

續碑傳集卷三十四

江陰繆荃孫纂錄

道光朝監司一

中議大夫兩淮都轉鹽運使廖公墓志銘

姚文川

道光四年正月十一日前兩淮都轉鹽運使廖公以疾卒於蜀之長壽其孫均走書京師以余爲夙知公者來乞文銘諸墓幽往歲予自粵東歸始識公於贛州後公來京師得朝夕繼見及余視學江蘇公方就養均官舍又因得數數見蓋予與公交二十餘年篤信仁厚今之古人也於法宜得銘故不敢辭公諱寅字亮工號復堂系出明初勳臣德慶侯後自侯次子官大理寺卿諱德有者實始徙蜀再傳至諱錠者又徙鄰水故公世爲四川鄰水人曾祖明命祖廷玉本生祖廷獻考能容世有隱德並以公貴

贈中議大夫蜀人稱敦行孝弟博通經籍門人私謚文懿先生者卽公之考也初無子禱於邑之華銀山始舉公公幼奉庭誥事父母能盡孝方就傅山寺中間父遘急疾星夜履層岡陟險阪以歸顛於神願以身代已而果瘳旣冠補弟子員家甚貧恃爲童子師自給會歲大禳邑斗

米千錢躬負米數十里外以養親足重繭肩肉潰裂後脫痂陰雨輒作
癢暮年猶袒以示子孫泣然流涕傷親之不及見其成立也乾隆己亥
舉本省

恩科鄉試力不能赴禮部前後十餘年僅一再至都而已蜀離京師數
千里貫匹馬以一子自隨艱苦跋涉世所未歷乙卯始以大挑一等分
河南試用初奉檄得南陽之葉縣會湖北教匪滋擾葉當往來之衝徵
發絡繹公供億無缺然未嘗重困民民賴之如父母也大吏善之檄赴
新野唐縣各行營綜理軍務葉民詣大帥環請得還公先是大名教匪
段文經滋事其逸犯劉之協久而未獲公於途次見二人繫馬樹傍語
刺刺不可辨其一人雙眉入鬢貌尤怪偉公密諭守城者物色之俄二
人緩轡入飲肆中有識者曰此劉之協也門者以告公卽令子思芳易
服前往與雜坐旁睨良久突起手持之斷其袴帶賊俯而繫帶遂就禽
並其黨亦被執事

聞

上嘉其能超擢知府

賜戴花翎

諭大吏卽送部引

見積年逋逆伏誅藁街此固由公之隨事精察亦平日得民之深故樂爲盡力如是公旣入京蒙

召對有

旨優獎荷文綺之

賜是年授江南鎮江知府鎮江爲漕運要道公以時挑濬又疏丹陽九曲河建插座慎宣勤洩以溉田濟運民享其利攝常鎮通兵備道尋眞授江西吉南贛兵備道兩地皆四方商賈所湊公關無苛暴人稱便贛郡壤接閩粵俗常患強悍公一以德柔之獄訟衰息會昌周達濱汪農望倡亂公設計搜捕悉置於法安遠大平堡餘孽復煽大府檄公會營懲辦公以上魏爲堡之大聚先口占三字歌曉以禍福選幹役張貼其黨與皆散去賊勢已孤公乃單騎往諭之耆民魏鋤經等禽首惡以獻事遂平歌詞文多不著是役也所全活無算厯權江西布政按察使嘉慶辛未升兩淮都轉鹽運使守己以廉恤商以仁嚴私販裕丁竈國用軍儲兩無匱乏在任三年直指阿公甚倚重焉後緣事被議鐫級上猶念前功准捐復道員而公自此遂不出云公篤於根本爲諸生時

有姊適開縣之關口坪往返計程而月聞其家無升斗儲公知二親甚亟親往迎之歸雖自處屢空不顧也性尤好施與既達凡親朋有一面識者有急必盡力周之公父嘗欲仿范文正義田法而未之逮公節縮祿入置廣惠義莊以成先志又建義學教遠中子弟之貧而嚮學者其在官時先後遇歲祲必親按戶振卹無俾一夫失所至如書院育嬰堂恤養老諸善政所至無不修舉故沒之日聞者皆為流涕學以朱子為宗著有詩文集藏於家公生於乾隆辛未四月十九日享年七十有四配邱氏閩德茂著子二長思芳江蘇候補道即前步隨公入都後手禽劉之協者也次思莊候選府同知孫十四人均嘉慶庚午舉人刑部貴州司郎中分巡江甯鹽法道圻嘉慶癸酉順天鄉試挑取謄錄館書議敘授河南布政司經歷次增培垣堦同會堪械埏塈壩堦堦皆業儒曾孫八人將以某月日奉公櫬歸葬於鄰水某山之原歸安姚文田為之銘曰

廖遷于蜀自明始文懿崛興振前軌篤生令德家益起奉職宣猷由百里楚氛蔓延蔽江涘羽書旁午無休止邑有父母眾咸喜保我四境歸安救巨姦竄逃久稽死縛之不異屠羊豕

帝旌其功

賜文綺游膺方面百度理懷柔商旅化姦宄桴鼓無驚樂耘耔移公再領鹽筴使丁寵阜安黠梟弭義田繼志法范氏誼敦任恤周桑梓公之名德在人耳雲祚流慶良未已吁嗟故土信稱美唯億斯年公宅此中憲大夫山東東昌府知府原品致仕前充沂曹濟兵備道軍功加一級熊君行狀包世臣

曾祖某

皇永康州學生員馳贈中憲大夫直隸大順廣兵備道

祖光遠

皇雍正乙卯鄉試副榜貢生贈中憲大夫直隸大順廣兵

備道

父恩紱

皇直隸大順廣兵備道 特贈太僕寺卿

廣西太平府永康州東城第一圖熊方受年六十四狀

君字介茲號夢庵其先世隸四川巴縣君之高祖遷永康為永康人三傳至太僕以進士起家備兵大名被逆賊段文經之難陽湖毛燧傳為碑銘論其功甚辨晰太僕舉三子君為冢嗣好學夙成下筆詡詡有生氣乾隆庚子領鄉薦庚戌成進士癸丑授檢討在詞館八年改刑部主事君少侍太僕宦遊歷府道署十餘年更吏事初至刑部主事即經

持議嘗諍於堂曰用法宜核情罪不當揣

上意爲高下益便吏胥以是不能得題缺計俸選授禮部員外郎入直軍機處題升郎中提調嘉慶辛未會試旋擢江西道監察御史不數月簡授山東兗沂曹濟兼黃河兵備道故事道員於士民赴訴者准提則爲屬吏所不快率皆違例轉發至批答詳稟率無所可否君一概絕去衡以事理詆詞始有獲伸者嘉慶十八年九月防河在工次聞曹縣之變未知虛實卽募士夫勇敢者二百名星馳赴難聲稱率弁兵五千人賊望風棄城分逃至縣境之扈家集李家莊范水坑蔡家大小樓各處屯集君以故得入城繕守具督兵勇搜剿先後敗賊目李克讓蔡五倫曹永貴蔡五言李克順李名揚之眾惟李克讓得逸餘悉就禽事聞奉

溫旨拜花翎之

賜仍議敘軍功加一級十九年調赴睢工督挑引河同官以卑約太甚忤使者并劾君奪職既竣事降一等開復二十年補東昌府知府山東自乾隆六十年

恩赦民欠之後至嘉慶八年清查州縣積虧至百二十萬巡撫承宣以

爲憂乃議視缺肥瘠歲提節省銀三十二萬兩歸司庫通力合作以六年彌補缺項其餘以津貼買補倉穀不敷者奏奉

俞允旣積數至百萬而上游不循成案非有力莫能邀撥補其暫署承宣者至有視事一二月而動撥數十萬州縣忿其不公繳解益懈至十四年彌補期滿而虧數反增至三百餘萬遂減節省之數爲歲十八萬兩具奏展限三年及十八年限又屆滿而虧數又增至五百餘萬時值曹滑軍需肆爲濫冒十九年

上命大學士駐東督查分別准駁計實虧總數六百餘萬而某人某任虧若干則奏交巡撫核實參辦二十年巡撫念虧數重大一出員名恐成大獄先將虧數較輕之四府三十餘員名開單補奏得

旨甚嚴切而事不能已乃議提冬羨彌補授意六府二州先造冊短報虧數以結前案冬羨者山東州縣一歲所需取給於漕餘之強名也其致規於本管也頗厚各府州願戀觀望莫能實舉其議者東昌所轄十州縣皆有漕君先事卽細核屬虧實數卻所規立程式除辦公必需之外盡提羨數以補舊缺及二十二年八府州冊齊各員虧數皆不至千重辟然惟東昌之冊得其實二十三年冬

恩旨赦免民欠查辦半載不能得要領承宣爲屬吏所愚遂照報部奏銷冊數將三次清查奏明之官虧和入民欠以八百餘萬具詳巡撫據以入奏

上察其朦混值巡撫身故遂除承宣名爲民而

命提刑會同新任承宣確查剔除由新任巡撫核奏計剔除已入清查舊虧之外又積新虧七十餘萬巡撫念新虧之法至嚴議以墊支墊解作抵有候補府者家世於巡撫爲恩門檄署濟南府印而續更提刑又其所能左右之者乃相倚以傾承宣濟南遂自定冊式札致十一府州照式造送彙呈巡撫君以關涉錢糧文案例皆由承宣核准呈巡撫以達大部從無首府彙呈之事不照行觸怒而巡撫以君爲詞館前輩遲疑未卽發濟南不及待遂於二十五年春初曠學政劾君巡撫恇懼亦續奏君迂緩不任事以原品致仕道光紀年君挈眷來揚州爲樂儀山長僑寓虹橋之西園旣蕭然無囊橐又老病兼至而戚友習受伙助者不能相諒修脯所入僅以供任卹薪米之需每於歲杪輟講出游以取給道光四年十二月十二日赴杭州五年正月七日返棹至嘉興卒於舟次公子接凶問匍伏奉移於揚州寓前僧院以圖歸櫬娶桂林陳氏

其祖諡文恭乾隆中爲大學士稱名臣父蘭生湖北荆宜施兵備道生
女子子二長孟嫻工詩而天次潤華適陳聚昌道光辛巳科舉人充
景山宮教習荆宜君之孫也君旣除陳恭人服以長洲韓氏爲繼室生
子一貴齡娶江都汪氏君通達治體其所欲舉事多切究有本末旣已
傷於哀樂衰羸善病氣怯未能稱其志常信筆爲詩文不起稿應人求
不自珍惜放失甚夥肱其篋名偶園草者尙有若干卷皆跌宕可觀采
偶園者君在都所居得孫退谷宅一角之舊名也貴齡侍君宦游年幼
未能詳君之行業余以嘉慶七年識君於鎮江後在蘇州在都下交益
善君任兗沂任東昌皆曾一過其署而山東復查民欠時余實客承宣
署司其事備知始末故掇其生平以告有道德能文章而與君交善者
徵信以託不朽焉道光五年春二月三日包世臣謹狀

循吏劉簾舫觀察傳

吳嘉賓

吾邑自

國朝起家守令者以百數今劉公簾舫先生爲著其前有江公名天泰
者令全椒未五旬被劾民訟直之不能得乃留奉養終其世惜未盡其
治能也李恭毅公自爲令至開府皆廉能有績望然居令守時其賢未

足以盡公故述之者亦鮮吾曾祖官秦晉所至民懷之秦人有江西四君子之目邑人經公舊治知其民有廟祀公至今者顧仕連蹇終於州牧其治績文字存者子孫謹藏之而已劉公名衡字蘊聲簾舫其號也榜名榕以副榜貢生教習官學秩滿爲令初任廣東之四會博羅新興等縣事丁艱服闋銓四川墊江縣調梁山再調巴縣由巴縣擢緜州進知保甯府遷成都府一年授河南開歸陳許兵備河務道數月以疾歸自公擢緜州至引疾前後不二年故公生平獨盡心於爲令以爲令尤異故達官以聞於

天子將峻用之而公得疾矣然公疾偏廢且十年神明知慮至老不衰蓋爲令未足盡公之才而天使之止於斯也公生平有異稟智能兼人而堪任勞苦之最下者故於事靡所畏避其爲令嘗語人曰官須自作而已凡有巡察必自行有聽納必自決有所循法奉職必自以意神明而變化之自初爲令卽不用司閹以杜壅塞久之益與民吏習盡知其疾苦情僞事乃益簡有所興作擇吏民之能者賢者任使之皆樂於從事莫敢有所欺官巴縣時巴號首劇訟者日恆十百至庭白役七千餘人公初至不敢盡出然籍者猶千餘人公至遣散之留經制十餘人曰

此固足用矣。署前茶肆爲訟者所集，一夕遽自撤去。公以其暇行保甲，備荒政，請廣學額，復其舊置義田、義塚，必贍眾。經久蓋公莅多事之區，如無事者。俾人皆奔走以奉公，令爲事嘗懸鉦，衙前民欲有所聞，自擊鉦以達，卽出爲之聽理。堂列長几，案牘出入分左右，置几上使主者自取之。有事於鄉計，所歷有民訟者，就近爲之取決。其緝盜許民自捕，賦役以期日召民自納。凡公所治邑皆如此。始受知尙書陳公若霖撫廣東，及尙書總督四川聞公至，喜曰：「此古循吏也。」繼侍郎戴公三錫爲總督，遂以名聞於

上。公年甫五十見

上，意將大用公。時公以疾請猶

命賞假調理。爲外臣四品，下異數。嗚呼！公之治行信於民而又獲

君如此，其視吾曾祖之遇，幸不幸何如也！願卒不獲如恭毅之顯，豈非

命歟！然公雖擢至方面，以爲令自喜。在官時摘律例若干條明

國家所以使吏畏法與使民畏吏，嘗並行不悖者。使吏人知所執，名曰

讀律心得。及自述爲治問答成帙，家居每以示故人子弟爲語。作外吏

治文書所以事上，接下舉善黜惡，能行其意而不違乎法。又道己居官

時事其年月地里姓名不遺纖悉與用意隱微曲折不自諱欲人得師而行之其所篤耆若此故其爲政之善異殆不可勝紀也公子弟皆貴顯余旣生同邑又與公子良駒今官給諫者爲姻戚故尤深知公之爲人古之君子求盡其道道不可徧盡也盡其位而已位之所當爲者亦不可畢盡其心而已若公之於令則所謂盡心者嗟乎使世之爲令者皆盡其心如公天下其有一夫之不獲也歟公歿數年蜀人粵人各請以公祀名宦予故謹次公治行爲之傳

書潘工部事

錢儀吉

凡百工之事之在官者輒爲姦利較久矣余友潘君吾亭往以工部營繕司主事兼料估所事吏以估冊呈君察其浮冒籤下數十處使吏造未幾吏弊覺逮刑部君與同官先後去職就訊刑部郎某君謂君之同官贓已承君必與之同考掠君僕蔡姓旣誣服而君終不承將請旨刑訊矣京師士大夫皆洵洵謂吾亭安有是軍機章京程職方春廬尤憤激謂正人能有幾欲鋤去之耶語頗聞一日軍機大臣奏事將退仁宗問外閒有何事耶近日有物議否大臣遂言其狀上曰是何言人各有操守卽同失察豈必同受贓耶卽

命禮部尚書盧公赴刑部訊其事初某君詰潘君曰子既知估冊之浮冒後又召吏欲杖責之而終不責何也潘君對曰是日召吏吏不至日夕余始出城謂掌印曰明日必杖責之不可恕掌印諾明日至署則吏已革役矣凡治吏革重於責且已革不復爲部吏惡能召而責之耶則又詰之曰凡治官事必有據汝亦部郎也當知之汝得贓有汝僕之供可據汝不得贓其據安在對曰憑虛誣人本無其事焉所得據某君怒譙訶不已退至請室獨坐浩歎一老獄卒勸君曰盍承諸承卽出矣君叱之吏曰吾好言之何叱爲前工部主事元某拘囚而月今日承明日出爾君曰事之有無不同何可比也吏笑曰君以元主事果有贓耶則曰元主事逮訊後稍久寓舍糧絕及獄之成何人以錢五十千與之而後出所謂贓者卽此耳君乃大駭而流涕曰身體髮膚受之父母何可以身嬰三木辱親哉雖然烈士殉名苟自誣如元君其孰能辨之吾其刑死可也會盧公至君對簿如前言盧公曰是也有事乃能見其據無則何據乎且掌印之革吏由於汝之必欲杖責此易明耳明日盧公復命有

旨潘恭常回工部任且

論曰潘恭常正氣可任用君之受知

兩朝始此某君官刑部積勞是歲京察將保列一等尙書錢唐吳公難之曰周興來俊臣豈可舉於

堯舜之世耶乃列二等後三年始得薦云君性剛正平居喜啁詭人或易之至論公事侃侃不阿龍江關監督以歲額不足請於它隘口分所收稅尙書蘇公楞額將許之君持不可最後爲一帖具列十年來收數贏絀卽兩年前猶有足額者今日不能足額是監督之不能也彼爲胥吏欺而部以之變法且近加賦何可爲也侍郎英公和遳君言事竟已南河自嘉慶中始定歲修銀若干萬兩至是東河援案以請君曰不定數卽欲浮冒道廳上下經營猶不易今與以定數則歲請部撥後但精造銷冊方價悉如例部何從詰之是縱之浮冒也蘇公曰今定歲例視前兩年用數不加多且有所限制部總其大綱事亦簡易君曰河工連年屢失事故用數多豈可爲例耶今徒欲部務簡易它日度支稍不繼使有所藉口及失事彼仍可專案以請豈終能簡易耶蘇公無以難然終不能用君言時論惜之君旣出獄工部之長始知君旋奉命提督兩窯廠不受例餽尙書禧公恩聞之未信謂君曰工程處大人

謂余昨所送琉璃瓦製造不如式今姑收用後當以爲戒君曰製造不如式工程處何可收也有誤

欽工咎將誰執大人幸語工程處速以前瓦還工部當更造禧公曰更造豈易言也且事已往子但諭工匠輩戒其後耳君曰此輩空言誥誡何足懲也且司官書生視瓦或不察但能號令工匠更造耳必更造乃可戒其後禧公曝爾而笑曰子休矣吾固知子之潔也君後官蘇松太倉兵備督治海運事竣

特賞加按察使銜巡撫保奏初無君名蓋

上亦知君前事將大用君而君以親老告養去尋卒於家君之歸也僑居嘉興君之子承華還本籍錢唐遇夷警避之武康山中數年亦卒余交君三十年心志相得念疇昔周旋歷歷在目而君父子俱殞其家消息亦久不得聞遺孫幼穉恐無有知君事者爲書其梗概以示同人

成方伯傳

劉淳

公諱世瑄字師薛夢蘭而生故小字蘭生性穎異四歲能誦唐詩百餘首及易卦書序八歲屬文贈公雅有深識不令就試年十六補弟子員顧芹芬學使特器之嘉慶癸酉拔萃登鄉舉入郭蘭石大理之門大理

負文學鉅望書爲一時宗工公仿之絕類大理對客常自歎弗如丁丑成進士改庶吉士散館授編修乞假歸省還都充

武英殿提調道光壬午分校順天秋闈乙酉京察記名以道府揀發浙江補湖州知府調杭州府兼署督糧道篆卓薦後丁父憂服闋入

見

特授甘肅甯夏府知府調署蘭州旋擢江安督糧道遷河南按察使再遷江甯布政使居三載以勞疾卒年僅五十有三未竟厥用時議僉惜之西南隅設行省久材賢日眾自今

天子御極黔士大夫膺

特達之知任封圻監司者蓋十數公予所聞花曉亭王香湖兩方伯翟雲莊廉訪本館中先進有公所身受業者至如張曉瞻中丞治豫滇朱蔭堂漕帥治淮陶子俊方伯治秦唐子方方伯治楚治秦隴宋芸皋廉訪治吳門但雲湖都轉治維揚王夢湘觀察治上海皆公角弁舊遊出入中外二十餘年心許爲骨肉兄弟者或有過舉雖遠在數千里外必手書規切謂吏持法務平不當殺無辜徇長官意一官何足惜聞者瞿然而公由詞林出守厯官四省所至以重慎寬簡爲治無纖介之瑕可

摘部民至今猶感誦勿忘嗚呼是誠所謂古大賢矣當

眷注之方隆而遽爲年命所促致方岳中少一良臣吾輩復冀聞仁人之言安可得哉始公計偕無資酤翁或餽之朱提比貴屬里人致二百金報之其人乾沒是金訟之邑適公假歸乃別出金遺酤翁而止其訟亦不問乾沒者其天性純厚若此歟曹太傅嘗屬以後事蓋有獨見云公生子二長者先亡孫二人

賜進士及第四品京堂前雲南按察使司棣華吳公墓志銘

朱翥

棣華吳公旣歿之明年孤思樹等來徵幽竊之文憶昔成進士故事臚傳前一日進

呈十卷君褒然居首余隨後塵於

宮門外相識嗣官翰林晚歲聚吳閩聯締倍洽曷敢辭按狀公姓吳氏諱廷琛字震南棣華其號隸籍蘇之元和溯明成化間始祖閒可公爲泰伯九十四世孫遞傳至公會祖諱仁昭歲貢生曾祖妣汪祖諱士楷考諱文燦俱太學生祖妣王妣章竝以

覃恩贈如例君同氣四人行爲季髫齡資穎疑有宿慧乾隆戊申年十六初應縣試壓其曹時山右康茂園廉訪校合郡儒童奇賞君因字以

弟之女未婚也壬子舉於鄉癸丑禮闈後始結褵踰數科嘗讀書西山
益自淬厲嘉慶壬戌遂魁南宮比

廷對復擢狀頭故

御製詩有雙元獨冠三吳彥之句蓋

本朝來似此者先祇得九逮君乃盈十而

天題榮寵則曩所未有也甲子典試湖南旋督學君雖授職尙與庶常
同教習驟秉英蕩稱異數乙丑按各部躬親披閱屏絕弊竇丙寅春丁
丙艱回里戊辰服闋北上己巳甫散館適逢京察膺上考庚午夏出守
浙中補金華府金華號學道鄉君追緬賢哲訪民瘼銳志興革新

文廟創育嬰堂城外雙溪橋久毀亂以舟水漲多覆溺修建費鉅議每
中輟君至勸諭匄資眾服治行捐輸全集工竟成名曰通濟人無病涉
焉臨婺六載善舉率類是丙子量移杭州聞永康東陽諸邑旱急往巡
視鄰氓遮道迎送幾數萬杭省垣要區他郡讞訟咸取裁定君綜覈名
實匙或徧徇大府惟黃梅帥仙舟師契合師固海內傾慕者餘亦倂倂
自將歷監司守常不變噫世俗喜脂韋仕途彌甚往往明知而暗誦桔
棹俯仰冀邀薦牘風軌如君殆空谷足音矣道光壬午遷直隸清河道

兼護臬篆畿輔京控案若緇絲君按日鞫訊夜繕奏稿至三鼓勿休詰旦詣轅連平顏惺甫制軍極推許據詞入告卽蒙

俞允終君任未干部駁歲杪

簡授雲南按察使滇省僻遠折獄疏略君嚴加整飭罪必當情有宜良江川通海三縣民家被盜宰諱爲竊民具控君慎選屬吏赴勘并戒以儻稍袒庇乃從并救人迨偵確果係盜劫上之督撫頗猶豫君力爭爰劾罷三令而議守望巡防之法盜風衰息乙酉權藩篆知銅庫虧乏由廠員半償私債徹底清釐覆盡發逕詳定勒限追繳一月後東西兩道報各廠豐收銅政大起丙戌九月

內召以四品京堂用君宦情本澹念年近周甲距家萬里而地高風烈頻患嗽疾藉是賦閒可假還調治丁亥秋引疾荷

恩準遽歸歸數年優游養疴雅不欲出山然振荒歉築郡城肩任無少諉與伯兄鑑庵太常夙友愛太常八旬有奇猶健雖異宅過從靡閒仲叔早世善撫遺孤復偕太常立支祠俾高曾下子孫會祀其餘賙族濟窮事繁不備紀紀其大者生平不屑肩章句而經典通貫文章道雋詩感時論事宗法杜陵身處林泉繫懷魏闕但素惡炫名中年以前概勿

著錄至是始訂歸田集若干卷君卒於道光甲辰九月初三日距生乾隆癸巳二月十八日年七十有二嗚呼自君之歸也蘇臺方結問梅詩社余暨君廟其閒詠觴甚樂無何石琢堂前輩韓桂舫司寇彭葦閒太守尤春帆舍人先後物故所仰者唯君而君又棄余去且壬戌同歲生數愈寥落東南之地獨區區勉偷視息迴首陶文毅公撫吳繪小滄浪七友圖時空勞夢想君少余四歲余乃爲君誌墓存歿之感烏能不悄焉而悲慨焉而歎也君元配康淑人越二年卽卒未有子章太夫人命太常第三子承嗣卽思樹也舉乙酉科鄉試爲粵東樂昌令調署香山庚子暎夷犯順香山當要衝君馳諭曰食祿宜效忠幸退賊固佳萬一不測若瑟縮偷生非吾子也思樹得書振奮竭力堵禦城獲全君之持大義如此繼配陶淑人卒於杭署生子三毓英金鑑毓華筵李氏生子二毓蕃毓幹趙氏生子一毓滋孫十八曾孫二道光二十五年九月初二日葬元邑廿九都六圖續字圩揚賢橋之舊塋銘曰

敦品則懿勤學則粹宜掇巍科

九重嘉獎目爲名榜傳徧玉珂剖符守正陳臬式敬無敢依阿吏民咸服爭迂行轂導之以和戒諱凶盜戒肆侵冒嚴而不苛請解簪綬樂處

巖數未竟厥施文譽不顯藝林冠冕永維世儀伉儷同宅勒此貞石千

秋弗窮

兩淮都轉鹽運使婺源王君墓表

魏源

士用世於三代以後難於三代以前者有二兵刑農賦不名一方不專一職猝然取之而必應更試爲之而不恆又南朔東西惟朝廷所命俗不暇漸習任不及久遠視三代以上之各仕其國終身一官者難易相百而

國家以此馭天下士未嘗不聞收其效則恃士有誠求疊斐之心力以貫於綱紀節目之間隨其大小各有以自見縱專精不及古人而心力則視古猶倍之今

天子御極以來江浙知名吏以平羅俞君婺源王君稱最二君皆任兩淮鹽運使大吏方藉其力以自翼而相先後卒上下重有愴焉故旣爲俞君銘其幽而王君之子復求表其墓按狀君諱鳳生號竹嶼安徽婺源籍父友亮始僑寓江甯君少治舉子業屢試不第嘉慶十年援例以通判試用浙江二十有五年補嘉興府通判君在浙江日久屢署知縣事所在有聲所著保甲事宜冊浙閩總督汪公志伊刊爲程式其令蘭

溪僅數月清積案七百餘事其令平湖民有數百戶誦經茹素傳授邪
教者時江南奸民方榮升以傳教與大獄在事者咸受上賞故浙吏亦
思以爲功君閱其愚惑株連無辜爲開諭利害飲以羊酒感泣自悔止
拘爲首數人科以軍流罪以白巡撫清安泰公公揖謝之大失同官望
適道光元年

天子用刑部侍郎帥公來撫浙兼轄嵯政又有清查通省倉庫之議方
難其人與君語大說遂奏君總司其事奏署知嘉興府明年又擬奏署
知杭州府君力辭不就是冬升玉環廳同知會杭嘉湖三府苦雨告潦
議大濬浙西水利以浙西之水尾閘於吳淞實在江蘇境乃會奏兩省
合辦而調君乍浦同知專治浙水與江蘇道員勘議君由天目湖州嘉
興沿太湖以達松江所至繪圖具說帥公故負重望知人善任能盡君
所長故君政聲亦自帥公至始大著四年方計費興工而帥公以憂去
是冬淮南大風高堰潰決兩江總督魏公元煜河督嚴公烜合奏調君
南河同知而浙閩總督趙公慎畛亦密保君才堪大用於是五年抵工
三月即擢知河南歸德府時永城旱蝗君齋宿禱廟果雨率屬捕蝗尤
力民以不災又請於巡撫濬虞城夏邑永城之惠民溝減水溝巴清河

沈公隄等處以資蓄泄九月復擢河北彰衛懷道河北屬有五廳歲修險工糜費巨萬道員多深居簡出不時駐工春秋防汛虛應故事君事必躬親細而放淤抽溝屏水大而搶險下掃箱墊走溜皆親率廳營監莅又以歲修有定例而另案無定例在任三年力刪另案請挑之工惟原武陽武延津之文若天然二渠封邱之四渠其議挑未興者安陽之廣潤渠並原河故道而已旋以疾乞歸家居二載用兩江總督大學士蔣公薦起復原官入都蒙

召見卽

命升署兩淮鹽運使時道光九年三月也以淮鹺極敝銳意整飭條陳十八事如收竈鹽節浮費濬河道增屯船緝場私鄰私之出入禁江船漕船之夾帶以及清查庫款督運淮非事皆可行惟求免帑利而反借藩庫道庫銀三百萬則事所必不可行者故蔣公半允半不允方疏入待施行而黃玉林之事起黃玉林者儀徵私梟也以遣犯私逃回籍君計招其出首請於蔣公奏許隨營緝私贖罪而無識妄議者或謂兩淮從此永無私梟或又謂將釀東南大患顧玉林實無能爲皆州縣吏張大其勢蔣公慮其叵測提至江甯獄科以軍流罪旋得玉林所寄其黨

私書意存反復密奏請處以重法

上以前後歧議嚴譴蔣公而君及鹽政福森亦均降調以去而陶公澍適奉總督兩江之

命朝廷又特遣戶部尙書王公鼎侍郎寶公興來江查辦合奏留君襄
鹺事踰月而議定始裁鹽政歸總督兼轄大裁浮費略與君前策相出
入旋又奏以君往查湖廣銷引情形及勘議淮北改票事宜故君卸任
而仍與鹺事終始道光十二年湖北大潦湖督盧公坤奏調赴楚總辦
隄工君歸自淮北卽赴楚時江隄則有武昌之江夏蒲圻咸甯嘉魚荆
州之江陵公安松滋監利黃州之廣濟黃梅漢隄則有漢陽之漢川沔
陽安陸之鍾祥天門京山潛江表互千里同時告災君策緩急陳利害
往返跋涉半載告竣會是秋蛟水復驟至新隄完潰各半盧公以天災
非人力所及仍請以道員留楚補用奉

旨送部引見君終引咎不安力乞疾歸明年浙江海塘役興侍郎趙公
盛奎及原任河督嚴公烜皆馳書促往君辭不赴而淮北票鹽大暢陶
公以君首議功奏聞且促君出山咨部報痊行有日矣而病復作十四
年夏四月君疾寢劇乃復請假而竟不起年五十有九君平生仕以爲

學尤篤好圖志其在浙江奉勸災潦則成浙西水利圖說備考在河工則檄取所屬府州縣地圖各系以利病成河北采風錄及江淮河運各圖其在湖北則有漢江紀程及江漢宣防備考其在兩淮亦有淮南北場河運鹽走私道路之圖每吏一方必能指畫其方之形勢與所宜興革若將寢饋而旋去之所至倥偬講求日不暇給左手畫圖右手畫方故士見用於三代後蓋難矣四方大吏以才難之故相爭奏調倚君若左右手刑名漕賦水利鹺政若風雨總至君朝南暮北席不暇煖所試或效或不效無一竟其用故無專長特績可頌當時傳後世而近日海內談實用之學必首推重君則其誠求之心齟齬之力足以孚下而信上士所遇大遂不大遂固自有命焉豈以是加損哉所著書未刊者尙有詩集若干卷學治體行錄若干卷其未成書有讀史彙說若干卷攷攷矻矻導原植根推而放之充如也妻前葉後邱皆

封淑人子二世翰世女四以某年月日葬某原梅郎中曾亮己爲志銘林中丞則徐書丹故予表其墓特揭君學行志事之大者於阡禮儒行有曰雖危起居竟信其志猶將不忘百姓之病也君之謂哉君之謂哉

哉

王藝齋家傳

梅曾亮

王公家相字藝齋常熟人祖承錫考庭芝公始以拔貢生官蕭縣教諭檄查水災時奉檄者多擇居高叩地而里正集災民就書冊刻冒爲姦公冒水親履其戶驗口數真僞上官賢之有災必檄公公後自京師歸過徐人皆識之曰此前敎官活我者也嘉慶四年成進士官編修遷御史遂具疏陳災振弊又以漕事之弊始於京倉之胥吏而遞歸其害於農其言絕深痛而是時有議漕事者以州縣浮收無定制請定令每石加米二斗民不大病而官亦有以贍運丁公曰州縣之取民雖橫然猶有所忌以非朝廷法令也今著令定爲加二則正供矣使加二之後能禁其不再加則前之浮收何以不能禁苟不能禁而先以正供之名掩其浮收之數以便其異日之再加是助官病民也上疏數千言論之時今上新登極是公言前議遂息以戶科給事中授河南南汝光道屢署按察使事地故多紅鬍捻匪爲民害讞以戍邊者百二十人以引疾歸於里少以文學鳴有茗香堂集十六卷服官後乃一以國計民事爲念奏議及與人書言鹽河事皆窮極情弊而議加米疏尤稱頌於時子三人憲正憲成憲中憲成進士官刑部主事

梅曾亮曰道光初來京師聞公上疏事然未一見旋遷擢且外任

聖主之遠利而褒忠言可謂至矣今執筆爲公傳追思與友人持讀公疏立倦而紙不得窮俯仰間忽三十年公固賢矣而受盡言之時亦豈易得者哉

屠之申傳

畿輔通志

屠之申字可如號舒齋湖北孝感縣人嘉慶末授大名道大名兵燹後人民離散之申捐設粥廠二十七所晝夜經畫民困以甦道光元年由甘肅布政使調直隸

召見時

上曰汝在甘肅辦事好故調此請疏濬冀州衡水等處瀦潦以利民田因事革職復起爲清河道升布政使護理督篆初直隸附京五百里內外多係老圈旗地年久隱匿牽混控贖山積而歲徵銀五十餘萬兩充賞兵丁其額日絀之申奏設局清查分別管業又酌改順屬四路弁兵歸營訓練州縣增添捕役俾兵自爲兵捕自爲捕以專責成又口外熱河七廳州縣蒙民雜處事權不一之申請仿照甘肅鎮迪道之例悉歸熱河道勘轉都統分別題奏核咨以歸一律均得

旨施行未幾告歸

俞都轉傳

姚瑩

俞德淵字陶泉甘肅平羅人嘉慶丁丑進士由庶吉士改授江蘇荆溪令有聲林公則徐賀公長齡咸重之調長洲縣甚得民心遷蘇州府督糧同知道光八年海運告竣以巡撫陶公澍奏擢知常州府調江甯會兩淮鹽法大壞庫貯久虛十年冬

上命尙書王公鼎侍郎寶公興至江南與總督議改鹽法先是陶公爲巡撫稔知兩淮積弊嘗極論之

上頗有意興革召還總督蔣公遂以陶公代

欽差大臣議多主罷官商鹽歸場竈科稅以德淵有心計使與議事德淵上言曰日者所議鹽歸場竈其法有三一曰歸竈丁以按餉起科蓋沿海草場四萬餘頃給丁割草煎鹽已按畝征收折價今正雜引課勢不能再取於地祇當取之於鹽惟論鹽必計斤而各場煎丁零星散處日煎日賣用力勤惰不同獲鹽多寡自異不能計斤定課明矣無已則征之於餉通泰二十場額餉三萬五千餘口每口歲煎鹽三四萬斤以引課加鹽價每餉當輸銀一百五十兩共銀三百七十餘萬兩而淮南

引課可足竈丁既按繳認課則鹽卽已物聽其售與何人無論遠近商民隨貨販賣出場後不問所之腳費外別無浮費人自樂趨鹽價自賤且使小民任意營生何官何私行所無事此真曠然無忌之善政也然其中難行者有三焉一在竈丁之逋欠一在繳鑊之私煎一在災稔之藉口竈丁皆濱海窮民蓬栖露處身無完衣平日煎鹽所得不過傭資餬口今忽責以百餘金之課按月限完恐貧人驟得多錢未經入官錢已他用至期甘受追比追比過嚴逃亡立待勢必設立頭長承總包納若輩均係同類容隱分肥一官何能遍察至於煎鹽用繳由官給領私鑄有禁立法本嚴闡近時各場私繳之數與官繳等一經官查則埋擲草土之中官去而私煎如故今既計繳征課則官繳之鹽課入倍於鹽本其私繳之鹽轉得賤售以奪官鹽之利卽納課之丁亦將添置私繳隱射逃課且不獨繳而已凡炊飯之鍋鑊無不可煎鹽現行例中有所謂鑊子鹽者卽鍋煎也此而不禁則大海之潮取之不竭勢必爛賤堆積竈病而課可憂禁之則海濱遼闊官外之私既百計藏匿官中之私復影射多方此又不能一概禁絕者也又聞場竈煎鹽必賴天時積潦之年海潮泛溢各竈卽有尙消之患再值洪湖盛漲五壩全開則各場

卽有浸沒之虞向者竈戶值陰雨久卽赴場商借貸錢米天晴煎鹽扣
還前後套欠既多往往有逃亡者如成災稍重場商必多方捐賑所以
有鹽義倉之設也然皆商捐官不過問今以課歸丁稍遇水旱不齊必
藉口求蠲求緩往時蕩課不過數萬節年以來因災減免者不可勝數
況數百年之引課何能禁其籲求不爲緩課必且求借口糧
國家一視同仁豈能不加撫卹更恐各場因災停煎竈丁素無積貯而
各省價必驟昂此又不可不預籌也二曰歸官場以給單收稅照各場
產額攤定每斤課銀若干由運司給發用印空單存貯場大使所無論
商民買鹽先赴場官報明斤數納課請填印單赴竈買鹽出場後另於
要隘委員查驗鹽單相符卽截角放行不論何省何地聽其運售場官
給單後登載印簿知會委員其委員亦截角後知照場官核簿以防偷
漏各場所收課銀按月解交運庫如此商課改爲稅課場官作爲稅官
人人可以賣鹽卽平日販私之徒一經納課任意所適此亦蕩然維新
之善政也然其難行亦有三焉一在額數之難定一在稽察之難周一
在官吏之難恃兩淮各場照引定課如伍祐場產鹽二十餘萬引應征
課銀六十餘萬兩等而下之如梁垛場產鹽七萬餘引亦應征銀二十

餘萬兩今就場抽稅不限以額則聽其儘征儘解烏知歲收果有若干
若試行之初卽責以一定之額則每場應收銀數十萬兩場官守單待
請畢竟一月發單幾何毫無把握且水次有遠近鹽色有高低儻鹽高
路近羣趨歸之而僻遠之場竟售者無幾場官無計招之使來此額數
之難定也至請單之法原以杜私而人情貪利雖小必爭兩淮鹽價斤
止數文而納稅倍於鹽本逃干引之課卽省銀數千難保鹽販不串通
竈戶私相交易或藉單影射以數百斤之稅冒運數千萬斤之鹽卽有
委員查驗而場地千里港汊支河無處不可越行雖多派巡役查緝而
若輩惟知營私苟啖以利何難爲所欲爲此稽察之難周也或謂就井
抽稅滇省行之矣何獨不行於兩淮顧聞滇鹽產於井地有定所難以
私增其地近而易查一井官可守也淮鹽煎於鍤晒以池鍤則隨時可
增池則隨地可開其勢渙而無紀一場官不可守也烏得以滇鹽爲例
乎江蘇財賦重地至大州縣不過十萬卽如淮許各關臨以監督重任
每年抽稅亦不過三四十萬今以一場大使而責以數十萬之稅課官
卑任重負荷難勝況場署皆近海濱無城郭之衛營汛之防起解收藏
均多可慮此又官吏之未可盡恃者也三曰歸場商以認鍤納課招徠

殷實之戶報充垣商聽於某場認繳若干口完課銀若干兩竈戶煎鹽
即歸本商場垣堆貯經理出賣酌給竈丁工本其販鹽者從垣交易應
售價值亦官爲酌定毋許擡價居奇秤桶遵制由運司較准頒發所有
垣商認充須殷實五家互保完課立定卯限赴場大使衙門報納至每
歲銷鹽若干由垣商自爲營運官不與聞而赴場買鹽仍不問其何人
出場售鹽亦不問其何地以商領竈而事有所統以課歸商而責無旁
貸此亦寓散於整隨時變通之良法也然其難行者亦有三焉一在疲
商之鑽充一在殷戶之規避一在垣外之私售通泰各屬場商多借本
營運近者日形疲乏因負欠多欲退無路今聞招商認課必且營謀投
充聯名互保祇圖孤注一擲將來完課有無姑置度外迨至卯期則設
法騰挪國課必多貽誤使大加裁汰另招新商則四方好事之徒如游
士幕客官商長隨皆得應募而來並廣求當路致書爲赤手成家之計
此輩一經得路以後驅除更難此場商之難於選擇也如謂各省殷戶
原不乏人貪夫趨利若鶩宜有不招自至者惟事當變法之初非常之
原黎民所懼彼富厚之家心計素工兢兢保守安肯挾重貲而謀不可
知之利縱日後不無垂涎而事前必多觀望此殷戶之未易招徠也必

不得已則仍謀之於商無論在場在揚第就平素業鹽之人擇殷厚者
僉爲垣商認繳納課而疲乏者一概裁除庶可收得人之效惟此法施
之商埠商繳則順而易行之竈埠竈繳則逆而難蓋商埠商繳商產也
竈埠竈繳竈產也以竈戶自置之產而一旦屬之商人無異掠貧民之
業使富民代爲管領以世業而變爲佃農孰甘心焉況商之殷厚者其
經理多委之商夥商廝此輩專以剝削爲能借貸則要以重息秤收則
勒以重斤竈既積怨於商必與民販勾通盜賣其勢然也況垣中有課
之鹽價數倍於竈上私販亦必舍垣而趨竈鹽不歸垣課何從出則恤
竈杜私之法又不可不深長思矣以上三法共有九難姑就三者兼權
之則招商認繳一條猶爲彼善於此苟得其人講求盡善或可徐觀厥
成顧事難圖始果欲行之則宜先定章程清竈僉商改官易制諸事非
行之三年不能羸立規模此一二年中課額未可以常懸也場鹽未可
以停售也各岸食鹽未可以久缺也然則新舊接替之時非熟思審處
其何能變通以盡利乎至兩淮捆鹽之夫淮北則永豐壩向萬餘人淮
南則老虎涇不下數萬人皆無賴游民以此爲業百餘年來世代衣食
於此一旦失業此數萬眾安往其患又不止於私梟拒捕而已議上陶

公深然之乃與王賈二公定計不歸場竈仍用官商如故惟奏罷鹽政裁浮費減窩價凡積弊病鹽者悉除之淮北課少又無商改行票鹽章程初改運使難其選陶公舉德淵以知府超授兩淮鹽運使在任五年正課無缺運庫遂充德淵風裁嚴峻植身儉約雖登臚仕妻子常布素揚州俗尙華侈德淵乘歲數荒歉諸商疲乏之後力崇樸實黜浮靡風俗一變郡中至無優劇既善會計又知人能任諸滯岸商憚往運輒遣官代之千里行鹽稽覈價用瑣屑悉當每運恆有盈利盡以充庫無私取故人憚其明而服其公身為陶公薦舉而持法無所阿當塗黃左田尙書家居有子中民在淮候補鹽大使陶公以黃清貧屬德淵予中民優差德淵曰優差以待有功中民無功不可得公曰吾已許之矣德淵曰以德淵辭可也堅不予公乃使中民之蕪湖緝私便省視焉其他事多此類陶公益重之林公則徐於時人少所推許獨於德淵曰體用兼賅表裏如一十五年冬陶公入

覲數稱德淵賢謂其才可大用以地方循良久在鹽官可惜

上亦嘉之將晉用而德淵病卒荆溪長洲江甯士民間者咸爲流涕相與請祀之名宦兩淮鹽政及運使素有豐稱多以財交結權貴人與四

方遊客以其餘贍給寒士取聲譽皆商資也嘉慶中某爲鹽政極意揮霍一時白食之徒競求貴人一紙書卽千金可得奔走若狂恬不爲恥風俗人心大壞自陶公力裁浮費潔己恤商德淵復謹守筭鑰寡酬應雖商力漸充庫貯常足而失望者眾揚人尤以爲怨言者亦時相攻訐矣

中憲大夫湖北糧儲道林君墓表

邵懿辰

道光中語賢相必首襄平蔣公所推轂天下賢人士甚眾瑞安林君其一也君諱培厚字敏齋先世自閩遷於浙爲溫之瑞安人年十五入學第一後屢試皆第一而獨艱於鄉舉凡十二試乃得舉至嘉慶十三年成進士入翰林年四十五矣又八年出知重慶府囑匪帶刀異常製籍境中鍛者若干家禁毋製賣有犯則坐沿江渡船爲盜資籍而稽其出入刻姓名船側盜爲衰止民好習天主教搜其書數十種盡批抉其繆妄多悔悟自改攝川東道所屬雷波廳民夷忿爭或覲邀功請發兵君不應立縛治其魁餘悉貸遣所全活甚眾以是受知於川督蔣公嘗奏稱君明幹實心又與人書稱蜀良吏惟君與楊太守世英耳母憂歸服除起知天津府時蔣公徙爲直督畿輔大水百二十州縣被澇災津地

窪下害尤劇君徧行屬縣振活飢民七十七萬有奇他屬民流轉入京師就食係藉棲流所列郡多有獨無津屬一人奉天臺灣商米先後抵海口議以官錢收買君委曲劑量商民交利而官不費曾有

詔督撫特保屬吏之賢者蔣公舉君等五人贖上不旬日擢大順廣兵備道畿南澇後大興修水利先在天津治淀河至大名治新衛河洛河等浚築悉中程度先是君數語蔣公時事利病屬吏賢不肖布政使屠之申心害之有所徵求又不輒應重嘆君蔣公入相那文毅代爲總督乃構君於那公坐河北旱荒施振不如法劾君撤任另補已而那公獨悔深諭君而

上亦夙知君不如所請令來京引

見改授湖北糧儲道河患淺漕舟數阻蔣公以大學士出督兩江期八省漕首夏畢渡黃河乘清水盛漲浮渡過利爲嘉慶以來數十年所未有君所部尤速達蔣公特奏給恩敘焉三運無誤例進官

上意亦嚮用而君竟以積勞卒於通州行次道光十年九月八日也年六十有七先後娶皆薛氏無子以兄子棫爲君後方

先皇帝初年銳意求治一時賢能布滿朝列在內如汪文端松文清王文恪在外督撫如趙慎畛阮元陶澍帥承瀛程含章朱桂楨姚祖同黎世序諸公皆名德重望所至留意人才而蔣公尤表裏洞達好激揚善類其所稱引立擢起大位與君同舉者鄧廷楨阿勒清阿璧昌後皆至尙書總督其他不可勝數而君被公知尤深數數稱譽願不獲竟其用而位屈於監司是固君之命也蔣公旣以伉直不得久居中君卒之歲亦以事去位自後在位者率不能如數公之用心老成祖謝興賢之意衰人才益不古若而吏治日以荒矣君卒逾二十年所繼兄子杖之長子句容縣丞用光始克葬君於平陽縣三都象巖山之麓句其同官震澤張履爲墓誌而復以狀走京師求爲之表乃質言爲治大略所以受知於蔣公者且致盛衰今昔之思若其餘行世系生卒之詳張君悉譜之矣茲不具咸豐二年十月仁和邵某表

按察使銜陝西鳳邠道查公神道碑

包世臣

道光辛丑九月十三日前陝西鳳邠道加按察使銜查公卒於白門僑第其孤同知銜江蘇卽補通判德基候選布政使司經歷德本卜吉於城東武岡山麓以癸卯某月某日舉葬旣蕝事涕泣來告曰先大夫生

平相知之深無如表叔當世任斯文之重一言不苟下可以信今傳後亦無如表叔今窀穸已安而墓表闕如敢以請按公於先母氏爲族子里居相距僅二十里嘉慶甲戌相識都下論議如笙磬相得之歡親弗中無與比者雖衰頽不文固無以辭爰述予所習知而確鑿有據爲天下共聞見者編次之以授德基使刻貞石於墓道以告後來曰公少小孤露羣從莫相恤不能卒儒業乾隆己酉甫弱冠徒步五千里入閩投所親旣至則無可弛擔者寄逆旅傭書以就口食好問好察漸通曉時世事以書記游小吏署數年爲福州將軍魁倫所知延入幕府爲腹心之友乙卯閩中大獄自浙起

上悉逮諸大吏而以魁公署督事主其獄閩中州縣少自然之入厯任大吏責供張無藝縱所屬羅織大戶勒鉅賄民不堪命是獄旣結正貪酷之吏悉伏辜其風遂息閩民始有生人之樂矣大吏繼者爭客公復贖金按例以通判留閩嘉慶己巳鉅盜蔡牽戮於海當路歸籌策功於公拜五品頂戴及花翎之

賜牽平後南洋惟朱渥爲猾賊欲歸誠而無可託命者公旣得要領隻身至舶上見其男婦諭以禍福遂受降而返洋氛靖以至今壬申署臺

灣淡水同知下車卽訪獲妖言惑眾之高媽達訊得劉林祝現定以次
年閏八月望在都舉事四方起應之情通詳請奏劉林者林清別名也
上游以其語不經僅照尋常傳教例論決及癸酉十月臺灣聞都中九
月十五之事而高逆伏法後其黨已解散竟得不起假疆吏據實入
告先事撲捕何至噍血

闕廷毒流三輔哉其甚者癸酉九月十四日蘆溝橋巡檢飛報祝現等
奉林清命定十五日午時進

宮滋事黨羽本日已入城而兼尹尙書並不部署防衛唯以事宜委婉
勸諭不可冒昧聲張釀巨變爲批答又前此陳德之變雖

睿廟至仁包荒然其事卒疑不能明及癸酉八月代理山東金鄉縣吳
堦捕獲逆目崔士俊究出嘉慶八年陳德偕祝現林清至崔士俊家住
一月趕車者爲支進才始知陳德本林清逆黨並無別故而東撫以事
屬旣往刪不入奏使陳逆疑團至今莫釋近世大吏遇小民茹素祈福
者莫不張大其詞以銜能邀功至於防微杜患別嫌疑機括攸關至鉅
者則慮其別無證據事難收拾置不問以貽伊戚比比然矣甲戌公當
以道員謁選乃去閩需次都下丁丑選河南南汝光道己卯恭值

壽廟六旬萬壽普施惠澤免民間積逋河南例有幫河工料價攤徵民間逋數甚鉅又山東以竄入官虧奉

嚴旨河南因惶惑不敢發時公以攝臬在省力持損上益下之義疆吏夙重公卒用其議雖不盡如指而案得照覆實惠及民爲十八省之冠老教頭劉松之緣坐子逃遣劉文煥數十年海捕無獲公偵知其傳教於安徽之宿州委員往捕解豫訊辦未定讞而公奉太淑人諱去官然邪教根株至此遂淨盡道光壬午服闋謁選得陝西鳳邠道乙酉逆裔張格爾擾新疆南路調主嘉峪關軍需局事自川楚軍興費帑累大萬與軍事者莫不饒沃將吏習川楚之故支銷多重複公不避嫌怨核實應付大兵出關時僉謂當雇長馬駝送軍裝公以內地馬不習關外寒苦必多倒斃且關外臺站皆有伺應關內長雇到彼適用唯增餽養費開銷重沓不便議者無以屈節帑至二百餘萬兩事覈敘功加按察使銜公在監司任內攝豫臬者一攝秦臬者三凡案有疑竇皆於初詳指駁使屬吏得研審更正招解後無復翻異以故得依限完結官民胥免拖累焉乙未公年六十有八懸車遂初本籍故無田宅卜居白門青溪之側計公幕閩二十年官閩十年官豫三年官秦十二年先後決大疑

捍大患飭官方以甦民氣靖伏莽以奠民生皆持大體不事聲色然初
爲丞倅卽係理民劇任洎當刑名總匯地雖能者苦叢脞而公卒未嘗
以公事望纖芥吏議其謹細慎微檢點周至又有如此者公幼歷艱辛
未得博涉書史出門同人始乘暇隙親羣籍而吐屬爾雅翰札雋妙館
閣諸公罕能及者從前爲諸侯客雖被信任專而且久然因人成事豈
能盡如我意及任監司攝提刑又事事須關白取進止若以公之才識
聞歷獨當一面則功業可以廣暨而限於資格又所居已僻莫能爲推
挽者故所就遂止於是然被其澤者歌詠慈祥聞其風者企仰俊傑吾
鄉先達有趙先生青藜以編修改官御史勿欺而犯權貴側目能不負
所學葉先生居仁以進士官廣東知縣清操自厲誠格幽明惟公通人
情達事變與趙葉兩先生前後鼎立爲吾鄉之偉人矣公安徽涇縣人
諱崇華字九峯晚號貫庵年七十有四

通議大夫原任貴州按察使昆陽李公行狀

王贈芳

公諱文耕字心田別字復齋姓李氏洪武初有諱慶者由浙之蘭谿從
沐武靖王入滇以軍功世襲百戶遂爲昆陽州人十數傳至三辰公以
廬江訓導死流寇難入祠靖忠其子澄以孝聞世稱孝穆先生長洲韓

纂廬宗伯爲之傳山獮劫官舍官以民變集兵將殲之獨迎官兵抗言
郡賴以全歿祠孝義公高祖也會祖從綱康熙丙子舉人爲黔貴定令
有惠政民爲立祠祖改乾隆丙辰舉人事庶母孝舉鄉飲大賓父頤學
乾隆壬午舉人以公貴三世皆

贈通議大夫妣朱淑人孝事舅姑訓子以義方公會屬贈芳表其墓公
幼刻苦承家學得張南軒義利辨陸清獻公三魚堂文集及朱子古文
讀本蚤夜服膺遂終身奉之年十七府試第一院試前一日聞父疾劇
促歸越一日父沒哀號逾常治喪循朱子家禮不作佛事父以酒致疾
遂終身不飲酒喪畢州府院試皆第一家貧以授徒養母甘旨不缺母
耳後痰核膿潰吮去之而愈太淑人樂爲善事喜施子必勉力爲之以
博其歡李氏居昆陽舊無譜乃創爲之又倡建宗祠及州之文峯塔鎮
海閣朝天閣玉帶隄以乾隆乙酉舉於鄉壬戌成進士以知縣用分發
山東假歸養母仍授徒以給時太淑人抱羸疾食飲湯藥必手調以進
夜分恆隅坐寢側疾愈乃已鄰邑易門請爲山長且備安輿以迎太淑
人公曰安有以山長而勞母遠行者卒不赴丙寅太淑人疾劇呼之曰
我疾不起爾終身將若何公涕泣對曰幸聞母教知爲善樂此生出處

誓終求有以對母者太淑人領之而逝公銜哀承大事一如居父喪時
戊辰服闋補山東鄒平縣知縣庚辰調冠縣道光辛巳擢膠州知州壬
午擢濟甯直隸州知州未至今大學士琦公時巡撫山東專摺保奏奉
硃批李文耕官聲甚好原係欲行特擢之員癸未擢泰安府知府甲申
調沂州府擢充沂曹濟兵備道丙戌擢浙江鹽運使調山東鹽運使丁
亥擢湖北按察使未至授山東按察使庚寅調貴州按察使癸巳以原
品休致初公之至東也撫時度勢慮不得行其志履任四閱月毅然引
疾而受代者以交款糾轡累公不得歸攜一僕授徒省垣以自給郭鑑
湖者門人世熙之父也精武事授公兵法未幾赴蔣令光璧之約至壽
張縣居數日直隸山東賊起長垣曹縣竝以戕官告公爲蔣畫守城策
選練鄉勇二百餘人擇武生爲隊長授以單刀法鎗法陣法時癸酉九
月十一日也城守旣固居人相率入城蔣以姦細雜入爲慮公曰弗納
是委之賊也取保結納之於是蔣令守城公四出巡堵夜禽賊目張學
義等置脅從不問有李昆者爲賊所誣公一訊省釋自是賊不敢窺壽
張事竣赴省上臺以公有幹略檄飭起病坐補鄒平時年已五十三矣
公爲治以清訟息盜興利除害爲先而尤盡心於教化鄒平有魏玉梓

者殺人棄屍井中人知之而不敢發公訪獲之一訊卽伏某甲圖財害命役指某乙爲凶手公察乙無凶惡相疑而俱之卒獲正凶又民婦陳氏訴其子忤逆公引咎自責其子叩頭流血母爲請釋子果改行爲善其聽訟凡株累者悉芟之其藉人命誣陷者驗明卽時訊釋初莅任訟獄紛紜久之庭可羅雀矣其除盜則捐設工食以贍捕役立獲盜賞格使捕役無叅賊爲養又數出親巡窮詰窩家嘗曰去盜固藉捕役絕窩線然必衛民之心至誠懇切洞中達外身之所能及者及之身不能及者精神及之精神所不能周者聲名及之終公之任盜賊屏息每朔望敬宣

聖諭廣訓自城廂達於四鄉鎮集宣講維謹暇則與書院諸生口講指畫勉以爲己之學邑有摩訶山會仙嶺爲祈晴禱雨之所公祈禱無不立應歲皆豐稔在任七年百姓初呼爲李教官後呼爲李青天循聲大著冠縣多劣紳把持挾制勢家互相隱護不可究詰公至胥斂跡去任之日將以亥刻授代而是日申刻役稟傳到聚眾鬪毆一案計兩造四十餘人意在乘此羈繫也公立時堂訊取結省釋皆叩頭歡呼而去抵膠州時雲墨二河淤塞商失利而民亦被淹乃捐千金倡修士民爭輸

得銀二萬剋日鳩工未而月而歲事其守泰安沂州以郡守去民較遠
爲屬吏立課程謂官不勤則事廢而民受其害而勤本於仁無痾瘵在
抱之心必不能殷殷於民事又本於誠無明且對越之隱必不能凜凜
於官箴其論教化也歸本於以身立則必能對百姓而後可以教百姓
識者以爲名言沂俗較秦爲悍而訟繁公至險健者不得逞掖匪鹽梟
亦望風而遁乃廣立義社等倉以裕籌備又以地產棹權椿樹可以養
蠶勸民種植以興繭利其爲充沂曹濟道修防必躬親河廳報河有沙
泥淤積請動款五萬兩開濬公相度情形謂春漲卽刷去矣後果如其
言其爲都轉也在浙六閱月躬親句稽弊無所萌拓貢院挑濬西子湖
皆爲協力經畫東隄商欠數甚鉅充商者多無業游民公詳察積虧之
由請於大府奏請分別徵緩而商力紓責令富商領運不得因引地滯
銷賤價私賣而課款裕爲東臬三年一本勤慎不務赫赫名兗州多詐
賊斃命之案公寘縣役重典自是無敢效尤者其他隨事寬減一以平
允安靜爲務惟深惡懸案不結大爲民害委員勒限嚴催分別賞罰不
數月積牘一清吏治肅然嘗謂東省之民氣麤而性直其麤處固易於
犯法其直處亦易於爲善使早以教化先之何至輕罹罪罟耶爲黔臬

時見其地本磽瘠吏多玩泄因言於大府辦事方能了事了事方能無事事多起於細微及早了之爲力易而傷人少反是則無辜受害者不可勝計矣州縣多苦缺舊例爲調劑交卸遞代無已時人存五日京兆之心公事遂置不問公攝藩篆商諸大府以所職之殿最爲調劑俾得久任以專責成於是密訪訟師豪棍嚴緝而痛懲之桐梓縣大水環城皆石山而葫蘆口久淤公請於縣治西南鑿石開濬水患頓息黔有府紳而無棉布捐立男女紡織二局又因黔民重財利而薄倫常以激揚爲化作家諭戶曉篇有詩云敝舌焦唇一腐巾苦將直道許斯民江河日下憑人說猶自諄諄講五倫亦情見乎辭矣公蒞仕二十餘年以崇正學挽澆風爲己任俸入一無所私捐廉爲

文廟修葺費書院膏火費鄉試卷費事難枚舉在鄒平創立梁鄒書院及義學四處修伏生祠長白祠表范文正公讀書處立馬宛斯先生神道碑在冠縣創立清泉書院署蒲臺縣時創立縈蒲書院在浙修錢武肅王祠岳忠武王廟並刊朱子古文胡文敬公白鹿洞學規三魚堂文集張楊園文集陳文恭公大學衍義輯要五種遺規四禮翼之類隨在頒行用資化導又采訪節烈孝義手書額旌其閭或立石墓左嘗自言

夙秉母教謂凡事必辦至誠心乃得見聖賢真處生平仕學於一切苟
焉爲名而實以自利者恧然深恥實得力此二語所至士民無不悅服
東人爲刊德政碑甘棠八思詩去思錄其去鄒平也老幼餞送者擁塞
街衢追至數十里不忍別後每過境士民必挽留其子孫至亦如之一
日公乘馬夜行避之天將明道旁有賣粥者識之曰此非李青天耶以
粥跪獻因而泣下復以其粥遍飲從者酬以值不受也其爲民慕戴如
此致仕歸里閉門卻軌自號壑石山人與其孫及一二門人講學不輟
常道過訪未嘗一識其面自立課程每日三次省察坐端直行舒而恭
語徐而簡動安而和自言生平不敢失禮於孺子四時祭祀及先人忌
日極盡誠敬雖老不衰述先世事或形諸夢寐輒泣下沾襟悽惻動人
其誘掖後學勤懇懇懇一如壯年授徒時論者謂其嚴毅似陸稼書和
粹似張楊園認理真確則一本朱子蓋其畢生所服膺云公安貧樂道
一如性生試童子時有以百金求代作試藝者峻拒之初至山東適鄒
平缺出當補或謂缺苦緩投文可避也公曰苦缺之民其不得所者甚
於美缺吾輩欲有益於民苦缺爲宜何避之爲自東移黔不能成行同
官爲致贖嗟商感其德亦釀金以助約白鏹二萬一無所受自黔歸儼

居會城甚湫隘服食麤菲非賓祭不用鮮當道欽其高節延爲山長以疾辭事上敬愼然事關利害必盡言無隱守泰安時撫軍奏興水利公言山東地多沙土欲改水田徒糜

國帑力爭之而罷攝東藩時有縣令營私壞法上臺曲宥之公據實嚴劾無所瞻徇而待人以寬不計私忿初至山東有同年友爲縣令接公多輕薄語不與較未幾友因事褫職公方由鄒平引疾猶典衣厚贈幼子聘宋氏女女以疾瞽宋願退婚公不可曰瞽命也悔盟者不祥待下恩義兼至僮僕疾病命子孫視湯藥待先世老婢有加禮及沒親視斂葬路人爲之歎息用刑最愼刑具必親閱諭刑役毋傷人筋絡成痼疾善書法端嚴凝重肖其爲人生平不欲以詞章鳴其講學著有憤悻初稿續稿課孫偶記官山左黔中有文移札稿兵法錄表章節孝義行有善善錄孝子傳家居所紀善行有見聞筆略孝弟錄又增輯

文廟通錄增輯白鹿洞學規訓言啟蒙韻言婚宴私議勵恥稿他著述甚夥錄其有關係者公生於乾隆壬午十一月三十日以道光戊戌四月二日卒享年七十有七德配雷淑人前三十餘年卒終身不復娶並不設妾媵子四人德謹武庠生德愼例授承德郎皆先卒德蕙候選州

同德輿早卒女一適武舉李春暉孫八人嗣武侯選府經歷允武大學
生錫齡廷琛錫金俱庠生濟武縉武覃武並業儒會孫三人啟功迪功
培功贈芳前守山左爲公屬吏旣又來官公桑梓之邦公不以爲不肖
獨進而教之用是稔知其素行戊戌四月朔馳赴開化臨安鞠獄先期
走謁時公病劇不飲食者數日矣猶神清氣定目光炯炯相對欷歔而
別乃遽以翌日捐館悲夫公之彌留也遺囑吾生平多涼德沒後有以
鄉賢舉我者當力辭其始終務實不近名如此旣卒鄉人合詞籲懇大
府亟欲表章爲風化勸遂臚實行入

告得

旨俞允崇祀鄉賢公之子孫不獲辭也先是丙申歲山左士民譌傳公
卒請祀名宦有司照例批斥而止至是聞公之喪所在聚哭復以爲請
亦經

奏準題牌設位以慰輿情三代直道之行於斯可見矣德蕙旣囑公門
人楊生勳類次其生平以請於贈芳爲之狀爰詮敘大略參以所用告
諸當代道德文章之君子而圖其不朽謹狀

趙君神道碑

會國藩

君諱仁基字子厚號悔廬武進趙氏五世祖恭毅公申喬戶部尚書清
正有大節爲世名臣恭毅次子鳳詔官太原知府者君高祖也會祖某
廩膳生員舉孝廉方正祖某增監生考某舉人豐縣訓導兩世皆以君
貴

贈朝議大夫妣楊氏惲氏皆

贈恭人君少而端視矩行恆言無誑年十三居王考之喪哀禮周至父
老驚歎毗陵故文獻之邦名儒相望君出而從訓導君於豐縣趨庭問
業歸而造請里巷耆宿若李君兆洛陸君繼輅吳君育周君儀暉輩咸
從捧手稽經講藝穆然如笙磬之克諧其學既大進譽望亦翕翕日隆
以試於有司則連蹇而不一當久之嘉慶丙子乃北上應順天鄉試未
歸而遭母惲恭人之喪又五年再試順天未歸而又遭父訓導君之喪
君性篤孝兩丁大故不克親視含斂平生以爲至痛又以壯年喪元配
高淑人復喪繼配錢淑人復喪其長子鑄客遊湖北子身浮寄塊然若
委枯枝於大澤廢興不復厝意蓋至道光五年舉於鄉六年以進士官
知縣而君年且近四十一人世紛華之念洗除盡矣初仕爲江西宜春縣
旋補崇仁縣知縣調安徽涇縣知縣既又署懷甯縣事所至判決滯獄

感格幽頑齋禱於深室而四境時雨立應道光十三年捕獲桃源掘河
姦民陳端

優詔褒勉賞戴花翎以直隸州升用明年補滁州知州

召見便殿

宣宗嘉之歸任滁州六安州甫歷數月卽升平陽府知府在晉數月又
升江西南贛兵備道君感荷

恩知益思有以自靖名捕椎埋盜鑄鹽梟大猾躬追而擒治之禁止鴉
片約堅條明是時

天子方申嚴詔拒絕西洋而英吉利窺天津陷定海割香港寇廣東省
城君綜理南安糧臺晨夜憂勞自傷無裨於時而海氛日棘往往被酒
泣下或力疾繞室旁皇適奉升湖北按察使之

命閱十八日而卒實道光二十一年六月十九日也春秋五十有三君
旣再失偶最後娶方淑人子熙文某官烈文某官女三人適增生李嶽
生候選主事周騰虎烏程縣知縣陳鍾英孫六人咸豐六年七月某甲
子葬於荆溪之東山所著書有江水論一卷雜文一卷歌詩曰幽棲集
登樓集等者凡七卷和陶詩一卷詞一卷君天懷淡定中歲頻邁憂戚

泊然不知窮通得喪之於己何與自詩篇外若無一足關其慮自獎誘
後進外若無一堪自愉樂者論者疑其超曠忘世及海上事起乃獨鬱
鬱不能終日豈有大志者當頽然不易測耶抑中年悲感晚節一觸而
不自克耶匪可詳己銘曰
達人離垢遺棄萬事聖者忘身不忘拯世迹若相反義乃相成趙公落
落衷道而行積困始亨將大厥施方駕而稅誰實尸之有子克家志亢
行俯天右勞臣永錫來許

續碑傳集卷三十五

江陰繆荃孫纂錄

道光朝監司二

貴州提刑按察使司按察使軍功隨帶加二級誠甫孔君墓表銘宗稷
至聖七十三代孫孔君慶綏字稷臣號誠甫曲阜人也其曾祖考諱廣
榮祖考諱昭煥皆襲衍聖公考諱憲均

恩貢生候選直隸州州判龔

聖廟六品官以子官累

贈通議大夫性寬厚貧而好施昔昌樂閻子與凡數稱之君幼慧五齡
能作大字及趨塾卽知問難經書大義聞講古人忠孝事言下爲躍然
甫十二遭生祖母余太淑人喪已能隨父盡哀禮旣冠以四氏學生拔
升成均戊子歲舉於鄉授徒爲養親忘其貧先後持

贈通議公陳太淑人之喪毀瘠三年不怠宗郟交稱之道光丙申成進
士入詞垣散館改授工部曹尋考取軍機章京由硝磺庫主事升營繕
司員外郎充丁未會試同考官擢都水司郎中京察一等授甘涼兵備
道未至遷山西按察使

宣廟召對賞其品學受

知特深俄權布政司膺保薦

今上御極初調任貴州屢著軍功加隨帶二級迭權布政司時黔疆不靖戎事焦勞患目幾失明遂告歸歸又五年未能起官遽以疾卒於家當其按晉也日夕治獄一以精心剖之謂讀律案如讀書不可一字滑過讀書疏患惟失學律案疏則民命之患滋鉅以此所治得其平其按黔也有十三歲幼女范么妹訟母被推踣致死冤檢驗平反論臯人如法值襄安教匪誘苗人煽擾君督兵至其地旬日而熄未幾獨山州桐梓縣莠民乘閒爲亂省城震動君率其子及甥登陴防禦與撫軍商定方略分道擣賊巢禽其渠亂卽定時遵義民抗糧聚鬪郡守請兵君言於撫軍曰無知之民激而生變多出不得已奈何不教而遽誅乎亟示諭民帖服納賦恐後多感其以誠定變焉至若葺學宮修禮樂戡亂時不忘文治士林尤傾仰於屬寮中薦拔人才如徐豐玉韓超其致身盡節各有成就而胡詠芝撫部則所成尤偉也惟軍飢餉匱日佐大府奏記請貸請撥心力爲殫其時聞君之從兄交河令慶銓及子繁渥禦寇殉難家國之憂并集枯肝竭腸先病目後病齒其瘁躬勤事固已久矣

余與君同事樞直最相契見其事上接下一以誠懇言不矜能事不弛
勞其爲外臺心跡不異疇昔退歸後余曾訪之北城老屋目疾雖小瘡
略可披閱及門文字聞寇難未已常懷隱憂君少時嘗主東魯書院晚
復掌教恆以躬行實學導後進其教子嚴義利絕私謁命之策名爲宰
訓以勉行中道君鮮兄弟養袁氏老姊而教成其甥啟畛啟耕仕學並
勵是尤行誼之足法者夫以君之篤誠明允若天假之年必能宣力以
安邊徼而所施乃止於此能不爲天下惜哉君配張淑人子繁準三品
蔭生軍功

賞藍翎六品銜陝西候補知縣孫祥璪祥采繁準自陝奔歸既葬君於
祖塋之側而請余爲之文於是卽余所知爲表君之行事法宜有銘更
系之銘曰

唯聖道先以誠誠之存世德明事尊親逮萌生孚一中完天經吾友子
自密地貌肫肫言臺臺推心腹洵無愧宜品學

簡在

帝用陳臬用治軍本忠信如其仁法無枉征有勳將大施瘁乃身爲養
疴歸魯門忽殄斯古善人善人亡澤貽後喜嗣音亦醇厚依先兆千載

久表且銘辭永壽

桐城姚先生墓志銘

徐子苓

桐城姚先生諱瑩字石甫一字明叔天下知先生者咸曰石甫先生云姚族望桐城前明至

國朝代有巨人曾祖範翰林院編修妣張祖樹元縣增生妣張繼徐父駢妣張三代皆以先生

贈通奉大夫妣夫人先生年踰冠中嘉慶戊辰進士試數縣皆最旋由高郵州知州轉兩淮監掣同知權兩淮鹽運使最如前道光十八年擢臺灣兵備道故事邊閩兵備加按察使銜得專奏既上事勸農料軍而是時西夷犯順粵東閩浙皆被兵

朝廷命上公佩大經略印副以宗親貴臣都逗留一二宿將戰不利臺灣地孤形便姦民相扇引先生與僚吏設方略斬俘奏可方是時臺灣軍聲壯天下既大吏力主款

詔臺灣歸所俘挾前憤訟時相國穆彰阿陰持之趣對狀先生以夷方就款大臣囚服對吏重辱

國迺亟引咎赴刑部獄時道光二十三年九月事也西夷既就款

上念功左官蜀兩使西藏補蓬州知州假歸時鹽政久弛兩江制軍議行淮綱檄監九江鹽務咸豐初元以大臣薦有武昌鹽法道之命未行

召以廣西按察使參大學士賽尙阿軍其明年賽尙阿無功逮先生方籌餉湖南撫軍張亮基奏留以其年積勞卒官先生狀短悍視炯炯發聲如鐘少學於其從大父姬傳先生與其鄉方先生植之劉太學孟塗友善博聞多通議論嶽嶽不少挫自爲縣官時數不獲志於長官臺灣之功旣斲於吏議其在廣西大帥懦不能兵部將都統烏蘭泰鎮軍尙榮皆驍將不相能紫荆山之圍賊就禽矣先生以爲流賊如水宜環攻以斷其逸因條舉利害累百餘言不果用比竄永安則又爲書白莫府請明法飭將并力合勦戒前失永安東北有隘名水竇徑阻蒼緣之可以達桂林賊壁隘死鬪而自軍興以來將驕士玩賊善閒屢持金錢與我軍媾永安城小而庠方是時都統軍西南鎮軍軍東北合滇黔楚蜀之軍總四萬餘人永安水竇賊數千又屢敗岨水竇者向軍門分守處也先生旣白於莫府則又力疾馳叩軍門數譬解之然皆不果用未幾賊突圍並水竇犯桂林推鋒遂前夫廣西之役天下猶全盛也向使先

生之說行夫安有今日之事哉士大夫居恆雍容方幅而武夫悍將快私憤以縱巨寇遂至一隅之毒痛於天下彼西夷者迴翔審顧操兩端以坐觀其弊嗚呼天下事果孰爲之而至是哉上下才十餘年閒亂日多生人死亡日益眾而余今者從烽煙煨燼之餘誦先生之功緒以論述其行事獨非幸與往余販鹽九江先生約共爲賈因師事焉卽別去而皖禍作又數年識其遺孤濬昌於安慶行營昨歸葬濬昌以狀請補銘其墓按狀先生生於乾隆乙巳十月卒於咸豐壬子十二月十六日得年六十有八配方後四年卒一女適里人按察使經歷張匯其倅蕭有子二孝早世季濬昌有學行與余好見官江西湖口縣知縣先生坦懷樂善老而彌篤其在九江孟塗已前死余識方先生於桐城爲堦書先生讀書未竟面赤鬚怒張曰咄植之與我都老大乃屢呵我如小兒徐謝曰頃失辭植之直亮多聞君子也微植之夫孰鑄吾過嘗被知於趙文恪公文恪死走武陵拜其墓其他振寒字孤天下知先生者都能道之故不具錄先生文之刊行者總四部曰奏議曰紀行曰詩文集建甯人張際亮好大言少許可讀而序之謂簡明似王文成銘曰維昔乾嘉人材輩進武臣元老天壽龐駿先生數奇載丁陽九出門張

弧跋前躄後潯陽之晏矢言江水旅襯歸來故鄉荆杞荆杞蕭條轉屍
蔽野握節簽樞彼何人者伐石刻銘以寫我思後有攬者視吾銘詞

姚公墓表

徐宗亮

道光三十年

今皇帝初御政

詔以湖北鹽法道起桐城姚公瑩於家往參大學士饒尙阿軍尋擢廣
西按察使蓋是時廣西姦民洪秀泉楊秀清以邪教惑眾作亂

上以公夙著志略風節特以軍事屬之公亦慨然以滅賊自任拜

命即行天下士大夫皆喜相告已而賊猖獗浸尋入兩湖蔓江淮而公
以調任湖南卒長沙於是士大夫嘖嘖爭歸咎公而不知公在軍始終
三年其言議施爲多受制而不見用至於憂勞憤鬱繼之以死其志事
固可質於天地日月者也公初至軍上滅賊方略六事而八面環攻之
議尤得賊要領相國不納公見軍政廢弛無以鼓士氣請斬一僨事將
官示警復不用然相國夙重公遇事必相咨公極言卒又不用公憤懣
無計請自督戰是時諸將惟都統烏蘭泰公忠勇有謀可倚以辦賊向
提督榮亦名將也然與都統不相能提督握重兵相國意鄉之公屈已

相下期和衷以濟先後致書二人引汾陽臨淮事爲喻都統以爲然而
提督意不可解方圍永安時公與都統皆主擊水竇絕賊外援而提督
必欲開水竇使逸從而尾追公上書幕府力辨其失而相國卒聽向計
於是賊果逸出圍桂林都統以赴援戰死賊勢益不可支而公遂鬱鬱
得疾踰年而卒公少以文章名年三十以進士外用知福建平和縣調
龍溪臺灣二縣署海防同知噶瑪蘭通判尋丁艱罷歸服闋改江蘇金
壇縣知縣歷元和武進擢高郵州知州尋轉兩淮鹽務監掣同知遂護
理鹽運使事未幾超擢福建臺灣道加按察使銜始嘉慶道光閒直省
大吏如武陵趙文恪公安化陶文毅公侯官林文忠公皆天下名臣公
先後爲屬吏以循能見知爭薦公謂可大用其擢臺灣道也

先皇帝蓋深倚之會英夷入寇東南內地諸郡縣望風潰中外大臣因
倡爲和議以求息事公孤懸海外獨訓練士卒陰爲戰守計英夷來犯
數力戰卻之斬獲甚眾奏入

特賜花翎兼二品冠服蔭一子雲騎尉以旌其功而公由是爲中外大
臣所嫉尋用夷人言誣以冒功奪職下獄議罪不數日
先皇帝特赦原之以同知直隸州知州發往四川效用大吏不說公奏

補蓬州使乍雅往返萬里徧考西藏風土形勢越二年乞病歸

今皇帝之再召也首頒明諭亟稱公與林公則徐攘夷之功而罷黜當日嫉公之大臣蓋猶推廣

先皇帝矜憫保全之遺意以行之此萬邦黎獻所共歎爲

大孝親賢而公以垂暮之年義不得不效死行閒以冀報稱

兩朝知遇於萬一者世顧以不得其言不去責公豈知公之深哉公自牧令至監司所至有賢聲其政蹟在民不可勝紀而英夷之役無賢不肖皆知公之忠其得罪爭爲訟冤惟公暮年志事之光明顯大至今爲浮言所蔽晦是宜特表焉以示後之君子公字石甫號展如卒於咸豐二年冬十月年七十有二其世系葬地子姓戚屬政蹟著述具公子濬昌之狀將求有道能文者誌以納諸壙茲姑弗詳列焉

姚公傳

吳嘉賓

今上登極未及改元卽黜大學士穆彰阿起用總督林則徐以撫夷之議執政者主之非

上意也故下

詔宣示中外並及達洪阿姚瑩前在臺灣盡忠盡力而穆彰阿等妒其

成功多方陷之欲置於死地二臣皆起用當是時中外臣工莫不額手稱慶下及士庶皆若有將出水火登衽席者天未厭禍林公卽世而粵西之寇遂猖獗莫能制二臣者亦皆不竟其用悲夫先是姚公以進士任福建縣令卽以才著聲海上由臺灣令權海防同知噶瑪蘭通判亦以能爲眾所忌摭他事中之遂褫職以噶瑪蘭任內獲盜引見復官簡發江南爲總督蔣相國及陶文毅公所賞洊擢至淮南同知權運使事未幾奉

特旨命爲臺灣道加按察使銜先是御史黃爵滋請禁民吸食鴉片煙罪至重辟

天子下其議而林公爲兩湖總督行之法嚴而民不擾

天子賢之畀以經理海疆大臣之任使絕其源責外夷無以酖毒入中國陷民於死林公遂以大臣專駐粵絕其通市已而夷船犯粵又犯浙陷定海入至餘姚又以兵船犯天津天津距京師不三百里朝議驟改用琦善督粵而林公得罪公以道光十六年九月奉

命十八年至臺灣又一年而御史奏請禁銀出洋不許民吸食鴉片海疆事起與島夷通市者皆閩粵人也反爲之耳目訶中國故事卒以無

成公素得臺灣民心民畏威懷德無敢以間諜至者夷船數至皆擊敗之二十一年八月夷船至雞籠海口副將邱鎮功擊折其桅船毀於礁獲其人及陷定海所得文書器械事聞得

旨嘉賞九月賊復至又卻之

詔予雲騎尉世職明年正月夷船至大安港公誘沈之獲鐵礮鎗刀皆夷陷鎮海甯波所得者

詔進公秩二品是年七月夷船由鎮江至江甯兩江總督牛鑑師失利朝議罷兵與夷和夷目訴以臺灣所獲船皆遭風各官俘難人冒功欺罔公遂逮問公以爲訴自夷人無可質且羣議定矣卽自置對引咎赦不治出獄以同知知州發四川用督臣又遣令出西藏治獄往返六七千里道經絕漠事竣復責令再往且劾以畏難規避奪其官其所以困苦公者如此逾兩年始補蓬州在州三年引疾歸至

上登極乃復用公在臺灣道時海上多事南北路土寇亦乘機竊發響應皆公與達公勦平之達公武人始與公齟齬旣而大服謝過約爲兄弟故卒能同濟艱難以稱

天子意論者並稱焉及公復起任湖北鹽法道未至遂命馳驛往廣西

贊理軍務授按察使大學士賽尙阿至軍以公爲翼長當時諸將以都
統烏蘭泰提督向榮爲最大帥待二將各有輕重二將又以爭功相忌
公亦不能行其意圍永安不克烏蘭泰卒於軍寇遂熾向榮追寇至江
甯與相持五年迄無功始寇以紫荊山爲巢穴公議八面攻之未行而
賊潰圍出陷永安州公馳駐新墟防其北寇之竄永安也精銳皆在水
竇莫家村二處公議進剿必先拔城外兩壘先拔水竇必一由黃村入
一由佛子村出成夾攻之勢此上策也否則一由仙迴嶺攻莫村一攻
水竇此中策也烏蘭泰駐佛子村向榮乃自由龍蔡嶺進遂敗又議開
水竇一路縱賊出追擊之公上書帥府力陳其不可與向榮書曰自古
兩賢不可相厄未有各自一見而能成功者賊輜重盡在水竇聞其備
船爲外逸計故須公一軍守黃村山門隘口由外攻入烏兵由內攻出
此上策也公不能迅速進兵又依違於此大計可乎卒不聽大帥方主
向榮故烏蘭泰卒受傷憤激死公又與向榮書曰我兵出隊賊堅閉不
出聞其礮子已盡必走但賊情詭詐不肯作一路我軍必分路預備追
剿堵截未幾賊果竄攻桂林適向榮先至得無失遂陷興安全州至湖
南據道州公奉

命隨辦糧臺請速進兵爲書上之大帥不能用寇至湖南驟猖獗圍長沙有

詔徵賽尙阿還京師公留湖南權按察使以疾卒公在軍中與烏蘭泰書曰某就木之年無以報

國惟念主憂臣辱之義疏食惡處與士卒共苦辛數十年貧賤憂患本無定居今日一如我素夫功敗於垂成病加於小愈前者武宣之事賊已將就禽徒以狃於大捷之後計慮稍疏遂使脫網今我師愈久愈疲賊又日懷奔逸之路萬一復蹈前轍不但無以對君父天下後世其謂之何蓋公之先見如此使

先皇帝卒用林公與公等天下事何至有今日哉公諱瑩字石甫號明叔世爲桐城望族今因公子濬昌之請次公生平大節爲之傳

舊史氏曰余識公於京師公方以縣令被議始復官蓋公官閩爲能吏有名久矣而與閩詩人張亨甫爲昆弟交亨甫蓋弱冠一諸生耳與余弟同年貢京師余以是識公然亨甫卒不遇公下獄時亨甫隨至都欲與公同患難公旣出獄亨甫樂甚日從公飲遂以醉死公爲治其喪卹其後人二人者皆古之人也公於一死友不欺其志如此況忍欺君父

乎夷人誣公不足責讀庚戌九月

詔書可爲太息也

候補三品京堂貴州布政使李公家傳

李星沅

公諱象鵬字雲臬號雙圃明初籍長沙爲著姓曾祖石柱公祖倬齋公績學好善矜式閭里父燮亭公郡庠生仁厚友愛以文行名於時生子二長侖圃公諱象鵠嘉慶己未進士官翰林院編修次卽公也公賦質英挺敏雋過人讀書十行並下幼從侖圃公讀書嶽麓名宿咸心器之稍長有聲黌序甲子捷賢書辛未成進士入翰林厯充

國史館纂修文穎館提調治河方略總纂石渠羣彥抗交推公亦念侖圃公志緒未竟益勤著作以燕許文章自任庚辰分校禮闈稱得士道光壬午京察一等出知直隸宣化府關南連值歲歉糧價翔貴公爲嚴禁姦販安戢屯戶分廠煮粥民無仳離郡有柳川書院分俸新之增膏火明條約按月五課公餘進生徒講貫曾未三載擢科者五拔萃者六邊郡奔陋之習至是一變旋調正定府知府再調保定府知府保定畿輔首善繁要甲於天下是時總督大學士蔣公攸銛治尙明察寮屬屏息那文毅公彥成繼之風規尤峭厲公整紛剔蠹舉重若輕親治文

卷行所無事每遇庭論辨析必反覆自暢其說無少屈撓同官或相顧色沮而公持正自若大府倚公如左右手

成皇帝駕幸木蘭公迎謁

天顏溫霽獎勉至再蓋稔知公之賢可大受也丙戌升直隸通永道調河南糧鹽道下車後體察機要著理漕說嚴飭並示禁差役藉雇糧剝攔截民船州縣便於轉輸弁丁無不懾服又請復潞鹽仍歸商運明定章程兩河人士至今頌德勿衰己丑丁外艱癸巳服闋入

見甫四日卽授江西吉南贛甯道當東粵之衝犬牙相錯連山伏莽出沒無常轄境遼闊多瘠土州縣幾不可治公掃除宿弊整飭嚴明地方秩然就理值贛州大水斗米千錢公設法招徠汎舟雲集市價頓平仍出廉俸助振活人無算信豐縣民某因姦謀毒本夫誣弟殺兄供詞甚狡幾成冤獄公切究得實及權臬事姦夫姦婦問如律丙申擢江蘇按察使旋署江甯江蘇布政使陶文毅公樹方督兩江引與同心政肅刑清一時稱盛戊戌調貴州按察使會仁懷縣軍務兼籌轉饟事竣得從優議敘逆黨株連頗眾公悉心研鞫無縱無枉庚子擢貴州布政使首禁漢姦盤剝苗民以遏亂萌倡建尙節堂收養嫠婦以正邊俗捐置石

洞坡義園祠祀鄉先達之有德於黔者以垂政績百廢具舉澤久益深
甲辰乞假歸官民聞聲臥轍奔走流淚公以惓惓不忍舍然終不肖留
矣乙巳入都奉

旨以三品京堂候補仍乞假歸公勇於任事精於料事鏡燭犀剖動中
旨繁他人四三年不能了者公以旦夕了之他人千萬言不能決者公
以片言決之至於錢穀冗雜參伍錯綜羣苦芴絲難治公則條分縷析
若網在綱有條不紊且從容談笑閒以雅謔似絕不經意者與人寬恕
伉爽表裏如一是非曲直無少假雖人心如面或轉以此尼公而公不
屑顧也夫使如公數輩擔當世務經畫封圻必克建樹非常幹旋元氣
大有裨於

國計民生何止以東南財賦之區惜不得假手於公爲之補偏救弊耶
公泊於榮利家濱漁樵渡自號漁樵散人當居燮亭公憂輒不樂再仕
祇以

主知優渥義難恣然舉凡立義塾以待族人之讀書捐義倉以待鄉人
之緩急置本邑卷價以待孤寒之就試皆遵燮亭公遺命獨力成之居
恆追慕俞圃公築棟懷堂見志嫂王宜人從兄湘帆大令年皆八十公

每過從必依依其孝友慈惠老而彌篤亦可以風世矣公解組優游合
林下十八人繪湘中耆英圖廣徵題詠古稀已近矍鑠健啖步履勁捷
望若五十餘人方命駕入省俄頃閒無疾而逝遠近聞之莫不駭悼泣
下享年六十有八以庚戌十一月葬善邑阿彌嶺加爵壟之陽坤艮爲
塋夫人張氏汪氏邵氏側室宜人朱氏劉氏朱氏廖氏子家驊太學生
郎中聘浙江前湖南巡撫陸費名璩公女家驄聘同邑前貴州貴西道
鄭諱世任公女女十適何適譔適周適俞適胡適陳適常適夏適程適
唐沅於公誼爲甥舅皆有媯所自出公采芹之日沅甫周晬藐茲後進
宦轍略同公每寓書告誠及躬聆緒論懇到詳勉常若所親故於公之
立身行政微窺崖際誠未能表揚萬一要未敢以不文辭銘曰
衡嶽英靈湖湘閒氣早陟詞垣洊膺藩寄脂韋如雲孤標果毅孰營城
府闢以簡易艱鉅奚辭彊禦奚畏人疑陵鑠我行其志敷歷中外
眷隆簡畀時行時止舒卷如意所去民思公望延跂長河耿天無何星
墜城南允臧以昌後嗣

署順天霸昌道劉公墓碑

郝植恭

太史公述吏治深嫉武健嚴酷之習以謂擊鷙之威非不足以救一時

而不可以培國脈也

國家自咸豐同治以來寇盜四起爲治者思重典以懲亂用法爭趨嚴峻而一二儒家者流又往往優容煦嫗姑息養姦爲世詬病求其存心平恕內寬而外嚴與民休養生息仍不改昔時儒吏之爲卒未一覲若道光閒攝霸昌道劉公殆不愧儒吏者與公以道光二年進士知直隸博野東明饒陽元城豐潤等縣旋知薊州擢順天北路同知攝霸昌道服官三十年懇款勤摯時承平久從容以德意柔百姓百姓習之故所至有聲嘗建饒陽豐潤社倉以救饑民築元城河隄以捍水患革饒陽元城停喪不葬諸弊俗除盜賊遏彊禦善政不可枚舉而尤留心庶獄其在讞局有某縣民居河上焚廬屠室而罪人弗得繫數人大府命鞠之時方盛暑囚汗浹衣袴公審再三無左驗遣役察囚纖微必報辰起役報囚夜澣衣映月視不一公曰盜在是矣立訊囚褫衣驗無跡乃入密室塞門戶於隙處漏日光驗之五指血痕宛在一訊遽伏其察囚之精密類如此公旣以決獄稱能凡獄之難治者悉以屬公公虛心研詰靡不折服已乃察其可原之情以求末減累數日或無可免則又大戚以爲是死於法矣嗚呼此歐陽公所謂求其生而不得者與夫州縣爲

親民之官而獄者天下之大命也召伯聽訟而詩詠甘棠孔子繫之二南有以夫公諱遵海字聿南明勳臣百戶某公之裔

國初自陳州遷祥符曾祖鐸農官祖廷遷邑庠生父璨侑生本生父珂邑庠生皆

贈如公官公娶牛氏繼張氏皆

封恭人著有有深致軒詩文集若干卷公以咸豐三年三月四日年七十三卒葬城南繁台原子曾縣進士官山東知縣銘曰

民以擾而馴氣以淑而溫豈有異於人人惟葆此盎然之春嗟哉式穀詒子孫

舒觀察傳 方宗誠

公姓舒氏諱化民字以德自庵其號也江西靖安人先世多潛德鄉人祀之於薰德祠公少好學家貧鮮藏書常手鈔呂氏呻吟語陳文恭訓俗遺規心體力行終身不懈中嘉慶丁卯科鄉試舉人丁丑大挑以知縣用歷任山東費縣長清縣歷城以卓異升德州知州道光辛丑舉治行第一奉

旨簡放蘇州府知府歷升浙江督糧道杭嘉湖道署浙江按察使鹽運

使年七十致仕公爲政務興利除害愛士養民尤以敦風化爲先所至編行保甲修義倉義學捐試資行賓興禮詳立規條爲經久之計必使士民沾實惠而不爲具文新文廟名宦鄉賢祠栞畫圖孝弟錄訪舉節孝幽隱必至爲立總旌坊嚴禁吏胥需索之弊嘗言爲官當作久於其任之思歷一地有一地應爲之事事未辦與辦而未成者抱歉實多何敢作遷擢想也其調長清也先是長清自正月至六月不雨民心皇皇大府以公善撫字檄往治之公入境行二十里大雨沛然歲乃大熟由是濬河築隄積穀興學謀久遠之利民至今德之請祀名宦祠任歷城首邑時公務繁劇而留心民事如一訟獄多親聽之其後知蘇州亦然在德州時訪停喪未葬者三千餘嚴立限期禁奢靡拘忌無子孫者族姻營葬無資者官爲葬之事畢以狀上大府請下其法於他州邑在杭州俗尤浮靡停喪者三萬餘公倡捐開局設官整理未卒事告歸猶諄諄勸諭士民無終懈又白大府奏請著令凡服除未葬者仕宦不得補官儒生不得應試所以教孝教忠者皆在是事雖未行而公之敦本善俗多此類公性寬仁然不爲姑息之政德州有土豪封姓積惡不悛歷任官莫敢治公禽之按治如律知蘇州未一月英夷闖入寶山土寇有

聚眾行劫公曰外患未至而內亂是引盜入室也請大府梟其渠魁四
人境賴以安夷務平公時護理糧儲道以江南漕賦甲天下而蘇松常
太鎮尤甚今既遭夷警轉徙流離又苦催科之急非所以恤民也白大
府奏請減十之二三其後蘇松二府得如所請在浙江時海防屬巡道
兼轄南豐沙漲趨北岸塘身衝潰公冒暑雨晝夜巡視圖方略累月而
塘成公論治尤以人才教化爲重聞有遺才弊俗必肫肫爲大府言之
嘗曰人才者國家所倚賴民生所共安危者也平時去一忠誠可恃之
人異時卽少一緩急可恃之人又謂安民必先察吏而察吏爲尤難循
良之與冗闕賢否判然惟中才介於可賢可否之間策以上進而精神
可期振興聽之波流則行徑日就卑鄙此中陶鑄全賴上官周咨博訪
得之有意無意之間遇切要之事於公牘外別下教諄切告戒屬吏奏
記許其由抒議論條陳所見或加宏獎或教其所未及如是雖中平之
才亦將爭自濯磨以供職分又謂古今政治無過興利除害兩端當隨
事之大小時之緩急乘機度勢爲之而欲厚風俗興禮教舍振拔士氣
無由近世儒學一官成備員矣誠得有品學者示之典型必有鼓舞而
振興者書院爲儲蓄人才之地誠得碩士通儒聘請分主講席甄陶培

養豈不可育英才又謂爲上者不可有嗜好多一游藝之心卽少一體國之力繁華絢采之習尤宜痛戒先自我躬作則而又多方曉諭惜民財力乃可以厚民風俗不然其害始在百姓終必國家受之粵賊跳梁公謂治盜賊如治痰涎養良民如養液津善醫者不遠使痰涎化爲津液當無使津涎化爲痰涎中外文武大小官司其所行順理與否皆足以沮賊亦皆足以致賊也又曰天下事無成而不毀之理所貴防於未然及早圖之則事半功倍至於敗壞決裂往往經年累月勞民糜費而不可收拾嘗欲奏請陣亡官得追封先代俾忠臣報君卽以報親而因忠以遂其孝復藉忠臣孝子以勸爲子之忠論事持大體通時務多如此已所不能行者皆以白大府居位去官如一日也持躬節儉祿入多捐爲祭田餘則散族親之孤寡窮獨或老不能自存沒不能棺葬者粵匪圍江西靖安土匪將起公急訪族中貧者數百人給資使治生計又立祠規有入匪黨者罪無貸土匪肆掠公言於邑令置之法又勸鄉人富者給散貧者亂始定年老避亂山東猶日讀有用之書勤求民瘼嘗自謂形體已瘁志氣已衰獨好才喜士憂閔生民疾苦之心猶未死也所著有厚德錄節識呻吟語節識備忘錄節識祖訓釋義文集雜著

若干卷咸豐九年正月卒年七十八子四人孔懷孔授孔安孔恂孔安以舉人勦賊立功今爲山東知縣

論曰孔子云善人爲邦百年可以勝殘去殺矣又曰善人教民七年亦可以卽戎今人每以善人所爲多迂闊而遠於事情非救時之才而烏知勝殘去殺與卽戎固非善人不可哉公存心立政眞可謂善人也已使天下親民之吏皆如公盜賊又何自而起邪公所設施多可爲循吏法余讀其上大府諸狀知公之所蓄積其仕猶未足以盡之也旣編公集復次之以爲傳焉

雲南迤西兵備道馬眷庵先生家傳

宗樓辰

吾邑馬氏世居吳融邨近數十年科目蔚起稱仕族而其貴而賢者首推吾先執育庵先生先生初名維騏字漢標篤內行讀書勤苦精三禮之學嘉慶戊午舉於鄉年尙少後十年己巳與先子同成進士則改名志燮選庶常以母憂至甲戌散館試帖誤成七韻

仁廟覽卷稱其佳而惜其誤改屬刑部斂詞賦手而治法家言後補四川司主事歷廣西司員外郎陝西司郎中兼總辦秋審處積資四考俸滿保可繇郡揀發安徽父憂服除權甯國府補潁州府四年潁大治陶

文毅稱江南賢守第一薦之朝

待旨擢雲南池西道以疾歸值海上用兵傾俸囊萬緡助軍食

上嘉之子加五級封例得視二品病目喘畏風不能出家居五六年以

道光二十六年十一月卒年六十有八當先生入秋曹時曹衛始平

仁廟欽恤庶獄頒慎刑二論於天下漸除法官倚法之習先生感奮當

治案牘終夜竭目力目爲之眇大司寇以其慮囚明允不矜武健而悉

要於平多重之礪堂金溪兩公尤相知深其守潁也以民富方能穀心

平自不鳴二語揭廳柱遂濬湖修城以教以養鋤治一二姦猾而民帖

然有譎言朱毛里亡入潁者白其誣乃弗擾明年夏雨霰幾損稼祈之

頓晴謳頌大起比備兵池西平民回爭毆之獄謂疾回祖民非公道陳

兵不用論撫之衅遂息創修蒙自棧道八百里以便行旅又築天申塘

築普長河梁以惠居民可謂能得民心者矣先生性廉退入官卽嚴絕

暮夜金抵滙三年目擊邊務之艱無日不求去上官慰留再三答曰薄

才任一路已逾涯分敢奢望乎歸裝蕭然助公之餘尙置田贍族寂居

病榻晏如也丙午夏秋間鄉苦旱秦望有譎火民間有譎眚先生與稷

辰書深憂之十月始寄答書而先生不及見矣先生爲善不近名服官

中外未嘗自記政蹟一言子敬勝早亡孫家豹輩幼弱無人能詳述言
行者沈編修元泰爲狀亦簡略欲訪先友之存者與穎上滇中人士遠
在數千里外末由益其咫聞姑以所知者著之家傳

論曰刑官多慘急其膺上考者則慘急必甚矣迤西至性慈良旣循常
資以出其治邊未嘗冤戮人惟汲汲勇退非所謂塵視軒冕者乎昔迤
西同官鞠逆案苛治脅從後出都爲厲所窘以暴死近歲永昌主殺回
者亂作驚悔至噴血不止若迤西善病乃優游考終是非天道耶聞之
活千人者有封子孫吾將於其後人望之矣

有餘齋師事略

吳昆田

師諱有慶字餘齋金氏漢軍旗人嘉慶丁丑進士內閣中書升侍讀調
戶部郎中簡四川重慶府知府署川東道卒官甲午昆田中式順天榜
出師門謁於邸第貧甚四壁蕭然無僕婢一老蒼頭應門通謁傳見遽
日子能文吾習舉業三十年於茲矣雖冷宦十八年未嘗一日廢學今
幸得分房校士適如所願乃入闈初得硃卷閱竟日無一佳篇悶甚急
取酒飲之醉就寢雞鳴而起焚香告神乞得佳士遂任取一卷閱之極
愜卽子卷也幸勉成偉器以副吾志一日又進謁時初冬氣候嚴凝師

問曰能飲酒乎敬應曰能喜曰是吾徒也急溫酒取一雞缸置於案而師之茶甌乃不易試之冰手師笑曰吾素冷飲昆田起立曰冷飲於人不宜請從此禁之命復坐對酌盡五壺而罷自是每見必飲時或醉然益溫克蓋師素謙抑持己敬而接人以恭雖對廝役傭奴未嘗有急言遽色也少孤依女兄以居女兄躬炊爨督之學迨成名尙未授室欲先嫁女兄女兄毅然曰吾撫汝至今日不待成家而先去何以對吾父母於九泉乎因泣下於是爲弟取婦乃嫁年已四十矣京師內外無不稱爲孝弟之門者師獨居靜穆終日危坐無倦容手寫六經自首至尾無纖芥之譌生平恪慎多此類最不喜接勢要有滿州權相見之目爲窮酸子故久不得遷曹文正公獨許爲有道之士言於

上得山西考官旋簡四川重慶府升署川東道有書來言病酒將不起竟卒子一申祜官浙江知縣繼配蔣恭人出蔣恭人安徽撫軍蔣公文慶之女弟也讀書識大義歸師執婦道極勤謹師卒川東道任所恭人攜子奉柩還都未幾粵寇擾湘鄂蔣公撫皖時督兵大臣爲兩江總督陸建瀛帥師屯九江過安慶檄壽春鎮恩長同行蔣公爭之不能得及賊竄九江總鎮戰死建瀛扁舟返金陵安慶遂不守蔣公殉難先是蔣

自皖藩升皖撫太夫人年八十餘矣恭人憂之自京師往安慶省母言曰兄疆寄無可言母高年可居危地乎遂奉太夫人北歸兄子常紱隨侍抵清河邑人有曾入蔣公幕者來告常紱謂道路傳聞皖城已失撫軍退守廬州矣紱白恭人恭人毅然曰汝父頂天立地烈烈男子吾默計之死矣居數日行至桃源遇土寇劫掠一空暫留待捕恭人曰幸未驚老母區區資斧何足言遂行抵京後昆田進謁恭人爲昆田歷歷道之如此

王實夫墓志銘

宗稷辰

韓城王文端公以賢相名一朝其邑望爲朝野所重沒後二十年而公孫篤以甲科繼起世皆以重文端公者重之卽前山東布政實夫君也君有夙慧六歲能賦物成句文端公甚愛之以爲他日當亢王氏宗以硯賜之文端公

予告歸君始九齡聞祖訓者三數年公薨時君考合溪公已下世君與伯兄季弟孤露如寒素沈潛勉學經十餘寒暑遂爲道光辛巳舉人癸未進士人翰林官編修補江西道監察御史出督四川學政任滿召對殷殷以無忝爾祖爲訓自此益受

宣廟知尋調掌河南道稽中倉俸滿記名知府

簡授汀州守未幾升廣東督糧道歷署運使按察使事迭遷長蘆運使山東按察使甫一年進布政使三署巡撫以失察家人降運使又以失察運司受商人面封敝職居家六七年襄理西安城工殫心勸率陝省捐借事宜

賞按察使銜咸豐五年九月己丑以積勞患泄而卒年六十五沒後贈官如前官君高顓廣穎嶷嶷特立望之儼若難犯而其處心極慈爲政務持大體不事苛急其視蜀學以倫理課其行以經史文韻考其菽而尤重默經一試士之熟習十三經者皆得以自見由是羣用力於實學蓋源本文端公視浙學時節目爲多其爲郡守才五日卽籌修庠校城郭見興作乃去在粵先爲林文忠公所倚令監銷英吉利所繳煙土於海墘道光二十年番舶入虎門君亟籍省中遊手精壯盡爲我用人服其見機敏速君素善騎射尤能擊劍至山東頗究心武備於權撫日卽充閱兵大臣會海上多警先整飭德州滿營軍械受孔雀翎之賜乃遽以疏節去官而海寇侵登州及粵寇犯東境未得使少展其勇略轉令閒居故鄉勞做其精神於勸分之日躬瘁心困以沒是可惜也

君事重闈稱孝與兄弟相愛晚年數見凋謝恆憐然以悲經歲時不自釋虔修遠祖近宗之祠廟並建塾教族子厚恤宗支皆以完文端公之志文端遺書與君考所著皆手爲輯次刊行余昔於韓城邸舍晤君出以分惠知其孜孜於舊德者終身不忘也君考再娶於衛一娶於趙趙太夫人舉三丈夫子與前妣均受一品

封君配吉夫人前卒子一福徵庠生議敘五品秩女二適劉繼愷張祺孫二璞璫福徵卜於咸豐六年某月日葬君韓城北鄉孝義邨之南原涕泣致書以余與君同年舊好又先後官臺中志墓之文非余莫屬爰爲序而銘之曰

祖爲師臣孫作州伯恪承先型爲

國宣力性嫗厥民海南海東澤未竟施遺其惠風爾祖是望爾宗是亢厚其本根百世之慶仁人所藏里名孝義書此大綱以示來禩

江南淮海兵備道桂君墓碑銘

陳澧

君諱文耀字星垣其先浙江慈谿人祖鴻以廣東商籍生員改南海籍中舉人官安徽涇縣知縣父士梧議敘直隸州州同銜

贈封皆如君官君中道光九年進士改翰林院庶吉士散館授編修乞

假歸娶丁母憂家居七年乃還京充湖南鄉試副考官授湖廣道監察御史出爲江南常州府知府調蘇州府升署淮海兵備道告病旋丁父憂歸咸豐四年三月卒年四十八君聰明絕人讀書不屑治章句恆以功業自任處事精敏理紛制變應機立斷神思湛然默計天下大事殫心規畫咸得要領及羣盜肆擾益奮然有撥亂之志嗚呼君才甚奇志甚大惜乎未得施用而遽死也君自言服官中外能行其意者惟常州養流民一事道光二十七年洪澤湖漲總督開六閘洩之水所至田廬皆沒流民南渡江巡撫令蘇松常鎮太四府一州留養之諸府州少受人數君獨請受二萬人告吏民曰吾一府八縣縣率有二百餘圖八縣毋慮二千圖一圖率一千家二萬人按圖分之圖十人備其力以給之食以千家養十人則不費分其人則不生事皆大悅散去於是一府不見有流民其爲御史三上封奏留中者二不知所云也其一曰州縣有守土之責任重而權輕近者湖北崇陽縣湖南武岡州賊皆戕官城守弁兵不爲州縣用州縣束手待斃萬一歲歉民飢姦宄煽誘州縣不能剪除及大用兵力東剿西逃此滅彼起如昔時三省邪教之事則難善其後矣臣請州縣倣照軍民同知例兼轄營伍城守聽其節制知府

倣照兵備道例一律辦理奉

旨下部議部駁不行及粵西賊騷擾半天下州縣殘破如君言其告病
在家聞賊犯長江曰江南必敗已而江甯陷如君言又曰能禦賊者惟
山東巡撫李德已而賊犯山東不得入境如君言又曰廣東賊必起起
必於東莞君卒後兩月賊起先陷東莞如君言又曰世人恆憂河合於
江是不然河之南地高於北異時必北徙君卒後河決豐北如君言君
之才雖未施用觀其料事之明可知矣君又論古今通弊曰元氣剝削
紀綱隳敗又曰夷狄輕中國草野輕朝廷百姓輕官長商賈輕士大夫
嗚呼皆名言也澧昔與君同爲諸生坐同席出同行勸善規過情若昆
弟嘗問君曰我二人性情學術出處無一同者而獨相好何也君徐思
曰我亦不解也君今死矣三十年交情痛不能已雖然豈獨爲交情耶
竊爲天下惜此才也君二子均堤以咸豐五年十月葬君於廣州城外
銀坑嶺之原銘曰

有美人兮冰玉姿軀幹秀削微鬢髭清談雅謔妙解頤誰知腹有千熊
熊鬻轆腎腸光陸離熾熾素手理亂絲皎皎神劍剗蛟螭昂昂驥驥脫
勒羈巉巉砥柱不可移偉哉斯人天下奇造物將奚以汝爲埋之深山

海之涯千載悠悠誰得知他人不知我知之以淚濡墨書此碑

特贈太僕寺卿浙江布政使汪公神道碑銘

謝應芝

公諱本銓字衡甫世爲新安汪氏明萬厯閒由休甯遷常州至公九世

今爲陽湖人曾祖樂清縣丞廷梅

贈贈通奉大夫祖國子監生文耀

贈通奉大夫父國子監生筠

封通奉大夫母錢氏

封夫人公自幼神明迅發篤學如成人道光丁亥公年十八補縣學生

戊子鄉試中式己丑會試中式授禮部主事充軍機處章京三轉爲郎

中甲辰充順天鄉試同考官再轉爲光祿寺卿丙午充江西鄉試正考

官遷順天府尹宗人府丞己酉授浙江布政使先是英夷之亂

欽差大臣林文忠公則徐主勦而琦善主和疏以激變許文忠

上卽命琦善訊鞫時公直軍機不肯宣

詔大臣莫敢面奏頃之竟易前命公大喜頌

上聖明本朝之制凡制詔頒降皆大臣親承

指授而章京行之公直軍機旣久

成皇帝知公謹慎

特簡浙藩清釐積逋時吳公文鎔爲巡撫黃公宗漢爲按察使和衷共濟政無不舉公任布政使二年署巡撫三月嘗念

國家承平日久大率以財賈兵弱爲憂誠俾官吏無逋負則賦稅可減民自爲守禦則兵亦可裁富強莫大於是深服顧亭林州縣吏久任之說以爲能久任乃能實心爲民何至視官爲傳舍有如今日之弊欲有以救正之而慨不能行也夜分秉燭治官書輒太息流涕不自已

今上咸豐元年夏入都

陸見以二親高年多病陳情乞養歸浙人思公不置謂百年來清正無與公比公旣告歸徜徉泉石閒偕二三友朋商論經史抵掌成敗愀然有終焉之志嘗會飲於州中趙氏園亭酒半言及粵賊蹂躪兩湖所至城邑殘破民不聊生烽火日逼座中有歎息爲之泣下者公獨默然指池水言曰他日此處是吾死所也三年春粵賊楊秀清陷江甯連陷鎮江奉

旨在籍保衛用古保甲法鄉里獲安益欲團練義勇恢復鎮江以圖江甯然餉無所出黃公宗漢已巡撫浙江慨然許之乃收召江淮銳士製

造火器持一月糧期必克四年春公駐鎮江天雨愆期以二月甲午乘
霽登北固山俯瞰城中射殺執紅旗賊渠餘黨驚潰或忌而撓之遂不
克濟久雨不止知難再舉出私財散遣募士羣泣拜去是役也公經畫
幾半載往返鎮江凡二月而公憊矣巡撫安徽江公忠源起縣吏能兵
公莅浙時所識拔者也至是死難廬州吳公文鎔由雲貴總督調兩湖
死武昌公連哭之慟內傷失血奉

旨賞花翎用益悲感氣喘不止公爲人清癯廣頰鬚眉朗然外和而中
介自洵九卿爲方伯蕭然儒素於書未嘗一日釋手欲撰著者甚夥以
勤於國事未及成書可慨也已年四十五卒於咸豐四年閏七月辛巳
娶呂夫人早卒再娶卽夫人之妹側室劉氏子四學澄學溥學濬學沅
女三長適何餘幼公歿大吏以聞

上軫悼

特贈太僕寺卿

賜祭葬銀三百兩一子前蔭官至是又官一子祭文稱曰性行純良才
能稱職公葬某所新阡立碑刻銘曰
翼翼我公受知

宣宗秉節於越攀龍莫從

皇上孝思顧公嗚咽公拜涕零

聖恩罔極乞養來歸蒼狗南飛公奮而起鞭狼驅羆義勇之首曰黃學

川臨歿猶呼公心繫焉永永名傳於千萬年

安徽按察使豐潤張君墓表

吳汝綸

咸豐初安徽甯池大廣兵備道豐潤張君用大臣薦遷雲南按察使於
是洪秀全反安徽戒嚴巡撫蔣忠愨公請留君自佐君則上書言六事
蔣公以聞有忌君者格不用蔣公出君廬州使募軍而安慶陷

詔以君爲安徽按察使洪秀全既據金陵賊艘縱橫大江中安慶瀕江
而城新剗於賊城赤立無門闌埒郭無居人官無廨舍無寸兵半粟行
省僑置廬州矣君受事方以掇拾安慶殘遺救集還定之爲事未幾金
陵賊連艦上犯再掠安慶城北十許里有關曰集賢道安慶北出則關
要其衝君曰城做惡不可守吾且守關事聞

天子曰城做惡不與凡不守者比賊叩關不得逞遂拔城君逐之皆拏
舟去賊去君空其城不居還守關

天子又曰城做惡不可守守險其可然文吏猶持初棄城爲君罪竟議

新刊傳卷三十五
罷君官賊去安慶遂犯南昌南昌城守不下折而再趨安慶則君已去
集賢守關者不能禦

天子峻法誅之自是後呂文節公江忠烈公相繼死難江淮間無完土
於是人思君守關勞而謂議君者爲非君雖議罷仍署按察使是時安
徽扼塞數二關南則集賢東則東關東關者在巢縣界上賊自濡須入
巢湖以窺廬州則東關要其衝初君守集賢某率鄉兵守東關已而某
往來近縣擊賊總兵勤壯公玉山繼守之賊踞安慶分兵入濡須東關
不守君聞趨救關戰而傷退保於巢其後卒與玉山力復關守之廬州
之圍江忠烈公故與君善自東關召君赴援師薄城下奪賊壘而玉山
陷陳死君收殘卒屯近郊爲聲勢比援軍虜至將帥不相能城卒以不
救陷君亦謝兵符歸矣初君爲吏浙中久厯知景甯建德海甯桐廬仁
和四縣一州同知石浦廳厯擢杭嘉溫三府所至有績建德石浦皆以
丁憂去官桐廬溫州皆以攝他劇處不至在仁和海上用兵客軍過供
張辦驕兵奉約束維謹在杭州會嘉興縣民以賦糧倍經徙市戕兵役
巡撫吳文節公且徵兵江忠烈時合秀水上言苟張守往可無煩兵遂
移君嘉興至則縛豪民一人而亂定更定賦法黠吏束手吳公下其法

他府行之皆便又議海運當時不聽行後卒用君議至今他所興除利病甚眾尤盡心荒政既授安徽道員猶留浙振嘉湖嚴紹四府災浙人德君大吏多知君能及自軍罷歸道浙江浙撫強起君防徽州君則既以勞致疾矣竟卒於徽享年五十七咸豐四年閏七月也君諱印塘字兩樵由嘉慶二十四年舉人起家會祖嗣浚祖棟均縣學生父灼三世皆以君貴

贈如其官娶欒州田氏

封淑人有賢行側室某氏子六人佩經浙江知縣佩綸翰林院侍講佩紱浙江按察使經歷佩緒監生其二人早卒女七人其五人皆適士族其一殉難杭州以貞烈旌門一早卒君卒二十有五年乃卜葬於豐潤縣之八戶莊東方江淮鼎沸獨君與某率千百羸卒崎嶇於擾攘之際君每自東關往來廬州輒過予里舍或分道轉戰卒相遇矢石間往來並馬論兵相慕用不厭予謂古所傳堅忍負重者君殆其人自君罷歸安徽軍事益卒卒予亦展轉兵閒無所就久乃謀引去而君則既不究其志死矣豈非其命也君既葬佩綸以狀來請乃論次其終始俾歸而刻之墓道

江蘇布政使倪公墓碑

張希鈞

公諱良曜字孟炎號濂舫安徽望江縣人曾祖諱某祖諱某國子監生考諱某候選布政司理問百以公貴

贈如其官妣皆

封太夫人理問君篤於行義值歲大旱輸麥以賙餓者所全活不可計數又嘗捐錢萬緡築濱江隄以寓振貸請官治之而不有其功有子六人而公爲長公少從伯父教授君謨於鳳陽學舍教授君故阮文達公門下知名士也藏書號稱極富校讐之役恆以委公由是得進覽墳籍又益從教授君執友洪稚存鮑雙五諸公游聞識益擴年十六補學官弟子旋舉嘉慶癸酉拔萃科

廷試二等選授江甯縣學訓導舊時任學官者類耆年謹迂而公獨年少以明練強力能有所堪任重於上官道光元年俸滿擢知縣以理問君憂歸服除選授雲南宜良縣知縣調補廣西靈川縣又調臨桂以大吏薦除龍州同知又遷江西南安府知府調知南昌府事遂擢江蘇蘇州督糧道嘗權江蘇按察使又再權布政使前後任蘇松督糧道凡七年始公爲縣令至郡守所至以才能著稱吏民弭服於龍州誅土豪劉

志友兄弟二人於南安盡力弭粵東壤界之盜於南昌壹完復屬邑隄防郡無水潦之患及任蘇松督糧道而蘇松賦故爲天下劇其後重設海運益殷以鉅公入走運渠三治海運無毫髮愆失又相度白茆滸浦諸水道排決淤澱導蘇常二郡之水以入於海置石閘以時啟閉至今以爲長利蓋公凡所任官於職事無所不辦治廣西及兩江大吏爭推公以爲能吏而權按察時遇事變賴公力遏亂萌尤以聲最於吳中初設海運也糧艘水工以失業譁於巡撫轅舉城皇駭公故歲將漕運有威惠於其眾立召倡禍數人曉譬壹解西洋夷人以傳教爲青浦民所拒殲其數人大譟要致青浦民於辟且揚言不者將遏滬上糧艘無入海巡撫恐憂命公往公至則直登夷舟或尼之不聽當是時夷勢張甚伺公登發巨礮以迎海波震沸從者怛懼失色公夷然不爲動直剖示以曲直所居許爲責青浦民以示懲耳夷人遽折服青浦大驩而糧艘以無稽期速二事微公事幾殆江南疆吏益推其能又歲滿當遷由是遷甘肅按察使是歲咸豐元年也入

覲對漕事稱

旨會浙漕船滯復有

詔調補江蘇按察使卽治浙漕既蒞任而疾作力疾益綜諸務浙漕以濟居無何而粵賊陷金陵乃復以公爲江甯布政使截留漕糧若干石未以聞公與有責得

旨降調仍留治海運而公以劬瘁積久重寇亂起鎮撫防禦旁午萬端疾乃日益劇不可爲矣四年十二月十二日卒於蘇州春秋六十有三公配太湖張氏

封夫人子三某某官某某官某諸生女三人孫三人某某以某年月日葬於某所公所讀書甚眾耳目經歷輒能口哦生平無聲色貨利之者雖身歷顯宦而被服其養有如常時芻苴問遺一不及門始終服官四十年家無贏儲銘曰

公實穎茂擢出自少彬或其文瓊佩有耀出筦郡邑威德竝耀飾以儒雅厥聲彌劭周歷南服存膺遷調事處芬絲姦穴奧突公來披之如疢獲療駭機將發睽賜騰趨徐擢其芒瞿視驚掉祇勤所宵謹秉機要名聞洋溢四遠流照謂當益顯遠罹

嚴詔爲人受疵羣匪我召終其勤能

帝心燭燎胡遂實沒使走相弔萬代千齡永閱崖峭銘此豐碑惟德之

肖

河南按察使余君墓志銘

宗稷辰

咸豐七年四月二日河南提刑按察使司按察使仙圃余君卒於官年六十七其孤扶匱歸會稽之山下葬未定其季弟觀瑞馳書來請銘君故自幼與先兄仁圃同學後與余同入庠又同舉道光辛巳鄉榜又嘗約爲婚姻其爲童子以至試禮部雅相親厚今忽奄逝深惜戚故中失此良友也非余銘之而誰哉爰爲序曰君諱炳燾學名棠鄉舉名廷珍久之改今名字吟香仙圃其號也居會稽入山陰籍先世潛德力田考幼常贈公嘗服賈途遇窶人以負債鬻其妻心憫之傾所得資爲代償家乃復完歸而告元配夫人徐氏欣然聽其義是夕夢仙神送以佳子遂震而生君君早失恃贈夫人董育之極慈君留試都下教習景山官學連聞兩親訃又遭兄喪居憂大哀教養二弟及兄之子終身無閒若恐愛之不如父兄焉君旣以教習勞用縣令壬辰癸巳薦不得進乃奉檄入陝西初計補次需三十年乃三數年閒署中部令定遠丞卽補清澗邑在北山北寒甚治之簡易更以暇日教文學士士多向學尋攝蓋屋移渭南曲體民隱善治骨肉之訟俗爲變政聲翕然以卓異薦於

續編卷三十五
朝先是大吏倚君治盜禽挾刀黨復令攝貳定遠捕誅其匪醜未幾以
渭南災荒回任辦振民困爲蘇訪有凶回全得瀛者謀作亂偵其蹤躬
往禽之論如法林文忠公疏聞

宣廟嘉獎命引見既升定遠丞且加秩矣君又捐軍餉

命以知府先用迨銓懷慶守

今上召對詢回莊辦賊事謂汝親入賊巢乎備陳率眾入捕始末又問
能騎乎對曰入捕期速固以騎率也

上笑而壯之元年武陟以催科闕君往諭以大義卽解散明年聞粵匪
犯楚悉索兩助軍需

賜道銜復加優敘河北素壯佼君日集士民而訓練之以防北竄及寇
據金陵橫出上下江侵潁毫蹂歸德圍汴梁城不克破溫縣將偪懷郡
郡城兵僅三百君與河內令裘寶鏞選團勇得千人率子弟執戈登陴
與民固守時絕下死士斫賊營殺其驍悍渠目潛毒城外并使自斃賊
屢以地雷隳城君發巨礮拒之陷者亟築勢少卻一日雷雨中礮火蟬
集危急甚天爲反風賊自燔轉戰大敗氣頓阻然城中糧盡人日一粥
幾不支援兵至賊遂遁去蓋死守者已五十七日云君久困圍中事已

上徹

天聽記名用道員

賞花翎圍解進按察使銜擢陝西鳳邠鹽法道奏留軍營

特改南汝光道防楚邊數月

命爲河南按察使勦治禹密等縣聯莊會莠民懾服尋署布政司事擒賊張樂行擾歸德復帶兵剿辦身領一軍破雒河集卽解亳州圍而賊首潛入永城歸德再警君猶整軍援之乃領軍者遽退致賊東去會撫軍率師調回居守君行閒積瘁病肝風日加劇矣力疾從政者歲餘七年春請撫軍代乞病假

上允予兩月調理迄三月下旬痰湧不能語數日而革河南北之人皆

痛惜之君娶王氏

封淑人生一子桂生軍功

賜六品秩孫四人福清福渭福潮福濬葬以某年月日在某山某原余與君交好數十年未嘗見其習韜鈴知戎事自官關中勤捕盜稍稍事拳勇馳馬澗谷始爲林文忠所賞識於是嬰城禦寇出死力以摧凶燄使其人不亡當與勝袁並駕驅除而勛勞竟止於此豈非天之命之但

續編傳卷三十五
以河朔顯哉銘之曰

嗚呼仙圃蹇於文乃亨於武投以大難莫我敢禦全懷之壙兮帥宋之

武功未成兮神遽追叶昭令名兮窆鄉土忠孝之遺永無斃

裴府君家傳

施補華

公諱寶鏞字韶甫一字芍庵直隸河間縣人道光十二年進士二十二年選授河南延津縣知縣治有聲二十五年敘中牟治河功以同知用二十七年調知河內縣咸豐元年權知祥符縣二年復還河內用助軍饗加運同銜三年六月朔粵賊數十萬自會城渡河而西次日圍懷慶城中文武吏與居民七萬餘戶倉卒見賊不知爲計彗星見妖鳥鳴城以外火光燭天人心愈懼或請卜之公叱曰守土官義與城存亡卜不吉走乎擲其著於地有秣馬城下者公見之曰此走耳斬其馬計糧之數若干計民之數若干軍器之數若干選壯千五百人登陴力守戶出一丁分守各門陰以兵法部勒城中回民有謀亂者輒誦得之賊舉礮轟城公立城上指揮礮子出耳左右屹不動反以礮擊賊賊爲少卻自後賊日出游騎擊之卽退公覺其異曰將爲地道乎囚有作炭者公特出其罪令伏地視見氣如縷出於隙乃於城中央穴地置大甕坐以聽

之準聲所起亦掘地道掘愈遠聲愈近至能辨人語引水驟灌之凡破地道三十餘處賊亦隨破隨掘公登城地道發城陷十餘丈身埋磚土中如有掖之出遇黃衣賊持旂率眾突煙燄以上手巨磚擊之中其顛眾駭退塹拒之然而泥沙塞耳目猝不可視聽民爭舐其目日復覩兩耳遂聾民請休公不顧地道再發再塹之先是料軍糧慮貧民乏食貸之富戶書數於冊賊退徵償之至是糧亦盡援糧外至又遇賊掠城中愁急旦暮且饑潰公飽肥犬斃之潛棄城外賊割其腹而嘻又以城堅不可拔慮援兵且至內外夾擊一夕遁去凡守懷慶六十日以功擢知府戴花翎加道銜授懷慶府知府母喪去官遂老於家以從子德俊貴

賤封資政大夫居鄉多善行有賀爾昌行狀在茲不載載其大者卒年八十一入祀河內名宦仲弟書懋諱寶芳少有氣略中道光二十三年舉人教諭甯晉咸豐三年賊破臨洺關甯晉大震知縣他出遂主城守賊退擢州判戴藍翎十年需次河南會城以南羣盜無數散則耕聚則劫緩則走急則鬪民賊相混不可爬梳陳大僖者據霍莊等寨巡撫聞君之守甯晉也檄知尉氏縣旋調正陽二縣當賊之衝君能練鄉兵屢

與賊戰挫之陳大僖平擢同知換花翎在官八閱月未嘗解衣臥勞卒
贈知府子德長字文延山東吏目偵賊霍莊被獲死之

子雲騎尉世職

施補華曰咸豐二年正月粵賊陷武昌方船載兵絕江東下陷安慶陷
江甯軍行千里如無人焉封疆大吏不能為旬日之守以待援師何論
州縣官乎當是時大江南北能以城捍賊獨一六合知縣溫紹原耳賊
遂謂天下不足平分兵渡河而北一趨山東一趨河南趨山東者
欽差大臣勝保公滅之高唐州河南城守自公始賊以少挫焉其後數
年今山東巡撫張公知固始城守八十餘日會合援兵殺賊數萬賊大
震駭遂專擾東南無意北嚮至今兩河父老言河內固始城守事如居
旂鼓閒指揮號令也嗚呼壯哉

張賓嶠墓碑銘

陳澧

君諱祥晉字賓嶠詩人南山先生之子也道光十八年舉人會試屢不
中以海疆捐輸議敘員外郎分發工部營繕司行走選刑部江蘇司員
外郎轉江南道監察御史咸豐元年河決豐北君奏請江蘇漕糧由海
運以所省運費濟河工而以滯留漕米三十萬石振災民

上從之授刑科給事中廣西賊走陷金陵君奏言廣西用兵以來咸曰無將才臣以爲將才惟謀與勇今日之急以勇爲先督撫養尊處優距賊數百里凡所調遣下一札行一牌其事遂畢惟靜坐以待稟報節詞以作奏章此豈能滅賊者今軍營諸將最勇者提督向榮乞
皇上取畏葸諸將置重典而命向榮爲統帥且令保舉勇將則士卒踴躍用命矣奏入

上命向榮爲欽差大臣賊至河南京師未設備君與同官條奏言京城外宜立營城內宜編保甲京城及通州米倉有在城外者宜先支放或運米入城江甯揚州宜分兵選將入衛京師奏入

上命設巡防處已而賊至直隸君奏言賊距京五六百里若待直隸總督及軍營摺報恐誤事機請飭州縣探賊在三百里內者兩日一報二百里內者一日一報一百里內者一日兩報先頒格式使州縣填寫由順天府以聞

上從之由是京師防衛嚴密偵報迅速君有力焉授廣西左江道君出京遲緩被劾革職是時逆賊李開方據高唐州之馮官屯科爾沁郡王僧格林沁以重兵攻之不克君詣軍營言曰此距徒駭河百二十里穿

渠灌之可滅也王問曰君能穿渠乎曰能幾日渠成日十日王曰十日賊覺遁矣限五日君唯唯而出至營門王下令限三日君大駭急集夫役執令箭馳馬大呼晝夜不絕聲眾役併力三日渠成水大至賊不得出遂乞降王奏復君官發江蘇候補夷寇陷廣東省城君欲歸省父母求上官爲催餉委員僞爲賈人附上海輪船四日而至見父母於城西之沁村又潛往謁督撫欽差謀殺夷復城時方盛暑感疾卒於省城之西關咸豐八年八月一日也年四十二妻金夫人繼妻戴夫人子四皆金夫人出兆甲舉人工部候選主事兆耆先卒兆鼎年十三中副榜貢生時稱神童兆豐尙幼兆甲自京師奔父喪歸而祖父母相繼卒乃葬祖父母而以君耐焉請余爲銘嗚呼君爲余門人自其童時至其死數十年情事何可勝道惟一慟而已銘曰

敏於謀而仕中蹶矣銳於事而身早折矣父母痛子相繼而沒矣君死有知目不瞑而淚血矣我書此銘心愴絕矣

江蘇按察使吳公傳

蔣日豫

吳公其泰字希郭生有夢橋之兆因自號橋生先世自江西遷商城明正統時有思民者輸粟振飢受詔褒美復自商城遷固始是爲固始吳

氏始祖積行傳世日益顯昌至公祖某官廣東糧儲道父某甘肅甯夏府同知公體承先德益以濟物爲懷迨甯夏公喪家日落授徒里門僅給朝夕猶罄典貸爲父執償官逋嘉慶十八年舉於鄉二十五年成進士授編修改江南道御史居四年充會試內監試管理五城街道協理京畿道各一直言盡職受

成皇帝知道光九年簡授浙江湖州府知府故事知府治行優異得奏移首郡公莅事纔十閱月調杭州人尤重之遷江蘇蘇松太道所屬秋禾敗雨流民載涂公首捐俸金養其老弱收其遺穉擇壯有力者開濬白茆河貸諸工又慮食眾穀價必騰復議廣勸輸通商糶併購粟作糕糜啖民民以罕而甘之凡隱積釣利者計悉沮全活幾三萬人尋謝病歸越三年起授廣東肇羅道調江西糧儲再調江安未行值粵匪犯江西巡撫張公芾夙倚公才奏留防守省城公慷慨登陴殫誠共濟念城外廩米轉運不及請先焚之焚畢賊至無所掠食遂穿隧及城足實硝磺引火然攻名爲地雷雷舉城裂空飛公守章江門適當其衝常冒煙燄力禦守士提土石隨墮壘築屢危而安及江公忠源督援軍至賊始退江公勇略冠世獨心折公每按視布置商推機宜未嘗不歎許深至

也初調江安兩江總督連檄催赴公以諉難引避非誼也誓與城存亡命家人皆預爲死計凡九十六日卒解嚴而去咸豐三年遷江蘇按察使時粵匪已陷江甯諸郡縣徵兵數萬芻糗浩繁公至卽兼理軍儲案牘環呈心籌手判訖終任獄旣無濫而兵食亦充吳江民陸孝中聚眾抗糧巡撫覺羅公吉爾杭阿欲馳剿之公謂兵出適以速變請自往捕誅孝中及其弟姪數人一方胥靖五年遭母喪歸歸一年卒公洞識政原務持大體所治必先學校之士凡被延接後悉成名而豪彊必鉏無稍撓居家敦善弗倦建同生莊義田以贍族整譜系備規條論家法者翕然宗之遇故舊有恩待以成立者恆十數而於門內昆弟尤孚愉婉篤雖屢殫已財不卹也詩文咸名家區其類爲一蒂十七實齋全集如千卷又熟於形家言輯地理纂要等書母喪嘗躬行崖壑詳審卜視果得吉兆於閭家大莊而葬焉其誠求必應類如此

論曰畏難之人其私僅知有身其傲寢至於廢事聞公未顯時歲暮家寒弟妹剋期婚嫁鄰人咸爲公慮不給覘之則已具禮矣爭訝問故曰財乏宜心到人乏宜身到吾非它有能也嗚呼充此運量雖天下無鬱不申無生不遂亦易易耳詎尙有窮疾呼怛之民哉惜乎未竟於設施

也

續碑傳集卷三十五

續碑傳集卷三十五

續碑傳集卷三十五

續碑傳集卷三十六

江陰繆荃孫纂錄

咸豐朝監司三

沈仲怡家傳

郭嵩燾

君諱棣輝字仲怡姓沈氏浙江歸安人曾祖某祖某考某皆以公貴贈通奉大夫沈氏故巨族世有顯仕君幼穎異有至性年九歲而父旅死袁浦兄廉往奔喪君固請偕會祖妣嚴太夫人祖妣吳太夫人憐之戒曰兒當留侍我稍長從族兄鎬邳北通判任方築堰備河患君察其溜汎督工下榘隄堅溜伏因言治水當適其性勿過其衝治民亦猶是也由是人知其才河帥麟公延請司章奏援例以通判分發廣東署雷防同知補永甯通判歷署廉州肇慶府兼護肇羅道清英土寇鄧南保等稱亂佛岡陽山君勦平之以功賞花翎補韶州府知府廣西賊李士奎劉八顏品瑤黃春晚等剽掠南甯橫廉之閒踞欽州之那彭靈山之林墟爲巢穴眾數十萬勢張甚調君署廉州府事集兵得二千人戒曰賊方易我又屢勝而驕驕必無備我爲諸君襲破之潛師兼程入那彭賊巢倉卒出不意賊驚潰君以眾

薄之殲焉因引兵急趨林墟分所部千人由大道多張旗鼓進擊自將一軍由閒道出林墟後賊傾巢出拒而君已由閒道入踞其巢遂躡賊廣平大寺平吉悉克之博白劉八者復率其黨數萬襲攻廉州君在欽州聞報急馳遇賊五里亭戰稍卻君大呼曰賊以十萬眾薄城退卽全城俱陷矣今日之事有進無退斬先退者二人兵勇皆奮有楊牙者手大纛陷陣眾繼之賊大潰廉人具鼓吹迎道左婦豎爭識君面傾城來觀道路填塞肩輿不能行望見君羅拜曰公來活我留十餘日追勦劉八餘賊於沙河有馮子材者君知其沈毅善戰招撫之賊勢益孤而子材累戰功至廣西提督爲時名將由君收用之也久之賊復竄靈山君設伏早禾涌伺其半渡擊之賊盡殪劉八跳而免君卒生致之五黃山並其渠黨吳晚阮晚皆斬之西寇悉平升授高廉道時兩廣總督徐公駐高州督勦羅鏡凌十八諸匪旋奉命赴粵西勦艇匪檄君取道北流鬱林至潯州上游會勦而以舟師截梧州君至潯州二十五里蒙墟賊艘三百餘環攻潯城勢危急君遣卒梯城入告援師之至且約期會戰潯州兵有難色左右亦謂君賊鋒方銳無遽進君怒曰吾與賊奴搏戰數十甯是之懼耶急引兵挑戰沿河

設伏邀擊則縱火焚其船日夜不休賊怒登岸索戰君以偏師截其歸路大敗之賊宵遁君急檄水師迎擊而上躬率輕騎追躡賊前後爲官兵所乘沈其船無一脫者

賞加按察使銜會徐公授欽差大臣督辦湖南軍務檄君參軍事與沈君映鈴號大小二沈事皆取決焉賊旣陷武昌犯江甯徐公罷歸兩廣總督葉公檄君回粵辦理軍需明年補雷瓊道未逾年而陳開之亂作陳開者福山博徒也咸豐四年三月倡亂佛山僞號大甯而省北何子海朱子儀豆皮春李文茂等各以眾數萬應之自石井石門金山官窯北接福山爲犄角環逼省垣旬日間反者四起連陷數十州縣城以外賊壘相望道路梗塞逆首陳沈瀧屯省河南水賊關巨何博奮等海艘數千阻河絕外援葉公檄君總辦軍務都守以下悉聽節制適肇慶協副將崔大同戰沒人心恟懼公選精銳四千人集帳下令曰坐守待斃孰與出戰爾等敢死者從我殺賊眾皆奮君分兵爲四隊以一隊出小北門躡賊二隊當前衝分駐流化橋西山廟張兩翼伺之而以一隊伏城中備策應令前隊伏健卒深林覘賊所向又分其軍各數十人爲一隊多張旗幟以疑之賊四面薄城官兵四出相抵城上發巨礮助之賊

驚反奔城中兵盡銳衝出諸伏兵齊起賊大奔自是不敢薄城相持六
七月而河南陳沆瀧復約水賊撲城公曰事危矣吾當與決一死戰自
率千餘人渡河沈舟絕回顧攻小港橋賊營竟日不能下君望見賊後
營火大呼曰賊後營破矣眾皆奮起斫賊壘短兵接賊棄營潰走追至
沙河斬殺以萬計蓋賊後營不戒於火君得以閒乘之都司黃彬以舟
師守省河與水賊相持戰數不利時有把總蘇海熟悉河道君令添造
礮船募驍勇爲水卒廉知有何高漢者來應募賊何博奮之弟也呼至
謂曰爾與賊爲兄弟吾不爾疑但能殺賊予重賞何高漢伏地戰慄曰
願盡力君卽令守大尾港口而東路賊艇又以閒攻襲獵德礮臺君督
舟師游擊賊終不敢入踞省河危城獲全君以佛山爲倡亂區鎚重精
銳所集佛山破餘匪可一戰而定乃調精兵三千合舟師與賊戰臨海
廟是日大霧彌漫塞路眾懼止君君曰賊以霧不意我出驚亂破之必
矣進復瓜步礮臺焚疊瀆賊營賊悉眾出拒君執桴鼓督眾前手刃數
賊賊大敗次日分兵八路攻佛山賊懼乘夜浮海竄九江遂復佛山急
分兵守要轄部署甫定而賊已糾餘黨十三路來犯君亦分兵十三路
應之時佛山人心未定新附者尙懷反側君明賞罰以安舊部布恩信

以結新軍復分兵勦官窰小塘蘆苞等處以次蕩平當勦佛山時水賊
鯉魚仔乘隙以礮船五百由石門入距城四里君聞警調舟師赴援黃
竹岐與賊艘遇下令各舟齊舉礮碎其巨艦而水寇黃幅何博奮等艘
尙數千環泊大石陳頭獵德檣帆四集君曰我師孤注也可勝不可敗
吾當併力攻大石使賊首尾不能自顧眾曰如約是日東風作君曰可
矣麾舟師四出撫蘇海何高漢背曰成敗在此一舉何高漢揚帆上入
賊水寨兵船繼之礮火蔽天君乘小舟往來策應而何高漢入賊陣奪
其首首巨艦以歸斃賊數萬君收兵東向餘賊悉揚帆由獅子洋遠遁
賊黃幅者尙以戰艦千餘泊潭州自潭州至梧數百里皆賊君乘流由
蓮花山進勦距賊數里命下旋以長龍艇數十伏舟後賊舟更番迭出
擊我師君張蓋坐舟中指揮自若不爲動徐曰賊以舟連營可火攻也
手揮長龍艇出乘流縱火海風驟起賊惶遽斧纜而旋纜交加急切不
得脫火賊舟幾盡賊大潰是日復順德次日復九江鶴山容奇陳村等
處君卽自梧取道赴北江復清遠英德抵韶賊聞卽解圍竄寇平授廣
東按察使明年擢貴州布政使而君已以軍事積勞病且憊其年五月
遂卒年六十有四

天子聞而憫焉

詔以布政司軍營立功後病故例賜卹

贈內閣學士銜

賜祭葬君少慷慨多大志讀書不爲章句博覽史籍沿革興廢治亂利病之原及人才高下得失燭照數計熟於胸中尤善讀孫吳兵法所歷州郡考求險要阨塞論其戰守治軍明賞罰均甘苦當事不避難好謀能斷佛山陳開之亂土寇蜂起城以內賊黨環伺不可辨析人岌岌不自保公私埽地無餘兵食兩窮君以一身鉅細兼綜出則持刀殺賊入則握筭籌軍實人皆曰故督葉公靜鎮持大體成敗利鈍取決俄頃挈提綱維俾無傾覆翳君之賴嫡配劉夫人先君卒妾黃氏連氏子三長金鑑候選同知次金昆分發廣東補用同知劉夫人出三金潤承蔭知州連氏出女六孫四恩湛恩溥恩滂女孫二

論曰沈君吾耳其名久至廣東觀其所設施而歎其才天下之需才急矣強者治軍旅幹者理庶政苟人舉其職焉飭法齊政靡精以思疆力以行一軌同趨明作有功天下之亂其可以弭沈君沒蓋十年吾不及見之世變相尋財殫兵驕天時人事之推移日靡月銷而無有終極追

求沈君之遺事流連太息想見其為人孔子曰才難諒哉

又貴州布政使沈公神道碑銘

陸心源

咸豐六年五月丁巳朔十四日庚午廣東按察使升貴州布政使沈公

卒於位兩廣總督葉公名琛廣東巡撫柏貴公以聞

敕部照軍營病故例議卹

贈內閣學士銜

賜祭葬如例源與公同里聞公功在兩粵以未得見行述爲恨同治元

年公之子金昆筮仕廣東爲同官出公事狀請銘其神道之碑源何敢

辭案狀公諱棟輝字奏簾姓沈氏浙江歸安人曾祖澤祖作梁父榮鏡

皆以公貴

贈通奉大夫曾祖妣鄭氏祖妣嚴氏妣吳氏皆

封夫人道光二十二年公始納貲爲通判試官廣東旋署雷州府同知

補廣州永甯通判擢黃岡同知累功升候補知府

賞戴花翎署肇慶府護肇羅道事補韶州府知府咸豐二年署廉州府

事時賊李士奎顏品瑤黃春晚等踞欽州之那彭靈山之林墟不數十

萬擄掠及城下城門晝閉公至人心稍安賊狂於屢勝不設備乃簡精

卒二千人出不意掩入那彭殲之急分千人由大道多張旗鼓趨林墟
佯以誘之賊空壁逐我軍而君已自將千人自後入其巢矣連克旁近
諸賊壘博白賊劉八伺閒襲廉州公馳還率左右健兒數百前驅遇賊
五里亭眾欲退公曰賊未知我軍虛實退則禽矣令列陣以待賊望見
公旗相謂曰老沈也疑有伏稍稍引去我軍呼譟乘之賊大潰廉人具
鼓吹迎道左婦人爭求識公皆羅拜曰公來活我休兵十日而進又殲
之靈山早禾涌追至廣西橫州斬劉八廉州平時兩廣總督徐公廣縉
督勦潯梧艇匪以舟師駐梧州扼賊東下而檄公將步騎出鬱林援潯
州軍次蒙墟賊環攻潯州城甚急公遣卒梯而入約師前以火箭射賊
舟分兵伏兩岸賊登公麾軍縱擊城中亦出兵接應大破之賊順流東
走公督諸軍窮追水師自梧州邀之沈其船無一脫者屍橫數十里論
功晉按察使銜會洪秀泉自粵竄楚
上授徐公爲欽差大臣督師勦賊檄公從征時粵軍擊賊屢捷公奏記
徐公謂賊勢已蹙若大帥親臨督戰諸將氣益奮可一鼓平也徐公猶
豫不能決武昌陷賊遂不可制嗚呼當時若用公言何至東南糜亂天
下騷動乎先是已奉

旨調授廣西左江道及徐公就逮廣督葉公以公熟粵東事奏請開缺留東旋補肇羅道四年署廣東鹽運使而陳開之亂作陳開者廣州匪首也其黨以紅巾裹頭倡亂佛山偽號大甯羣賊何子海豆皮春李文茂等應之踞石門金山官窠爲犄角連陷數十州縣環省皆賊壘聲息中斷賊渠陳沈瀧屯河南岸何博奮海艇千餘踞河公以運使總軍事選精銳四千以二千分駐流化橋西山廟爲兩翼以千人伏城中千人出小西門分布要害多張旗幟爲疑兵賊四面薄城城內隨抵禦賊中礮陣亂官軍隨而擊之斬級千賊自是不敢近城圍至十一月未解賊艇益逼公謀於眾曰今外無援兵內無積儲聞賊中因爭食內攜急擊不可失乃自將千人出攻小港橋賊壘日晡未下忽見賊營火起大呼曰賊破矣士皆奮無不以一當百克之乘勝進攻佛山至臨海廟大霧對面不見公曰賊以霧不虞我軍之至攻之必克天贊我也鼓行而前連戰皆捷遂復佛山忽報東莞水賊由石門直犯省城公反救至黃竹岐賊船數千四望如蟻不見涯際而我軍纔數百艘賊又居上風勢危甚公禱於南海神俄而風反公撫裨將何高漢背曰勉之成敗在此一舉大丈夫立功報國之秋也何高漢駕艨艟當前衝入賊陣碎其乘舟

餘船成列而進礮聲殷天大破之殺賊萬餘俘數千人溺水死者無算
奪賊艘五百危城獲全又分兵殲賊黃幅於潭州焚其船幾盡五年復
順德清遠英德賊圍韶州城年餘聞援兵至遁湖南廣東北路悉平擢
廣東按察使時公已積勞成疾六年升貴州布政使未赴卒享年六十
有四公少有至性九歲贈通奉公卒於清江哀毀如成人與兄廉友愛
彌篤至老不衰爲人僮多智豪傑自許明習時事長於應對始游淮
上爲記室奏記督府條上治河十二事識者歎爲知言及晚年以戰功
著偁廉州之捷潯州之捷省河之捷皆履險犯難轉危爲安迄今粵人
言之尤勃勃有生氣嫡配劉夫人先君卒妾黃氏連氏子三長金鑑候
選同知次金昆廣東補用同知劉夫人出三金潤蔭知州連氏出女六
長適浙江候補知府馮譽驄次適廣東候補從九程崇墉三適翰林院
編修吳嘉善四適候補主事楊恩海五六未字孫四純江蘇候補通判
恩溥恩澂恩沛女孫二咸豐九年四月某日卜葬於湖州府歸安縣楊
里村之原夫人劉氏耐焉銘曰
漢佗故封往在陽九蝨賊內訌公以文臣指麾三軍廓霾摧氛爰奠南
服神在疆場德在尸祝我銘幽藏文無溢詞以貽後嗣

王壯武公別傳

李元度

王公諱鑫字璞山湘鄉人年十歲母病疽甚劇公吮之顙天乞身代數日瘳尋從羅公澤南遊二十四補弟子員咸豐二年粵逆犯長沙公上書知縣朱君孫詒請練民兵討賊朱壯之令與羅公募鄉勇教練屯縣北馬坵埔防縣城明年春巡撫駱公命帥三百人擊衡山土寇追及安仁滅之五月擊桂東賊未至賊走追及龍泉大破之師旋察得桂東積盜百餘人悉誘禽伏法七月廣東賊自樂昌陷興甯公簡死士百人疾馳三晝夜未明薄城鏖戰盡殪之復其城初保縣丞晉知縣及是遷同知直隸州知州

賜戴藍翎會賊攻江西湖南援師失利死事者多公親舊公憤甚謁侍郎曾公請增軍殄賊曾公令稍增募公遽募三千四百人曾公以進驟而費繁檄令裁省公缺望請併撤歸駱公閱其軍可用汰留二千四百人公令軍士足各縛鐵瓦習超距又以意爲陣法左右隊魚貫分兩行鼓作左馳右右馳左三馳而圍皆持滿外向再鼓之左右馳復其伍相向格鬪左起則右伏右起左亦如之三起三伏乃變圍爲方後軍分左右出蛇行繞攻前軍三合而退前左右軍皆然當嚴鼓時旗周麾卒周

馳圍聚爲城郭疾如風雨公手赤幟自校之四年二月賊自武昌上犯入岳州湘陰及靖港分黨陷甯鄉公敗賊靖港適訓導儲君孜躬亦擊敗甯鄉賊賊下竄公追及岳州未幾曾公親帥水陸軍抵岳三月公獨進剿崇陽通城師抵羊樓岡驟與賊遇前軍失利退岳州賊躡蹤至曾公遣部將楊名聲鄒壽璋等禦之皆敗潰賊圍公城內糧盡殺馬以食曾公遣戰船迎公得脫城尋陷死者千餘人坐輕進失利削籍賊仍由湘陰甯鄉竄陷湘潭四月朔水陸軍大破賊於湘潭賊由甯鄉下竄分黨自易俗河口至石潭取甯鄉間道公時在馬坵埔急起截擊追至通湖橋賊皆落水死旣而駱公令帥勇五百人防郴州道平嘉禾藍山土寇會廣西賊萬餘人嘯聚桂林地接江華之嶺東巡撫檄公赴江華與守備周公雲耀協防閏月賊犯江藍廳之錦田擊走之九月恭城賊竄永明之桃川灌陽賊圍道州州牧馮崑禦之糧且盡公及周公赴援屬疫作僅簡三百人自隨戰竟日賊敗遁公策賊必乘虛襲江華與周公晝夜馳百四十里待賊至迎擊大破之進擣桃川出龍虎關破恭城賊於栗木街回擊甯遠藍山圍城賊圍悉解而江華永明賊復大至公回駐道州兄勳率五百人來會復破賊龍虎關分軍駐錦田嶺東備粵寇

又削平甯遠藍山嘉禾諸醜類南鄙略靖公復職

賜戴孔雀翎五年春逆渠朱洪英陷富川江華永明大震公及周公往援屢創賊會僞鎮南王胡有祿自連州入楚境與朱逆合攻永明公與周公協勦設伏敗之功最擢知府賊遁出龍虎關陷灌陽尋竄全州竄陷東安公與周公進攻東安城自四月至七月杪血戰數十次陣亡三十餘人受創四百二十餘人乃拔之賊竄全州亡何胡有祿掠東安祁陽界公敗諸桐子山越日禽有祿餘黨踞四明山又追殪之

詔以守巡道用別賊何祿自宜章陷郴桂及永興分黨陷茶陵將繇耒陽犯衡州巡撫檄公守衡命勦增募千人公以五百人駐耒自帥千人攻桂陽再戰復之餘賊併踞郴城凡數十戰乃復遁者尙萬人公會鄉團追勦十二月五日戰黃沙堡追至兩廣墟賊方食官軍乍至奪其食而殲之先是朱洪英寇新甯爲邑人劉公長佑所敗竄永州界周公雲耀連敗之及回粵復糾黨來攻永明知縣逃周公力戰死城遂陷方公之攻郴也逆渠蕭元發率賊七千有奇攻桂陽爲鄉兵所敗竄入甯遠九疑山參將蕭公永年追擊遇害遂陷江華與永明賊相犄角公進戰復永明六年正月復江華窮追至連州境盡殲之朱逆跳而免二月戰

西岸三月屢捷於陽山賊竄英德之大灣

詔以楚境肅清

賞四品封典當是時軍中瘴疫作死亡相屬公亦積勞思稍假休沐而江西州郡連陷羅公澤南戰歿武昌李公續賓馳書約公綴賊上游公卽投袂起轉戰崇陽通城通山蒲圻界復其城斬逆首張庸忠陳華玉敘功加按察使銜七年春奉

詔援江西公自是屢奏奇捷竟以勞卒軍矣初官軍水陸圍吉安其攻臨江者亦掘長濠因賊逆渠胡壽階何秉權率數萬賊來援據水東與城賊夾江相望公至沿贛水而南自三曲灘濟壁水東東南山上賊鼓譟乘之公方眠大樹下欠伸徐起部署擣鼓登望樓令士卒俯首結壘仰視者斬賊大疑不敢前稍進士仍結壘不輟俄而山後一軍出賊背賊遽退望樓鼓發士投畚操戈大呼馳出左右伏兵齊起斬秉權蹙其左軍入水餘賊走入水東壁眾請具餐公曰今日不克水東不遑食也遂揮軍擣賊壘都司易普照窺壘孔中鎗死眾奮曰當爲易將軍報仇爭入壘殺賊數千壽階遁五月賊自萬安屯藤田將出樂安解吉安之圍公與遇於流坑壽階忿前衄糾黨數萬自甯都據沙溪出藤田後

公掩擊其前鋒於陂頭復敗諸沙溪越日賊悉銳犯藤田公先擊其左
自帥死士百人擣其右賊崩奔再蹶之瑤嶺嶺險狹賊悉墜巖洞腹碎
首以死遂禽壽階是役也兩廣凶悍賊俘斬殆盡閏月賊自甯都出數
萬人據永豐之韶源冀援吉安公以千二百人轉戰屢敗之追及甯都
之釣峰賊爲背水陣旣敗盡沒於水師踐積屍以渡斬僞將軍蕭復勝
復破賊於古夏再破新城賊數萬於東山壩斬僞總制張宗相其時僞
國宗楊宜清楊輔清等憤其眾屢衄糾黨十萬有奇據廣昌之頭陂誓
與公決死戰傳令前者卻後則刃之公偵知喜曰賊散則難圖聚可一
戰殲也乃勒兵大戰公先馳馬陷陣壯士從之呼聲震林樾賊大潰逐
北六十餘里斬級萬別遣將復樂安公自渡贛九日中大捷十有二
皆以寡勝眾賊望見公旗幟輒膽掉呼爲王老虎士民鼓掌歎咤牛酒
相屬於路於是江西兩湖三巡撫均以狀聞

賜號愛什蘭巴圖魯會吉安軍敗丐援公密令鄉團張已幟僞爲趨建
昌狀而潛返藤田吉安軍氣復振七月賊自宜黃窺樂安圖出示豐解
吉甯圍撫州賊亦來會公抵樂安誘賊於城下敗之明日再敗之於崇
仁太平市又明日大勝於林頭賊用騎兵數千突陣公誡藤簾軍俛首

砍馬足自領精銳橫貫賊陣斬級數千獲馬二百匹俘八百人會疾作返樂安數日卒時八月四日也年三十有三

優旨悼惜贈布政使

敕江西湖南建專祠

子諡壯武

卹廕如公式公貌不逾中人膽力沈鷲負氣好奇用兵亦以奇勝疾馳掩捕嘗出人意表於風雨險艱一無所阻御眾嚴而有恩軍暇輒令讀孝經四書士卒化之嘗追賊乏食掘民間山諸各投錢於穴償其值民閒爲立生祠嘗自憾用世太蚤學未充優禮文學士如不及甯遠張老人者年百十有八矣貧不能自存公造其家厚卹之爲妻子婦比旋師經其地老人已抱孫矣乃以封公生日偕老人及賓佐登九疑張宴作樂遙爲親壽公以久違子舍語次欷歔老人執爵言曰公慎自愛第患功業弗建爲親恥耳服勞奉養抑末也眾聽其言公所著有練勇芻言陣法新編尺一偶存

贊曰公與曾相國同里開相國檄令滅竈蓋未深悉其能也不且舉國以聽矣公自是別爲一軍垂翅後折節自勵卒能出奇兵以寡克眾每

變益上能者固不可測哉士有青雲之志不甘附驥尾卒顯名天下不
尤足壯耶然觀其自憾用世蚤未竟所學公其非挽強鳴鏑中人歟

記馬布政事

徐宗亮

咸豐戊午十一月予遊楚中鄉士大夫爲言前布政使馬公之賢予心
誌之蓋公性伉直自喜不甚拘繩墨至於風教倫紀所關則持之甚力
不以死生利害動其心其澤被於僚屬士民者不可殫述襄陽城守一
事尤赫赫著名於時初武昌漢陽之陷賊也總督官文公由荊州分三
路進剿公以布政使駐襄陽總理軍需局時提督標下兵多出征者其
留守率老弱輩土賊乘閒起欲爲賊應遂犯襄陽報且至文武將吏爭
詣公請去公慨然曰襄陽重鎮也吾與若登城巡視可守則共守之如
不可守吾當以老命報

國他非所知乃大集士民決去守而召其三子示於眾曰吾宗宜有續
者以一子歸其二子存亡視城與我而公子咸稽首涕泣願以死從於
是士民大呼感泣一時從公登陴者男女凡數千人軍容甚盛初賊意
襄陽無備及攻之十日不克輒相驚曰此中有人因築長圍困之會官
文公復武漢遣兵赴援凡再至戰敗而退士民大懼公晝夜居城上從

容慰語無幾微不自持者人心乃安已而援兵大至賊燒營而遁公去之武昌仍兼理軍需局事時巡撫胡公林翼有鄉人從軍者私假令索金二千公廉知其情啟胡公自治胡公領之公佛然曰若本局有如此人吾早殺以警眾矣甯復伺人顏色耶趨下堂去胡公亟起謝之而置鄉人於法嗣公以年老乞休當事爭慰留曰固知公老不任事特留公在此使吾輩時有所警耳而公歸志甚決再四請遂為報可至今楚中士大夫猶以不獲顛留為恨公名秀儒乙未進士山東安邱人

江西按察使鄧公家傳

李元度

公諱仁堃字厚甫武岡人曾祖添昇祖茂相從九職父友煊州學生皆以公貴

贈如其階公三歲時嘗戲疊錢為樓堞狀問之曰象城郭也十六補諸生尋食餼道光乙酉充選貢

廷試高等以知縣發四川權知梁山禽囑匪渠置諸法將受代有以五百金為壽求飢法者公叱之去明年權江油旋權洪雅辛卯補綦江大水壞城公捐錢千貫倡振遂醵金修城周百二十有二堵築城百二十丈

詔加知州銜又重修學宮試院進學子課以文藝又增設賓興義卷以
廣厲之調富順士民牽衣泣送有走數百里者綦鄰邑南川民被怨家
以謀逆告川東道下公察治公白其誣而別鉤得貴州仁懷縣民穆繼
賢乃真逆徒也密白當道牒仁懷令令諱護之公歎曰不及十年綦必
有事事必由仁懷乃鑄巨礮三備城守戊戌秋繼賢果據方家溝叛滇
督伊里布公征之檄取綦江巨礮夜擊賊營遂破賊後二十五年當同
治壬戌粵逆石達開竄蜀圍綦江城綦令急發巨礮遂以全城綦故有
公生祠至是人益謳思不置云馬邊夷蠢動官軍進征檄公治饜餽夷
地寒夫役多凍死委道路公捐施棉衣五千領事竣有
旨賞藍翎旋舉卓異庚子以憂歸公之在蜀也循聲與江津令郭君彬
圖埒而才加敏蜀中循吏首推此兩人總督鄂莊勤按部稱為兩賢令
將薦之幕客楊某遣奴來道意兩人皆拒之不果薦後有欲薦公者而
公歸矣服闋入賞為知府甲辰補江西南安府大庾民某姓與其鄉四
十餘姓互仇殺吏莫敢問公至郡獲犯六十餘人勒繳軍械平其爭崇
義有齋匪聚徒斂錢公檄縣捕至方鞫治而參將某要功籍其家得傳
教冊指為逆上巡撫吳文節文節大驚謂南安守尙曠曠也下教切責

公具言首從已全獲餘多惑於禍福非從逆者文節悟擬劾參將公爲
解之文節益以賢公丁未貴溪民以漕務闕文節檄公權守廣信竟其
獄漕亦以治戊申夏饒九南廣四郡大水九江守劉某阿藩司意謂可
無振公庭詰之劉語塞巡撫傅公繩勛舊爲川東道知公因問策公言
災甚重請帑且無及宜借發數十萬金而勸捐以補又言振口不如振
戶振米不如振錢陳利害甚悉傅公遂以公權南昌專任振事於常例
外展振五十日用銀二十餘萬全活數十萬人薦卓異卽真己酉得
旨換花翎權督糧道咸豐壬子將入

覲聞粵寇陷全州亟白院司修豫章城手定規式乃行比旋任寇已犯
長沙乃建敵臺鑄銅礮修干櫓侍軍火時承平久人狃苟安百口撓之
公堅不爲動癸丑正月賊由武漢蔽江下九江不守時巡撫司道皆帥
師出防官紳多挈眷避市晝閉公揭示曰太守料賊犯金陵志不在我
不然敢以八旬老母爲孤注乎爾軍民各按堵毋恐示出市立開賊果
不至而公設備益嚴上三省水陸合防議請於華陽鎮治水陸軍規復
安慶巡撫張文毅以事關三省難之公力言賊必回竄復上守江議請
增兵扼湖口又條上城守事宜請急拆近城民廛徙城內貧者官給以

資文毅然之爲紳議所尼五月賊犯江西公擢督糧道矣會江忠烈帥師抵九江公亟請文毅疏調且遣使迎之江軍之未至也官紳多爲避地計公獨持守議眾憚之有巨紳前席款語曰公以守土爲必不可出邪吾且舉公爲將出城禦賊公正色曰某知與城存亡耳巨紳默然去尋商臬使帥二千餘人屯城外各官爭藉差遣出城有議退守撫州待援者公請巡撫出王令於庭捧令抗聲曰

王令在此敢言棄城者軍法從事於是眾失色守議粗定越二日江公至議者猶欲要止之使屯隔江之沙井江公入力任城守與公語合遣壯士縋城焚廬舍夜半火四起城外營相驚以賊至皆棄壘走輜重喪且盡於是尙書陳公臬使惲公太守耆公先後由敵臺突門入文毅大悟手二令授江公及公曰戰問江君守問鄧君芾謹率官民以聽十八日賊大至江軍哨目李克寬戰死公撫尸哭取己花翎四品冠以殮眾爲感動六月四日地雷發城裂八丈二十三夜復發者三城裂十六七丈皆以力戰得完方事急公手劍立泥淖中冒極險或勸稍後公曰客兵血戰守土官敢惜死邪初公欲出奇計焚賊舟以鄱陽令沈君衍慶忠果有謀密檄令率所部千人備草船六十艘藏火藥泊距城四十里

之烏沙港約期襲賊沈喜從之約十八夜陸軍誘賊近城別遣親卒爲
沈嚮導駛赴上游縱火及期有阻之者是夕北風利沈君伺城上無礮
聲太息罷去後卒與樂平令李仁元同死寇難進賢門者陸路咽喉也
公慮無兵扼守檄衛弁改糧船數十艘爲礮船募卒守之賊遂不敢窺
截餉道八月二十二日焚營遁是役功首江公而公守禦盡力且徵公
繕守備幾無從措手也寇退眾喜公獨泫然曰賊未受大創去禍未已
也亟請大修城文毅檄公督辦遂建礮城五月城三礮臺中虛者五半
虛實而袤長者六方者三十五附女牆平設者四十礮池二十六城上
官廳十七官房五十二營棚三百三十五軍器庫十三硝磺庫四十八
川門五十八水門三十三瞭臺八望樓三又各礮城礮臺內葺官廳九
官房兵棚廚舍爲間一百一十八硝磺庫二十用銀十萬六千四百有
奇又浚環城壕深廣各三丈築臨壕礮臺登石爲隄聞先後用銀四萬
觀者見規模閎固疑所費且十倍不圖後反以城工干議也公生平持
正論不迎合上官及摸稜兩可用此頗叢忌嫉吳文節張文毅雅知公
虛己以聽代者至皆爲蜚語所惑每計事聞公言輒厭拒之公侃侃必
欲畢其辭聽者滋不納甯失事機不悔其尤關大局者莫如救義甯與

吉安二役乙卯四月賊自湖北犯義甯知州葉君濟英告急公調道勇
五百人往援會贛州守耆公帶勇二千至公請令駐義甯巡撫陳公令
防饒郡然是年三月侍郎曾公已遣羅思節克弋陽廣信東路固無賊
也公力請改援不許十五日州再告急公申前議并請調寶勇志同軍
合援又不許二十日告被圍公請急檄防守武甯之林守懋勛率所部
二千人就近援甯陳公喈曰義武等也何厚義而薄武邪公曰義甯扼
三省要衝官民頻年固守團防爲江省最若棄不救後將不能責官以
守賊責民以團練奈大局何武甯殘破地非賊所措意且甯存則武不
難復甯失則武難獨存陳公乃令藍玫帶兵二百五十人往公少之具
牘請濟師不報時義甯集團丁近萬候武甯師至同入援見玫至大失
望玫中道遇賊潰鄉團喪氣二十五日陳公始調吳錫光往錫光故都
司在江南犯軍法逃陳公曲宥之令帶靖勇其人驍悍而猾陳待以國
士至是自都昌調之往公憂其行遲則請增調陳公曰師行矣惟吳君
最速公喟然曰吳平日行速以偵知賊退疾進圖功也今賊勢方張稍
逡巡則事去矣退復央南昌守言之乃允增調寶勇又爲異議者所格
五月初二錫光自都昌移軍州城於初九日陷矣死者數萬人葉君闔

門殉難道勇殲焉吳軍抵湘竹敗潰錫光亦死月之初五公猶固請催調寶勇志同軍初八抵省會陳公曰吳軍已足辦賊何多爲改調景德鎮敗信至始調赴奉新未幾羅忠節自請攻義甯公允措餉銀十萬七月始克之遂由甯援鄂而陳公亦坐事罷矣是年十月賊自湖北陷瑞臨又自湖南竄永新泰和圍吉安下游賊復萃九江湖口江西大震公添募捍衛保衛軍城備加嚴曾公撤九江圍師檄副將周鳳山率三千五百人規臨瑞戰勝於樟鎮時防吉者按察使周公玉衡也警報至會官紳集議公請署撫陸公速商曾公檄鳳山乘勝援吉以鳳山方駐新淦距吉止二百里也眾議倚周軍蔽省門持不可公爭曰石逆知我城高池深難卒攻必爲翦枝及本之計先擾郡縣使會城孤立然後大舉某請具狀如有賊犯城下願先伏斧鑕以謝江西百姓且當瑞臨初陷江軍新挫楚師遠駐潯湖賊不以此時乘虛襲我顧俟樟鎮敗後乃出攻堅下策邪就令賊來犯但吉安圍解兩周軍必振旆回援周守汝筠之師亦可由泰和下而駐南康之曾帥一軍駐饒之耆道一軍駐奉新之遮副將一軍皆朝發夕至以今日之城垣兵力視咸豐三年堅強十倍豈不能守以待援邪若懸賞二萬金剋期十日周軍必買勇以解吉

圍圍既解則瑞臨皆可復今棄吉不援則吉必失吉贛土匪必蠶起撫
建鑿吉郡前轍不復嬰城守周軍孤懸亦終歸於敗是援吉而吉圍卽
解江省可期肅清不援吉而吉撫建必連陷瑞袁臨皆不易復馴至全
省糜爛會垣且坐困矣議者謂此會帥軍也誰尸其咎公痛哭罷尙書
陳公曰公策雖不行不可無此議無此哭也且俟新中丞至圖之未幾
某公蒞任公仍申前議不納會周副將得吉郡血書請進止公夜謁巡
撫先揖同官曰今日不得請誓不出諸君其助之自酉至丑公持議益
堅巡撫姑諾之詰旦爲紳議所尼丙辰正月二十五日吉城陷周公及
守令皆死之二月十五日周軍潰於樟鎮石逆遂陷撫建自贛南外八
郡皆陷南昌屬縣亦遭躪而獨不敢窺撲會垣公會議之言若著蔡云
當是時庫藏如洗公擢按察使兼權布政使議搭放鈔票米鹽捐餉六
千三百金爲寮屬倡當事檄公子輔綸及同知林君源恩會帶平江勇
三千餘人益以寶勇志同軍進規撫州三月復進賢曾公亦檄同知李
元度帥平勇四千自湖口移師會之復東鄉兩軍破賊於河東灣四月
壁撫城東南隅吉臨援賊不時至皆擊走之大小數十戰皆捷卒以師
少未合圍城久不下九月分軍克宜崇援賊驟至老營陷林君死之而

輔綸已爲學使者所劾於七月去軍矣學使劾輔綸臬司子不應與兵
事並劾公辦城工時不能潔已遠嫌事下會公及巡撫察覆巡撫數諷
公欲令出門下公不屈故進賢令潘尊賢盜賣漕米短價萬餘金私回
籍公劾之褫職按問尊賢與巡撫有舊數私謁巡撫示意南昌守欲爲
脫罪公持不可尊賢撫案外事訐公然事皆無稽卒以誣論戍巡撫旣
與公齟齬坐公修城時未先請勘估與會公會疏請嚴議得

旨鐫五秩調用公遂浩然歸然曾公疏猶稱公所承修爲南數省第一
名城自七郡並陷賊終不敢窺省垣兵民亦有恃無恐皆此城力也公
歸輸穀三千石助軍庚申冬協守州城得

旨議敘又斥產捐千三百金甲子秋母夫人棄養公哀毀得疾以丙寅
正月十八日卒於里第年六十有三先是道光甲申母夫人痰厥七日
乃蘇公與原配鍾顛天各求減算益母壽鍾年四十卒惟公得終事太
夫人公內行純篤析筋時悉推產與兄弟以父命強受田百餘畝嘗捐
金千五百勸祖祠又增置祀田學田別置義田百五十畝又以田二百
畝畀舅氏前後爲伯兄償負萬金又以田八十九畝爲兄子立後州舊
有賓與田爲豪猾所蝕公釐出之自捐百二十畝他善行多類此公卒

後江西祀公百花洲位在江忠烈張文毅之次繼室陳氏子輔綸拔貢生辛亥副榜

賞藍翎前浙江候補道輔繹廩生江西知府加道銜輔綵山西候補知

府

賞花翎輔鑾光祿寺署正銜

論曰詩有之謀臧不從不臧覆用古今事類若此可勝歎哉公在承平時爲守令皆有聲寇事起力持城守議有功江西甚鉅方公與大吏巨紳斷斷爭辯時元度適在行間日擊其狀又嘗與公子輔綸同治軍故知之悉公所持皆正論策事勢如指掌某公不足論陳公則鄉人且同年生也而柄鑿至此何哉豈大劫不可回人謀無自挽救邪抑曲突徒薪必不得與焦爛者同稱上客耶烏虜非公之不幸而江民之不幸也

蕭壯果公別傳

李元度

蕭公啟江字濬川湘鄉人咸豐三年以國子生從羅公澤南剿賊永興四年從平岳州克武昌

詔除縣丞

賜藍翎再遷州同五年廣東賊犯湖南巡撫駱公檄公募兵協剿署曰

果字營自是獨將一軍九月平茶陵踞匪功最明年僞翼王石達開竄江西公駐師瀏陽禦賊會知府劉公長佑奉檄援江各營歸節制公以師屬焉二月劉公出醴陵攻萍鄉公出瀏陽攻萬載賊楮樹潭旋出不意擣荆樹埔賊巢焚其壘進剿大橋賊宵遁時上高新昌賊已爲守備蕭君啟淮所敗逆渠憤甚糾袁州賊自楮樹潭直犯大橋公嚴陣以待擊破之平高城竹埠等處賊壘越日再敗賊於竹埠遂復萬載將進規袁州偵知瑞州臨江賊謀復陷萬載公設伏以待賊至發巨礮擊之都司田興恕怒馬突陣公麾軍猛進賊崩奔自相蹂藉死者無算又敗諸斗門又敗諸南路賊自是不敢犯湘軍亡何崇通賊犯瀏陽賊意公必回援乘月夜來襲公蓐食以俟值大霧官軍迎擊賊不辨多寡大敗去六月金陵援賊至走之時公已累前後功洊擢知府矣尋進兵合攻袁州當是時賊久踞袁城不下公與劉公議分地責成於是劉公攻西南公攻東北盡平城外賊屯城中賊窘甚公策援賊且至設伏待之九月臨吉賊果大至伏起盡奪其輜重十月賊再至又敗之餘黨竄合山公率興恕擣合山巢盡焚其壘賊走分宜遂乘勝克分宜而城賊益困不支矣李能通者賊酋之一納款爲內應許之遂以十一月朔復袁州

詔加公道銜給

封典尋進勦上高斷臨江西北路上高賊聞風遁七年正月大捷陰岡嶺嶺爲逆渠老巢與瑞臨袁賊相犄角公奪而據之斬僞監軍高萬祥僞總制艾得勝臨江賊勢以孤二月鄂中援賊至敗之賊復謀抄襲爲我伏兵所殄改趨太平墟犯劉公營劉軍迎戰失利營被陷賊乘勝折犯陰岡嶺逼營而陣箕踞謾罵氣驕甚參將楊恆升突入其陣斬悍酋數人我師從之賊大潰次日盡夷各賊壘遂與劉公進逼臨江城十二月八日克之

詔晉巡守道加按察使銜時劉公以病歸知府劉君坤一代領其眾公遂及劉君進勦撫州由新淦徇宜黃崇仁皆下撫州賊次樟樹鎮將伺我軍渡贛襲臨江八年正月公與劉君回擊大破之賊遁入撫州會江西軍復新淦公帥師渡江邀擊之賊敗賊甚眾三月再復崇仁屯上頓渡距撫城十五里築壘畢賊至迎擊大敗之斬騎賊數十四月進攻高橋賊棄城遁追斬千七百有奇撫州復詔加布政使銜石逆之擾江西也連陷數十郡縣贛水以西無完土會城孤立勢岌岌公與劉公戮力並驅每克城輒爲招流亡建碣卡勸團

練紀律嚴明所過無秋毫犯而公耳重聽人呼蕭聲百姓聞聲軍至皆
拊髀雀躍悍賊遇之輒衄石逆不得逞於江西尋由楚入蜀以汜於誅
實公等摧陷廓清力也九年正月援贛州石逆自信豐陷南安南康告
急公改援南康偵知賊有老巢二一在新城眾十萬立偽城踞村莊二
十餘里一在池江賊數與新城埒公念寡眾弗敵當以計取乃令團勇
誘之而伏軍村左右約聞礮聲乃起及戰團勇走賊數萬猛追伏發賊
首尾不能顧大驚潰斬級二千有奇新城巢破越日攻池江以團勇輕
進爲所蹙交綬而退已乃獨率湘勇盡燬其壘將進攻南安未行而信
豐警報至乃帥師赴援而是時南安賊一夕數驚公詢知卽改道攻之
二月三日賊奪路逃俘斬數百人南安復仍冒雨援信豐再戰解其圍
詔賜額呀斯圖巴圖魯當是時江西郡縣皆復石逆率黨由崇義竄湖
南於是郴桂所屬皆告警公馳防郴桂賊已繇永州扼東安防賊竄逸分軍
劉公長佑李公續宜等禦之公繇臨藍趨永州扼東安防賊竄逸分軍
屯白牙市八月寶慶圍解官軍追賊至白牙公夾擊之禽偽將軍楊家
廷馬繼昌等石逆竄廣西陷興安盡集悍黨踞大溶江遏追師遣別賊
直犯桂林粵撫疏乞援師公奉檄由全州趨興安復其城八月攻大溶

江大捷斬悍酋無算江水為赤石逆時踞靈川連夜走義甯龍勝九月
公拔營趨桂林賊自南路遁圍解得

旨記名以按察使用十月班師抵湘潭會石逆將由黔窺蜀

詔公帥湘軍入蜀截剿十年春抵蜀四月二十七日以疾卒於軍

温旨流巡撫例賜卹

賜祭葬

子澄壯果

詔湖南江西及湘鄉各建專祠公性果敢機牙四應臨陣英鷲無前攻
茶陵時帥壯士數十人單騎薄南城奪門入賊自民塵擁出攢矛環擊
公橫槊躍馬手鏃數賊出城賊瞠視莫敢逼料敵尤有神算攻萬載及
南安賊先棄城遁公曰此詐也將誘我入而反攻之耳法當按兵不動
賊計窮城乃可得也已皆如其言

贊曰當文正公再起督師援浙時公及張忠毅公同隸戲下余綜理營
務始見公於貴溪時公新復撫州撫州余百戰爭之未得者也以是尤
敬公握手談攻取之略甚快公少嘗服賈入蜀語雜蜀音後竟卒於蜀
烏虜苟非乘時會樹首功公且以貨殖老矣古今奇偉非常之士草澤

中可勝道哉

崔侗傳

順天府志

崔侗字同人號葛民先世由山西洪洞遷霸州性沈毅喜讀書自其先家本寒素無力延師而攻苦自課讀書務求實用至是一字未安輒廢寢食治經時每取先儒詁經之說抉摘精審融會貫通擇其要者書於諸經之上道光十一年舉人十二年進士引

見以主事用籤分吏部考功司每平旦黽勉趨公不避風雨案牘所不能徧閱者攜至私寓考校盡夜無倦容嘗以蒞其官不習其事一切仰成吏胥爲恥爰取吏部則例察其與廢辨其沿革比較而剖析之講求切究一如向日治經法或例所未載偶遇一事必旁推曲暢務與律相比附一日吏持牘上稍未符輒叱曰是當取某案某例何取此也吏大驚由是奉法不敢上下其手大學士陳官俊尙書恩桂皆曰吏部郎得人矣旋升考功司員外郎掌考功司印題升文選司郎中丁憂服闋復補文選司郎中掌文選司印銓曹所司視考功尤叢雜難稽缺分之榮枯班次之進退日月之後先勞如治絲侗一治以嚴絕苞苴杜請託於科條之勒爲成書者剖析其異同比較其新舊昕夕纂記蠅頭細書行

閒幾無隙地故雖老姦巨蠹但瑟縮奉行文書無敢營私舞文者意所
不可蹇蹇諤諤執簡與同僚上官爭必得乃已久之所與爭者轉相倚
賴如左右手遞相引重是年司中空匱累逋二千餘金經費無所出吏
言於侗侗曰是無難捐俸自給一年後宿逋可豁矣行之果然人咸服
其裁斷刑部郎中某斃使女投之并事發命侗隨尙書文慶赴提督衙
門會訊侗不深究其致死之由祇以擅殺奴婢抵罪尙書歎曰上不虧
國法下不拂人情矜慎忠厚兩得之矣以京察一等擢廣東南韶連兵
備道未抵任旋授本省按察使於時清遠英德賊匪煽動制府下檄督
勦侗運籌幃幄一切調度悉合機宜以屬吏爲難信凡糧餉出入必親
爲句稽文移往來必手自指畫焚膏繼晷連夕不寐事平接辦善後事
宜奉

旨賞戴花翎咸豐四年補授本省布政使適賊匪復熾直逼省垣當是
時出則巡視城守入則籌畫度支檄調芻糧加以協撥鄰境庫款空虛
費無所出藩司爲錢糧總匯支發皆取給焉侗握算持籌焦勞太甚力
疾從公不能悉心靜攝待賊蹤稍遠遂卒於任年六十二

福建記名道張公平賊紀功碑

孫衣言

咸豐十一年秋平陽奸民趙起等爲亂瑞安奸民應之剽郡城焚福鼎
圍瑞安城十日其明年粵賊由台括以環攻温州陷樂清遂犯永嘉瑞
安福建援師先後至閱十月內外賊盡滅於是福建記名道嚴勇巴圖
魯張公啟煊實辦瑞安之賊兵少而戰力法寬而威震邑人士皆曰微
張公我其寇死矣將刻石著功而屬其詞於前史官孫衣言衣言曰會
匪之初匪有尺寸憑藉七八惡少年藏伏山谷借名巨寇招呼郇徒張
皇四顧如鼠如狃不肖長吏爲之卵育煦濡養成角牙萌枿旣露莫敢
手斷至於掩郡城劫官寺屠其父兄奪佩印符然猶便文自營匿賊罪
名監司跳逃守噤且瞪令唯丞阿羣喙一聲小人附和陰機翕張虛喝
恫疑助逆萬方及粵寇之猖獗處州入台州一年以來矣於是樂清南
垂阻山瞰海青田居萬峰之顛一夫之守謀温必爭之險也顧乃憑城
闔戶婉婉處女邊齟關闖以越視秦嗚呼藉非閩人來師温州事則去
矣閩之援甌軍分爲三張公所部千人最先至前鋒颯發遂解瑞安之
圍首奪龍山眎賊形勢旌旗臨江濤波擊撞掇祇陀臍沙洲擘石步燧
金谷之巢與南師會於馬嶼叛腰亂領棄骨如麻孱官睽陽汗出咨嗟
及其破粵賊於雷橋則又百里馳師倍道夜進蛇矛前飛凶渠墜首卒

有馬嶼大獲羣頑潰奔自是里閭潛奸無復後望外寇搖手視瑞安爲巖疆矣而我謂張公之功尤不可及者當桐嶺退師之際賊悍然無北顧之憂十萬之眾并力南趨金谷山沙洋伏莽之徒爭出迎脅方舟爲橋決計南渡其勢可以直擣平陽衝軼閩嶺梗絕饜餽爲患滋深張公以數百殘罷之卒鼓漁蟹之船孤檣江麋張機設疑與賊拄枝卒能號召援師激子弟臨江一決萬虜并流斯爲難也且夫提銳師戰狂賊推鋒平行前無堅對此壯士勇夫之所易也至於眾寡懸絕進無首尾之兵退無嬰城之固轉眼禍福不堪逆計愚者惶惑智者巧避而地形利害所關絲毫差失吉凶萬里獨能慨然出九死一生之閒爲義不反踵之計卒所以自拔於險底成巨勳其知爲明其志爲決張公之功在此不在彼眾皆曰然遂書之碑同治初元秋七月

栗耀傳

山西通志

栗耀字仲然渾源州人栗恭勤公毓美次子也道光乙未舉順天鄉試以父卹蔭

特賜進士咸豐二年以知府揀發湖北在道奉

旨授漢陽府知府時漢陽再爲賊陷行省未復督撫皆就軍次寄治耀

至卽委綜營務明年從大軍復武漢未幾賊大至總督不能軍城隨陷
及節相官文恭公繼任擊賊走之武昌旣復旁郡賊亦棄城遁乃令燿
留漢陽視府事前後積功以道員用以廉幹爲巡撫胡文忠公所知釐
稅糧臺多委令綜理奏署荆宜施道尋加按察使銜補授武昌道荊州
當蜀江下游監司兼督鈔關時全楚軍餉仰資鹽權又地當兵衝黔蜀
寇亂方殷督撫念非燿莫辦故仍令居署任燿綜核嚴密稅入羨餘悉
籍入公而修戰艦增軍屯水陸有備戰守皆宜歲辛酉賊逼施南燿旣
請重兵爲備復檄郡縣集民團守山險賊合川匪分掠宣咸諸縣施南
協鎮某禦之遇覆盡沒施南大震賴燿所請劉布政嶽昭軍至與郡兵
夾擊賊連敗之賊大創因竄歸蜀松滋人馬鉦者挾左道惑眾至數千
人密通賊官軍禽斬鉦並其黨燿料賊未知鉦死希應援必復至力請
大府集水陸軍密爲備賊果趣夔州遇官軍輒敗及得馬鉦死耗遂大
潰水陸合剿俘斬萬餘自是無敢犯楚境庚申大淫雨荆江暴溢齧攻
萬城隄聲若雷震水突起高於隄及尺荆人大恐燿督兵民備畚揭儲
土石立泥淖閒躬視板築信宿隄上事定乃還在荆四年政教大行洎
秋檄署臬篆旋奏攝藩司甫踰月授湖北按察使燿以父恭勤公會任

是職乃顏其堂曰誦芬感受

殊遇思紹前烈日治文書綜財賦而征餉浩繁庫藏所出浮於入殆半殫心籌畫常傍徨通夕不寐猶以時接見僚屬詢民疾苦及興革事宜疾已深殊不自知同治元年遽卒時有

旨擢湖北布政使矣燿性警敏遇事縝密周察而務存大體敦尚名義時時以利澤及人爲心尤勤於學淹通史傳及經世諸書兼工書畫嗜金石文時以自娛曰吾夙好此欲陶淑古人以鍼吾僻於政不無裨也世以雅度稱之

贈太常寺卿福建興泉永兵備道會稽秦公神道碑銘

馮桂芬

同治三年秋七月庚寅鹽運使銜福建興泉永兵備道會稽秦公卒於里第於是公將改官江南赴部引

見道里門會越郡大水東西兩江塘決千餘丈山會蕭三邑成巨浸公請開棟樹堰洩水築閘家堰等柴隄以免內灌月餘水始退僉謂兩塘之決二百年來因循憚興作所致失今不治禍且無窮乃叩當事奏免新賦並借帑十萬興工暑暘中規畫相度積勞疾作遂不起後數月塘成事

聞卹贈太常寺卿

子祭葬廕孫祖均官知縣公子會熙以七年三月葬公平水鄉游龍坂之原朱夫人耐禮也越五年以行狀來請刻銘於神道余與公同年會熙復從余游不敢辭公諱金鑑字厚齋世爲會稽人曾祖惟仁候選都司祖文奎候選州同知父溥山西太原縣典史三世皆以公官加四級贈榮祿大夫曾祖母高祖母王母俞皆

贈一品夫人兄弟三人公其仲也以監生舉道光甲午京兆戊戌考取覺羅教習庚子成進士以知縣籤分山東補高密癸卯甲辰兩充鄉試同考官修城敘勞加知州銜丁內外艱服闋咸豐二年例選福建甯府知府以勞績保道員七年護琉貢使入朝拜蟒衣之

賜七月調福建八年夏署鹽道籌餉議敘加運使銜

賞花翎先後檄署延建邵道興泉永道以省局冗要皆未赴六月再署

鹽道十月授興泉永道未赴十年四月署糧道明年六月署按察使

詔舉賢才公被首選記名軍機會制府奉

命援浙以廈門賦稅總匯檄公督理浙餉遂赴本任旋因鹽道任失察

商虧鐫級閩省肅清論功復職卒年五十有九公居官清勤自矢開誠
布公而機牙肆應遇事立斷高密車網魴鱗二村素頑梗公威德並施
弊俗以革鄰邑膠州豪管大成繫獄自裁其家以杖斃訴上官褫州牧
韓某職有鍛鍊之者檄公覆訊公廉得其實爲申辨復韓官時有貴族
女適濰縣劉氏女少寡無子家鉅富爭嗣久不決大府檄公鞫之兩造
皆輦金相覬覦一日將訊有董弁者來謁公延之坐而自出定讞以判
詞入示董董遂巡退在高密五年挑五龍河修夷安書院士民德之再
與分校能得士江督馬端愍公新貽其尤著也其知建甯也時粵賊初
起距閩遠官吏泄泄然公下車卽籌團練親赴崇浦修治隘口未幾土
匪四集公會延平各軍平之終公之任建無賊警公去賊始長驅入岑
陽關兩攻建城眾數十萬皆賴公所練勇擊退人由是服公慮患之早
松溪匪吳葉奴糾眾謀變爲期攻縣城公偵知之星馳勒兵入其巢穴
諭以順逆禍福脅從皆散渠魁就縛事立定建甯崇安諸路皆產茶公
請開出洋之禁益課數十萬建鎮平關於大武嶺以爲延建屏藩閩省
局稟病民

上命將軍督撫治其事會公知福州以委公公議局稟民不樂用致銀

米驟貴十倍請停罷

報可民患頓除廈門俗悍地沿海無屏蔽公之任首禁械鬪毀寶場獲洋盜楊岸等誅之執土豪三十六人置諸法籍嘉禾鄉勇二千人日夕操演成勁軍民心大安永春州陶某縱役殃民民鬪於州求殺役不許遂被戕州佐以竊發告公知其故曰是驅之叛矣手示令獻罪魁餘不問首惡遂得州以無事歲旱禱雨夷目妻過壇左與民爭道民以瓦石擊之夷目大恚將構兵公怵以眾怒難犯事立解公之隨機張弛多此類公性孝友敦睦嘗以宗祠未立即故居改爲祠廉奉所餘悉周親串厯官三十年起居如寒素自號強恕居士具經世才晚際時艱慷慨許國壯心未已中道徂謝不竟厥施海內惜之元配朱先公十七年卒贈一品夫人繼配陳

封一品夫人側室申蔣江皆以曾熙官

馳封宜人子一卽曾熙同知銜江南高淳縣知縣

賞戴花翎女二婿郎中王文謙一未字孫二祖均三品廕生候選知縣

祖壻孫女一銘曰

種山巖巖鑑湖滉滉鍾德美兮巍峩起家民望

國華譽鵲起兮政成齊魯旌移彰武歌樂只兮定策決疑方圓具宜隨所
履兮棠陰有頌柏臺無訟臻上理兮金隄互虹我稼屢豐福桑梓兮康
衢方騁義輪促景命邁已兮化蝶招魂游龍返根永于已兮

湖北候補道張君墓志銘

莊受祺

君諱曜係字仲遠又字昇甫晚自號復生其先世由四川縣竹廳南渡
遷常州南郊殷薛里爲武進治後分設陽湖縣遂世爲陽湖人始遷祖
祚宋右文殿學士從祀

聖廟所稱南軒先生也曾祖金第祖蟾賓皆文學生父琦山東館陶縣
知縣以君官湖北糧道祖父

贈如其官祖妣氏姜母氏湯

贈太恭人張氏世以學聞至館陶君及其兄皋聞編修並以經術學行
名海內君既承家學更具夙慧未弱冠卽工爲文辭及諸藝術稍長益
研求古今成敗天下利病所繫從館陶君官山東愈稔爲治切近之理
館陶君卒於任所清貧無以歸葬君乃以醫自給又久之乃得歸後遂
以醫游京師往來南北當世賢士大夫皆慕與交所至言事侃侃聽者
忘倦道光二十三年應江南鄉試中式會試報罷援例以知縣謁選二

十六年選授湖北武昌縣知縣武昌向稱繁富君至適頻年大水饑民失業者數十萬君如疾痛在己力籌振卹富民感其誠各傾資以助荒政井井無冒濫咸以爲前此所未有也二十七年

賞加知州銜咸豐元年調補漢陽縣時粵西軍興徵調往來旁午芻餼以千萬計君赤手當劇任遇事悉辦旋擢漢陽同知粵賊洪秀全等始北犯全州湖廣總督率師駐衡州遙爲聲勢君卽上書大府謂全州爲粵楚要害若不守賊必入楚楚邊遼闊未易遏也應請督師移駐永州以防兵援全州更與廣西追師夾擊可大克也督師不聽復退三舍賊遂陷全州由道州入楚而長沙被圍當全州之初陷也君言於當事曰楚禍急矣請南守岳州北鎮漢陽以固省會并條上武昌漢陽守禦事宜各二十四事當事皆不能用二年十月賊果大至漢陽武昌先後陷君引帶自經有受君惠者竊解其縊以小舟夜載之北行君甦乃大恨或勸之曰君駐漢口固無城曷不留身爲後圖君始稍進飲食次年正月賊退張公亮基江公忠源皆至並器重君并奏前失漢口狀請免罪奉

旨褫職留營會金陵賊北竄分黨從陸入楚張公檄君以鎮筵兵遏之

黃州至鷲公頸與賊遇君故喜談兵而初臨陳所將又非素習乃舍舟面水而陳賊掠民船大至登對岸伏樹屋間以火器擊之不退君令曰有能過河挫賊鋒者重賞一卒曰田與恕者應聲過河獲二級還又令曰能焚樹屋者重賞田與恕挾利刀戴火具赴岸樹屋立焚賊遽走我軍迫賊之斃賊甚眾餘黨悉出境君立沮洳中督戰水長幾及膝也事聞得

旨復原官九月賊又大至江公來援亦敗漢陽又陷君以兵隨江公進戰復之會江公巡撫安徽君請督師吳文節公留江公守楚而力阻文節出師文節不聽憤然自行檄君赴德安旋署府事君時已解所統兵及武昌再陷則以策說楊公需而獲信用委司營務卒會湘軍復武昌以功擢知府

賞戴花翎時會城司道府縣皆不備君以一身綜庶職輒數晝夜不寐事賴以定楚禍幾可息矣乃事機舛迕楊公復兵敗北走武昌三陷君皆先事言之而深痛權之不終屬天之不佑楚也洎官節相胡文忠督撫全楚則專以吏事責君五年委署督糧道七年克復省城敘功以道員補用君素稔東南漕政之弊由於胥吏侵剝有浮於正額數倍者東

南多事漕運暫止則言於文忠權量各州縣贏緡大減浮費隨宜酌定折銀正額民歲少輸數十萬緡一省歡呼稱悅十年戶部以君宰武昌時所餉荊州兵米後數未符當君革任追逋君實全解由亂後呈部冊未全也往返鉤稽經三年方辨復君亦悄然無志於世矣君既去官復司節相營務癸亥漢上通商事起君倡議當取洋稅佐餉檄君至上海定議甫有成說君遽卒於滬年五十六時同治二年六月某日也君至性過人少時侍父母疾連封肱肉以進兩臂瘡痍斑然女兄三人各挈其家相附終身無間疏闊不治生產而於百政興廢據理直陳必行其意湖北榷稅諸政皆發其端緒而終身弗握利權其待人偏於施德卽相負亦不措意田興恕拔自小校存膺節鉞終身執弟子禮君誨誠如嚴師田故喜揮霍凡蒙薦拔者皆獲厚報君未受其一縑田後以事敗深悔不聽君語也君藝術中尤精於醫甫勝衣卽讀越人仲景之書爲扁鵲倉公傳注後益博通諸家治疾數十年鮮失一二人或效之不能及也妻包氏

誥封恭人子晉禮隨君上海邁疾先卒無子以族兄子某嗣女三長適王臣弼湖北興國州知州君之甥也幼者字余子允懿妾李氏楊氏著

詩文集若干卷在滬爲友取閱靳不歸嗚呼余於辛卯歲識君又同官湖北八年申以媼好其知君志行者竊以爲當世莫余若也君交游半天下古誼薄霄漢而遇事齟齬不能無谷風棄子之悲仁活數千萬人所治父老至今悲涕而中年旅沒且靳其嗣其所設施不能盡其百一區區文辭且不盡留於身後是君之大不幸也然君精黃庭內景之學其於性命之理灑然無滯復何所繫戀邪君殯暫厝滬上以同治某年某月歸葬於常州某鄉某阡爰爲之銘曰

識照古初量周環竟顧其設施有幸不幸苟際時會風雲景從迎刃解節益開蒞封命之將廢昔人所歎或躓於埴或焚於爨積善有餘弗期其慶殖學旣厚乃祿其長吁嗟張君千里歸魂陵川變徙其安此原

直隸候補道王公墓志銘

代

汪士鐸

自姚江興而聚徒講學之風扇其魯人徒談性命辯理氣門戶標榜無補世用有真儒出迺灼然於天之畀我者與當時之所急而竭吾力以維持其際其上與下始深信其不欺則吾師惺齋先生其人也先生氏王原諱立人南陽內鄉人幼從塾師王香峰研究傳注之旨弱冠領道光五年鄉薦出桐城姚柬之之門姚固多藏書召先生入署讀之由是

新和傳卷三十一
三十一
飫聞所欲聞繼與相國倭文端公宗伯李文清公少司寇竹如吳公暨
陳心一丁彥傳諸君子切劘風議益洞徹於天人內外體用之本在於
吾心因改今諱曰檢心而心睿在能容故字曰子涵乙未大挑一等發
江蘇以知縣用旋丁龐太淑人艱喪葬盡禮庚子始至省試用其冬放
粥上元先生丑正詣廠槩米眎饑班男女懲吏役邦用不增民惠以溥
上游以是知爲非常人矣二十二年署興化當是時海氛不靖縣雖辟
左而俗汰先生防內訌則簡男丁祈有年則禱甘雨禁枯喪則引禮經
徠學徒則籌膏火俗用丕變暇則修志葺城重訂學規皆本實心爲擘
畫去之日士民送者塞涂術陳方伯繼昌亟稱爲得民心焉明年秋闈
後署句容又明年闈後署高淳先生禁諸淫祀以高碗會積貲創建義
學義倉各百餘所捐廉奉修邑南永濟橋經紀周詳可持以久徐方伯
廣縉徐太守青照又亟稱其實惠在民焉二十七年調儀徵先生設牛
痘慈幼紡織蠶桑諸局修

文廟僭舞除老河影壞舵之惑民聽者振江都冬青鋪河決饑民之衣
食藥櫬收耕牛之在災區者經理未已以外艱去上憲挽留堅不可其
年金陵大水民愈思之咸豐二年服除來省陸制軍建瀛委赴豐工時

決口未合災黎彌野公私束手先生先禽擒首皇甫吉而弭強橫徐稽
戶書之振災者而蘇閩閩雪王張氏之污而表貞烈節省漕米萬餘石
遂於次年正月合龍其年六月調署銅山練勇修城以防守殲匪犯斬
擒目一如在豐時五年奉

旨以同知直隸州卽補旋奉部文以陝西知府用六年卸銅山篆將引
見時豐工已再決幸自銅瓦廂北徙故十月復使先生往勘其老稚聞
先生復來扶持相迎有泣下者其感人如此七年引
見奉

旨發直隸以道員用以徐州守城功

予花翎譚制軍廷襄委查保甲以清盜源散囤積以平糶糶歷黎陽大
任以拯其魚省糜費以收實效先生嘗曰弊端安能淨惟勤查細訪庶
有所察覺耳夫冒濫之在災民可也胥吏中飽不可也至我漫不省錄
則大不可故制軍以任事實心許之然先生已積勞受溼乞假歸田矣
其後嚴中丞樹森李尚書棠階皆以勤政愛民薦卒不起同治紀元敘
團練功加按察使銜是年皖匪擾內鄉有欲與之賄和者先生力斥之
嚴守備賊不得逞竟遁去先生獲上原於孳民而愛民本諸學道道非

虛器也必講去其近似刮磨其私與欲非二氏靜寂無爲遺棄世故也故先生雖勤講學而不流於禪嘗拈居處恭三言以示人謂燕居必衣冠行政必勤慎待人必忠信其在準提庵薦福寺菊潭書院內鄉義塾孜孜善誘率不外此而不涉高深元妙之談教子弟以小學亦期以孝弟而不語以達天在里建宗祠植松柏祭田義學義冢義渡悉本文公家禮折衷時宜而無迂迴難行之舉此先生講學實際也晚營別墅寶塔山以養疾八年五月忽病中滿卒春秋六十有五學徒嚮哭如其私喪遂於十月葬公於其山新塋越七年至光緒二年奉

旨祀公於鄉賢又一年德配郭淑人卒葬於縣南盆窰先生爲明太僕寺卿儼之後高祖令善曾祖建元皆隱遁不仕祖增生杞楠父廩生延壽皆以先生貴

贈如其官子五人之濬之沂之城之沆之江女一孫男九人曾孫男五人皆業儒先生在江南癸卯甲辰兩分校秋試得士稱盛卽不學若宗瀛亦辱與門牆焉先生著有易經說約春秋本義孝經本義四書存真禮傳合鈔等二十餘種又刊姚公伯山全集香峰文鈔以行世烏乎先生可謂眞儒矣體用一原張弛異地胥奉方寸爲嚴師一時名臣倚重

羣黎戴德至今日無異詞非真道德焉能淪浹於人若是乎倉龍戊寅去先生之卒已九年公子之濬等來請墓刻計同門存者無幾矣因不敢辭而爲之銘曰

學期濟物非徒言詮翳聖之用人情爲田孰寬而粟孰猛以虔運於天君我執厥權叔世學徒高談性命安肆日媮處事弗敬自信過深迺施於政民謾以怨妄期作聖先生英英旣勤且明戴星問俗彎月修城弦歌弗輟倉庾載盈人飾於兒我感以誠江淮之民思公道化憩息棠陰凄然淚下我慚負牆弊於十駕欲贊不能昔有游夏

又候補道前知儀徵縣事王公檢心家傳

程晚

王公檢心號子涵內鄉舉人嘗令儀徵嚴明有聲鐵面其私印也道光戊申己酉江漲數千里儀徵環城皆水不沒者三版公威惠並行水退查振親行泥淖中水深處乘一葉舟隨吏一徧閱各鄉數必核實冬放棉衣必親閱視布棉皆親稱其分兩鈐以印俾不得私押公自出巡哨每竟夜不返盜賊屏迹小偷發必痛笞之鎖於官寓概勿釋親給飯食厚養之嘗曰從來大盜多始於小竊無小竊自無大盜且人至爲竊羞惡盡喪杖而釋之不一月仍擾民耳竟公任民夜不閉戶性耐勞夜恆

不寐親治簿書府史胥徒各以其日值宿親察之離次則痛懲黎明坐
早衙逐案清理已刻乃罷老吏巨猾必盡其法御家丁尤嚴作奸敗露
則刑訊待諸生有加禮月課以文如師生然言不及私人亦無敢干之
每縣試皆自閱文竟日坐堂上繳卷卽閱案出每右寒峻公精理學喜
讀書靜坐以儉養廉薄嗜欲無姬侍精神滿腹道氣盎然顧公雖尙猛
然持大體關係婦女多不傳訊嘗有和奸被獲之案人意必重責而公
坐內衙薄責之以爲必有他事口角不究其奸其用法而得法外意又
如此以憂去官邑又大水振衣粥如故而凍餒眾矣駱文忠爲星使時
嘗過境公往謁門者以無苞苴拒之造謗於駱及駱陞見
成廟問江南州縣官孰優駱首以公對人兩賢之後公仕至道員俊良
峰相國保舉人材首薦之公竟不出

論曰子生也晚梓鄉循吏如陸公師羅公煜范公仕義王公用貴雖耳
其名均不得其事迹獨內鄉王公子應童子試出其門政績實親見之
迄今三十餘年舊日父老無不思公之清且勤者嗚呼賢哉

按察使銜甯紹台道史公墓志銘

方清願

公姓史氏諱致諤字士良一字子愚爲漢溧陽侯崇公五十六世裔孫

五世祖隨進士江西瑞州府有循吏稱高祖詒儉爲文靖公之兄舉人湖北安陸府知府曾祖勝無子以兄子汝櫛爲嗣是爲公之祖又以兄之子錫祺爲嗣是爲公之考三代以公貴

累贈通奉大夫妣皆夫人其本生兩代皆得

賜贈如例公寄籍宛平舉甲午順天鄉試戊戌成進士改翰林院庶吉士散館授編修歷充

國史館纂修庶常館提調奏辦院事充順天鄉試同考官得士二十三
人京察一等

記名以道府用擢江西廣信府知府廣信控豫章上游爲閩越孔道號稱難治而漕務更多積弊公政尙嚴明治獄詳慎捕貴溪漕棍劉開發等十人寘之法頌聲翕然東南大水廣信山鄉尤患衝決則講求水利修隄放閘督率所屬次第行之故鄰郡告災而所治獨豐稔清查州縣賦額庫帑有無虧絀綜覆鉤稽條分縷析下僚罔敢欺隱而調劑盈虛亦無有以此獲咎者咸豐元年權南昌首郡大府知公才壹意委任公不阿不亢凡有關於民生利病者反覆力爭必得請而後已二年粵寇犯長沙民情震動公總司團練並辦保甲於德勝門外築三礮臺修補

城垣二千五百餘丈改建章江門濬濠及城內豫章溝設縣門布渠答
備一切守禦而九江戒嚴南昌城門晝閉諺言四起公請於大府洞開
七門而派員嚴稽出入不使姦宄溷迹人心始安公旋回廣信任三年
寇陷饒州延及廣信界公招募健卒名信新軍馳至鷹潭因險設伏與
浙軍相犄角賊知有備不敢前四年調補首郡公協和將吏激厲士民
上下一心艱難共濟江右諸郡行淮鹽者過半惟廣信行浙鹽軍興淮
鹽不至公創議借辦浙引以餘息充餉名曰餉鹽大府疏入報可卽命
公襄其事年餘銷引逾於常額江楚及浙皆利之賊自興興攻義甯未
下遂陷武甯武甯在萬山中實爲南昌肘腋之害公自率信新軍馳往
勦賊迭挫之於紫鹿嶺於巾口於火鑪坪於箬田甫一月復之會下游
有警折回省垣是冬我吳城師失利楚軍亦敗於九江之官牌夾南昌
大駭援師雖集而與江右諸軍不相下主客判然內釁將作督師曾文
正公與公爲齊年友素稔公引以爲重故楚軍亦皆敬公有楚勇二持
刀索質庫錢勢洶洶公見而立斬之一軍皆驚大帥弗以爲忤五年兼
攝鹽法道六年丁楊太夫人憂公聞訃哀毀奔喪於杭州文正擬請奪
情公力持不可旣行巡撫文俊公仍奏請留江襄辦軍務而西安將軍

福興公駐軍廣信復奏調隨營七年奉
旨交福興軍營差遣九年服闋入都引

見奉

上諭發往浙江交王有齡差遣又

命幫辦團練二年浙撫湘陰相國檄辦滬上商捐奏署甯紹台道甯紹
台自上年陷後天台民團首先恢復而甯波亦資洋兵之力下各城方
謀畫曹江而守尋以法國總兵馬籌思與游擊布興有李光所部廣勇
互鬪廣勇潰賊乘閒回竄慈谿奉化將撲郡城公聞之立請東渡甫受
篆卽報慈谿陷距郡四十餘里烽火相望公激厲居民登陴助守整飭
稅釐以通餉源公之附輪船來甯也與美國兵官華爾同舟見其忠勇
奮發遂介以見英國總兵吐樂德克法國稅務司日意格推誠相語均
感服約束洋兵頓釋前隙公令布興有率礮船先迎堵於大西壩檄華
爾攻慈谿撥稅務司姚防洋兵及同知謝采嶂團勇應之慈谿賊分竄
鄞界另股擾及半浦而嵎縣新昌之賊復大舉犯陳公嶺我軍旋克慈
谿華爾中銃卒而陳公嶺不守奉化復陷知縣屈永清死之南北渡防
務又警公念三面皆賊必以剿爲防爰乞餉於滬令都司楊應龍募忠

勇軍紳士李鏐招集大嵐山義勇及各鄉練勇又以廣勇潰散慮爲賊用招之回令布與有布良帶守備張其光分統之部署方畢而賊由北渡閒道趨櫟社直犯郡城天正雨陰霾蔽空人心惶惑公勒兵以待伺其懈輒出擊之賊陰有退志則分兵兜剿連敗之橫溪石橋進薄奉化楊應龍率死士百人由城西北布竹梯以登奪其北門賊驚潰下之奉旨補授甯紹台道奉化敗賊復句結上虞賊分道犯慈谿餘姚公以賊眾我寡分援力弱不如併力擣上虞則賊且急而還救顧出師漸遠不能兼顧郡城且籌餉維艱日不暇給乃以兵事屬之前署道張公景渠而張公已奉

旨逮問公一再籲大府奏留以堅其銳往之志用能士飽馬騰中外協力所向有功復上虞嵗縣新昌我軍至是已增萬人謀規紹興洋將勒伯勒東達爾地福輕進礮炸而卒軍稍卻二年復紹興進克蕭山與大軍會於錢江浙東以平江南奏減蘇松太漕賦部議酌減三分之一杭嘉湖與蘇松錯壤賦額亦同奉

諭一律核辦公上書湘陰相國指陳漕弊數千百言略謂蠲賦惠政減正額尤宜革浮收於

國家儲胥無損於小民更爲獲益唯各州縣情形互異辦法不同當擇大者奏咨立案餘並著爲省例以盡通變之宜大府隲之三年提督高勇烈公率兵會剿福建賊公爲籌欠餉行糧軍火爲數至巨湘陰相國以籌餉勞勩入告

賞加按察使銜花翎先是甲子春公以衰老乞休大府不允所請嗣奉中旨察看湘陰相國調任陝甘總督瀕行疏稱公辦理諸務均無貽誤而年力就衰奉

旨以原品休致乃得賦遂初公起家寒素習知民間疾苦又博覽史冊明於歷代治亂得失嘗謂橫雲山人明史稿近而有徵

憲廟硃批諭旨

昭代科律居恆研究故在官有所施設切中事情久而無弊好獎掖後進一技之長稱不絕口遇非禮直言規勸受人之惠報德不厭所施於人事過輒忘故遠近聞公之喪而哭失聲者不知凡幾也公以同治十一年三月二十三日卒享年七十有一公先配蔣氏先卒繼配蔣氏子二長恩綬福建廈門同知次恩緒舉人內閣中書孫四定官盤官奎官聯官孫女二光緒丙子恩緒計偕北上道揚州持公狀乞爲埋幽之文

將以某年某月某日葬潛頤曩官京師爲詞館後進久從公游知公最深不敢以不文辭迺爲之銘曰

我與公交因宋侍郎辱公愛我垂老弗忘銜卹遠游道出信江旣分清俸俾得成行嶺南北歸又荷公貺淹滯章門彤神悽愴公曰勿爾爲之屏當過返故鄉甫營喪葬悠悠一別倏逾二紀感公高誼古之君子及公歸來我官邗水毘陵匪遙近在尺咫過公之里末由見公城闔夜鑰有刺難通公喪未哭悒悒於胸讀公之狀警歎如逢侍郎曰公一時無兩壬癸之間治兵籌餉不尸其名功任人壤可謂知言盛德同仰吁公有子述公勳烈能讀父書使我心折我文非諛質而且實傳之千秋不可磨滅

山泉朱公墓志銘

錢振倫

公諱善張字子弓山泉其號也系出發源自其本生曾祖孝義先生始居平湖高曾祖皆以公世父官封贈一品世所稱椒堂先生也考爲霖有聲庠序爲阮文達高弟官終贛縣知縣前妣氏陸母氏蔡並以公貴贈夫人公濡柴家學早孤善事母友教其弟六人值彝陷乍浦以諸生率義旅守鄉里起家南河通判進同知道光二十年補桃南通判署豐

北邳北調中河咸豐五年升裏河同知卽補道員九年除淮揚道未幾改并爲淮徐揚海兵備道遂眞補而終於任咸豐以後粵逆與捻匪分擾於江北之境而姦民亦乘時起故歟歷諸職而時在行閒自粵寇入江卽理防務三年勦幅匪於海沱殲渠獲黨

賞花翎又勦黃河海口洋匪得優敘七年捻寇已熾勦辦得力

賞加鹽運使銜旋禦捻首張濬於浮山使水軍潛伏臨淮焚其舟又卻之小溪及揚城再陷髮逆陷天長撲蔣壩公馳往拒之殲其酋

賞庫木勒濟特依巴圖魯名號蓋異數也九年四月僞英王四眼狗撲揚州公方駐揚先置礮四門爲備賊環撲欲斷糧道公以巨礮擊斃賊目十餘人賊駭曰紙糊城如此難破耶遂堅壘爲久計會天雷雨毀其壘因擊潰之旣而援師併集敗賊於七里店追至儀徵以西揚民以安復以捐資餉軍

賞二品頂戴秋冬閒賊麇至聯營至司徒廟互百餘里公晝夜守陴率厲將士多所斬獲賊始退蓋禦粵寇以保揚者如此十年捻匪陷清江浦公統師克之遂駐浦創築圩寨爲善後計同治紀元莅任徐州兼辦糧臺用堅壁清野法僧邸圖攻孫疇老巢公率圩練以從破之於棗溝

斬馘數千旋獲賊事二年降練苗配林據下蔡叛再陷壽州圍蒙城時公會辦徐宿軍務知蒙城餉絕輸粟助之餘黨竄入湖團迭派裨將斬禽之脅從者釋之邸營大集復派隊爲後勁已而苗逆復誅徐方以安得

旨優敘蓋禦捻匪以保徐者又如此未幾湖團之患起矣湖團者始議招流民開微山湖激自沛至魚台戶數萬爭利亡命頗遷跡其中會新團奮匪殺掠沛縣劉民寨圩三年七月會營勦之未竟而沛人愬不已公以急之覺速緩之患滋憂憤傷肝疽發而裂八月十七日子時奄捐館舍春秋五十有九沒之前夕猶誦陽明身可益民甯論屈心存經國未全灰之句聞者傷之漕督吳公棠先檄勦辦公密畫啟陳力疾不已并據以上聞

恩贈右都御史

賜祭葬廕一子知州嗚呼榮已公至性誠篤沒不忘親善屬文前後校刊家集甚夥自餘政績不備書配范夫人前卒生子之柎兩淮運判側室趙恭人生之榛江蘇同知賞花翎戴恭人生之樾候選主事王安人生之柱候選通判女八孫三

之柁等於同治四年十二月奉公柩葬於故里之徐垓以振倫以公從
兄善驥爲同年且舊史氏也乞爲文謹據狀詮次而系以銘曰
事親孝移於忠鎮維揚障徐僮死勤事憂羣凶

帝憫焉

贈秩崇遊故鄉劫初終銘諸石奠幽宮

沛上致憂圖卷書後

湯紀尚

沛上致憂圖者圖故贈右都御史平湖朱公治湖團事也湖團者何咸
豐初元河決豐工自銅沛魚臺南盡微山昭陽湛爲巨壑議墾於澱濟
軍實則有山東貧民逐利不逞之徒在大男劍椎女亡命逃匿其間叢
叢蝨蝨旁絡數百里鱗鱗億萬戶於是土客狐離酒肉敖盪一端睽沮
輒瞋目語難刀槩夏夏深宵有聲期殺傷當乃已不則刻時日更鬪名
捕戎首則攔秘狡逞不以實獻其尤桀黠往往與大寇屑齒時公備兵
徐海時會搖迫武競恩狎縣相怨愬公憤犂牙騰遑而出瘠心紆圖
卒沮眾議憂悴以歿可謂勞臣已阡陌裂人私其土輕徒若駭獸吏仇
視其民民迺罔託命貧相軋富相猶貧者危而完富者擁而覆詭異不
俾之氣鬱而爲戈鋌人禽冤痛山河潰瘡迨苗患徂安集慶而槁瘵在

野國勢日蹙其不亦晚計矣乎夫同利者必爭恆情然也恆情所樂趨而不爲亭毒以濟之平則蓬跣之子將頽怒其長上而售厥姦故治術之善任擇將率不若任擇守令時乎休息與之安舒蹈舞焉以凝其器競使之回易志慮馴導血氣渾渾乎相融以漸臻夷佚之化其道如是而已吾觀公之用心匪扈聚之又捍庀之更噢休而媁嫗之自非孤忠鬱律恣摩蕩而無鯁避安能繚戾詰曲中積憤求大慊若此公子之榛捧圖督題用奮旌卷首以訊痛心民勞者

前雲南布政使蕭公神道碑銘

董

沛

鄉泉蕭公之歿也鍾侍郎秀旣志其墓方布政濬頤復爲之傳公生平行誼已具大略孤子彝游於吾門復以埏道之文爲請乃敘而銘之公諱浚蘭字儀卿鄉泉其別號也先世居長沙宋時有諱維嶽者官延平通判始遷高安遂爲江西高安縣人曾祖映春祖物華俱諸生父元吉嘉慶庚申舉人官河南知府以循吏祀名宦祠事具江西通志三世皆以公貴贈資政大夫曾祖妣祖妣俱況氏母鄭氏並贈夫人生母吳氏封太夫人公生於祥符官舍故小字祥生有兄蘊蘭早殤及舉公河南君春秋高絕憐愛之自幼穎悟讀書倍常童年十六回籍應試卽補諸

生旋舉於鄉成道光甲辰進士改庶吉士明年散館授編修又明年充
湖南主試官尋督雲南學政丁未遭嫡母喪去任己酉遭父喪壬子服
闋補原官乙卯遷江南道監察御史明年掌京畿道巡視中城又明年
轉工科給事中戊午授甘肅甘涼兵備道明年署按察使
賞戴孔雀翎又明年補四川按察使未之任即擢雲南布政使滇中亂
道梗不前部議鑄秩

詔留營襄辦軍務丁卯

賞四品頂戴還其孔雀翎旋遭生母喪奉柩歸里此公一生歷官之本
末也公軀短小不踰中人而精悍之色時見於眉宇議論雄偉抵掌天
下事左顧右盼千人皆廢敷歷中外逾二十年奔走數千里所在稱職
官詞林也朝章國故如肉貫串遇有大事公卿成就諮焉典文衡也端
士習培人材孜孜訓迪務勉於正學居西臺也封章屢上彈劾不避權
倖軍事得失將帥賢否皆直陳無隱任外僚也日治官書幾廢寢食決
疑獄如神明理番回之案無不帖服參軍務也尤以將材爲亟一技一
能悉與甄錄士心豫附之公受

聖明之知一歲一遷駸駸大用而適滇回之亂中道顛蹶海內聞者咸

爲扼腕及夫奉諱家居年力正盛

天子有意於公

命俟除服

召見而公爲境遇所困不復出山棲息寓廬卒以不起此則有識之士所以爲公重太息也同治癸酉十月三十日卒於南昌年五十有二配曹氏新建人江南道監察御史熊女繼配錢氏嘉興人金山知縣燕女俱封夫人側室王氏尚氏曹氏子二長彝縣學廩生曹夫人出次蕭尚氏出女六長適光祿寺署正翁立誠次適石泉知縣鄭桐三適戶部主事張懷慈四適夔州通判彭祖厚五適中書科中書周鴻年幼未行孫一人孫女二人光緒乙亥七月十四日葬公於高安石腦橋西南山之陽兩夫人皆別葬又十二年始爲之碑余需次江西公已前卒頗聞公身處困厄而慷慨好施急人之急展轉稱貸無吝色一日客至以貧乏告公以蹙額無計相與痛飲席未終有遠道寄公函者啟視之白金五百也公大喜亟分其半以饋之公歿後舉債數萬盡斥其衣服器用不足以償宿負子孫食貧至無一隴之產然士大夫之知公者則猶唏噓感喟於靡旣也嗚呼難已銘曰

始仕則通而躓於中始境則豐而困於終公處憂患而不墮其忠公好
施濟而不恤其窮山高水長奠厥幽宮畢然者碑磨且礪銘此神道光
熊熊

續碑傳集卷三十七

江陰繆荃孫集錄

同治朝監司四

馮志沂傳

安徽通志

馮志沂字魯川山西代州進士由刑部主事洊升郎中咸豐三年尚書許乃普以知兵薦奉

旨交山西巡撫差遣派防固關事竣回京十一年授廬州府知府勝保奏調隨營勦捻有功加道銜同治三年唐訓方調辦文案旋赴本任招集流亡撫綏教養禮賢課士謝絕餽遺清操自勵深為曾國藩所器重累署鳳潁六泗道安徽按察使補徽甯池太廣道皆以清靜為治廉威稱其職六年卒官幾無以斂行篋僅圖書千餘卷著有微尚齋詩文等集

贈光祿寺卿銜廕子知縣如軍營立功後病故例

黃良楷傳

江西通志

黃良楷字品芳清江人道光鄉舉起家山東樂安知縣在官九年膺上考

賞戴花翎量移荏平知縣時捻匪孫三羅漢幅匪魏徐元等倡亂大吏
諭良楷知兵調蘆山縣辦賊戰曹平溝禽賊渠王興未餘黨走聚江南
邳州良楷越境往剿平之移知滕縣粵賊窺北方良楷奉檄救金鄉以
兵三百人往陣斬偽土司將軍金鄉圍解之曹州率八百人受土寇王
尙義降先後得眾萬人出追臨清賊尙義感良楷恩力戰焚徐家樓殲
賊無算從親王僧格林沁滅李開芳於馮官屯曹州土寇復起又平之
侍郎勝保勦張洛刑奏以良楷兵自隨山東巡撫執不可良楷亦以疾
辭事未定

朝命授良楷濟東泰武臨道遂留山東尋奉

命幫辦三省會剿以孤軍駐永城淮南北互長七百餘里賊眾四出良
楷大小七十餘戰賊不得越永睢巡撫文煜調良楷當徐邳間賊移駐
紅花埠剿沂州土寇戰於蘭陵追殛於垛莊再隸僧格林沁軍解滕縣
圍降白蓮池賊殲其餘黨山東巡撫閻敬銘以良楷精吏治使核州縣
交代清釐五百餘案奏加按察使銜致仕歸卒年七十有八

署山東督糧道丁君家傳

道國華

君姓丁名彥臣字筱農浙江歸安人軀貌威朗性警敏有才略少偶儻

窮居讀書生事落甚粵寇亂天下當路大收才俊一時俊偉之士幸不
罹於鋒鏑率自感厲變去儒術奮然思所效用君始去里中游皖江與
廣德刺史有舊止焉短衣敝屨所遇皆易之或從市人飲醉則枕繳臥
竟且不起有杜生者大憎君於眾曰棄人也哉而曰有功名之思也君
聞焉仰屋且歎既起而走曰杜生教余也居無聊從他客爲會計會寇
至天下太平久士不知兵而長江陷且下浙四十餘城君留江北友有
詣京師謂力能處君至則負所言君益落拓與酒客游噴墨作梅花乘
醉論時事手畫几席上人以其狂遂去走山東聊城令者君里人造焉
不能見再造亦不能見君泣然危涕曰蓋生年三十無有所成積至
於此嗚乎窮哉途也乃投山東軍是時大府下令有能獲賊輒奏予官
民死於誣者無慮千百氓隸佳兵以殺爲嬉中丞譚端恪公識君於眾
人練軍縛人離亂中皆屬君處決誣者往往得論生而巨盜郭囚稔君
慈故不伏君自引刀堂下斬之人莫不又威憚君繼爲中丞閻公敬銘
丁公寶楨皆重君先後以君爲儲胥同治四年丁公拒寇臨城食匱事
甚急君方置酒會軍諮得告罷酒卽夕嚴裝戒車騎號資糧十萬斤卒
不給足以炊餅載庫錢五千升譙伐鼓策炬呼譟而出如發千軍實則

二十騎寇聞軍聲游騎左右至天味爽君行蓋徐投餅塗間遙雜散金
寇惡其爲誘不且進君遂馳入丁公壁士卒懸釜者驚相賀以爲眞君
自天而下也寇遂解旣君領一省饜大軍恃如山事無有不舉七年寇
平十年河決鄆城復從築隄隄成得敘爲道員銜布政使蓋以令長累
是職初不十年君之座上客恆滿振貧乏如所親遇故人問候羈旅有
叩門來謁則振衣出迎引眞茵榻苟有陳說必曲爲之盡單人窶子一
長一技俾各以自見大夫士之徑山東者攬環結佩悉禮厚之晴風佳
日旌旗搖曳偏裨軍校立庭戶下名畫彝器函籍之屬嘗念文獻所喪
後求之如不克譽望隆重心曠目開振纓戎弁承顏接詞其至若歸與
人約無不信無急色遽聲加之於人凡履君之門無咨嗟怏怏而出者
君暇日自道微賤未嘗不下泣霑臆也初君嘗讓典濟南郡及轉觀察
始攝督糧事漕粟倚爲平同治十二年卒於官年四十有五一子祖德
扶喪至濟南會弔者千餘家貧嫗乞子提挈哭於塗君嘗建棲流所
煮穀爲冬衣也君嘗集浙人相地濟南三一鄉祠以時會一同善社殯
亡者其一義園無嗣及貧莫歸者以葬君嘗以籌精數多輸入禮部得
廣浙試而多舉至於五人

論曰天之於人也所困之數者其後美往往視之然或有效不效如丁君者則既償之矣顧不美與而能公其美於人獨至於此豈其間有所傷心者耶雖然非賢豪者則竟不必然

黃琴鳴先生墓表

郭嵩燾

君諱輔辰字琴鳴先世由江西瑞安遷醴陵十五傳至公之考運裳公再遷貴筑遂家焉曾祖曰朝瓚祖曰承謨三世並以公貴

贈中議大夫運裳有子四人長曰安泰次曰輔廷山西垣曲縣知縣次曰輔相廣西右江道殉難潯州其季公也少貧讀書自刻苦遭父喪徒步走雲南三千里告貸所親得三十金歸葬自是貧益甚至屑糠以食日夜自砥於學無所得書故湖北布政使唐公樹義少與友善時攜小童負書麓就公公遂以博覽經史周知古今事變慨然有志經世之學由進士官吏部文選司主事遷驗封司員外郎再遷考功司郎中以知府分發山西公在吏部歷文選考功二司主天下人才進退例案出入比校吏緣爲姦公輯舊案揭示吏部堂使不得蒙蔽匿飾遇事持大體論辨侃侃無阿回尙書長白恩桂公方厲威嚴以公言事忤意積九年不遷及病且死語雜縣陳文恪公曰黃君賢者而久淹滯此吾過也昆

明竇君埈爲鐫石曰硬黃以贈公於是人知公直諒能任事而憂公之
道不行於今公至山西聞貴州亂作遽歸歸則倡議團練躬自察形勢
建礮堡積穀省城二萬餘石治垣堞樓櫓以其閒撫輯清水江諸苗已
而賊犯清水亂民四起公急馳至巴香平其亂以功擢道員旋署山西
冀甯道時戶部鑄行鐵錢議就鐵鼓鑄設寶泉分局於平定州鐵錢積
滯不行京師錢法日壞而平定一州歲消鐵錢千餘萬當時以州地小
請通行各府州縣鐵錢日賤物踊騰貴山西錢法亦大壞公以鐵錢餘
利歲解銀三萬餘兩爲利無幾而爲民害甚大旣通行各府縣必議交
納錢糧以三萬金之餘利而妨數百萬金之正供是爲利一而害百巡
撫英桂用公言上聞分局遂罷當事者注意倚公矣而公以抗直積忤
當事於是人又知公之道不行於山西直隸總督恭襄公恆福故爲山
西巡撫知公會天津海防急調公直隸爲部議所持公亦環視歎曰有
機事者必有機心吾老矣豈足堪此居久之四川總督駱公秉章馳書
召公遂入蜀而劉公蓉適巡撫陝西議興屯田利病公爲屯田輯要曰
成法者十七曰積弊者十四大旨在爲民興利而不與民爭利劉公得
公書大喜密奏公授陝西鳳邠道公遂一以屯田自任正經界定限制

行之期年墾田十八萬餘畝於是士大夫知公者相謂曰黃公之道庶幾行於劉公而公以積勞病遂卒年六十九同治九年十一月六日也公爲政一主愛人而剛嚴守法無瞻徇姑息其在吏部易州牧以賄事發覺侍郎何公與同年陰護之公亦與同年因曰如此是翫法也何惜一同年之納賄者而翫法以徇之其治獄山西臨汾令以非刑殺人獄具矣而以疑詞上聞公爭之力已而奉

旨詰責卒從公議其勦巴香賊有武生羅憲章者大猾也與賊通族眾且強公至問曰巴香亦有以死拒賊者乎眾曰有羅燦奎憲章叔父也公召其子慰撫厚卹之眾感泣召憲章問通賊情狀厲聲曰誰能保憲章不反者卽反與同座眾出不意莫敢應公顧曰汝羅姓亦無敢保者乎卽縛斬之眾大懾凡斬王登學張洪二人自是巴香民無反者山西大吏議行保甲求公在黔成法公曰事不躬親取行文書集事其可得耶苟非其人法雖良爲害而已大吏意難之山西保甲亦終不行而公在黔在秦行之皆著成效其辦陝西屯田陝甘總督楊公岳斌請以陝西回民叛產變價充甘餉公言變產利近而害多募民開墾其利遠陝西民力竭矣募民開墾應者無幾甯復有越境裹糧以就危亂者如此

則弊且不可窮詰劉公遂據公言覆奏府州縣有以屯田爲利者悉論如法是以陝西民思公尤深劉公於是具公事蹟祀陝西名宦而請以公治行編入

國史循吏傳得

旨褒敘如例嗚呼吏失其職久矣世所謂循良務在平易近人情邀流俗稱譽容頑保姦馴至大亂而賢者樂趨焉有能持正議行正道則見爲迂闊不能和同於人爲世大詬嗚呼孰知夫循良者非能持正議行正道而固不可哉微公誰與討論政治之得失微劉公則又誰與表章公之道以有傳也公夫人左氏有賢行先公卒子彭年自陝西奉公與夫人之柩歸葬湘鄉蓋劉公爲之擇地卜兆庶幾能有始終者嵩燾與彭年同舉進士夙知公益知彭年學行能守家法乃敘次公行政大要揭之墓道以俟後之徵公軼行者有攷焉

又陝西鹽法鳳邠道黃君墓志銘

劉蓉

同治五年十一月初六日陝西鹽法鳳邠道黃君卒於任越三日子爲疏列治狀於朝得

旨褒異命祀陝西名宦祠下其章宣付史館明年其孤彭年以喪還湖
南又明年戊辰三月卜葬湘鄉縣某鄉某原夫人左氏耐焉彭年以監
利王君柏心之狀來請銘予與君同官陝西相得也又與彭年交最篤
其敢不銘君諱輔辰字琴陽世爲湖南醴陵人逮君考始遷貴州年十
七補貴鏡縣學生遭父喪徒步走雲南三千里貸金以葬旋丁母憂困
甚諸兄皆客游留錢四百米二斗贍之益茹苦自砥於學夫人躬井臼
佐之食不給則屑糠和麥麩爲粥以繼又不給則就鄰舍孔生擷園中
桃實生啖之意常充然讀書窮日夜不厭從友人借史漢諸子手鈔積
數十卷已又從其兄之山西官所講求時務利病得失由是學益闕肆
慨然有經世之志矣道光壬午舉於鄉乙未成進士補吏部文選司主
事遷驗封司員外郎再遷考功司郎中貴矣然被服操履如寒生時平
居溫然與人無畛畦及遇事侃侃持正論不視勢俯仰前卻屢忤尚書
恩桂公又與侍郎張公爭易州收貪墨事抗論再三同官或目之硬黃
鑄石贈之然君但知謹法度舉吾職而已未嘗以節概自標異也久之
以知府分發山西會貴州楊鳳亂君馳回籍集士紳修礪卡行保甲法
撫輯清水江諸苗弭其怨隙其後賊至無叛者巴香亂君馳往大會團

衆縛斬羅憲章王登學姜洪三人義肅民安事以大定以功

賞花翎擢道員仍發山西時患餉絀議抽釐以濟君謂晉人皆賈於外又山程非他行省比不宜以病貧民爭之不得則請蠲苛細取大宗不切民生日用常需者戶部設寶泉分局於平定州就鐵鑄錢既滯不行則請分銷各府州縣歲收息銀三萬兩解部君謂

京師用鐵錢以濟銅幣之乏也山西銅幣敷而用鐵故弗便今如通行各縣必令交納錢糧銅少鐵多司庫必絀以三萬之微利妨數百萬正供是謂利一而害百卽專行平定一州然鼓鑄不息日積日滯患滋大且州在萬山中工匠蝟集諸亡賴混迹輳趨不可稽禁奸民煽之害胡可言巡撫英桂公用其議入告分局遂罷兩權冀甯道加鹽運使銜調直隸軍營至大沽海口察形勢請以重兵扼北塘僧邸迂其言不用卒以大潰後政府聞其賢或諷見之君謂非公事義無私謁終不往也旣還山西英桂公雅重之然君內自度孤直不諧於時堅乞假歸抵成都客總督駱公秉章幕於是君年六十有五亦無意世用矣會徇逆大擾秦隴閒荒殘無耕者子承

詔巡撫關中疏請興營田裕民食而函訪利病於君君因采錄官私書

爲營田輯要三卷述古今經制得失讀之犁然念非君莫予助者於是密請授君鳳邠道至則舉西同鳳延鄜邠乾七府州屬營田事委之君謂關中土曠人少非招徠客民事末由濟然墾荒所需耕牛籽種農具棚舍之屬官不能給民不樂趨也則莫如卽以地畀之薄收其租畝二斗爲差六年屆滿則給券使世其業然慮田無限制賦無定則吏得以意高下爲民患也則議先正經界略如古井田法量地每百畝爲段編號列次第書賦額多寡於券視土肥瘠別等則上下授之凡領墾者以先後爲次自一至十毋越其序十段爲甲十甲爲里置長焉里長總十甲租課歲輸之官凡移徙更替事皆責之別授田六畝俾食其入爲庶人在官者之祿而官總其成令下民大便之朞年凡墾田十八萬餘畝又撥產給關中書院米薪及各義學養濟院育嬰堂種痘局以至壩岸隄工渠工之費諸廢以次舉矣會時稍異君感憤疾作數上書求謝事予念功垂成又難其繼顧君積勞且病不可強留也久之君竟不起而秦益多故矣夫人左氏懿行篤備先君七年卒曾祖朝讚祖承謨考運裳皆

贈中議大夫曾祖妣張氏王氏祖妣羅氏妣匡氏皆

贈淑人君立身清嚴而不立崖岸論事持大體而務盡纖微計久遠其在黔治鄕團置屯租在晉規形勢險要圖阨塞以固
畿輔皆幾成矣而卒廢及來秦治營田慮患必深創制無頗效未半而君遽病予亦去官終以不竟其施故秦人尤嗟惜之君病中賦詩感悼亦自傷所志之不就也然予觀古井田溝洫諸法大都累世經營聖哲相繼積數一百年而後大治其時候國秉一王成法子孫世守私土田爲樂利亦兢兢莫敢廢墜非久道政成之效與自郡縣興而治歸牧令又不數歲而徒職事治否非天子所得周知也故上下以文相承深智之吏知弊積而難返利遠而不可驟興則蹈襲故常不敢圖創始難成之功不肖者視官如寄或翫法令爲姦利苟然以便其私由來舊矣然則君卽以耆年終事任豈能保吾志之必成與繼君任事者之必不廢吾法哉惟知其然而不以自撓不苟簡以急近功而必規百世之利不逆測後人之莫吾繼而必竭一日之誠此仁人君子忠貞篤恭體國經野之遠猷所由異於後世能吏而君之賢遠矣予於君治行不悉著獨舉經世大略係時得失者垂世鑒焉蓋世變甚則任事愈難其成與敗非人之所能爲也君亦盡其在我者求爲可繼而已其他又奚恤乎君

卒年六十九子五人長葆謙國子監生早逝次彭年官翰林院編修次
晉齡又齡葆垣皆殤孫四人國瓊湖北候補同知次國瑾國琛國瑄也
彭年賢者學行為世推重諸孫皆傑立勵學自修君社所施庶其無既
銘曰

以儒起家仕則遭十年郎署淹不遷艱貞百試志彌騫匪鳴吾介道則
然宦遊汾晉涉幽燕中藏瓌瑋鬱不宣晚起承

詔西營田噢咻婦子惟攸便襁負偕來歌復絃我黍芄芃瓜縣縣創始
在人成則天位不竟功奪其年

帝獎循良嗟爾賢

詔書惻怛光黃泉我銘惟實納幽阡後有作者考斯篇

袁篤臣墓表

孫衣言

嘉道以來天下無事久吏治日趨於文達官大僚務貴倨為威重羣下
望風而靡外官尤甚及咸豐軍興吏道益雜望彌輕體亦益卑自兩司
至道府階級稍殊則儀制異甚凡趨踰應對及班行次序苟毫髮有不
合輒顏色立變或羣齟齬之使不得出氣而後已於是輕儇者投隙競
進而嶽奇磊落有志之士困矣子友袁君篤臣以高科為曹郎喜讀儒

書有志於經世大事尤慕其鄉先輩呂甯陵湯睢州之爲學束身自好
不肖荷促隨俗己而奉

特旨發往山東以知府候補當是時關中閻公爲巡撫稱當世賢者極
欲革靡風而承平痼習猶在牢不可解篤臣在山東數年以功得道員
道府皆四品而儀節殊異凡公事期集不同次舍由知府得道員當綴
兩司班後然必逡巡再三俟藩司再三請乃敢卽次以爲謙讓有禮篤
臣在府廳班久已鬱鬱及是不俟藩司請徑入班坐藩司某深嘆之先
爲道員者亦愠遇事與齟齬而篤臣素氣甚好論議無所回避同官益
不喜所以陵折之萬方篤臣久始覺已無可如何其後上官數易人皆
知篤臣才而無一人右篤臣倮然處羣閥中益寂寥無與語欲棄官去
未能堅決而馬端敏公由浙撫擢督兩江遂奏調篤臣來兩江差遣是
時予亦以端敏公疏起先至金陵後數月篤臣亦來篤臣既得端敏公
則意氣益發舒知無所不言端敏公尤傾下之初端敏公虞楚軍不可
獨用奏調淮北舊部將召標兵三千置營金陵教練之卽以篤臣盡護
諸將復令赴上游疏通官鹽篤臣能洞見利弊有所罷行端敏公無不
以爲善其大指在簡易核實無文具篤臣既爲大府重賓客輻輳日盛

而篤臣獨暱就予予亦樂親篤臣閒數日一視篤臣卽出所著初書視予多切近中理如呂叔簡薛文清兩家之言篤臣好論天下事視同時人無甚當意者予嘗微語之曰以子之才無所不可然宜益就靜深以觀世變必是非可否之理盡於吾心而後可以決爲而無悔否則浮動傾仄之徒將有以中之篤臣以爲然越明年七月端敏公遇賊暴卒金陵賊中大擾予方提調鄉試將入闈卽語諸淮將曰各速歸守壘備非常徒效兒女子聚哭幕府無益眾愕然獨篤臣以爲是又謂篤臣曰今賊幸就禽宜及其惶遽未定嚴刑掠治務得其本謀若稍縱示賊易與則玩不吐實矣篤臣尤然予言其後治賊者率惡言用刑獄遂不能竟已而

朝廷亦以爲疑出大臣覆治大臣至欲用尋常殺制使例爲速了卽并檄予暨篤臣同讞冀無他言予復語大臣曰賊旣承爲粵逆黨矣倖脫不誅死復敢爲此與叛逆何異今卽不能鞫得實宜棄常例用重典東南大亂初定不可遷就損國威大臣尤不悅卽具獄欲奏上予遂不書諾篤臣亦不書諾當是時獨篤臣與予議合端敏公旣卒文正曾公再督兩江素賢篤臣令治營政如故及文正公卒香山何公權總督尤謂

篤臣幹力無習氣既而予由鹽道擢皖臬卽奏以篤臣署鹽道予既來皖篤臣時時寄書相策勵人由金陵來皆極稱篤臣治狀時開縣李公來制兩江文正高第而端敏同年也予謂篤臣雖不得端敏公然上官相繼皆賢者其必有以盡篤臣之才矣而竟以癸酉六月二十一卒嗚呼此豈獨篤臣之不幸也哉

雲南布政使姚公墓表

鄧嘉緝

同治十一年十二月山東巡撫臣丁寶楨山東學政臣潘斯濂合詞請以故官雲南布政使前任安邱縣知縣姚錫華入祀安邱名宦祠從民志也

制曰可於是宣事實付史官有司諷吉奉主入祠天下翕然稱公爲循吏矣公字曼伯上元人祖世求考先立鄉里目爲善人公少有文譽辭賦傳誦一時世稱實庵先生道光壬辰受知於湯文端公辛丑成進士歷官山東新城長山安邱齊河知縣擢桃源同知卓薦授廣東惠州府轉廣西左江道奏留山東署曹州府稍遷山東督糧道父艱服闋補雲南糧儲道升按察使再遷布政使以疾乞休同治九年七月卒年六十有七公之治安邱也日坐堂皇坐兩吏堂隅訴者入互書之使不得增

損徐諭之曰汝辭直矣彼曲者必以爲辱辱將怨汝而尋讐同處親族里黨之中獨不能小讓以解怨釋讐乎歸更思之如不可忍者官不難爲汝判決也於是曲者尤感悟往往罷訟邑徵例納錢折銀解司庫是歲銀價驟昂虧累頗鉅紳耆請增納緡錢公謝曰父老意良厚比歲銀賤而今適貴命也使我去而價平地方受加賦之害我何心也自今其照章納銀使官民兩利可乎人情大悅歲終邑無逋負其治盜優養名捕獲卽重懲嘗謂捕不食於官必食於賊一案之費輒數百金吾卽以此金養捕捕亦何樂參盜由是盜發卽獲相戒不趕姚家集毋浪入死門非他捕可賄也在官三年民俗丕變其治新城長山一如安邱而政差簡最後治齊河安邱民相率具鼓吹綵仗走數百里獻旗扁頌德政齊河民亦同聲歌頌爲樂云其在曹州值粵匪擾直境分竄高唐德州腹背受敵守禦百計城賴以完至入滇後逆獮叛服不常當事勦撫莫決公不得有所設施遂以憂勞致疾矣嗟乎觀公之爲治使得涵濡漸漬以深其教養何詎出召杜張王後哉惜不得永其施以溥其澤於世也公嘗自言使吾宰一方十年可百廢俱理而今之長官於佳吏不使久任以究所欲爲此教化所以不行也又言州縣當重門洞開與民日

相見蓋官之於民惟聽斷時得相接苟稍假辭色因以覘地方利弊風俗美惡兼可聯之以情故一日不宜閉閣自適也嗚呼安得此長者之言哉謹最公治蹟揭諸墓道以為長民勸焉

前陝西按察使權巡撫事張公墓志銘 薛福成代

光緒四年冬十二月丙子前陝西按察使權巡撫事張公卒於京師寓舍孤兆蘭具事狀請銘於某其略曰公諱集馨字椒雲揚州儀徵人曾祖諱盛祖諱能烜考諱式堯本生考諱式封皆以公貴

誥封資政大夫妣氏吳本生妣氏許皆

誥封夫人公以道光九年進士改翰林授編修累充湖北河南副考官旋知山西朔平府事擢福建汀漳龍道以憂去起復為陝西督糧道擢四川按察使進貴州布政使未及赴官調甘肅又調河南奉

命勘事山西事畢入對仍還河南以事奪職遣戍復起為河南按察使遷直隸布政使粵寇北犯公帥師防剿迭有斬禽會總督與大帥不相能劾公奪職遣戍復以接戰大勝留營從克臨清州及馮官屯

賞五品頂戴發江南大營充翼長旋引疾歸復起為甘肅布政使以憂去旋除福建布政使調江西以事奪職復遷為陝西按察使權巡撫事

時回寇方熾西安將軍多隆阿率勁兵入陝公會師進剿不數月全陝
悉平俄而新巡撫來莅事公既受代奉

命赴甘肅審度勦撫事宜復被劾落職永不敘用旋以勦賊獲勝銷去
永不敘用處分俾率所部援狄道河州公遂引疾回京凡十四年而卒
壽七十有九公性警敏尤練於吏事治朔平值旱蝗用古法掘塹驅之
以粟代價收買蝻蠶百數十萬斤蝗不爲災督糧陝西以歲饑請蠲緩
巡撫林文忠公則徐嘉其識具疏密薦陳臬四川誅鋤巨盜平反冤獄
禁州縣之私繫無辜者及爲布政使也甘肅地曠瘠丁糧多不時納納
銀又違市價州縣懼償所耗則虛報旱災以虧公帑公明定章程凡已
徵不解者勒限嚴追積弊遂清河南地大物博起運及河工加價銀幾
三百萬兩州縣習以延宕爲虧挪計公造征解清冊載明應征起運已
征未解留支實欠各款時時稽覈按冊嚴提不半年庫儲無缺額人以
是服其精及居京師翰林年輩無如公者公優游鉛槧以道自頤時與
諸髦俊文謙爲樂主講金臺書院教士猶不劾去嗟乎世方操成法以
繩天下之才當官者務渾其才智而謹身選事之流轉得自託於中庸
卒之焯有樹立者不數數觀若公之才足以宰物理民智足以審時應

變乃既起旋躋至於三四或邂逅聖議幾不能自解免才智誠不易得
得一才智者而困於訾訾之口又不肯稍自斂抑以就繩墨齟齬不得
究其用斯其可慨者已公初娶黃氏繼娶邵氏王氏皆

誥封夫人先公卒子一兆蘭將以光緒五年冬十一月某日葬公儀徵
縣之某鄉某原銘曰

文宰羣倫武振三軍胡屢貽屢奮而不能息眾謗之紛紜志百韞而一
施豈人事之多歧抑天命之不可知闕其休祉後昆是貽鏡辭窆石用
諗來茲

河陝汝道尹君墓表

吳昆田

顯皇帝御極之八年粵豫皖逆方張四海糜沸會夷艇駛至直沽御史
桃源尹君劄陳時政疏凡八九上最後以與設立夷館議力爭不可痛
哭於

朝於是天下知有直臣尹杏農而君之禍自此萌芽中外思有以構傷
之間者人人危懼其友刑部員外郎吳昆田謂之曰盍避諸君曰吾自
先人卒官河上竭產不足以償官累乃久無家避將焉往及昆田歸里
聞君之河南贊戎幕淮徐海饑君一遣使商振卹事尋聞河南亦饑而

君以憂勞死矣嗚呼君爲當世之所忤憤久齎志以死固宜獨恨心迹

晦至煩

朝廷推問遺事曾不萬一見諒於九泉之下於眾多疑似之口爲可悲也逾年其孤彥釗奉喪歸葬有日以昆田知君深泣請爲表墓之文其焉辭按狀君姓尹氏諱耕雲字瞻甫號杏農世居江蘇徐州府睢甯縣遷淮安府之桃源縣遂爲桃源人曾祖仁祖乾父漣河工山盱營守備皆以公貴

贈榮祿大夫君幼而穎異過目成誦稍長學爲文每一藝出輒驚其長老年十四居父喪哀毀骨立侍母疾刲股和藥露禱於庭病立瘥二十四歲補博士弟子員踰年丁內艱自贈公卽世後貧如洗君以教讀爲生益力學祁文端公雋藻視學江蘇重其文行嗣於道光己酉科選充拔貢遂中式本省鄉試舉人庚戌成進士以主事分禮部值

宣廟升遐敬襄大典曾文正公國藩時貳秩宗極器重之充

實錄館校對咸豐五年補主事掌精膳司儀制司印務
實錄告成加道銜粵逆陷金陵分竄大河南北蠟畿輔犯天津惠親王
爲奉命大將軍僧忠親王參贊檄君入幕府君上疏五千言論其事由

是見知於

文廟七年考取御史記名八年授湖廣道監察御史九年轉掌湖廣道監察御史署戶科給事中查稽萬安倉巡視北城感激時艱封奏月數上不避嫌怨其請收成命以嚴賞罰疏曰本月十五日

上諭訥爾經額著以四品京堂候補欽此

聖意高深臣下何由窺測然記曰爵人於朝與眾共之刑人於市與眾棄之訥某之罪眾之所棄天下既共聞而其見之矣未喻其所以復行起用也方今江淮楚豫軍務未清秉鉞之臣星羅棋布所以奮不顧身必欲滅此朝食者固由篤於忠義亦由

國家信賞必罰有以畏服其心耳萬一效尤解體患何可言昔宣宗成皇帝起用琦善因陳慶鏞之言收回成命

神聖詒謀炳垂史策伏願紹述心傳俾天下咸仰大公其請授曾國藩爲欽差大臣以援湖北疏曰湖北武漢二府地踞上游北可窺關陝南可脅湖湘東可撼吳越西可制巴蜀自古南北用兵皆出死力爭之咸豐三年粵賊回竄武漢再失前兵部侍郎曾國藩忠義憤發簡練鄉兵重復武漢乘勢東下圍攻九江克復之期在於旦暮乃五年賊由北岸

上犯避實擊虛督臣望風奔潰武漢復爲賊有非克之易而守之難也
蓋黃梅廣濟興國大冶居省垣肘腋賊躡蕪黃則武漢危如累卵故欲
搗金陵必先經營武漢今羅澤南胡林翼先後濟師崎嶇數載僅收殘
局而賊用其故智窺伺楚北分擾廣濟黃岡逼近省垣撫臣胡林翼兵
勇數千眾寡懸絕江路繇遠首尾不能兼顧萬一蹉跌封疆之事尙堪
問乎曾國藩忠勇樸誠久邀

聖鑒用以急難斷不敢辭唯用人而不盡其用與不用同曾國藩比在
江西未建尺寸功事權不屬威令不行也應請授爲欽差大臣赴援湖
北率其舊部以解震鄰較諸他臣事半功倍其劾滇督專意主撫疏曰
滇回流毒徧於三迤焚燒殺戮之慘中外共見其聞其罪狀之大者則
攻陷大理後立僞國設僞官將迤西道林廷禧參將懷唐阿知縣毛玉
成割取首級懸掛四門逆回動日報復漢民與官無涉此數臣者官乎
民乎此而可撫孰不可撫恆春舒興阿主撫敗壞至此吳振械不思變
計依然唯撫是議夫使退出大理縛獻凶渠盡解省圍如此而曰就撫
猶可言也今則據者自據圍者自圍遠以沿途訪察情形爲逆回飛章
入告萬一抗不受撫而兵無可用餉無可籌吳振械孤立萬里之外不

知何所藉手以謝滇人報

聖主乎夫逆回狡詐反覆就令詭辭受撫或此撫而彼叛或旋撫而旋叛或既撫之後仇殺太甚漢民激而生叛將來之憂正未有艾目前之計斷不可行故爲國勢計必先剿後撫而後威可申爲滇省計必先剿後撫而後爭可弭卽爲回民計亦必先剿後撫除莠而後良可安其籌淮河以遏賊鋒疏曰定遠失守全淮盡爲賊有上至懷遠下至五河沿淮處處可渡西北可達宿徐而趨曹兗東北可達靈泗睢桃而趨兗沂順洪湖東下可達清淮而趨青沂粵逆新合必爲北竄之謀河淮之間並無一旅所恃山東爲之屏蔽而金嘉魚單郊費蘭蒙諸邑無月不爲擒匪蹂躪撫臣幸其不戕官據城於賊退後捏報勝仗內則巧爲彌縫

掩
一人耳目外則恣其股削竭萬姓脂膏民怨日深無事之時猶足驅民爲盜一旦粵捻交至從而響應冀其保全齊壯畿輔難矣况粵捻合勢北來勝保翁同書隔在賊後傳振邦偏在西路不能斷南北之衝山東勢如破竹可謂寒心

本朝官制各直省承流宣化責成布政使督撫等官原以寄將帥之任

今乃概謂軍旅未學別簡大臣堵勦此省之兵調之他省此任之官移之則任兵皆客兵官皆客官平日恣睢偃蹇臨利害則秦越相視而已故臣以爲任將帥不如任督撫惟懇俯念藩籬重地立將撫臣罷斥簡大員往代其任於洪湖多募水師置礮船溯流而上直達五河臨淮使賊不得由鳳陽以下徑渡其懷遠上下百餘里夾岸皆賊礮船不能上駛水路難防宜飭傅振邦全軍移紮固鎮靈壁一帶使賊卽渡淮不能長驅而北一面於淮徐曹兗適中之地調撥馬隊三千與前派德楞額所帶一千名益以青德駐防馬隊千名派重臣在彼駐紮賊竄何路卽由何路截擊再合各路之兵追勦驅之盡歸淮南然後步步進逼以期收復皖北而山東得以整軍經武堅固屏翰其統籌大局疏曰昔人建省安慶與九江金陵相爲犄角控扼長江意自深遠上年徒治廬州已失形勝茲並廬州亦不能守舒桐棄爲賊巢夥郡畫若境外此時胡林翼等肅清武漢進逼九江各路重兵節節前進而安省之賊或由英霍走湖北牽我上游或由徽歙擾浙西騷吾腹地我軍分道揀援罷於奔命賊有四達之路我無三面之圍雖日克一城何益大局故臣以爲安省之賊一日不盡則數省之賊未易殲除撫臣屢經挫卻聲威銷頓桑

榆難必候補京堂袁甲三忠勤果毅素得民心見在穎毫與捻相持如
以爲巡撫安徽必有毀家供餼奉之用者該臣亦必感
恩奮身圖報其請飭應援圖皖楚師疏曰軍興以來征調半天下糜餉
數千萬雖有斬馘卒未能埽穴擒渠則以屢後時而數失機也曾國藩
初復武漢順流東下李續賓銳東征直趨廬鳳皆有滅賊之機而失
之九江之蹉跌三河之敗亡一軍奮而諸軍邇迥一將入於窻中而諸
將觀於壁上功敗垂成賊情復熾今曾國藩蓄養精銳所向克捷逆渠
陳玉成張樂行李大股悍賊十餘萬齊往潛山太湖抗拒眾寡之數十
倍於我一有疏虞不獨曾國藩等智窮力竭難期復振且全楚振動河
洛騷然天下安危關繫甚重兵法云攻其所必救又云致人而不致於
人此時廬鳳六合賊勢必單請飭袁甲三張國樑剋期進取擣其巢穴
逼令反顧或命兩營各簡銳師統以戰將間道疾行出其不意爲楚師
聲援亦足禡其狂魄則釜魚檻獸之形成而摧朽拉枯之勢舉矣其劾
河督請籌大局疏曰清淮爲東南七省咽喉關繫大局其地運河貫其
中黃河襟其北東南西三面濱湖如宿遷之歸仁集桃源之金鎖鎮清
河之馬頭鎮天妃閣等處風檣迅利頃刻可通無論賊竄何方皆將直

趨清淮河督庚長數年以來未嘗真養一兵練一勇凡領地升科抽釐助餉等項盡爲劣員侵吞居民商賈敲骨吸髓士庶寒心軍民解體使賊竄清淮必棄之而走請

旨將庚長罷斥篆務交袁甲三兼攝責其團集水勇控扼全湖調集馬步招練壯勇庶可補救於萬一十九年君以戊午科場事被議去位十一年夷事起京師戒嚴肅順要

上北行君寄書責之以耿南仲汪黃王振蓋君在禮部曾爲肅順屬吏及官御史敬禮有加八年會議之痛哭肅順匿怨而與通款曲君故以危言動之莫可挽回於萬一無何

文宗巡幸木蘭和議成君遂去適豫攝撫黃公贊湯詢以兵事時有議招撫捻首者君曰撫可爲招不可爲會副都御史今豕宰毛公昶熙爲團練大臣奏留幫辦軍務時髮捻交訐民團各堡皆向背持兩端而餉匱兵單其勢岌岌君佐毛公入治軍書出援桴鼓攻金樓寨教匪以步卒五千隸僧忠親王部下檢渠埽穴攻張岡捻寨偕提督張公曜血戰十日克之毛公及撫軍張公之萬交章論薦以知府留豫旋以道員簡放

賞戴花翎檄署河陝汝道卽軍中單騎之官河陝豫之西陲毘連秦晉
楚北陝回方熾征調絡驛民苦供億將軍多隆阿公西征購糧陝州斗
斛倍市肆靈閱廬三屬責備小麥數百萬勦追呼迫切君請於中丞咨
免之徹遣楚師其橫恣不法者斬以徇一軍斂戢屬境有河陝嵩廬四
邑額兵逾千而守道無兵備銜不得問君以地多險僻爲刀匪所出入
且逼西陲兼緩急無以應請於中丞得節制河陝兵兵餉不繼先爲籌
給兵益感激奉號令捻酋張總愚北犯畿甸震驚君從撫軍李公鶴年
進軍磁州君議自道口迤西至太行山東至黃河築長圍斷賊歸路賊
果以是窮蹙諸軍乘之遂卽殄滅豫境肅清君佐撫軍經理善後濬惠
濟河消省城積潦塞武涉沁河決口濬農田水災與夫練軍積穀增鄉
試號舍更定書院規制偃武修文百廢具舉凡兩署糧儲鹽法道一署
河陝汝道積功加布政使銜光緒元年補授河陝汝道赴任父老歡迎
競曰我公復來吾濟更生有日矣故事民出車馬供支漫無稽考吏胥
紳士因緣爲奸歲用金錢按畝攤派亞於常賦日甚一日是以豫民大
困君至河陝令置尺籍申報月計歲會奸無所容民以是益德君二年
豫省河南北薦饑君捐銀入省倉備振三年大旱西路尤甚君議採荒

七事上中丞李公慶翱一清查戶口以核等次一咨訪殷富以勸周卹
 一稽查倉穀以資糶貸一較量災區以別蠲緩一捐廉倡率以備振粥
 一收留老弱以救死亡一解散誘惑以靖地方未及施行而尸骸枕藉
 村堡邱墟矣君憂勞成疾竟以殞身嗚呼君負徵清大略痛哭流涕中
 外憤激規畫軍謀無不先事奇中至於先死之夕猶思起痼振彫為請
 命之計則其心之造次不忘吾民誠宜質諸天日而可鑒者豫民之不
 獲甦息則有尸其咎者矣卒之豫中大吏以災荒致彈劾奉

旨查問有元年冒領餉銀事牽涉君雖旋得白要為君奮身不顧私其
 氣燄有以取之蓋自為御史時若逆操券必知有今日事者然即今起
 君而問之其欣然樂受不以此而易彼決然昭昭也所箸奏議二卷雜
 文詩若干卷大學緒言二卷周易輯說四卷豫軍紀略十二卷

安徽布政使

贈內閣學士銜吳君墓銘

程鴻詒

新建吳君竹莊從湘鄉曾文正公討賊立功浮膺疆寄文正公薨之歲
 君官安徽布政使哭寢甚哀遂感疾後文正二百三十日卒官嗚呼惜
 哉君諱坤修字子厚竹莊其別署也多鬚髯又自稱髯云蚤歲家貧幕
 游養親以監生數應南北鄉試道光二十七年年三十二罷舉捐職從

九品指發湖南二十九年赴補檄振湘陰水災八閱月活十餘萬人三
十年從湖廣總督裕泰公勦匪李沅發於武岡事平以府經歷縣丞補
用檄赴永州防堵粵匪丁母憂歸咸豐二年粵匪圍犯長沙巡撫駱文
忠公奏留湖南治軍八十餘日圍解升用知縣長沙圍解未久武昌漢
陽繼陷而桂東土匪又起三年勦平之以知縣補用先是曾文正公奉
詔團練鄉兵及是創立水師費鉅且急檄君催餉廣東還文正在衡州
督造戰船檄君提調軍火四年春岳州再陷湘潭又陷長沙西北南面
皆賊文正令水陸各軍復湘潭整軍東下復岳州克武昌下斬黃破田
家鎮進攻九江水師被襲舢板陷湖內不得出且飢潰令君單騎走領
之遇諸南康卽率往吳城籌借糧米攻克都昌就食南昌以湘潭功
賞藍翎同知銜五年正月理田家鎮前勞以同知用率舟師防瑞豐丁
父憂歸葬甫百日武昌復陷文正奏調君同羅忠節援湖北復咸甯蒲
圻崇陽通城

賞換花翎進規武昌築壘洪山石達開自崇通竄陷瑞臨別賊由廣東
來會江西八府五十餘州縣皆淪於賊文正分九江軍援吉安自率舟
師回顧南昌駐於省河六年春吉安不守援軍失利江楚文報梗絕餉

源竭罄七月胡文忠公昇君新軍曰彪營會同湘寶各軍援江西沿途再復咸蒲崇通入江西境兩復新昌上高以知府仍歸湖南補用由新昌取道羅坊攻奉新營獅山梯城而登賊死守不能驟拔乃先下安義靖安後萃奉新時江西餉絀君傾家貲并力勸族里富人大出銀米饌軍又籌銀四萬兩解省安輯平江潰勇七年春克奉新以道員記名請旨簡放文正公以父憂回湘君與諸軍合圍瑞州拜廣東南韶連道之命仍留剿賊賊乘夜雨當他軍汎地竄越君坐拔去花翎旋克瑞州府城

賞還花翎冬東鄉師潰南昌戒嚴君以孤軍扼康頭山賊不得越而湖南北巡撫會劾濫招游勇得

旨革職交江西巡撫查辦而散遣所部無一譁者八年耆齡公覆奏無濫募事得免置議文正亦於是年奉援浙之

命九年文正公駐師撫州耆齡公檄調君督辦撫建甯三屬團練始立團防營駐貴溪移德興出援徽州十年春克池州之建德縣開復原官花翎當是時文正以

欽差大臣總督兩江駐東流縣張文毅以副都御史督辦皖南軍務駐

安徽府降將韋志俊以其眾自徽州奔至建德勢洶洶君資遣趨甯流
大營警服得無事而徽州告急奔命往援君與徽爲客軍主者更番移
之無甯候時君弟修攷以參將偕道員蕭君翰慶援浙與君會休甯旋
陣亡於湖州君請假歸秋徽防潰君方在假君弟修攷攝軍事守嶺外
郭邨調回江西部伍整肅文正公時駐祁門見而嘉之益賢君治軍有
紀律令守湖口而巡撫毓科公檄援建昌賊由金谿竄東鄉君自撫州
移師迎擊於鄧家埠大破之賊復由貴溪竄安仁我軍遏之不得渡河
復竄德興萬年之交將擾景德鎮君由饒州馳軍景德以固祁門大軍
後路獨身謁文正於祁門會寶營潰建德賊上犯文正予三日期由景
德馳保湖口縣城君戰賊而行先賊至城恃以完上功加鹽運使銜十
一年由九江湖口撥南昌回防湖口文正既克安慶檄守無爲州移防
廬江同治元年檄往上海勘江陰沙還充營務處仍統團防營駐蕪湖
與金陵甯國蕪湖各軍會同辦賊并付契箭巡查安慶沿江以下及各
湖汊港江路肅清賊黨自蘇州援金陵分犯蕪湖會擊卻之
特旨仍以道員記名簡放文正奉

寄諭飭君及弟修攷赴山東防剿以江南兵事尙棘覆奏寢其行而

朝廷嚮用君始此矣夏會克金保圩秋會復高淳溧水及溧陽東壩各要隘遣散降卒數萬撫卹難民三年

賞加布政使銜金陵克復以按察使記名遇缺題奏四年署徽甯池太廣道補安徽按察使五年署布政使六年回臬使任此兩年中巡撫宮保英翰公駐潁州出境督勦捻匪公在省轉輸餼餉未嘗遲乏興學校建廨署辦城防既稱其職亦冀紓宮保返顧之慮宮保深器之密疏入告七年宮保以父憂北還君以臬司遂拜

命署理巡撫赴潁州受署撫篆正值皖軍勦捻移駐壽州籌協前敵軍餉整飭營伍經理善後諸大政竭盡心力旋補授布政使仍署巡撫統師辦賊捻匪平始回省垣初君從軍長沙及赴援湖北時未獲終父母喪常以爲疚八年秋宮保回任君卸署撫事籲准回籍補制九年春假滿進京夏間

陛見回布政使任整頓吏治綜理餉需勤催科籌振卹及一切應辦公事鉅細躬親不辭勞瘁僚屬服其嚴明雖賦性過剛不肯少屈而其清勤自勵實足以風示羣倫有令人爲之心折者十年秋因病請假一月調理甫痊卽行銷假任事十一年三月患腦癱之證委頓臥榻仍披閱

案牘未嘗少輟外證雖愈氣體愈虧九月二十四日遂不起距生於嘉慶二十一年閏六月七日春秋五十有七宮保疏陳戰功政績且稱人才難得盡瘁忘身請從優議卹以慰忠藎奉

旨賜卹尋

贈內閣學士銜廕一子入監讀書期滿以知縣用曾祖一崑祖嗣葵考

敬炤俱

贈光祿大夫曾祖妣何祖妣李妣葉暨元配張俱

贈一品夫人繼配彭

封一品夫人子明鐸明鏘孫則藩曾孫孝先孝民女七人君本寒士及登廡仕自奉仍極菲薄而尙義好施在籍則重建祖山墓廬興造家廟修族譜助祭田立里長社造宅以居親近子姓捐修新建縣學垣牆建石坊奎樓王謝二公祠捐建江西忠義祠助江西昭忠祠經費捐西昌建書院膏火銀五千兩其他睦嫻任卹事甚多在安慶則捐建忠義節烈祠曾文正公專祠奎星閣大觀亭振風塔修余忠宣墓開通省城溝道捐置學宮禮樂器選諸生肄之在蕪湖則建鳩江書院修李涪風墓費皆不貲云不殖生產僅有園半畝藏書數萬卷刻半畝園叢書三十

種多有關於吏治民生表彰忠義節烈儒林文苑及史學兵法算法地輿醫術皆備焉自著者曰三恥齋詩集十卷余在文正公幕府時與君常相過從中間出處睽隔昨歲襄纂通志至皖則君病久未得覲君卒之前三日手柬約舉菊觴掀髯高談終燕無倦容臨別忽以銘幽之文相諉誣以謂戲言詎意永訣君弟柏莊廉訪率君子孫卜地將葬於某原而以武進管樂才叔所爲狀屬銘君言在耳曷忍不銘銘曰浩然之氣塞於天地髯得其剛謂髯詩人迺伍絳灌善治戎兵謂髯將才迺濟名杜稱最循良謂髯武猛迺多平反保赤如傷謂髯慈悲迺奮薙獨封尸如京謂髯寒素迺廣施濟有惠弗名謂髯輕財迺躬儉約無故弗觴謂髯使氣迺服善言不尙矜爭謂髯凌人迺篤風義不間存亡髯之畢世全乎血性質幽對明髯之出處半乎通塞始楛終榮朝廷超擢帥臣推舉吏民瞻望自髯之病皖之人士爲髯禱禳髯病旣瘳忽不意料竟摧棟梁屬續之夕有神降語於髯之鄉百戰英靈超倫軼羣髯死猶生必有天道再生申甫以慰吾

皇吾

皇贈卹內閣學士文階至清馬卿張釋何嘽贊進髯憾其平惟髯疇昔

辨香南豐悅服心誠生死從之一歲之內同證廣柔徒令不佞兩哭師
友熱淚滄浪髯有詰弟暨賢子孫爰封堂房髯魄九原髯名萬古貞我
斯銘

安徽布政使吳公墓志銘

方濬頤

公姓吳氏諱坤修字子厚號竹莊江西新建縣人曾祖一崑祖嗣葵父
敬炤三代以公貴皆

贈光祿大夫母皆一品夫人公家素貧未冠橐筆走四方旋援例以從
九品需次楚南從總督裕泰公勦辦甯亂民李沅發事平獎敘以府
經歷縣丞補用粵匪起檄赴永州防堵旋以母憂歸咸豐二年粵賊犯
長沙巡撫駱文忠公奏留公辦理軍務長沙圍解敘功擢知縣克復湘
潭晉同知秩

賞戴藍翎曾軍東克武昌漢陽攻九江陷於鄱湖不得出無統帥且饑
潰使公單騎間走南康領之公移舟趨吳城傾家資並勸戚鄰輸錢米
餉軍軍以無恐是役也微公事幾殆十二月遂以水師下都昌復就食
於南昌待曾公進止五年正月曾公自九江至追論田鎮功擢同知換
花翎六年江西各府皆陷江楚道梗公先統水師至是胡文忠公以新

募之陸軍曰彪營者俾公與劉騰鴻普承堯合師援江再克咸蒲崇通
入江境兩復新昌上高進規瑞州曾公奏擢知府旋由新昌取道羅坊
攻奉新出賊不意梯城而登賊死守不能卒拔乃先下安義靖安而後
萃於奉新明年克之公嘗以是役殺傷大過爲恨時軍需告匱饟不時
至公就地勸富人輸將且以其贏解濟省垣事訖力爲請獎其有汙賊
僞職反正者爲固請弗問人以是無怨而重德公曾公知公可大用遂
以道員記名請

旨簡敘既與諸軍合圍瑞州軍中拜廣東南韶連道之

命仍留剿賊冬我東鄉師潰省城戒嚴公孤軍扼康山賊不能越而湖
南北巡撫合詞劾公招勇過濫奉

旨革職交江西巡撫查辦公散所部無一卒譁者耆公爲昭雪免議九
年督公奏以公督辦撫建甯三屬團練立團防營既成軍卽出境援徽
公自是遂入皖矣十年春克建德督辦皖南軍務左副都御史張文毅
公奏開復原官時韋志俊新降以其眾驟至洵洵懷反側公資遣之赴
東流大營綏以威惠得無變而徽郡復告急奔命往援公於徽防爲客
軍惟主者檄所向公弟修攷以參將與道員蕭翰慶援浙死湖州之難

公乞假歸秋徼防軍潰勢岌岌公方在假公弟今蘇州候補道修斂攝
軍事由嶺外郭村奉檄返汪西行伍肅然時曾公已督兩江軍祁門嘉
之益信公治軍有紀律也使守湖口而賊圍建昌益急巡撫毓科公檄
救之抵撫州賊由金谿竄東鄉移師迎擊於鄧冢埠大破之賊復自貴
溪竄安仁我軍隔河不能渡賊復竄德興萬年之交將擾景德鎮公由
饒州馳赴景德以固祁門大營之後獨往謁曾公直我建德師潰賊將
上犯曾公予公三日期馳保湖口公先賊至城得完毓公奏加鹽運使
銜以獎其勞明年曾公檄守無爲旋移廬江自此公遂長駐皖矣同治
元年曾公以公筦營務處仍統團防營駐蕪湖與金陵甯國兩大軍相
首尾號令嚴整江介肅清賊伺聞來犯輒擊追之曾公不次奏獎奉
旨仍以道員記名簡放三年

知召公及修斂赴山東防剿曾公以江南事尙棘奏止之公雖未行亦可

朝廷倚公之重矣夏我軍克金保圩秋復高涓溧水及溧陽東壩諸隘
公皆有功三年春

賞加布政使銜嗣以克復金陵記名以按察使遇缺題奏四年署徽甯

池太廣道補安徽按察使五年署布政使至是公始親吏事初公治軍以嚴稱及治民則噢咻煦嫗有如傷之仁安徽巡撫英翰公駐師潁州時時出境勦賊公在省治轉輸餉餉未嘗遲乏起學校葺公廨率作興事百廢具舉不使英公有內顧憂英公由是稔公才七年英公丁父憂還京謂公清介剛勇堪膺大任請以臬司攝巡撫事奏入

報可未幾補授布政使逾年上命英公回皖撫任公回藩司任公以前遭父母喪未及在籍終制乞歸補制百日假滿入

覲又逾年而受事至則澄汰利弊規復舊章捐置學宮禮樂器選諸生肆之陶淑有具民氣太和郊市之間熙熙穰穰忘其爲兵燹後皆公之力也公長身鵠立論事鬚髯奮張人多憚之而其慈祥愷惻則發於至誠初從曾公使讞獄某弁犯微臯曾公怒欲誅之公力諍而免估客十餘人遇盜喪資斧邏卒得之居爲獲謀功公悉縱遣之凡公殺賊不可勝計所將卒有犯法者皆勿貸而平心活人乃多類此公在軍最久前後以功得官屢晉秩然公異軍特起所統綦少又或迴幹於敗挫之後賞不得行或顛蹶於艱勩之時黜非其罪故雖以末僚起存陟屏藩兼

權疆寄而人心猶覺歉然以公爲未竟其用也轉戰歷數省服官則於
皖故皖人尤思公生平篤於道義師事曾文正公垂二十年文正薨哭
諸寢哀甚氣鬱成腦疽遂於同治十一年九月二十四日卒於官享年
五十有七巡撫英翰公奏請照軍營立功後積勞病故例議卹
上俞所請贈內閣學士銜廕一子入監讀書公元配張夫人繼配彭夫
人皆以公署巡撫時恭遇

覃恩封至一品子明鐸先公卒嗣猶子明鈺明田爲已後公不侮鰥寡
不畏疆禦獨立天壤以成功名敦尙氣節所居之室輒榜曰結歲寒緣
館嗚呼可以見公之志已酷嗜書籍藏弄至數萬卷著三恥齋詩十卷
校刊半畝園藏書二十卷公歸道山已三稔哲弟柏莊觀察以事來揚
州持武進管才叔所撰狀眎濬頤曰某月日將卜葬先兄於某原乞子
爲埋幽之文濬頤不敢辭也敬作銘曰

槃槃大材善治軍旅蹶而復起驅除狼虎公本書生乃握韜鈴受知文
忠文正繼焉勇捍枌榆功在桑梓左右相俟欲行且止甫偃戎旃載持
使節咨汝旬宣遑勞成臬獨秀突兀大龍嵯峨從容坐鎮舍公則那直
諒果毅表裏如一嚮用方殷云胡顛踣弟子從師控鶴廣桑萬民尸祝

千秋弗忘嗟予撫膺輒呼負負公之姻家我之死友卓然可傳一代偉人後有作者視此貞珉

江蘇按察使中江李君墓志銘 黎庶昌

君諱鴻裔字眉生別號香嚴晚以居近蘇子美滄浪亭又號蘇鄰四川中江李氏曾祖純祖敦魯考崧霖舉人崇世蘊德君以拔貢生中咸豐辛亥順天鄉試舉人旋入賞為兵部主事才高而學瞻聲譽翺起公卿多折節枉交有達官誣使出其門許以鼎甲不應某相國素與君善君見其權勢日盛亦謝絕咸豐十年不樂在京將南游江淮未至鄂為胡文忠公林翼奏調赴英山大營未幾胡公薨從曾文正公國藩於安慶君本文正門下士文正開幕府治事辟召天下英雋程其器能君恆為之冠參與機要文正嘗曰眉生豁達精敏應世才也密疏薦君堪大受江南平明年遂權十府糧道及北征勦捻又奏補君徐海道徐州縮轂南北時湘淮各軍之討賊者數萬人更番休替糧械軍火皆以徐州為總匯君內筦胥儲外充營務又以餘力治民所設施方略甚具淮勇銳氣正新銘字營勇嘗殺人君禽而治之卒張軍法與諸將接納撫以懽好主客大和踰年擢江蘇按察使論功晉加布政使銜

賞戴花翎寢寢大用矣而遽以耳疾再請開缺竟不復出云君既罷官閒居樂吳中山水徙家蘇州得瞿氏網師園葺治之園故有老樹怪石池沼亭館之勝積書數萬卷益蓄三代彝鼎漢唐以來金石碑版法書名畫以自娛閉門謝客徜徉物外身與世不復相關性內介無妄交必自終始生平游宴甚廣而其契誼最篤若吳縣潘尙書祖蔭湘鄉曾襲侯紀澤開縣李制軍宗羲嘉興錢太僕應溥吳縣潘方伯曾瑋歸安吳觀察雲劔州李方伯榕湖口高大令心夔獨山莫徵君友芝此尤海內共知者可以觀所與已君卒於光緒十一年八月十五日春秋五十有五娶敖氏榮昌望族邁心疾不瘳妾二俱吳氏無子以從兄子賡猷嗣廩貢生候選道孫五人鶯候選知縣鵠鵠鵠某年月日葬君吳縣四都十二圖善人橋金牛陽君書法甚精詩古文亦窺古人堂奧晚又好釋典皆以爲寄沒後賡猷僅得詩二百餘首刻之君之至鄂也與庶昌從兄伯庸善卽弟視余越二十六年矣銘君之墓其曷有辭銘曰高才步追淵雲躅厥蹤治彭麟一角急流不居此其卓退棲吳中山水曲靈巖之宮與木瀆精魄永綏藏此麓

劉子溥傳

江西通志

劉于濬字養素南昌人道光鄉舉大挑河工知縣補清河未幾擢通判以憂歸咸豐初粵寇變起于濬率團勇隨官軍剿賊敘功遷知府五年曾國藩侍郎督軍江西始立江軍水師奏以于濬爲統領兩克樟樹鎮復豐城新淦浮梁撫州臨江及安徽建德諸郡縣嘗追賊馬田攻陶家壘強武爲江右第一同治三年江皖閩浙逸賊入江西眾號數十萬于濬方駐撫州所將僅二千人賊攻文昌橋親督將士晝夜血戰賊旣敗乘夜復進攻于濬知賊必至嚴陣以待斃其悍酋賊遂不支自于濬統江軍累戰皆捷積功

賞花翎圖薩太巴圖魯勇號累擢至甘肅按察使遇缺題奏布政使未之官以疾引退于濬天性友愛老而彌篤保衛桑梓不遺餘力比戶尸祝婦孺咸能道其姓氏年七十一卒光緒四年巡撫劉秉璋奏請優卹特贈內閣學士從祀張芾江忠源祠

贈內閣學士前安徽鳳穎六泗道任君神道碑銘

黎庶昌

君諱蘭生字晚香江蘇震澤任氏任之先出於孔子弟子當陽侯任子不齊傳三十世至梁新安太守昉始家江南又三十二傳曰伯通自宜興徙吳江同里鎮吳江與震澤同城今又爲震澤人君生而英敏續

栗自少則見端緒年十二隨父訓導君拯饑委已救人具列條理長老
驚歎爲文章慕先古不中時程嘗一就禮部試罷去遂以同知投效皖
營喬公松年委充前敵營務處至則大爲果敏公英翰所賓敬事必咨
而後行雉河集者今所設渦陽縣捻賊老巢也貫渦河之中捻賊絕欲
得之以躡潁亳壽三州之地同治四年僧忠親王戰沒曹州城下賊酋
張總愚任柱賴汶洸益橫合眾十餘萬南趨圍之數重時守兵三千人
形勢寡弱英翰公謀曰今賊眾兵少不冒萬死一生之計以求援則彈
丸小集糜爲齋粉矣於是屬君與今雲南布政使史君念祖堅守而自
率數十騎卽夜潰圍馳出賊偵知益疾擊君廣設方略隨敵應變神卜
鬼諷賊不能窮遂巡失氣圍中食且盡君以餘粟分置四門虛內倉而
實其外標旆充積矢守益固相持四十餘日而英翰公以援師至卒大
破之賊鹿埕隴種而遁聲譽翔起遠近皆奇君才以謂可屬大任矣厥
後蹙李允於盱眙滁州遏任柱於宿遷殪張總愚於臨清靡役不從算
卽克捷臨清之役英翰公凱旋至南樂軍士十一人爲某寨所阬殺眾
怒欲屠之君請以二千人往單騎款寨門一諭而服斬八人而事已歸
渡黃河也馬步四萬君下令舟各載二十人渡南予券日暮計券受直

軍至如流是時君已改防軍營務處兼縮淮北牙釐局駐壽州君綜覈之才冠絕一時奸蠹所叢皆能窮抉奧竅絲粟不得欺隱復以餘力治寇捻賊雖平而皖豫穎毫間孽芽包荒伺閒輒發君耳目廣布悉鉤致其計畫主名先事覩情翦其牙翅應時摧破無留餘者一州以甯累功至記名鹽運使安徽補用道

賞布政使銜光緒三年署鳳穎六泗道安徽巡撫裕祿公兩江總督沈文肅公葆楨吳公元炳交章論薦五年遂拜真除之

命矣中間一署按察使君既與民蘇息於是盡飭吏治以清獄訟整緝捕爲課吏之首以勸農桑興水利爲養民之原以修書院設義塾爲教士之本陂塘道路平治修濬義倉豐備儲使充牣大小庶政條綜周密廢墜皆起然獨君精力能行之他人學者不能至也而晉豫大饑流民走死入皖君守便宜發倉廩振濟前後收養資遣凡十一萬餘人皆占記籍尤以此名譽在口先是君任鳳穎六泗道七年以留用革書屠用亭被劾落職居無何紳民謳思善政醵金八千兩代籌捐復再奏奉命發往安徽是歲河決鄭州黃流四溢皖北尤被其烈君復任振撫事益感激馳驅乘騎周歷轄境形神並罷疽發尾閭未幾竟卒光緒十四

年四月十九日也春秋五十有一安徽巡撫陳公彝臚陳事實照道員

積勞病故例從優議卹

贈內閣學士事蹟宣付史館立傳附祀英翰公專祠嗚呼偉矣君之先
世代有隱德曾祖祖望祖振勳均國子監生考酉附貢生候選訓導皆
贈資政大夫妣皆夫人配陸夫人妾潘氏子二傳書傳薪女子子五人
某年月日葬君某所君鄉人凌君淦者與余善以余昔令吳江寓書以
神道之文相屬而余亦自美君政略忘其弁鄙而樂爲之辭銘曰
豪傑代興大難斯靡前湘後淮異軍特起亦有皖軍克趾厥美將帥聯
翩戡亂而止維民有瘼吏事實難任君天授嶽嶽膽肝外臨戰陳內靖
凶頑愛人學道秉心所安淮潁之閒捻巢榛莽梟狼是棲人禽反掌君
不鄙夷曰吾師長撫此獷區風蘇雨養七年報最民和政成古有遺愛
如君式賡請祠復秩直道在岷我銘貞石永播休聲

記劉方伯降尋甸回事

杜俞

道光季年雲南漢回互鬪蔓延咸豐朝回性多疑往往反側二十年間
文武官被害者百計議撫者頗難之同治初孳育益廣官吏勢益孤唯
唯受指使無如何七年四月湘鄉劉公嶽駿至自滇公字旭岑嘗以功

積官道員雲貴總督劉公嶽昭之從弟也總督時治軍曲靖府回首杜
文秀方稱王大理自曲靖至省垣據險爲固八月總督命營官李家福
賀連璧謝景春督軍進規尋甸州戰不利而軍興久乏杜文秀遣死黨
萬餘來援總督患之十一月乃要公詣尋甸視師逆回大至總督引親
軍三百掠陣入公登驛旁山調度各軍夜三鼓軍失利公馳八十里與
總督會王家莊集潰卒趨馬龍州公從兄四川題奏道劉公嶽曙自帥
三千人先日至嶽曙病以軍事屬公共議城守策總督以賊勢大欲駐
馬龍遏賊鋒公謂曲靖總督駐軍地不可棄儻賊以偏師取曲靖既無
解馬龍之圍而先失根本大不可也當是時總督以馬龍爲前敵重鎮
形勢要害脫馬龍失曲靖亦孤公請自守總督又以馬龍屢陷賊良莠
錯處民心未可恃且城郭不治慮公以孤軍處危城當強寇意不忍公
毅然任之且曰事急矣速還曲靖猶可及總督乃還賊果分兵襲曲靖
以有備退公旣任守馬龍賊百計攻之不克公念兵勇傷亡多糧盡外
援不至而賊又圍城久勢益懈可乘不如以戰爲守乃定策令從子提
督青煦出城戰青煦善戰有膽略戰而捷營西城外賊圍青煦南門明
日擊之又大捷再擊之賊敗去城圍解公乃修城積粟練兵三千人請

進取尋甸總督以大軍未成餉不備檄止之公見士氣可用而賊自馬
龍敗後眾心益解賊酋不知方驕妄自大念時會之可惜進兵直駐尋
甸之水坪子距水坪子三十里曰七星橋賊之衝要也賊營七如列星
橋前後皆堅礮公上書總督言狀乞濟師總督言孤軍忌輕進公使謀
水道深數尺念礮堅不易攻若繞道而擊其胸腹賊可走也遂分兵繞
上流渡約四鼓奪橋礮而自引軍攻賊營賊倉卒出迎左右軍乘虛據
橋礮賊大潰公乃移軍賊壘近城及河上城賊自七星橋破形便失日
夜震恐尋甸四面沃野憑險在橋橋距城十里賊不敢前時以五月節
公出犒師為言我軍氣甚銳可揚兵城下以示武諸將皆欣然率師薄
城賊出迎敗入守公以日暮恐攻堅傷士卒欲收兵而各軍乘醉飽
鼓勇攻城士氣益奮兵不可得收公方以為危而城賊大愬請降公因
而許之退軍七星橋明日回首馬廣等八人至公責以從亂罪皆叩頭
泣公為宣

朝廷寬大之恩令還盡除偽令吾行人城安撫也總督方遣李家福來
助而公已降尋甸家福進曰回人多詐公曰吾已許之矣若不入城是
我實疑彼夜秉燭讀通鑑郭子儀見回紇事益自信家福又諫青煦請

先之公明日去未爲失信也公強應之夜青煦還言城內回兵萬餘回民三千戶漢民千餘戶屯聚甚廣而頗疑懼公曰馬廣來營吾諭以恩義彼已輸誠矣前日之戰我軍勇銳彼所深知而七星橋之險又爲我有畏威懷德非詐也遲回不決彼必生疑疑心一生不但前功盡棄單兵臨堅城已處危地況明知其兵多糧足乎今撫軍兩月三捷我軍自尋旬敗後雖無所失而老師糜餉已示人以搖動之機矣吾意已決汝勿再言次日馬廣等至具言回民驚疑狀公率侍從十餘人以行一軍皆驚青煦堅請從許之於是胡志祺謝景春李家福朱連勝皆從然眾不過三十人城回嚴兵仗出迎甫入城門閉公不爲動叱令前進道署馬廣等侍堂下觀者數千人少選進食家福疑有異而所供皆回饌公爲之大啖酋以公無所疑也皆悅食既下堂呼兵民而慰勞之皆歡呼散廣等請久駐以定人心公許之乃命青煦家福還軍五月十日雲南巡撫岑公毓英遣總兵吳永安率師襲尋甸先是總督奉旨治滇東賊而以巡撫解省城圍巡撫猛鷲號知兵以省賊易與而滇東賊圍馬龍不下勢益衰總督持重師久無功自度兵力可兼辦滇東賊乃以吳永安部驍勇陰走尋甸而攻其背出賊不意而潰之欲以立

奇功未至前一日而公已入城吳永安怏怏還具以告巡撫大驚拊手
歎曰彼大有人在也公既得尋甸編戶口設保甲與學校講武訓農民
以大和會曲靖軍潰公往撫之兵民送者數萬人公諭之曰從此爲良
民耳言未畢皆嗚咽於是馬寶率傾城兵民焚香跪道右公步行出城
有五六老人鬚髮皓然年皆八九十鞠躬扶杖卻行而前曰大恩何以
爲報惟日夜望公之重來活我赤子也公亦淒然曰吾何德重勞父老
公撫軍事未應庚別有記晚年家居或問尋甸事公曰回亦人耳觀其
送我行感發若是雖桀鷲本性固未嘗失也以機械防之人亦機械應
之矣獨回也哉

續碑傳集卷三十八

江陰繆荃孫纂錄

光緒朝監司五

贈太子少保席公神道碑銘

郭嵩燾

公諱寶田字研鄰姓席氏先世自明由江西涖官東安占籍為東安人始冠補縣學生行學嶽麓書院與劉武慎公同志相切劘會廣西寇起踞金陵劉公從江忠烈公以戰功顯名江皖閒後劉公自起一軍援江西召公參軍事累功保同知直隸州咸豐九年石達開掠永州西趨寶慶眾數十萬連戰武岡新甯披賊勢寶慶之圍以解擢知府賞戴花翎湖南巡撫駱文忠公檄公募千人備邊防號精健營廣東賊犯郴州桂陽金陵踞賊又數分兵犯江西往來馳擊數殄賊有功擢道員加按察使銜同治二年賊黃文金號黃老虎躡江西眾十餘萬江誠恪公忠義率諸軍赴援公副之數月江西肅清曾文正公檄調入皖援青陽誠恪公急馳復青陽城以勞卒公更領其軍累功以按察使記名加布政使銜明年

賞業鏗額巴圖魯名號已而李世賢汪海洋挾賊數萬趨江西公迎擊

白沙關與相持

朝廷以賊勢注江西命福建提督楊公督辦江西軍務劾公援南豐遲延奪按察使降補知府而公實已力戰崇仁宜黃金谿梟其精銳賊創甚南遯又躡之甯都會大軍克金陵賊數萬擁洪秀全子福瑱由開化玉山走瀘溪公急回軍扼之新城賊聞卽走遯日夜窮追至石城楊家牌危崖削立路紆阻日且暮軍止不進公怒曰寇窮且困可掩而擒也汪海洋踞瑞金咫尺耳縱使合爲患必烈斬前鋒一人以徇卽夜度嶺嶺盡見炊煙四起薄擊之賊駭顧散走擒其渠酋數十人洪福瑱竄逸部將周家良追得賊驚呼曰此小天王也捷聞

詔復原官加雲騎尉世職

賞黃馬褂時汪海洋方由瑞金趨石城迎福瑱未至而福瑱爲虜所部數萬人皆潰海洋奪氣趨鎮平公自平遠邀擊截降萬四千人急趨信豐扼鐵石嶺邀賊賊果由龍南迤邐至據險擊之又降二萬人賊趨和平陷嘉應州江西巡撫劉公奏公江西戰功第一得

旨以布政司記名題奏

賞三代一品封典左文襄公旋克復嘉應州公以賊平請解兵終養是

時貴州苗亂二十年劫掠州縣頑民習教者全起應之有白教黃教紅教之分皆假天主爲名勢張甚湖南布政使兆琛屯鎮筸資防剿久無功而黔餉一取之湖南公私困憊會劉公崐巡撫湖南公故劉公提學湖南所得士也素知公檄募萬人援黔悉劾罷諸將獨留李公元度一軍會辦至則度荆竹園爲苗教巢藪地險固破荆竹園而後剿撫有可施察北岡地稍平可乘而入進逼之戰旬日奪其壘悉平其四十八砦進至台拱台拱苗最强右清江左鎮遠連爲犄角公策規復兩城卽台勢孤可下遣將榮維善出奇兵越山襲清江連克鎮遠方合黃運昌軍會攻台拱過黃飄道狹苗薄之運昌維善俱死急遣龔繼昌蘇元春分克岩門甕谷諸砦遂破革夷復台拱城於是屢

賞御用珍物至是

賞頭品頂戴而諸悍苗悉眾踞九股河倚丹江凱里巉險爲守九股河者黑苗地也自明世阻兵約降而已未窮其境公乘銳督兵益急平其砦二百數十所連克丹江凱里於是乾隆中所設六廳城皆服苗酋張朽迷踞雷公山會暑雨公親執桴鼓督戰諸將肉薄奪其砦張朽迷跳免而勢已窮不能軍數月捕得之苗疆平

賞騎都尉世職公貌中人沈毅寡言笑目奕奕有威稜用兵規畫全局
不輕出邀利乘危薄險部勒堅忍不可挫撓駕使才雋程量尺寸必盡
其用自其用兵數百戰未嘗敗衄而平苗功最鉅自漢西南蠻濡化內
屬其種負山爲阻在黔楚者曰苗種最繁爲亂亦最甚明設土司經紀
之畔服相仍未有衰止

國朝乾隆嘉慶數十年間大舉深入殫竭兵力以改土歸流臣畜長養
亂是用弭至道光之季又數十年矣撫馭失宜垢釁叢生姦民飢法窟
穴其中相獎爲亂黔西苗竝起剽掠城邑滋蔓數百里故所營建地盡
還爲苗西南邊防日棘連屯相持積二十年公審度形勢以知苗情向
背緩急摧擊剽悍落其牙角搜剔巖窟蛇伏獠升窮極荒梗縋兵四擊
苗驚以爲神每平一砦旁砦降者推誠諭化示以信義苗民大歡言者

謂

國家席全盛之勢經營數十年易置將帥度劉捷伐僅乃克之公以萬
人蕩平苗砦數百斬刈者數萬撫綏安集又十餘萬黔西南大患以息
湖南數百里邊疆帖然不知有兵公之功爲大旣克雷公山功垂成矣
而公感瘴病風痺還軍施洞以龔繼昌蘇元春唐本有謝蘭階分領其

軍指授方略檢其渠帥遂以訖功自公病歸又二十年勅建詒經書院
蠲施族田及諸有益地方苟知焉必致於行苟行焉必要於久恢奇自
喜身負天下之重處鄉里益務發摠不以自弛其志曾祖際雲祖上錦
並以公貴

贈光祿大夫父居正歲貢生

封光祿大夫妣皆夫人以道光己丑歲某月某日生光緒十五年己丑
歲某月某日卒年六十一湖南巡撫以聞

贈太子少保事蹟宣付史館

詔湖南江西貴州建專祠祀焉配魏夫人繼配萬夫人子五人曜衡縣
學廩生鏞分部主事匯湘縣學附生啟驛啟騶葬所居武岡玉屏山之
原公少貧出就學道經櫟社以爲常鄰嫗忽夢櫟神告言席生非常人
旦暮過我幸爲署門屏蔽我嫗以是奇公頗資給之其後嫗子亦以從
軍功階二品云銘曰

籍氏爲席原始自環曰廣曰衡漢晉之閒光祿建威功績以起爰及闡
文列名於史以功受爵實徙湘西江右再徙莫究端倪公之初起亦以
文學俯仰苴繚參稽管樂狂寇四獬丁時艱虞用提一旅以訖天誅黔

苗失馴連三十稔地遐勢阻公計之審萬險羅胸騰駕虎貔自天下擊
霆奮颯馳劔其梟頑駟良弭伏功燁截刈心存煦育世亂才與實資武
功湘士莘莘挖雅揚風公提兩戈萬人辟易帷燈夜張沈酣篇籍未竟
其施以羸其身神徂名永來考貞珉

劉勇介公神道碑銘 郭嵩燾

自曾文正公起鄉里視師削平寇亂一時奇偉傑特之才奮起立功名
肩項相望而勇介劉公年最少儀容瑋麗神采奕然每戰搏膺大呼盪
決馳突當者辟易他軍或少卻見結束端整奮矛直前相與指目曰此
劉某也則皆奮一軍倚以自壯同時湘潭壯武郭公與齊名而公之出
稍先於壯武其沒又後壯武十年功尤多名尤顯公諱連捷字南雲湘
鄉人家世儒者其族兄武烈公騰鴻領湘軍公以裨將從戰湖北有聲
保千總巡撫胡文忠公壯其勇俾自領一軍時曾文正公駐南昌瑞臨
諸郡皆陷武烈公援江西搏戰上高城下沒於軍公憤肉薄而登拔其
城武烈公名將敢戰軍中失主帅奪氣公力自激揚氣益振曾文正公
見謂公容貌舉止儒生也改保知縣會威毅伯曾公自起一軍薄吉安
悉所部隸焉從克吉安保同知文正公駐軍祁門檄公攻太湖擢知府

克安慶功最保道員

賞果勇巴圖魯名號自是轉戰廬江無爲含巢和州旋攻太平府晉按察使銜威毅伯策江南北諸城批賊勢略盡而賊踞金陵十年所憑厚號召四應但出不意擣金陵下之卽賊可滅功可成公奮請前行而金陵城守固驟不可拔李秀成以所部三十萬號百萬援金陵官軍固不滿三萬圍數重壘土列巨礮環攻發聲動天地穴地穴伏火當官軍營轟之公率死士捍營礮發卽伏稍聞則乘其懈出擊令善聽者循聲知所穴處開而迎之殲其人圍四十六日計窮遯去時以無爲州通餉運公急率二千人突出賊前扼城以守賊至敗之論功以按察使記名加布政使銜再克巢縣含山和州奉旨賞黃馬褂江北事稍定乃謀合圍金陵約水師進克九洲斷賊接濟公力爭下關賊壘兼斷城援突礮火薄登賊死咋左右從者皆噓血濺衣不爲動卒奪其壘而賊援已絕逾年金陵平以布政使記名簡放賞頭品頂戴給騎都尉世職庚辰威毅伯巡撫山西奏公駐防關外會俄夷構釁移屯山海關威毅伯由粵督改督江南而法夷據安南沿海戒嚴再起公任軍事父老望見相戒言此故少年將軍能殺賊者皆大

歡以勞卒於江陰軍次

上聞

贈太子少保

子諡勇介

詔所立功省分建專祠明年奉

旨圖形紫光閣所著書曰臨陣心法

詔竝宣付史館公機智警敏而貌深湛恂若書生臨敵決勝精神倍出軍行迫險隘賊來益眾分軍四應從容指麾意常有餘軍中號曰神勇性孝友父課讀嚴公意不樂也獨喜孫吳兵法弟鴻年入學籍乃啟父

曰弟固才也得以文學世其家兒當從

國家之難以自發名成業既貴益務施濟延攬篤友朋之誼患難比依輸心吐臆人奮思效推患均仁由其家以治及其鄉使飢寒有備衣食有資武烈公卒家貧甚賙之尤至曰吾不敢忘所自公生於某年某月某日卒於光緒十三年七月二十日年五十有五曾祖某祖某父某皆以公貴

贈光祿大夫妣皆夫人妻某氏無子以從兄子某爲嗣以某年某月日

葬某鄉某原其弟蔚昌鴻年立碑墓道表示無窮而高燾承事爲之銘

銘曰

元會剝屯幹世以功文武憲章風動雲從公之初起因緣卽戎提戈奮
飛造基自躬江淮狂獠其眾浩瀾縱橫洗蕩一搏千里披其城邑禳滌
垢疇大燾開張揚鑣佩藥始終兵事訖三十年年初及艾而命不延
天子有詔悼忠表賢千齡萬載永護斯阡

布政使銜湖南辰永沅靖兵備道翰林院修撰陸君墓志銘

俞樾

君諱增祥字魁仲號星農姓陸氏江南太倉州人康熙閒有諱毅者以
進士官御史歿祀鄉賢祠君六世祖也曾祖諱錫蕃恩貢生祖諱廷珪
鹽運司知事鄉飲介賓歿祀孝子祠考諱樹薰舉人皆以君貴

贈通奉大夫妣皆夫人君於兄弟行居二其生也知事公夢見魁字以
爲祥也君名字取此幼見父作篆籀書效爲之父喜授以六書之學輒
通曉其義道光十三年父卒京師君時年十八匍匐迎喪悲感行路十
六年兄弟並補學弟子員會壽陽祁文端公視江蘇學以君兄弟皆通
漢唐注疏之說餼之二十四年同舉於鄉時有二陸之譽兄名增福尋
卒君先世席中人產及君已中落至是益不支事母奉寡嫂無進取意

道光三十年會試將不赴母錢太夫人責之曰爾父爾兄皆齋志以歿今所望惟汝矣余與汝嫂汝婦恃十指猶不至餓死汝奈何不往乃行其年成進士以

廷試第一人授翰林院修撰咸豐元年丁錢太夫人憂三年土寇劉麗川據上海周立春應之襲嘉定犯太倉君以團練保危城復嘉定既服闋將入都寓書巡撫吉勇烈公陳方略甚悉明年上海平

詔加君五品銜以贊善卽補六年充會試同考官歷充國史功臣方略諸館纂修

起居注協修

文淵閣校理本衙門撰文奏辦院事庶常館提調八年京察一等記名以道府用十年授廣西慶遠府知府行及湖南巡撫毛公鴻賓重其才疏留之同治二年擢道員歷署糧儲道鹽法長寶道經理釐捐十餘年軍府度支悉賴以濟積功加布政使銜

賜二品封典其權糧儲道也湘漕改徵折色起運款目往往名存實亡州縣相爲侵匿君廉正率屬整紛剔蠹吏不敢欺及受代日庫儲倍蓰於舊光緒二年補辰永沅靖道所轄乃漢五谿蠻地與黔蜀錯壤林麓

勦儻爲羣盜淵藪君名捕其首置之法陰使人偵盜蹤所至檄所屬掩捕無脫者境內苗民寨二千餘所皆循謹守法度內地豪右或從而魚肉之君曰此亂所由起也凡民與苗之獄必持其平虐苗者治無赦苗疆有書院六君益廣其額優其禮而勤督課之士益嚮學在官四年減徭役勸耕作與民休息見有種罌粟者罪之山地不宜五穀使易種茶以廣民利前使者方鑿沱江議采石炭君度沱江通水道便民出俸錢踵成之開采繁費無益罷其役五年秋解任回籍省墓會君次子繼輝典湖北試畢乞假歸君願諸子曰吾老矣汝曹勉之其明年遂以疾告君居官固不廢學至是益事撰述成金石補正百三十卷札記四卷元金石偶存一卷甄錄一卷吳氏筠清館金石記目六卷篆墨述詁二十四卷楚辭疑異釋證八卷紅鱗魚室詩存二卷晚年作古今字表謂與篆墨述詁相表裏未卒業而君卒矣其卒以光緒八年六月丁卯年六十有七娶徐氏生子五繼德候補郎中繼輝同治十年進士翰林院編修繼烜候選通判先卒繼賢浙江候補布政使理問升用知州繼常中書科中書孫男十有三長佑長康長葆長偉長序長履長佐長廉長椿長泰長廡長春長廕孫女十有三諸子以光緒十年三月甲申葬君於

州之二十五都下一圖雲字圩庚山甲向先期以狀乞銘余自入學及
領鄉薦成進士無不與君同歲君沒之年猶至杭州訪余於俞樓不謂
別未數月而君之訃至也玉堂舊事恍如夢寐同年之友亦落落如晨
星矣余何忍銘君邪雖然誼固不得而辭銘曰

道光之年咸豐之始

文廟知人冠君多士宜參鼎鞞回翔

朝右遽辭槐棘出采蘭苴徘徊邊瑣至於暮齒得無榜運有亨有否庸
知不然視其人耳惟君領袖乃杞乃梓一麾而出名譽鵲起大府曰才
民曰父母尤邃於學金石淵海摩挲鼎鐘下及甄瓠文字光怪俗目所
駭藏之名山以埃千載君於仕學兩無所負我作銘詞傳之永久下告

幽宮上告青史

布政使銜直隸按察使

贈太常寺卿丁公墓表

薛福成

代

同治九年西洋人之旅居天津者與官民積不相能客主挺爭訛言朋
興是時遇缺題奏按察使丁公率淮軍四千人赴天津備非常

天子授公天津河間兵備道公開誠示眾消釋羣疑扶良詰姦遠人賓
順屬郡無事旣而居民不戒於火天津舊有救火會其人皆輕俠尙氣

卽與西洋人不洽者也猶以前嫌相約不救火公聞警趨赴未及呼僕
仗跌一足跪泥塗中向火泣禱救火者聞風踵至烈燄頓熄梁家園河
隄將潰築者披靡公親執畚鍤躍立水中幾滅頂不爲動水勢驟卻眾
益奮隕土疾築隄以不壞自是天津士民咸謂公之精誠足以禦水火
格蠻貉翁然頌之曰賢父母余適奉

命總督直隸以公居余部下久其樸直果毅之氣可屬大事又能深得
民心若此始知其不僅習兵略也凡察吏庇民諸政一埤之鉅細事無
不理前後倚如左右手者近十年不意中道淪謝志業未副追溯往事
愴然不能爲懷者久之公始習舉子業設皋比爲句讀師窮年佔畢書
生耳咸豐三年粵賊踞金陵淮南諸郡相繼陷公始集里中子弟部勒
以兵法累戰有功同治紀元余創募淮軍赴援江蘇公率偏師從余渡
江屢還悍賊自是轉戰江浙楚豫山東之境克復郡縣城汛三十餘處
禽斬僞王逆酋十數招撫降眾數萬公未嘗不在行間屢舍之戰賊憑
河爲險公率所部梟重河拔密椿破其兩壘諸軍相隨奮擊立克之湖
州賊由此不振洮陽之戰時值霖雨平地水深數尺捻酋任柱西渡洮
河狂竄公首先解衣涉水將士隨進至河干伐木爲梁畢渡乃斷之眾

知無退路窮追破賊任柱勢蹙就殲乍浦降眾多桀黠未釋兵恐有變
公諭其酋曰汝械來自賊中與我軍異盍繳舊易新示無相歧眾然之
繳軍器已盡始告以奉檄遣撤狀量給塗費眾愕聆命遂分道歸鄉
里公之勇決善戰審幾定變多如此積功擢遇缺題奏按察使

賞戴花翎加布政使銜西林巴圖魯名號任天津道數年屬境大水公
手定章程設饘粥廠以棲流民廬竈藩溷悉有程式選賢員發振鄉村
條教緝密道無殲者他郡多奉以爲法以憂去官紳民額留者數萬人
服除起權津海關道會直隸山西河南大旱公廣勸民商分財濟振噓
枯濯痍鄰疆蒙澤遷按察使攝布政使平獄訟甄賢否廩然以不得其
職爲懼觀公所勉欲樹立者其意量殆不可窮遽以光緒六年五月十
九日卒年五十五以七年某月某日卜葬合肥西鄉椿樹岡南之新阡
公諱壽昌字樂山其世系邑里行誼余已誌之幽堂有子二人功浩功
勳公之卒也余具公戰功治績上於

朝得

旨宣付史館立傳

賜卹如例並於天津建立專祠公之治行在天津尤爲異天津士民哀

之如喪父母

朝廷援禮經禦災捍患則祀之義豈特以慰士民之思亦俾世之吏於茲土而能盡其民者知所勸也故余復甄敘大略貽諸其孤俾揭於墓以告後之人

甘肅安肅兵備道調補廣東惠潮嘉兵備道臨桂王公神道碑銘

琛

端木

君諱必達字質夫號霞軒先世浙之山陰人曾祖雲飛以乾隆戊子舉人大挑知縣歷任廣西昭平縣卒官貧不能歸遂家於桂林祖會

贈資政大夫妣馮夫人考誠立

封資政大夫妣何夫人生四子君其長年十七入臨桂縣學道光癸卯舉於鄉讀書務經世學粵寇起無錫鄒公鍾泉撫粵西辟主文檄以勞敘知縣咸豐五年謁選得江西之建昌時賊已殘鄂皖據江甯以九江綰轂江楚守以悍酋楚軍攻之久未下公私餽運文報上下僅恃建昌一綫路賊鬪邑形勝覬吞之擾楚軍後路紓九江急分股來撲兵食兩絀君激勵民團躬親搏戰馬斃於礮矛不及身者尺易馬益進連戰皆捷賊失勢九江復鄂撫胡文忠公曰建昌令力戰與有力焉疏聞於

朝超擢知府且馳書會文正公稱其才李忠武公亦盛推之十年攝建昌府事總江西糧臺十一年攝南昌府事賊在近地鄰境辟賊者皆至良莠莫辨君擇城外地處之分別遣留無一人失所同治改元授饒州守饒兵潦相繼流殍載道牛種竝絕君通牒大府爲民請命巡撫沈文肅公閱其牘曰此鄭俠流民圖也允所請撥帑三千給耕具舉振濟全活億萬且惠及皖境接壤民困略甦君深維教養必相資興學校給書院膏火逾年屬邑多弦誦聲饒俗德興樂平尤獷悍睚眦仇殺君嚴治之威惠竝行民大悅先是勇船過水次市魚斫其直漁人曹追之勇斃以礮反誣民劫船論死君廉得其實置勇於法人稱神明文肅手書嘉獎新甯峴莊劉公繼撫贛入飛語罷君任後采輿論得君治狀乃更親善粵寇平會公上君功

賞花翎擢監司仍留江西七年劉公上其治登計典引

見交軍機處記名八年權臬使會公檄督嵯局十一年復權臬使十二年特簡督糧道明年以憂歸光緒三年服闋引

見授甘肅安肅道時相國左侯方西出師君當嚴關總轉餉內培生民外不匱供億前後五年兵事葺以勞

賞加按察使銜君以屯田爲邊備要務而鶯粟妨農特甚深惡之興水利修隄堰嚴禁種鶯粟劾屬邑奉行不力者二人侯上其治

賞二品頂戴伊犁既復西邊通商事起肅當其衝君條陳十三事引据新舊條約規畫今昔情形晰疑慮後伯相合肥李公稱其能七年冬移廣東惠潮嘉道君自官湟隴竭蹶支拄忘身憂

國自西商乘隙邀挾語及洋務未嘗不歎惜痛恨朔漠一官離家萬里邊風塞雲感慨時艱閒發爲詩歌淋漓激昂以子美夔州東坡惠儋自況及是移官近家欣然就道顧自宰建昌以後垂三十年所值多盤錯急公愛民不暇自攝養受病已深官事仔肩以志帥氣未嘗告勞及稍弛易遂不支十二月二十日行抵平涼微疾遽卒嗚呼其諸以死勤事者矣子五人惟幼子維禧在侍君生有至性年三十母夫人卒哀毀感行路及贈公卒痛絕復蘇者再三丁丑起服再引見歸而欷歔不自勝家人怪詢之君曰吾昔

召對兩宮

皇太后垂簾聽政今十四年矣倏歷

兩朝爲臣子者能不悲乎生平篤於友愛俸入所餘悉分兄弟性好圖

史及古名臣書畫謂爲陶淑性情之助公退手不釋卷哀集唐宋以來
名迹爲卷冊六百有餘人殆以萬計珍弄部分有歐陽子之遺風焉君
生於道光元年辛巳四月初八卒於光緒七年辛巳十二月二十日壽
六十有一配向夫人繼配劉夫人甯夫人竝前卒側室關宜人徐宜人
子五長維翰同治甲戌進士官戶部郎中以

陵工推

恩擢道員分發河南加按察使銜次鵬海報捐知縣分發江西次鵬運
同治庚午舉人官內閣中書以

陵工推

恩晉侍讀

賞戴花翎次維豫維禧俱業儒方赴之聞也採往唁鵬運星奔前夕泣
且拜於苫中以狀屬爲外墓之文採文奚足以張君嫩感於鵬運哀毀
之誠有不忍默以謝者謹按狀詮次之而繫以銘曰

尊叱蜀馭濬利江風伊古蓋臣不有厥躬頌頌王公濟世之嫩發揮性
情敦篤倫理爰初效職章江一隅踔厲風發幸完其郭大局攸裨巖城
以復羣帥推功

懋賞褒錄以扞以綏惠及贛都民懷厥施愈久不渝玉關之西征麾遠
伐當關濟餉存歷日月關中有蕭河內得恂以今抵昔同符古人功光
於時疾醞於身忘身匡時嗚呼其仁其仁允成其疾曷瘳大星遽隕遺
愛長留鬱鬱佳城獨秀之陽於萬斯年光其故鄉遺徽積慶以啟後昆
代有清德益光先民民懷不忘天祚靡倦勒此貞珉爲臣子勸

前江西布政使李公碑銘

譚廷獻

公諱桓字叔虎號黼堂湖南湘陰文恭公第三子曾祖世亮王父疇膺
文恭兩江總督一品封秩李氏明洪武初徙自長沙著籍湘陰世儒術
以文學名其家文恭宦達兼資文武督部雲貴移節兩江總師廣西卒
於軍令典飾終錄嗣公除喪入覲奉

綸詔以道員揀發江西激厲民物銳廛赴官文恭逮長子杭繼武翰林
公稽古有聞師友推著述巨子比出也藝林嗟惜而公志力方軫艱危
矢忠孝署廣饒九南兵備道時寇踞九江已三年公忼槩官守博求鄉
團良畫謀復嚴城行至南康陸撫部元煥檄調回疏請巡防省城公由
是迴翔都會涉歷監司攝撫總藩雖尼於朋黨終焉淪廢而威惠所布
實事求是奉身旣退橫覽二百餘年盛衰成績藏山傳人終副師友之

夙心殆所以曲成之也公簡糧儲署按察平情訊釋投巷戰殺賊議之
盧朝發流通鈔票裁劑大錢以智術平準出內矣比署藩司心目所注
減征錢漕總督方以肅清謀更始引公同心綱條不紊浮收一浣糧入
遂羸民情大可見有司匿澤白簡隨之南昌廬陵二尹劾罷肅然承令
不及三稔大府動於流言一意反汗公叢吏怨民德實深大府位兼將
相中外受裁所題拂者爭埒門下公始終在官言官不執師生之禮安
有名賢以是芥蒂人閒疑似然耶否耶蓋大府者湘鄉曾文正公也公
莞江西釐權且七年同治元年曾公訊責語厲公以守禮束身不營私
售貪剗直陳贖請解官候勘時曾公疏入云免參辦
廷議俞之公遂乞歸沈撫部葆楨挽止曾公七檄鉤稽署藩司報贖覲
縷無閒言公方以二年二月旋任次日卽拜授統漢中援軍之
命公攬轡星征募健兒成軍變產濟饜名曰楚軍義勝營
溫旨迭頒踴躍上道四月次武昌簡軍實登舟失足左支中風方借湖
南北協解陝南軍餉皆不應但趣新軍速行憂憤病日劇楚督文恭公
官文代請回籍醫調遷延不瘳請湖南撫臣疏達開缺江西南康石大
令治前周令私人虐百姓獄公手書詞得主名石再三呈請末減二人

持許高鴻父甘結定讞斬高鴻邑人稱快踰年高鴻父觀國訟石勒書
甘結周前尹已擢調許石殺良遂指公與沈撫部徧徇時公方在武昌
聞之陳本末上手書稿草會公治是獄輾轉坐石令罪遣戍以公致書
詞未正大得降三級處分於是杜門養病不再出家居發文恭遺書目
盡千卷擴以宦游所獲頌讀尙友雪鈔暝寫自天命逮道光文武臣工
士庶

國史列傳私家紀述哀香七百二十卷曰耆獻類徵又緝閨媛類徵十
二卷

國朝人物掌故歎觀止矣屬草二十四年而後寫定謝病久支體小平
出遊探勝窮天台雁蕩普陀之奇賦詩紀之光緒初就養杭州與名流
談燕結別墅西湖六一泉之上題小盤谷寄栖隱之志已而兄喪馳返
里門老懷盡傷遂失明耆獻類徵開雕尙以耳校自著寶章齋類稿百
卷言有體用亦及身刻行著作物望承學者大慰公病不起易簣猶神
明晬然光緒十七年卒年六十有五鑄級後以家資濟餉

賞還二品章服子輔曜嗣伯兄編修公後承重孫相綸葬公長沙黃旗
營莊山後塋輔曜官浙江候補道署鹽運使以獻夙昔接公言笑聞仕

行請述德爲豐碑之文而韻之以銘其辭曰

古之君子不同者多賢亦相厄論定如何李公名門以學爲仕扶危鎮
傾事無不治未竟厥施藏鋒而歸忠孝篤誠病羽不蜚篤念師友端默
樂受汪汪萬頃孰料以斗載績西江衢歌在民著書滿家奚止等身布
政使司疆臣專任行省飭權典無格禁理公緒言以告在列鬱鬱貞松
閱此靈穴

貴州候補道樊君傳

俞樾

樊君諱希棣字萼樓河南府知府樊公琨第三子也幼隨其父在中州
讀書習舉業已慷慨有大志以兵亂途梗不得回湖北原籍應試乃挾
貨入都將博一官徧詢於人曰今仕途所尤畏者何地邪咸曰無逾貴
州君卽以布政司庫大使指分貴州人皆危之河南公亦以其年幼爲
慮君曰兒自願之必不貽父母憂旣至貴州桐梓有亂民鳩眾以叛苗
夷皆從之而起黔中大聳大吏廉知君才檄署貴定縣知縣貴定在省
城東北九十里乃省城之門戶也君下車訓練卒伍激厲士民爲戰守
計賊不敢逼每歲春耕秋穫輒以練卒防護農民故四郊多壘而三時
無害久之賊勢愈熾鄰邑盡陷惟貴定獨完賊以不得貴定不能進窺

省城乃合長圍以困之君晝夜棲止雉堞閒與士卒同甘苦賊近城則出奇兵擊之大小數十戰殲賊無算賊少卻則以其閒率所部收復附近歸化定番廣順諸城當是時大府亦倚君爲重而貴定之民戴君尤甚君時已由庫大使歷升知縣同知直隸州知州補仁懷直隸同知賜託喀台巴圖魯勇號

賜戴花翎旋有

詔開缺以知府用然君猶署貴定縣如故每以事至省城必有數百人從之君止之城外而從入者猶數十人至則噪於大吏之門曰無奪我好官故君在縣猶以縣令冠服視事不敢言已遷官也賊畏君甚百計密圖之一日欲鬚頭呼刀鑷之工至其人見君而色變問之乃實告曰賊以千金賂小人使乘閒害公耳君曰若然汝將害我乎曰不敢然則汝執汝業不汝罪也一日出行城外突有人剗刃輿中削冠綾去半視其人官兵也執問之賊所僞爲者從者皆擣舌君神色自若其後賊賄通飢卒爲內應探知君寓城南關廟中黑夜蛾傳登城攻關廟而是夜君適在署聞警從牀上躍起蹠而出傳令守陣之兵毋妄動毋使賊得繼至乃奮身奪賊刃與賊鬪城中兵不百人然皆死戰自丙夜至戊殺

賊殆盡遲明城中亂定君回署衣盡赤解視之凡受七創皆深入四五寸城中訛傳縣官傷重而死君裹創出行通衢以靖邑人又鞫所俘賊得內應者主名自副將以下數十人是日皆入署賀戰勝悉縛而誅之然後白臺司且請治專戮之罪臺司諸公嘉公膽識然亦以其傷重不欲其久居危地乃使人代之俾君入省城養傷君既去貴定未幾貴定竟陷於賊省垣震動強起君攝貴陽府知府君力疾視事內安外攘不遑啟處而大府又以遵義府爲賊覬覦恐爲所得檄君往守之未至又以遵義所屬正安州民變命往案其事君單騎至正安撫定其眾而亂首不可得一日按簿籍呼諸吏役名見一役長鬚而豐頤似素識者久之乃憶初至黔時署按察司司獄其人曾來行賂彼時卽知其人非良善也鞫之得竇竿其首遂以無事已而粵賊石達開自蜀回犯遵義與土寇相鉤連連營百餘里君由閒道出兵乘賊不備擊走之士寇悉平詔書褒美命以道員記名簡放會有傳習邪教者制軍勞公使君治其獄君以脅從者宜赦與勞公意不合爭之過切勞公怒疏言樊某固執己見與臣抵牾於是吏議撤銷所記名已而黔撫張公又疏言樊某性情倔強不善事上官固咎有應得然其治此獄甚合事理督臣未免偏

執且樊某在黔素得民心今處不當罪恐乖眾望於是又有
詔復君原銜久之奏署糧儲道時賊復據貴定龍里等城巡撫曾公檄
君督勦復之

賜加布政使銜當是時黔中亦略定矣君在黔垂二十年與兵事相終
始所在有功其名甚著官貴定時從十餘騎行山谷中遇賊大隊至賊
見君遽曰樊萼樓來矣則皆走最後勦龍貴之賊賊望君旗幟驚曰聞
樊萼樓已死矣得毋誑我乎君怒馬獨出曰余在此賊皆辟易麾眾擊
之大敗之其爲賊所畏憚如此無何河南公卒於鄆城君自黔奔赴奉
其喪歸咸甯服闋入都由吏部引見蒙

召對一次命還黔君雖以將才顯而居官實克舉其職所至必興復
尙節育嬰諸堂以收養嫠孺又增益書院膏火以興起文教興利除弊
不遺微細黔城之外有湖曰小烏江君署貴陽守偶經其地見湖中魚
甚多無漁者問其故或告曰此湖神所居也一施網罟水卽湧起君曰
妄耳烏有是呼漁者至督之漁水果湧起次日又往復然父老皆諫君
不聽又次日又往則水不復湧矣至今民食其利焉君廉而好施與凡
故舊來投者可用則用之不可用厚遺之必滿其意故厯官守令而不

名一錢以積勞成疾又感受溼氣於光緒二年某月日卒發其篋止白金十二兩而已年四十有八卒之日民幾罷市斂之日傾城往送其親屬轉無容足之所其喪之歸也黔之士大夫皆素服送之巷哭野祭者相望又言於官請爲立祠格不行黔人至今惜之

舊史氏俞樾曰君本儒家子恂恂然非讀孫吳之書者也一行作吏遂爲名將君之用兵殆所謂天授非人力乎君以末秩至黔不數年遂以功名顯不可謂不遇矣然君之志固不止於此嘗自言異日

國家有事四夷雖死不辭烏乎其壯哉今天下號雖無事而伏莽之戎所在多有鱗介之族亂我冠裳尤志士所同憤君子聽鼓鼙之聲則思將帥之臣如君者可以深長思矣

贈太僕卿故福建臺灣兵備道吳君墓銘

吳汝繪

君諱大廷字桐雲湖南沅陵人姓吳氏由選拔貢生入貲爲內閣中書咸豐乙卯順天鄉試舉人縱學而甚文警敏有器觀明於去就趣舍名字白著交游增懷賢公卿耆宿名德多折位望行輩與交寒峻下輩知名者君亦禮下寵薦之不倦當是時東南被兵久將帥大臣爭以收召豪雋得能士自助相高士輒由薦起不循用資敘平進而君始居京師

求舉湖北巡撫益陽胡文忠公今大學士湘陰左公聞君名皆走書數千里候問日月以至君益自奮勵欲指取樹名績道路引天下大事爲己荷負咸豐十一年

詔從李中丞續宜於皖用薦改員外郎同治二年從唐中丞訓方於臨淮用薦改道員記名

賞戴花翎李中丞知君由胡公唐中丞知君由曾文正公已而謝去從左公自浙入閩自君在皖左公則薦君材中司道選及入閩用左公薦補福建鹽法道居一歲埽故弊變法下條教屬吏洗手奉約束惟謹免逋負八十餘萬增稅至六十萬三千有奇軍饒商給又用左公薦調臺灣兵備道兒畜獸獮夷中捍外勢長聲高用前勞加二品服再加按察使銜寢寢嚮大用矣左公去閩後帥適左公不好者至則遣人微伺君不能得毫毛過失君卽病免徑歸臥家左公治軍乾州沈尙書葆楨治船福州曾文正公再鎮江南治舟師海上先後交章薦起君自助始君在皖文正公厚遇君旣官閩海而睽睽八年而後合合而文正公益重知君君周旋諸公間久饜食事亦稍倦遊獨暱就文正公所當是時沈尙書左公皆

上所倚信十言九見聽而文正公尤重於是眾度君不久迴翔且復用未幾而文正公薨君居吳淞海壖鬱鬱無所嚮久之今大學士合肥李公密疏薦君

詔留不下最後沈尙書鎮江南李公在北迭爲奏論君行治惟

天子量材能進退之君入見出待

命月餘

命且下而君卒卒而沈尙書以聞於

朝

詔贈君太僕寺卿光緒三年某月也春秋五十有四夫人孫氏前卒子文元某官孫二人曾祖仿聖祖元佐父諧比三世皆以君貴

贈資政大夫妣皆

贈夫人嗚呼世嘗謂士得一知己死不恨若君者傾一時名公皆知之皆薦之而卒久棄閒不一究極其材以死咸同之際胡曾二公所薦士無不光顯君能則尤所欲振拔尤噤不獲施用得知己死果不恨乎或往往孤特獨立上無援下無和而顧自行其意抑又何也君旣久不遂益發奮恣記覽時時著書以自娛汝綸友穆君所禮士也爲君編次所

著書君卒而致君願言來徵墓刻汝綸辱與君遊知君為深乃不辭而

為銘

銘詞

贈光祿大夫甘肅甘涼道李公墓碑

馬其昶

公姓李氏諱鶴章字季荃合肥人當同治初李文忠公以淮勇戰江蘇於時佐治軍而躬戰以成其績者公也考刑部郎中諱文安有子六人公次三少英朗刻厲嚮學年二十六始補縣學生員再試再不利時仲兄文忠公已第進士在翰林有聲矣公自期待不後於諸兄既連不得志有司輒棄去益究心經世之學會廣西寇起江淮俶擾因部勒丁壯為鄉團自捍衛姦民夏金堂期會為變乘夜出不意斬之其黨立潰刑部奉

命治鄉兵將數百人從刑部歿復出隨官軍拒寇屢戰有績廬州再陷走定遠上書巡撫陳兵事累萬言巡撫不能用馳去展轉江浙閒無所就會文正公一見激賞稱為將才因隨會軍攻安慶時伯兄勤恪公備兵贛南復隨往領贛勇四千助防勦會公之督兩江也議規復蘇常主募淮民替湘勇既上海來乞師遂薦文忠以道員擢巡撫賃外國輪船載師而東別檄公將騎五百增募千人繞淮揚裏下河至上海會師當

是時淮勇新集公入贊軍謀出護諸將雖曾公亦以教練新軍之責重屬公矣寇圍虹橋屯大雨文忠期旦日往援公謂天雨寇懈宜乘銳急擊勿失從其議破之上海軍自此振遂進攻青浦分軍還救北新涇屯拔嘉定擊援寇四江口大敗之功爲多文忠推先他將奏言臣弟不敢闡功

天子稱其功與程學啟埒命一體議獎自初起及敘安慶功已前得知縣

特詔加四品銜以知州用常熟寇反正蔡元隆亦據太倉降公率騎至城下伏發中槍傷股後七日會軍復其城於是程忠烈克崑山遂與公各率萬人爲統將忠烈攻蘇州公則趨江陰無錫以取常州寇自顧山連屯數十里伏兵河側燬其礮舟盡奪其屯城寇懼謀內應遂復江陰加三品銜知府移屯逼無錫悍賊李秀成突犯大橋角大橋角蘇州西北要隘也寇爭之急公馳救連大破之乘勝薄其城而程忠烈已定蘇州軍益奮遂克無錫虜其酋捷聞以道員記名

詔曰李某隨其兄在軍戰甚偉今徒緣撫臣引嫌務推功故賞不答勞剋日平常州江甯其速議諸將率功賞無有所遺由是益感激思自效

引軍冒雪趨常州悉平埭郭寇壘下孟河解奔牛圍屢擊退援寇寇西南窺前所復縣用牽我師因還守無錫遣軍分援別縣皆破走之常州外援絕再進攻明年常州平

賞黃馬褂已而湘軍遂拔江甯大功成乞假歸矣

詔授甘肅甘涼道疾發未行會曾公督師討捻為奏請開缺留軍總理營務從至清江告歸遂不出竟以道員終其後文忠臻宰相封爵同時勤恪亦用州縣平進開府兄弟旌節相望而淮軍諸將起偏裨膺疆寄尤顯者復十許人大抵皆公舊部而公顧落落論者謂古今功名之際往往有遺憾焉至於公若或顯之又若或靳之尤不能不太息其器業之未究而有覬於其後以觀天道之大恆也公既歸自號浮槎山人亦時出遊都會稍營商業致巨萬喜義俠立然諾多棄財為之助山西振加二品銜光緒六年年五十六卒大臣上言績狀請付史館立傳并立祠原籍暨建功處

報可後以子經義貴

贈光祿大夫廣西巡撫初公投効年纔踰四十及巡撫君以優貢生至今官亦纔踰四十人皆曰是公之餉遺也前夫人李氏早世後夫人周

氏側室石氏子三人長天鉞按察使銜江蘇道次經義次經馥記名道
女二人適張適沈孫六人國蓀國松國筠國蘅國芬國芝松筠皆舉人
從余學以公前葬二十年墓道碑不具致其父巡撫君命來請銘墓在
合肥東南許貴村銘曰

惟公之先實本自許承李而興大恢厥緒刑部齋志教子卽戎淮孺勁
旅聲殫中夏暨暨我公樹績自躬勞成不有校古疇雙范蠡違越遨彼
海江以商經國今見於治公之英略百彙一試鄙儒小拘曷不是思

兩浙鹽運使高君墓志銘

俞樾

君諱卿培字滋園姓高氏安徽貴池人也曾祖懷獲祖君輔並有潛德
父燦歷官浙江海鹽餘杭天台縣尉所至有聲三代並以君貴
贈如君官君生而明敏讀書能通大義少孤奉母陳太夫人家居以貧
故不克事章句之學然義氣磔落與常見異年甫弱冠橐筆游京師則
名姓已隱然動公卿聞道光二十三年入貲以縣尉發浙江試用卽奉
檄攝南潯巡檢旋補西水驛丞會陳太夫人卒以憂去官服闋仍至浙
江當是時粵賊已踞金陵爲巢穴東南諸行省咸震動浙與江蘇江西
安徽皆接壤議防議期日不暇給尤苦無餉乃設局專治其事日籌防

曰助餉君從事於中器幹恢張綜理微密不苛征於民而財用充牣大吏倚之如左右手疏薦於

朝以知縣用俄擢知府

賜戴孔雀翎咸豐之季杭城再陷君皆以勸捐催餉在外不及於難然顧大局糜爛江浙間無可以辦賊者而湖南自曾文正公起義師名將輩出土氣奮揚君默計異日爲

朝廷滅賊奏中興之功者將於此乎在乃如楚會今相國一等侯左公帥師入浙知君之才謂君曰用兵必先裕餉餉之所出惟鹽惟釐君在浙久熟其利弊今以此二事專屬於君君其勉之君感左公知遇亦力以自任所謂釐者計商賈所廢著百物千而入其一謂抽釐而浙中以絲茶爲大綱乃明定章程類若畫一至今遵守莫能易也鹽則漕綱廢弛引商疲病乃改行票運仍按引抽釐鹽茶兩課歲入四百萬左公一軍糗糧楨幹無闕於供士飽馬騰所向克捷未逾再稔全浙廓清固由師武臣力之故而君之功亦非細矣左公上君之功

詔授兩浙鹽運使君益以廉潔自勵又以禹筮爲

國家大利宜籌經久之計票運可以濟變難以持久力以招復引商爲

事中間兩權臬使事析憲禁悍不爲苛察繳繞之政時論稱焉僉謂封疆之任非公莫屬行且開幕府受節鉞而君以積勞得目疾又傷長公子之秀而不實目疾益甚遂引疾去官未竟其用海內惜之逾年大吏又強起君使督辦釐局君不獲辭又筦局務者數年所用惟惻愍無華之士其紛更擾民者率罷斥之故君在釐務民無謗言至今浙中推善治釐者蓋無出君右云君雖服官數十載無中人之產齋廚蕭然不異寒素以故里無一椽之庇而其仲子以鹽運副使需次兩浙乃遂僑居於杭相國左公以君歷年籌解協餉厥有成績颺言於

廷
詔賜二品冠服旋以

覃恩封榮祿大夫君謝事家居惟與諸故舊銜杯酒敘殷勤頤惟養壽宜登耄耋乃感重腿之疾縣歷數年於光緒六年四月戊午卒於家年六十有六娶陳氏繼娶裘氏皆

封一品夫人子二人尙綸貴池縣廩膳生候選郎中早卒尙縉兩浙候補鹽運副使孫二人春榮春森某年某月尙縉等葬君於杭州之某原以樾雅知君具狀乞銘銘曰

我交於君由王文勤君賢且才文勤實云惟君服官垂三十載積優成
陟宦蹟咸在其蹟伊何在浙西東統籌全局佐成大功厥功伊何功在
轉餉餉以不匱師乃用壯文勤之歿我文其碑今君逝矣我又何辭鬱
鬱佳城森森華表銘其幽宮萬世永保

江蘇候補道杜君墓志銘

俞樾

同治四年余見今相國合肥公於金陵公曰子見觀察杜君乎余曰未
也公曰是賢而才且工文辭宜往見余往未見已而君來一見如故未
幾君權蘇藩又攝臬事余寓吳下過從益熟及君罷官還嘉興而余蘇
杭往返必徑由焉歲輒一再見旬輒一再致書往歲君病既愈語余曰
病中已粗具大略煩君諛墓時余亦久病笑而應曰未知誰先耳無何
君竟捐館舍所具大略不可復得久之其嗣子以一冊來則君自定年
譜也起嘉慶二十年訖光緒四年敘述甚詳然止具入仕履歷而言行
之大者固無可見又不具祖父名諱於志墓之例有闕姑就其書刺取
而編次之蓋亦大略也君諱文瀾字小舫浙江秀水人其生也其王父
夢老僧擔簾入室謂有異徵奇愛之少而孤露家甚貧其舅緒公習法
家言久客湖北憫君母子無所依迎之往以長女女之君既從舅氏居

兼讀律然欲以科第顯不屑也久之始出就人聘佐任明府於襄陽凡三閱月手定大獄七十有三於是名大起所得贄幣益豐腆諸與爲賓主者咸愛重之曰以君之才胡不仕乃入貲爲縣丞旋改兩淮鹽運分司運判未赴而湖南有李沅發之亂總督裕公帥師征之命君從夏方伯廷樾禦賊於靖州遂由粵西之懷遠永甯歷苗猺諸峒寨以達於桂林復由大榕江至西延而回新甯崎嶇戎馬閒數十日李沅發平賜藍翎此君入仕之始也既至兩淮署淮北監掣同知補海州分司運判改補通州分司運判署泰州分司運判兼署東臺縣知縣而君實已累遷同知直隸州知府以道員用加鹽運使銜花翎矣當是時軍務孔亟諸事蝟集於江淮閒諸大吏皆以君爲重靡役不從故一歲或數進階而君於其閒丁尊夫人憂弟少牧戰湘北半截山陣亡其舅氏褚公死難麻城天倫之戚無歲無之雖簿書旁午衽革枕戈未嘗不涕泗滂沱也時淮北詳定鹽法君立章程十有四事咸以爲便其以私鹽牟利者名捕得十一人置之法貲課充足軍府賴焉官軍之攻揚州也君出奇計度城高下遠近置雲梯船尾帆風直下適與城平鼓士而上城中賊出不意大驚而陸路兵失期不至遂無功君嘗與樾言以爲憾同治

初江南平諸大帥論功於

朝謂君才大心細簡核精詳屢克名城咸資贊畫

詔加君布政使銜自曾文正公以下無不重君之才歷署江藩蘇藩蘇
臬江安糧道蘇松太道常鎮通海道所至咸治其攝蘇臬也如皋有冤
獄平反之活三人於歐刀之下至今稱焉俄爲制府沈公所劾免官君
初有肝疾醫者以鴉片治之遂不能絕沈公疏云鴉片之害以豪傑自
命者犯焉以道學自命者犯焉縱其才學爲當世所希臣亦不敢有所
顧惜蓋雖能以法中君而君之才學爲世所希則沈公已論定之矣君
是年已六十三歲曰吾老且病固宜歸劾我甚善所營私宅在嘉興報
忠埭有花木泉石之勝君歸終日手一編不輟所著有曼陀羅閣瑣記
四卷采香詞三卷萬紅友詞律校勘記二卷古謠諺一百卷平定粵寇
紀略若干卷江南北大營紀事若干卷其餘所校刊者如周草窗詞吳
夢窗詞諸書皆行於世晚年又作同人詞話甫寫定未刊而君歿矣君
卒於光緒七年七月某日年六十有七臨終爲七言古詩一章頗自道
其襟抱云君兩娶皆褚氏舅之子也如夫人者三曰王曰魏曰金無子
以弟之子嗣曰廷章先卒又嗣從兄之子爲次子曰廷章女子子一適

章氏廷章卽於其年葬君某原越二年余追爲之銘其辭曰
自古官人厥途甚備繇唐以來壹之進士遂令天下異視學仕庸知人
才固無不有彼幕府中大有人在練習名法通達事理駕輕就熟其易
十倍英英杜君人之杞梓原其所學自法家始試之於事事罔不治千
緒萬端釐分毫剖羣公嗟歎言之

天子一歲數遷猶以爲久謂將大任如何遽止其才其學實無餘子雖
在忌者不得云否如君所學乃真無負巨細咸宜方圓可以以之從政
庶乎可矣嗟余不才忝與君友敬作銘詞敢告千載

福建鹽法道署按察使翁公家傳

俞堯

公諱學本字小軒一字蘭畦翁氏其先世居浙江餘姚國初有諱運標
者與兄運槐先後尋父於湖南世稱翁氏兩孝子運標後官道州知州
祀名宦祠此則公之高伯祖也會祖會堂因留湖南遂爲善化人祖元
鈞爲甘肅通渭靈臺等縣典史父忠清三世均以公貴

贈資政大夫曾祖妣朱氏祖妣謝氏李氏唐氏妣鄧氏並夫人公生於
廣東合浦縣署其伯父諱忠瀚者適宰是縣也生十日母卒四歲父卒
祖母李太夫人撫育之嘗從李太夫人至山東舟行墮於水若有物負

之出人皆異焉俄李太夫人亦卒煢煢子立然不廢讀公經世之學蓋基於此矣咸豐二年七月粵賊犯湖南永州鎮總兵常公常祿知公才以潮勇千二百屬之勇目贖金五百以獻曰常例也峻卻之故潮勇多橫恣而公所部肅然復永興縣城破賊於攸縣丹陵橋從援長沙道隘不可騎徒行七十里飢食生芋渴飲泥漿夜與士卒臥畛陌中一日單騎偵賊爲賊所迫前有塹不能越賊或以戈椿其馬馬驚躍遂踰塹公歎曰天也會所部潮勇調隸別將而月饟未發者尙多環而請領勢洶洶公曰吾不負若也但一日隸吾麾下卽一日遵吾號令靜毋譟苟譁有軍法在立以糧臺他項儲款發如數或以擅發尼公勿顧也常公甚驥之以公參其營務時所獲賊謀積二百餘人公知其中有冤者親鞠之尸其半釋其半已而常公援武昌命公催湖南餉及至而武昌陷常公戰死公望城泣拜而去四年謁曾文正公於江西文正命公稽察水師夜見巨舸張燈譙飲聲樂甚盛詰之曰吾與曾公姻婭也公曰吾知有軍令不知其他於是文正益賢公鄱陽湖之敗公掉小艇跡文正所在而從之文正執公手曰能爲吾徵兵二百里外乎請檄文正以小紙書數行付之持以行兩日而兵至文正嘉焉命往佐李公元度於南康

公既至遂師事之崎嶇戎馬間所學益進時軍事孔亟公以轉餉及以
他事渡鄱陽湖者三十餘次文正疏

聞有不避艱險之語未幾移駐貴溪七年八月賊大至而城中食盡公
冒雨走廣信乞食於廣饒九道沈文肅公衣盡溼文肅解衣衣之與以
米五百石鹽千斤銀三千兩載之歸夾岸皆賊也公佯睨賊而笑賊不
測不敢詰城中得米民心大定遂有鷹潭之捷李公上其功稱其廉明
得士心突圍乞饗不避矢石尤人之所難云是年秋選就福建浦城縣
縣丞李公以爲是軍中不可少之人請於文正而留之旋以貴溪弋陽
守城功奏保知縣加同知銜

賜鷓羽翎至九年江西肅清乃始赴浦城任自是而公之政績皆在閩
矣十年三月粵賊石達開由鉛山犯浦城公語縣令曰二度關吾邑要
隘也是宜守邑令卽以所募臨江勇數百使往守關旣至寇亦至眾大
恐公於關上張疑幟分兵繞出賊背擊之關上亦發大礮轟擊賊敗走
浦城以全自此一戰而軍務少息未幾江南平戎事葺公之治閩乃專
以吏治見公始以浦城縣丞遷泰甯縣令泰甯號難治北鄉之民尤雕
悍不納糧前令坐是免者三人矣公曰治民有道撫字宜先催科宜後

也訪求民隱知邑多訟有曰保家者實構成之兩造雖欲罷訟爲所持
不得罷必破家乃已公嚴治保家向之受其累者皆大悅又興復書院
修建名蹟進其諸生從容問民生利病吏治得失於是剔除錢糧積弊
與諸父老約糧畢輸則有獎上者扁榜次者花帛遠近觀感輸納恐後
乃親至北鄉召其長老語之曰國課不可逋也我一官去留不足惜然
我去汝能終抗乎民間公言皆大感悟逋賦一清按察使桂公超萬歎
曰是真能以撫字爲催科矣同治元年調署崇安適遇水災公請奏免
錢糧三四請允免十之四明年歲大熟民曰好官不可負也春稅所輸
數逾巨萬蓋以撫字爲催科猶泰甯也巡撫徐清惠公上其事於

朝

詔下吏部議敘公之受

知遇自此始矣公治崇安三載星村茶市客民聚鬩馳至卽解曹墩貧
民糾眾強糴傳諭立散民惑於風水之說不葬其親則嚴禁之買義山
以葬無主之棺民錮婢至老不嫁則苦口勸諭之年逾二十不嫁罪其
主有母訟子者請置之死不許荷校以徇於市俟其子悔以還其母爲
母子如初吳越子女避難來閩請於上官飭所由禁勒賣所保全者無

算三年三月調署閩縣八月又調署侯官縣公以省會之地獄訟繁多立書役功過格以地遠近定日遲速到卽訊訊卽結如原告兩月不到注銷勿問遇華洋交涉之案據理斷之左文襄公歎曰安得天下皆如此強項令哉洋商欲租民地者非有印結禁勿租奸民誘人子女鬻之外洋公捕其爲首者陳阿佺等五人論如律洋人欲築屋於城中烏石山之顛公持不可立石示禁其後持禁者不力改從其請竟激民變朝廷遣使者按問得公所立石歎曰是有先見時公已官鹽法道仍以屬公卒移之城外當漳郡之陷於賊也省中人心恇擾有汪洋洋者乘亂行劫公立斬之或曰縣令耳奈何專殺人文襄嘉其膽識勿問也時奉文加徵糧餉以充軍用公親歷四鄉告以不得已之故民皆從命無違言大湖所轄有嶺兜等五鄉焉是皆頑梗有田無稅所司請以兵剿之公力爭不可單騎往曉以禍福不三日而賦盡納其糾眾抗官者自繫待罪文襄喜曰吾固知此事非君不辦也公勤於民事日坐堂皇在崇安結舊獄六百餘在閩縣結新舊獄二千餘在侯官結新舊獄一千五百餘嘗以書上布政司陳十事曰海防曰鄉團曰額兵曰田賦曰廣積倉曰勸課種曰免煩碎之釐曰除賤濫之捐曰錢法曰交代建議宏

大非徒可行於閩省而已又陳閩俗之弊曰淹柩不葬不孝溺女不舉不慈不孝不慈皆由於不學方議有所施設而左文襄奉

命西征徐清惠薨於位遂不果論者惜之四年調補詔安縣仍留署候官以辦理通商事

詔以同知直隸州用以閩省肅清

賜換孔雀翎五年奉檄赴閩縣尙幹鄉治土寇先是總兵某君以重兵臨之獲十人公訊之有兩人者非寇也總兵曰制軍命我駢誅之矣公曰事苦不知耳知而不言於心安乎請活此二人我任其咎於是鄉人悅服轉相告語父兄縛送及自首者五十餘人土寇悉平六年遷永春直隸州知州甫下車頒采風十問於民間州有盜魁曰謝險嘯聚於何山時入城剽掠市人至不敢呼其名公縣重賞購之期必獲謝險布流言云將不利於公公不爲止先獲其黨張智等二十餘人置之法謝險走建邵閒公度其必由水道經省城授計於紳士陳某集茶市健兒伺之果獲數十年巨憨一朝而除

詔加知府銜鄉民聚族山居尙氣好訟訟不解則鬪鬪或數世不休而洋湖黃鄭兩巨族尤其雄伯都魁也公捕治其渠自此境無鬪者命案

多匿不報富則私和貧則擇殷實之家而波及之公嚴誣告之罪此風
衰息著戒訟說一篇聽訟時爲之解說有聞而涕泣罷訟者巡撫李公
鶴年下其書於各州縣總督英文勤公書其後曰是不愧民父母矣訟
詞必使載作者姓名一語歧異卽究作者而遇庠序之士不遽繩以法
往往悔悟成善士焉大田縣民拒捕縣令請兵公曰毋擾農功馳一檄
往而犯者皆自投山田種蔗利倍於穀公曰毋荒本務巡行田野見禾
稻青蔥輒獎以銀牌民皆拔蔗而種穀虎爲患牒於神終公任無一虎
夏不雨禾且槁步禱於神雨立霑有永陽壩者袤延五十里廢久矣復
其壩灌田五千頃州城圯更築之白鶴嶺道隘行者不便拓而大之環
翠谷音兩亭朱子遺蹟也修而復之新

文廟備樂舞春秋丁祭悉如禮儀創建鵬山書院設立義學四區士皆
嚮學永春之有科名自此始有周夢齡者神童也幼失父母教之公顏
其書室曰榮護柯恐者愿士也其父訟其母與兄於官公責其母不順
其夫柯恐痛哭叩頭不能成聲公責其兄不孝其父則請以身代公曰
孝弟之士也以鼓吹送歸自督撫學使以下咸有贈民始知以行誼自
勵矣民間婚禮陋不中禮雖娶妻與納妾無異故婦女不知自重夫死

卽嫁守義者。公製彩服禮輿以重初婚之禮。著女兒經貞節歌婦豎傳誦風俗爲之一變。立同仁堂以養老疾。立育嬰堂撰育嬰要言以保孤幼。州故瘠貧商販罕至。減釐捐免零稅以利市廛。土產瓷紙舊歸鹽船回空載運小民肩挑販鬻者罪之公惻然曰貧民自食其力何罪之有。立請於上自德化洋湖得運至仙游興化諸縣從公議也。永之鹽務自同治初定新章計口銷鹽每人月食一斤有半。一州二縣舊課僅千二百兩驟增至萬二千兩民不堪命。公力請改章不許。及公歿後九年德化縣民陳拱果以此倡亂官軍討之而民皆陰附拱久之不能定於是下

明詔革除派買之弊。總督檢舊牘則公稟故在也。卒如公言乃定。嗚呼公之治永也其尤一生精力之所注乎。今尙書孫公毓汶方視閩學至州聞公之治行爲賦滂惠歌一篇皆紀實也。永之民至今不忘爲建祠宇歲時祭祀蓋亦漢時樂社于祠之比矣。十一年署福防同知福防同知駐南臺其地華夷雜處奸宄叢集公至禁小船私載禁物以通寇禁夜市禁夜戲又議禁賽會而奸民許阿石挾嫌糾眾謀於福防署公懷印見巡撫王文勤揖之曰循吏苦心謂余不知乎置許阿石於法地多

火災公度地鑿井造石斛以儲水錢肆多以空票牟利公命備載姓名族戚鄉鄰於冊空票遂絕十二年調署龍巖州州有爭墳地者訟且十年矣公問地吉乎曰吉公曰訟則終凶吉於何有兩姓感悟罷訟

文廟無佾舞生招之無應者公以名族子弟爲之簪花披錦導以簫鼓眾以爲榮佾舞乃備款試餞諸生於明倫堂以詩送之三年中鄉舉五人解首與焉成進士入詞林者一人僉曰龍巖僻壤非公教誨不及此拳勇之士號召其徒少年子弟喜從之游以武犯禁悉驅逐之奸人蓄蠱毒害行旅捕治無赦又刊布治蠱之方不數月民稱翁青天云十三年又回永春任公再治永於民益親被控者不傳而自至因訟羈管者歲暮縱之及開印皆復來建通仙橋贅叢桂嶺於鵝鴿嶺下建石橋一木橋四行人便焉光緒元年補行十三年大計以卓異聞二年署福州府知府自此官位益崇而爲治仍如牧令時三年五月大水城不沒者三板公坐木筏巡視墮水衣履盡溼而不自休息歷十晝夜寢食皆廢齒齧作痛兩足盡腫公病自此成矣公仕閩久左文襄徐忠惠王文勤累疏稱公賢

朝廷知之稔議破格擢用會建甯府缺員卽以公補授未之官授福建

鹽法道閩鹺自改票法民窮商竭公埽除積弊每屆奏銷於正課外皆有盈餘時已累加至二品銜而左文襄又以協餉功請加按察使銜七年大計羣吏又以卓異聞八年

奏署福建按察使爲清訟簡明章程四則通行各屬羣謂公必大有造於閩而公病竟不起光緒八年五月甲寅卒於官年五十有四妻高夫人有賢行公在浦城二度關之戰或傳兵敗矣夫人手劈印匣握印擊二女坐井闌竟日捷聞乃止隨任候官公適以事出有客兵自城外突入署中索餉夫人遣老僕慰勞質衣飾得錢餉之旣畢乃問曰今日之事不知於軍律何如皆叩首謝無狀公卒同僚賻贈數千金夫人曰非公志也悉卻之後公一年卒子四人傳煦傳照餘二子殤女四次女殤殤者皆葬永春大鵬山民敬護之樵采不至焉孫二人家騎家銳余識公次子故得聞公事甚詳念公已廟食永春他日必有請以公政蹟宣付史館者故詳述其事冀補

國史之闕焉

論曰公少年投筆從戎意氣甚盛使長從曾文正諸公游安知不擁旌麾受節鉞赫然稱中興名臣乎乃以縣佐赴閩從此遂以循吏顯造物

者成就斯人果在此不在彼乎觀烏石山禁洋人築屋及請改永春計口銷鹽二事在當時皆不盡以爲然而歿後卒如其議詩不云乎維彼哲人瞻言百里公之謂矣使天假之年得至督撫於天下事必大有裨益惜乎未竟其用也公二子皆賢尙能繼其志哉

江蘇候補道吳君墓志銘

俞樾

君諱雲字少甫姓吳氏自號平齋晚年曰退樓又曰愉庭浙江歸安人也所居在太湖之錢澣曾祖魯招祖世傑父鼇以君貴

封贈如例君生六歲母康太夫人卒十歲父榮祿公卒君雖孤露能自奮於學而屢困場屋凡六試始籍於學官應省試又不訾乃講求經世之學旁及金石書畫咸究壺奧道光二十四年君年三十有四矣始援例以通判分發江蘇既至佐郡守折獄判決如流時常熟民以徵漕事鬩於縣有陶四者年甫成童有司誣爲魁君鞫之非也出之獄糧道某公頗不嫌君勿顧也俄權知寶山縣縣多逋賦君立法懲勸賦畢而民不擾方信李公德下其法於三十二州縣咸以君爲則又權知金匱治亦如之及受代歸適江北高家堰潰災民南來江南設局留養以君尸其事無一夫失所者二十九年吳中大水君再權寶山甫下車爲鬻以

食饑民有鬻厥有鬻擔厥以人就鬻擔以鬻就人天遲明設大鑊煮於庭君夫人陳氏親督婢媪爲之曰淡食弗便也加鹽焉曰冷食弗宜也置薑焉君履行四境勸富民各振其鄉鄉無富民使鄰村助之是歲朝廷發帑金百萬振江南饑獨寶山縣民自爲振無一粟之浮無一戶之漏於是大吏咸以君爲才總督陸公方改淮鹽章程使君攝泰壩監掣同知受事三月粵賊沿長江東下泰州爲裏下河門戶爲賊所窺而壩上扛鹽之夫又以失業將爲變君察其老弱者安集之其強有力者則以搏力之法訓練之鳩然成一軍揚州東鄉恃以無患侍郎雷公以誠駐師揚州萬福橋以君總理營務敘功升知府大帥以軍餉不繼使君履畝勸捐不數月而餉足議以君功上

聞君曰此不得已之策可居爲功乎力辭之已而總督怡良公上君保全裏下河功加道銜咸豐八年權知鎮江府時郡城初復官吏所需咸取給於各鄉鎮之團練局而主局事者則苛斂於民君至悉裁撤之曰子遺之民可重困乎鎮江故有關常鎮通海道實主之巡撫徐莊愨公以關政之弛廢也欲以君攝道事固辭公曰然則專以關政屬君耳君曰茲事體大果爾必入

告公無易言也乃以會辦之檄往既治關整紛剔蠹商民不困歲入益饒是年以籌餉功

詔以道員用明年權知蘇州府其時金陵大營潰常州繼陷蘇松太道吳公煦請以洋兵助戰守莊愍公遂命君馳赴上海與西洋諸國領事官會議議未定而省垣陷巡撫薛公煥命君率礮船會合洋兵收復松江府城而部議以君失守蘇州奏奪君官薛公上言蘇州失守君實不在城中莊愍所給咨文委劄令箭歷歷有據事乃白復君官薛公旋檄君兼攝松江府事而君於是役也奔馳烈日中巾月心力交憊乃力請交代蘇郡事并繳還松郡檄薛公鑒其誠許焉然猶命君董釐捐事且筭營務君與薛公約勿任吏職勿列薦牘勿主銀錢出納署所居曰三勿齋已而薛公疏保諸有功者君名居首堅辭至再曰息壤在彼矣謂所署齋名也當是時賊勢甚盛浦東諸防營皆潰烽火及滬上民大震君雖不居職而有大議必預焉其尤大者一在立會防局以聯合中外中外合而滬上一隅乃得安堵以待援一在籌巨貲賃輪船以迎今相國肅毅伯李公安慶之師師至而江浙以次肅清東南底定是二者皆君成之也君口不言功俄獲咎以去先是蘇城有賊魁李兆熙者請反

正以母子爲質薛公使君圖之賊中頗有受密約爲內應者君白薛公
機可乘矣顧薛公所部將皆恇怯無應變才其兵則驕惰不可用事垂
成卒敗忌君者以此事譖於李公君亦不辨也曰一官得失何足道惟
念吳民久困重賦曩以減賦事言於故總督何公累數千言格不行至
今以爲恨耳會糧道郭公嵩巖以事諮於君君卽錄舊稿與之議俟克
復蘇城然後發君曰如此則需矣及今言之時不可失李公聽其言會
同曾文正公言於

朝減江浙兩省賦額數十萬石此又君成之也君官江蘇三宰劇邑兩
典名郡年甫強仕罷官遂不復出人咸惜君之未竟所用然而君之造
福於三吳者已甚鉅矣諸大吏屢欲起君皆以疾辭而民間利病往往
爲當事者言之丁公日昌爲蘇藩君語之曰兵燹後民無蓋藏盍謀積
穀乎丁公從之民食裕焉浙水利久不修太湖諸澗港均淤塞君致書
太僕鍾公佩賢及之鍾公以聞

詔下其所定章程於江浙督撫遂有大修澗港之舉嗣後雖歲恆雨不
爲災同治十年直隸大水君施木棉衣如千襲伯相李公疏請還君道
銜且曰吾督師十年閱人多矣獨於吳君有失之子羽之歎今以補過

也君篤嗜金石幼時讀漢書至梁孝王爨尊事曰此必三代上法物惜
史氏言之不詳耳塾師大異之所著有二百蘭亭齋金石記二百蘭亭
者君所藏襖帖積至二百餘種故以名齋其書以兵亂燬焉後得齊侯
爨二遂名所居曰兩爨軒著兩爨軒彝器圖釋十二卷凡一器一銘鉤
摹而精刻之意所有疑則博稽經史以證明之此外有古官私印考都
凡二十七卷號季子白盤考漢建安弩機考溫虞恭公碑考華山碑考
各一卷焦山志十六卷而詩文尺牘題跋之未寫定者尤夥君於同治
三年遷居吳下所居有泉石之勝客入其室左圖右史鍾鼎前列君角
巾杖履揮塵而與談望之如神仙幾忘其前此之爲召父杜母也余亦
寓吳與君居相望也君長於余十歲而嗜學好古簡略世事則與君同
之猶憶往歲嘉平旣望過君劇談君謂余曰海內皆知君文章經術耳
君所學詎止此耶余深愧其言孰意此一見後君未及一月而遽謝賓
客也君卒於光緒九年正月癸巳年七十有三初娶於李先君五十四
年卒繼娶於陳後君九月卒子五清湘幼殤承璐同治四年進士江蘇
候補道承澤兩淮候補鹽大使承源江蘇候補同知承溥縣學生江蘇
候補同知澤源溥皆先君卒女五長女未嫁殤餘四女並適名族桐鄉

周善有歸安王錫玟吳縣潘祖頤歸安朱鏡清其瑁也孫八家棠家棟家楣家樞家楨家柎家椿家椿曾孫二惟峻惟崑孫女四曾孫女一光緒十年四月壬子承璐奉君與陳夫人葬吳縣某山之原李夫人始淺葬於湖漚至是亦奉移而祔焉禮也以狀乞銘余衰病之餘凡以碑傳請者概弗應然君吾老友也義固不得而辭乃爲銘曰

士之大端惟學惟仕苟不兼優何以言士惟君之仕政績咸在未竟所施以詒厥子惟君之學與古爲友羅列尊彝排比圖史我觀時流無出君右上壽八秩盛名千載鬱鬱佳城蒸爲蘭茝刻石幽宮用示永久

兩淮鹽運使洪公神道碑

繆荃孫

宣統元年二月兩江總督端方奏已故兩淮鹽運使洪汝奎服官政績請開復處分奉

旨俞允於是公子槃奉事略踵門請曰先公之歿二十有四年矣因未復職不敢碑不敢廣求傳志今

恩綸丕煥光及泉壤先公在江南所任之事江南人知之所獲之咎江南人亦知之吾子其次爲文傳之當世感且不朽荃孫禮不敢辭謹按事略公姓洪氏諱汝奎字琴西先世籍皖南涇縣後僑寓漢陽遂占籍

馬曾祖兆熹祖璫祥父錫錄皆以公官

封贈中議大夫妣皆太淑人公秉姿穎異自幼劬學凝重若成人年十九補弟子員甲辰

恩科舉人丁未考取教習受知於太傅曾文正公漸以遠大使事同邑劉先生傳瑩益勉爲經史有用之學至是與長白倭文端公旌德呂文節公師宗何文貞公餘姚朱侍郎蘭霍山吳侍郎廷棟講學春明尤邃於宋五子書以躬行實踐爲主咸豐閒粵寇亂作轉徙流離樂道安貧絃歌不輟庚申入都補正白旗覺羅官學教習俸滿引

見奉

旨以知縣用益陽胡文忠公時駐軍英山聞其名禮招之遇以國士嗣參曾文正公戎幕克安慶下江南贊畫軍謀多所裨益公故皖人凡涉地方利病胥就咨詢皖南被兵久郡縣殘破特甚休養生聚務農爲先請於文正公籌給耕牛籽種廣招徠資開墾民氣大紓軍實亦足同治丙寅合肥李文忠公權節兩江委領精臺凡支應本省防餉外省協款劃還西征洋債出入逾二千萬公綜核名實洪纖不遺弗當用者不避嫌怨力加裁汰一遇日本窺臺之衅再遇俄人要盟之患內籌軍實外

固海防晝夜焦勞不遑寢食卒以緩急有備隱恃無恐光緒丁丑晉豫大饑江南諸不逞之徒乘機竊發公時縱理營務設法捕治之不少懈其贓證未確如儀徵溧水解省盜案凡數起獄悉具矣察有冤抑立予平反而高淳一案某令持之甚堅及真犯就擒卒以帖服己卯沈文肅公督兩江因疾篤再籲開缺疏請以公代拆代行時望翕然歸之會海疆有事

詔下王大臣密保人才中外交章論薦遂由候補道員

特旨擢廣東運司旋調兩淮異數也涖官後整飭疲綱痛裁冗費抑鑽營拔淹滯仕途一清又以地方諸務廢弛銳意振興如建義倉修城濬河諸役不數月百廢具舉三牌樓獄起遂有軍臺之役公夷然就道曰雷霆雨露莫非

君恩一身榮辱何足計獨不能爲沈文肅公一雪枉殺之誣不無抱疚於中耳是時言路大開是非蠶起如浙江餘姚之案四川東鄉之案誅削譴責無不如言者之意而翻覆過甚亦未能持其平文肅公涖督兩江五年吏治澄清闔境安堵黎民至今思之而後之爲政者鑒於前車泄沓成風釀成不治之證火烈水懦利弊立判公雖失官何足悔哉王

午七月抵戍所其地書院講席適虛奉公主講公爲之購典籍勤講解處憂患之中而不忘勸學之事猶素志也居數月得

旨賜環旋奉發廣東差遣委用之

命李文忠公寓書勛以時事艱難勉圖報稱旋馳抵廣東任善後海防事宜猝得疾卽不起光緒丙戌十二月十二日歿於廣東行館公內行純粹孝於親友於兄弟自奉儉約而樂於施子又以亂後書籍散亡在江南淮南書局籌刊經史廣爲流傳其祕籍精本往往多經手校尤搜輯先德著述壽之梨棗所以述先烈勛後人者用意至爲深遠以學行經濟負海內清望者三十年文正公嘗手書褒奩以爲畏友文肅公更待以師友之間顧公深自韜晦恆惴惴以不克副盛名爲懼出處大節尤皦然不苟有古君子難進易退之風配朱淑人歿後公四年合葬當塗楊家莊之新阡子九人樅恩嘉棊樾均歿恩毓福建上杭縣知縣恩廣直隸存記道槃江蘇候補道鼎棻署江蘇靖湖同知恩苞署浙江甯海縣知縣女二長適潘杰江蘇候補府經歷次適崔逢霖貴州廣順州知州孫男十九人曾孫十三人荃孫久聞偉績敬述銘辭目擊時事之日下而歎我公之不復作也爰序其事而爲之銘銘曰

同治初元雲龍風虎庶政綱綱公生孤寒干將莫邪作生銚湘鄉知
公拔從寒瓊寘之戎行合肥知公反旆北征責以轉饗侯官知公納之
幕府左右劾襄公感知遇忘身趨公所夕不遑江南甫定精徒殃夫百
端擾攘辟以止辟匪矜除暴實以安良閭閻億兆江湖千里枕席梯航
射工巧伺讒夫助之奪職投荒
賜環未久復奉

恩命馳驅粵疆冰天瘴海精力消鑠歸神天闔臣精亡矣臣力竭矣臣
志未償嗚呼臣志夙昔所慕內聖外王

今皇御極功罪罪下燭豪芒

恩旨復官九泉有知感激悚惶官有何榮闈茸以警循良以彰後有式
者視茲貞石青山之傍

續碑傳集卷三十八

續碑傳集卷三十九

江陰繆荃孫纂錄

光緒朝監司六

誥授光祿大夫貴州布政使李公神道碑

王先謙

公姓李氏諱元度字次青一字笏庭自號天岳山樵晚更號超然老人其先出唐太宗三子吳王恪後遷江西建昌石晉天福中再遷湖南平江為縣人曾祖自芳縣學生祖家庚從九品父傳祁府學生母喻氏旌表節孝以公貴三世皆

贈光祿大夫妣皆一品太夫人公生有異稟四歲而父歿稍長讀書過目成誦年十八為諸生食廩餼中式道光癸卯舉人會試報罷遊奉天學政幕

陪都尊藏

列朝實錄公得以仰闕美富通知一代政事又隨使車徧覽關東形勢浩然有得益肆力掌故地理之書旁稽百家載籍才識宏裕大挑選授黔陽教諭咸豐二年粵寇破武昌而東曾文正公國藩奉詔在籍團練公上書數千言隱其名曾公聽之既相見詢知公所為大

驩曰吾固知非子莫辨引與規畫軍事岳州師潰曾公敗於靖港部軍捷於湘潭賊返竄

詔落曾公職戴罪督勦故事革員例不專奏公代草疏請出湖南境後仍專奏以速戎機會公疑焉公力持之得

俞旨奏保知縣加內閣中書銜復武昌克田家鎮加同知銜

賞花翎水師敗於九江曾公入南昌公相從艱危中多所裨助曾公自出師迫不利輒奮卽死皆以公防掇免五年公自請於曾公募平江勇爲一軍破賊蘇官渡會水師克湖口賊酋石達開據撫州瑞臨袁吉諸郡皆爲賊有六年公克東鄉攻撫州累戰皆捷分軍西徇復宜黃崇仁值皖賊來援戰不利退保崇仁七年曾公檄公守貴溪兼控閩浙要隘大捷於鷹潭加知府銜敗石達開眾鉅萬擢知府以道員記名八年石達開竄衢州道出貴溪擊走之分兵解衢圍移防玉山及廣豐常山閩賊犯廣豐襲玉山公廣設方略賊窮竄伏兵邀之大獲江西巡撫疏稱以三千饑疲之卒當悍賊數萬自有戰事未之前聞爲時推重如此先是曾公憂歸爲書勞公曰君當靖港敗後宛轉護持入則歡愉相對出則雪涕鳴憤一不忘也九江敗後特立一軍志在護衛水師保全根本

二不忘也樟鎮敗後我部別無陸軍賴君支持東路隱然巨鎮力挂絕
續之交以待楚援三不忘也至是再起視師遂上公功加按察使銜
賞色爾固楞巴圖魯號胡文忠公林翼疏舉賢才公與沈文肅公葆楨
左文襄公宗棠首列焉十年金陵師潰曾公爲欽差大臣總督兩江檄
公守廣信衢州授浙江溫處道曾公奏調皖南道改防徽州公率新卒
三千以行八月抵徽先數日甯國陷賊酋李侍賢眾十數萬來犯舊防
兵潰環索餉甯防兵踵至大掠公善遣之賊犯績溪叢山關部將童梅
華等往禦賊入關梅華擊走之遇伏歿關遂失賊薄徽城周十八里傾
圮甚公督修三晝夜完三之二而賊至曾公所遣援兵潰公收兵登陴
賊環攻五日北門不守公馳往督戰墮馬暈絕爲親卒負出城遂陷事

聞

上意雖欲罪之然有李元度謀勇兼優人才難得之旨

命曾公察奏曾公疏請褫職逮治而浙撫王壯愨公有齡請公募勇赴
援十一年

命曾公飭赴浙應得罪名仍察辦公歸里募八千人爲安越軍會賊酋
李秀成連陷湖北江南郡縣湖南大震官民固請留守平江六月公自

湖北轉戰而前賊望風潰遁連復通城崇陽蒲圻義甯新昌奉新瑞昌諸城

詔賞還按察使銜再

賞布政使銜前罪應否寬宥

命曾公覈奏九月次衢州浙餉不至稱貸以行敗賊雲溪峽口葉村等處道梗迄不得前十一月杭州陷同治元年李侍賢陷江山公力戰挫其鋒復分軍與左公會擊大破之授浙江鹽運使晉按察使署布政使而曾公以公罪未定遽回籍疏劾褫職留營

命交左公差遣公遂歸尋言官論劾復

命曾公左公察實具奏時金陵已克曾公奏公守徽之役到不十日巨賊猝至兵力未厚前奏逮問本從嚴今大功垂成請量錄用左公奏杭州失陷非公逗留所致惟落職後求去索餉不顧大局

詔遣戍仍留養母貴州教匪嘯聚思南石阡與苗賊應和蔓延楚蜀五年巡撫張公亮基起公專辦教匪公募平勇二千督各軍由銅仁進攻克大小壘八寶關大園子馬鞍營席家山諸堅巢大捷於孟溪解銅仁圍教匪居河西者曰城頭界曰老團曰環岳曰秦家寨曰大堡曰景陽

洞曰牛渡灘曰岳科居河東者曰荆竹園在安化縣北其酋朱明月踞
湄川縣之偏刀水公勅設水師斷東西互援進規河西六年克城頭界
老團環岳諸巢東會席公寶田軍攻荆竹園三道水七年正月克之分
兵克秦家寨走教首劉儀順禽朱明月於覺林寺五月拔偏刀水禽偽
王何繼述田應武老教主王科等以降人內應克大堡景陽洞而牛渡
灘岳科乞降兩年之間勦撫九百餘寨廓清五六百里設屯田局招丁
三千授田二萬餘畝教匪平屯政亦竣

詔復原官授雲南按察使陳情乞養

允之光緒八年母卒服除十一年入都補貴州按察使十三年遷布政
使在黔翦巨惡劾墨吏興蠶桑設礦局前殉賊難者自貴州提督孝順
公以次爲請建十忠祠而卹其後裔宅善政多可紀以九月二十七日
卒於官距其生道光元年八月二十五日年六十七湖南巡撫奏埒祀
曾公祠事蹟宣付國史

詔如所請妻同邑喻氏

封一品夫人妾徐氏吳氏宜人子五積琳花翎三品銜江西候補道積
璠同治癸酉拔貢花翎四品銜兵部員外郎先卒積璿縣學生積璜積

瑄女七適黃錫綬彭樹森沈瑩慶會廣銓郭焯瑩歐陽鈞張壽威孫八
厚荃府學生厚蓀候選道厚英厚葵縣學生厚芬厚萃厚芷厚藩孫女
八曾孫一曾孫女二公性肫篤事母逮老如孺子厚於親族塾有課
有資姻故鄉鄰多待以舉火平江地界三省設局縣城集械編丁以時
訓練寇警迭乘恃以完固立諸善堂及廣仁倉貸不取息勸建平江忠
義祠及葺新諸祠祀必親必慎倡捐江西欠餉二十餘萬請增府縣學
額它軍效之省帑千萬自少以文鳴既老於兵閒聞見開廣益雄於詞
所著有

國朝先正事略六十卷平江縣志五十六卷平江十三君子事略二卷
十忠祠紀略二卷南岳志二十六卷天岳山館文鈔六十卷未刊者四
書廣義六十四卷

國朝彤史略十卷名賢遺事錄二卷

國朝先正文略二百卷求實用齋叢書若干卷安貧錄四卷古文話六
十四卷天岳山館詩集十二卷文續集若干卷四六文二卷以光緒十
九年四月葬縣南水南里丑首未趾積琳等泣請文其墓道之碑先謙
少公二十年自公貴州軍營歸里始相識一日過先謙書齋見所爲明

大學士史可法補傳誦之再曰君有班范之才幸努力由是以文字相知好意氣許與至今不忘銘曰
公之文章足以潤色廟堂而不操史筆才猷足以參贊密勿而滯於外官武略足以取侯封而蹶於任事之勇忠誠足以信朋友而不免同心之責言固瑕釁之有開亦時命之適然彼古人致歎數奇兮如公者猶可自慰於九原

山東候補道施君墓志銘

楊峴

君姓施氏諱補華字均甫湖州烏程縣人王父某父某以君貴贈如其官君早失怙勤讀書經史百家動窮窾郤甫冠入郡庠雖甚貧而負氣不下人咸豐庚辛間粵賊陷蘇常杭嘉等郡攻撲湖州趙忠節督民團禦賊招人局計事君上納糧章程謂賊勢大藉第築長圍絕餉道則一城皆飢矣忠節不聽卒糧盡失守君丁母憂服滿中同治庚午鄉試一再赴公車報罷楊中丞昌濬撫浙憐君落拓使謁左文襄於關隴當其時文襄開幕府網羅天下英俊得君諸賢皆出君下乃大喜軍事一以相關駐肅州出奇規復南北各城功最以同知留甘
賞孔雀翎調赴嵩武軍抵吐魯番巡檢楊某方以他罪發覺聞君來懼

案問自經某蓋楊中丞族子弟也有忌君者譖於文襄疑君恫喝薄舉將疏劾以府經縣丞降補既抵阿克蘇張勤果行營勤果親禮之南路攻剿皆斷於君五戰五勝進駐喀什噶兒以功復原官翎枝擢知府加鹽運使銜會俄羅斯有畫界之議君跋涉冰山雪嶺凡犬牙相錯之處據圖與俄爭俄無所施其詐拓地八百餘里奉

旨以道員仍歸原省用加二品銜法蘭西犯閩燒殘萬民驚駭城郭君大憤將入都有所建白聞張勤果拜撫東之

命疏請君總理營務折赴濟南馳書李肅毅伯敘法事數千言後皆如所料光緒庚寅春引覲奉

旨以道員改發山東儘先補用閏二月病作醫不得其要遽卒年五十有五憶三十年前偕君登杭州之吳山東望錢塘江波濤掀起如萬騎奔驟忽大聲曰錢鏐射潮豎子耳吾曹當射天狼甯潮為之哉烏虜君

之志大矣然而不竟其用孔子曰有命是耶非耶君著作已刻者澤雅堂詩六卷古文八卷未刻者詩續集若干卷配某氏子二彥詒彥振以

某年月日葬君於某原銘曰

一蹶一起而位止此也若跛夫疾步曾不逾咫也孰播弄之莫知其以

也雖然不可恃而可恃者晉於君必豐於其子也

貴州布政使王君墓志銘

王閻運

君諱德榜字朗卿江華黃竹柴人其先廣東東莞王氏祖達敷始遷嶺北父諱燦羨母謝氏三代均以君官二品立功

特賞一品封咸豐初嶺外盜起蔓延永桂所在團練君兄吉昌最有名曾侍郎治兵衡州遣平甯遠道州土寇君年十六從兄跳盪巡無駱公知其材及大援江西兵餉並匱率偏旅備資糧合會部圍寇奉新吉昌追奔深入摧鋒遽殞代領兄眾遂留江西從克瑞州豐城身被七創出境援浙收衢五縣時曾公引退軍政無綱君官五品例難獨將因用助餉議敘擢躋道員俾騁高遠抗衡列將玉山衝要遂專防守危城屹屹寇來如牆踐雪乘堙拒戰九日兵食俱困智勇沛然乃躬率帳前夜焚寇壘寇帥李秀成即曾公所憚也三戰三合卒遯廣豐奏功

賞花翎加按察使銜逮蘇杭竝陷曾左斂軍唯倚鄙東以通餉緡羣盜洵洵志圖衢信孤軍屯距經三百日六被長圍曾無蟻援寇竭其力我不告勞

詔賞勇號部從優敘而逋餉巨萬軍士散亡自劾免官釋兵待罪浙撫

左公方因龍游奏以自副軍寵未黔堅城立破具奏復官留浙自後驂
靳高蔣號爲三軍奔命五年周旋閩越凡五得奇捷十復名城再被重
創功名赫奕然左公咄嗟使人患其躡直急則優假緩則厭之初調赴
閩奏署按察使軍中受印年二十九既遷布政復從援越左公自擅圖
學習講方輿每按地圖遙授節度嘉應合圍汪海洋兼行突進圖相影
響君與劉典竝遏黃沙左公令屯江口周履形勢枯瘠偏荒路絕行人
乾灘死水改用便宜移屯北溪甫至而右屯已潰海洋督其勁黨漫山
鶩隴龍旂數百衝鋒電掣君曰必死可虜此易禽也張翼避之伏槍叢
集海洋踣死餘醜遽降投兵殉跪俘四萬眾寇平加號達冲阿
賞黃馬鞋左公知兵事已定恥絳灌無文諷令乞歸遂請終養及西師
大起復奏自隨總統甘南定遠諸軍受降十萬眾

賞頭品冠帶母病告歸終喪三年君孝性純至忠以移天幸值投閒兩
還侍養會胡並有奪情之痛唯君無憾焉左公內召宿將竝從受命教
練京營再督所部治涿及永定河隄
特詔勞勉而時將偃伯朝論右文舊日臺司屈於巧宦醇賢親王博求
英武獨惜其歸託之撫浙縻以差委旋議援交趾遣將十營且署廣西

提督自誓死綏固辭新命客將崎嶇要荒狼狽扼關助戰大捷諒山廷
議罷兵復從初服卽家拜貴州布政使自藩閩至是三十年矣岳牧之
班邈無同輩黔撫潘公當君顯時昉官州倅及將交替越次授印按察
司君夷然自抑在僚如屬勤於職事必持大體婺川普安民苗私鬥按
兵遣諭威信允孚然積苦兵閒重創十數南征感瘴舊疹彌增光緒十
有九年二月十二日卒官年五十有七巡撫崧蕃公問疾唯以島夷窺
伺爲慮故奏稱平居衡論期於破敵勤清忠毅足爲砥柱有
詔優贈官

子祭葬以明年某月某日歸葬零陵禮也君通籍卅年在官一考位隆
祿嗇論者同悲軍獲之貲悉推贍學於永州勸建書院直輦萬金畿輔
水灾出祭租千金助振疆臣特奏坊表再旌豁落樸誠亮爲楨榦膚功
易著抑志誰甄爰刻幽珉將爲史補銘曰

鵬巖負海代鍾英挺昔哀賜劒今功銘鼎琅琊世貴祥覽雙名洄溪卜
宅三世昌卿鎮惡童奇荀都早達舍之則藏功而不伐羽林典午貴筑
編丁人驚宿將自吒新劓安不償勞脂不自潤沒視巖疆盱衡國豐龍
淵始化鼇柱忽移湘淮灰滅將相星馳巨筏偃然鏗鐘不號何功何名

孰咷孰笑青松覆壟大樹搖風永蕤奇氣屈作長虹

貴州布政使唐君墓志銘

俞樾

君諱樹森字穀九湖南湘鄉人姓唐氏曾祖志本祖方燮父壽皆以君貴累

贈至一品君少孤母陳夫人授之書弱冠入縣學旋補餼廩額文名甚著而十試省闈不售君澹於仕進亦不以措意因自號曰澹吾以時方多故留意經世之學又勇以爲義如修葺學宮整理義渡振濟窮黎皆力任之至於建宗祠修族譜更不待論矣一時宗族交游翕然推服咸同閒駱文忠左文襄諸公方治軍擊賊危疑之事必諮於君同治六年君以事至京師都下諸鉅公皆奇君才縱與之曰君可仕矣其明年遂以道員候闕於浙江時適有繞城石塘之役浙撫馬端敏公卽以屬君塘成端敏善之及端敏督兩江而君以內艱去浙端敏遂留君金陵使筦淮鹽局君崇寬大蠲煩苛務在恤商力以培元氣商民感之服闋還浙時楊石泉制府撫浙素知君才省中諸大政若保甲若軍需若營務若振務悉使與其事浙西各屬皆有客民土客不相得則聚而鬩君履行其地或藥散之或剪薙之浙西賴以無事台之屬有曰桐樹山者奸

究之淵藪也君名捕其魁尸諸市浙東亦安大吏上其功

賜戴孔雀翎君仕浙久權溫處道者一權鹽運使者一權糧儲道者一
權按察使者四其巡溫處也以海防爲方今要務於溫州台州定海鎮
海各礮臺皆親往相度圯者修之未得地勢者移之孤峙海外者增建
之又以其地盜賊充斥尤嚴治盜翦猾禽姦不留萌蘖其總漕政也以
餘帑曬鹽天地美利稽覈版數以杜其私又嚴巡緝之令設立官局銷
售私鹽化私爲官私販以絕其督糧運也凡大戶之包攬小戶之詭寄
不肖生監之把持書差胥吏之勒索釐剔務盡其權臬事也每治一獄
必得其情前後結宿獄數百起有累十餘年不決者片言以折之無不
懾伏光緒五年補授金衢嚴道下車之始卽以士習民風爲首務禁奇
衰之敝俗化土客之私見東陽之民有私結盟會潛謀不軌者一郡大
聳君示以鎮靜陰爲部署亂民知君有備亦遂不作時議清丈山田大
衢山有金姓者恃其疆梁抗不遵丈脅畧戶距傷官兵君怒嚴緝之凶
頑伏法良善用勸十八年春

詔授君貴州按察使時君權浙臬甫受代而

命下浙之人喜君之遷惜君之去士大夫咸餞君於西湖道旁觀者皆

歎息曰髯公去矣蓋公多髯嘗自號髯叟故人亦以此稱君也黔本荒服獠獠狁狁之所居而川楚粵三省之民每攜妻子來黔租種苗田於是苗民與客民爭而苗與苗亦自爭君既至悉心體訪客民侵佔苗田治如律苗人誣控平民亦治如律苗民條糧向由土司轉解以土司多浮收改歸官徵而苗頑又不以時納仍責土司墊繳其事糾繚益難治君稔知之及攝藩司力革土司科派之弊又重治苗民抗糧之罪苗民畏之德之無敢抗者苗有鬼師苗民之不率皆其煽誘又俗尚跳歌淫蕩無恥君皆痛絕之貴陽城東有龍岡書院明文成公講學地也君延名師主講席又廣設義學令守令召苗童入塾有背誦五經者優獎之自是苗民皆知向學矣普安土寇聚眾為亂君不動聲色禽其大豪曰劉燕飛脅從皆散四境帖然二十年逢

慈聖六旬萬壽奉

旨來京祝

暇維時君長子贊袞以臺南府知府奏派入都布置

蹕路景物先是君之拜黔臬也贊袞方攝臺灣道兼按察使而君弟斐叔亦陳臬於秦中一門三臬使海內榮之至是父子同遇盛典相繼入

都人尤以爲榮遇君與同列十六人獻壽於北海

瀛秀園預廷臣之宴

賞賚優渥既還黔次年卽拜黔藩之命

詔免入覲君先會再攝黔藩熟其利弊裁糜費覈浮銷課額賦之盈虛
察僚屬之賢否積米穀以待凶荒治津梁以利行旅繕城郭以備不虞
下至恤殘育嬰諸善政無不畢舉黔民戴君與浙無異然君年逾七十
視在浙時精力固有閒矣自京師航海南回由滬而湘而黔水陸數千
里而體日以孱是年冬飲食驟減痰嗽大作遂於光緒二十一年十二
月壬午卒於官年七十有三君外和內介平易近人而意所不可終不
可奪自妻胡夫人卒旁無姬侍一室蕭然服用儉樸而性好施與賙人
之急拯人之危養無所怙恃之孤葬不能舉之喪不可以數計久亦忘
其姓名暇則以詩歌自娛敏於詞翰公牘私函手自裁答彭剛直公養
疴西湖時相過從觴詠流連余亦常預斯會往年君七十生日余曾以
文壽之君自京師還至滬猶手書寄余蘇州吾浙之人方冀君重來開
府而不意其已作古人也娶胡夫人生文夫子四濟楫濟梓皆殤贊彝
江蘇候補知縣補用直隸州贊哀同治十二年舉人福建補用道前臺

南府知府署臺灣道兼按察使女子子二長適浙江孝豐縣知縣蔡陵
譚恩敵次殤孫五植元植漕植遠植運植蓬孫女十君之喪自黔還湘
沿途士庶扶老攜幼跪送者不絕有奉鏡一面水一盂爲奠者足見君
之有惠政於黔也光緒二十二年九月丙午贊彝等葬君於孔溲塘之
莊山以余素習於君具狀乞銘銘曰

君仕浙久浙人所思曰我髯公愛之敬之去而仕黔位躋藩臬君之仕
黔亦猶仕浙至今兩地皆不能忘吏守繩墨民頌循良我以部民銘君
之墓千載而下式此宰樹

贈太子少保江西布政使陳公墓志銘

王先謙

公諱湜字舫仙姓陳氏先世有諱珩者於明成化間自江西泰和遷湖
南湘鄉一都之常樂鄉遂爲其縣人曾祖大田祖德棻俱太學生父開
煦貢生候選教諭三世以公貴

贈光祿大夫曾祖母丁祖母左母杜皆一品太夫人公少蘊奇氣以幹
略自負旣婁困場屋無所發攄咸豐六年曾文正公國藩勦粵寇江西
其弟忠襄公國荃帥師往援要公襄理戎務從下安福萬安進圍吉安
文正兄弟奔喪返里公代領忠襄軍丁父憂歸蔣果敏公益澧帥師援

粵西強公借屬以新中營攻平樂府一戰復之賊趨桂林公率四營還之大灣車埠村焚大壘二悉破其餘壘逐北卅里剗蘇橋賊巢平磯石灣土賊從攻柳州焚奪潯州援賊船於三河口遂克府城病假歸九年賊酋石達開竄湖南圍寶慶號六十萬大府檄公會諸將赴援公宣言曰賊盛不啻倍蓰壘相偏將長圍困我今南閉不通更斷東道禍敗立至宜急重兵扼山峽深溝峻垣與城下軍相首尾通饋餽戰且守以待援萬全計也眾不從賊圍合公大小之戰八十餘迭勝負會湖北援軍至夾擊走達開文正圍賊安慶速公往總營務公規地形策冬令湖涸宜先竭樅陽口蓄水則援賊唯道集賢關便扼擊忠襄從之遂復安慶自是獨領一軍會克無爲州運漕鎮東關銅陵開巢縣含山雍家鎮裕溪口西梁山諸城隘丁母憂歸再赴營從圍金陵建議先併力九洑洲斷賊江北接濟賊酋李秀成來援破其數十萬眾城圍合公將西路軍克江東橋印子山七寶橋紫金山諸隘金陵破公入自旱西門遇李秀成率死黨走出急擊之秀成匿民舍爲官軍搜禽先是公以功由主簿積保至道員

賞花翎巴圖魯正一品封典至是

命以按察使記名同治四年授陝西按察使調山西兼辦防務汾晉狎

承平官吏宴娛捻寇入秦公請於巡撫益兵儲饟得

命旨同僚積忌齟齬甚公孤立束手議自戕柱而上增練水軍吉州鄉

甯冬冰可徑渡宜河壩築礮設險眾尼不行五年捻酋張總愚謀渡渭

公令水軍泝河入渭焚三河口浮橋上下周防自督朝邑民團嚴備渭

北賊不得逞秦撫以聞

上嘉其奮勉六年賊由渭上游涉淺傍河疾趨乘吉州凍合關入山西

事

聞部議奪職忌者續劾

命遣戍仍留任督防時回捻交蹤窺覷未已公分兵防東自守西河卒

就前議起龍門抵壺口三百里量山口闊狹作城堡使寇不得入鳩工

於軍取材於山袤八千餘丈半歲而畢河冰復合公謂諸將曰守足恃

可戰矣出奇掩擊賊襲創走捻寇平

命赴甘肅隨征左文襄公宗棠委總營務平金積堡

詔復官統諸軍規河州營是時連喪領將軍情少沮公與文襄密畫機

宜隱若符契賊窺運道一戰破之乘勝再厲回勢以蹙受其酋馬占鰲

降申定約束責獻馬械誅尤不馴者數十人弭耳崩角罔敢枝柱梟狼
革心版圖來歸出眾不意咸大驚伏馬桂源本源兄弟以撒拉教主據
西甯受職官持兩端攝兵威走巴燕戎格公請於文襄簡精銳自番地
閒道踔數百里陟降山谷踐歷冰雪距城廿里所賊覺而駭悉兵迎戰
公令於眾曰前有強寇後無歸途不破賊無生矣大呼競進三合三勝
桂源本源遁公善視其孥迺因占鰲乞降公以計傳致蘭州論如律撫
定其徒黨東渡河降循化廳內八工平堡寨千修城建官立約二十條
皆敬信奉行關內將清公復假歸光緒九年

命入覲發江南交忠襄委用奏派總統諸軍兼理海防營務因事被議
回籍十二年

命繪像

紫光閣十六年再被

命入都仍發江南補江蘇按察使二十年倭事起

詔北上尋率卒五千援遼二十一年正月駐軍大高嶺左之甜水站坎
徑乘隘倭來伺攻迭擊之老君堂八會寨牛嶺九溝峪柳林子多所斬
獲時遼瀋諸軍大集皆蓄縮自保唯公婁挫狂寇往返援應沛若有餘

眾倚爲固嶺防鞏完陪都弗驚羣議侈張公不有功七月和議成
命西勦甘肅叛回擢江西布政使改駐山海關專辦湘軍操防事宜以

湖南振捐

賞加頭品頂戴二十二年四月卒於軍距其生道光十一年十二月年
六十六事聞

賜卹如例

贈太子少保事蹟付史館廕一子入監讀書原籍及立功省分建祠公
長身高額威重內蓄臨戰陣意氣飄發不測若神怪善審敵情覘形勢
遇艱險沈幾默斷應時立赴卒善自全自湘軍名天下後進多躋高位
公聲績出諸老將上仕久不進眾每語及公必相詫曰

國家有軍旅事非陳某不任天殆留異日大用地不則胡然始政於晉
軍書之暇雜治案牘必有雪理豪勢無奪逮晚治吳專精竭誠積以歲
年多可紀述於是競美公豐於吏才不竟其用尤足惜云夫人氏潘繼
娶氏夏妾氏張胡葛子五善二品頂戴安徽候補道仁五品銜訓導潘
出翼棟員外郎銜中書科中書翼梁太學生早卒夏出翼爵胡出女適
李歐陽黃季字張孫道亨優廩生道恆附生道穆道愈太學生道頤道

履道節道復曾孫傳燧二十三年五月善等葬公湘潭上十七都瓦子坪首申趾寅泣以銘請辭曰

公之績書太常公之政炳刑章公之軍張吾湘公之澤滂

帝鄉名雖高抑不揚施弗鴻民有望惟明德永馨香臧旣堅後必昌

贈內閣學士山東登萊青兵備道劉公墓碑

馬其昶

劉公諱含芳字薌林池州貴池人也曾祖駕夫祖兆父孝樟連世種德各以孫子貴顯

贈如其官公少孤從從兄瑞芬受學同治初今相國合肥李公始誓師上海公兄弟實從其後瑞芬以諸生積勳伐至廣東巡撫而公終始依李公初隨征蘇常湖州輪轉軍械設局太倉無錫北征捻逆移局清江蔣霸張秋濟南敘功至道員加二品銜李公督直隸兼北洋大臣而公遂治軍械天津光緒九年統魚雷營屯旅順嘗一攝津海關道數月自請還屯十七年授甘肅安肅道李公奏留旅順十八年補山東登萊青道逾年乃到官自海禁開泰西諸國以疆武相尙械器日新不窮李公初資外國火器平寇暨棟國管北洋乃盡革變用西國軍制自是言兵事者尤以購器練技爲急公識性明達於事無所不諳練又主軍械

久攷別良楛窮覽冥會曲得理解每一新械出外國語文轆轤公對客
稱舉應聲而得議建武庫於西沽廣收博儲以肄將士益增廠造子彈
不假外購法越之役竟以濟師李公既興立海軍築礮壘設船塢備鐵
艦通電綫置魚雷開醫院起學堂造士多由公本謀於是威海旅順大
連灣三口屹爲北海雄鎮工役浩穰一領於公又兼海軍及緣海水陸
營務處調護諸將綏輯華夷專一趨公不顧徇流俗俯仰人初或不便
久乃大服終李公之在直隸倚公治辦若左右手留天津十四年屯旅
順十一年後雖之任山左猶隸於北洋北洋軍器精防守完堅冠諸行
省及甲午倭韓之難作李公不得志內召而公亦遂去位當東事初起
李公持慎不肯開兵端絳禍強鄰朝議大譁日夜責問戰狀事益不可
爲威海旅順相繼失敵據甯海州城前鋒距煙臺道署十三里時山東
巡撫亦駐師煙臺西國諸領事以巡撫在則倭攻之急於租地不便巡
撫退萊州領事復言公公曰巡撫大臣可去某守土吏去何之今死此
矣因置鳩兩盃與夫人郝氏日服公服坐待意氣堅定民恃公無恐有
潰卒數千操兵噪譁求食勢將鬪公疾馳至皆斂手聽約束厚給遣散
破數萬金盡取之囊橐西國民商在租地者聞潰卒至咸戒備旣去數

日乃覺則大驚服相謂曰使中國主兵皆鄧世昌守土皆劉公若者卽何憂倭乎鄧世昌者起水師學堂領致遠鐵甲以偏師拒倭戰死大東溝人謂其才足當海軍大將者也威海旅順旣淪陷而煙臺孤懸獨完和議成大臣奏遣公渡海勘收日本還地始威旅大連灣皆荒島公瘁心力營構十餘年成嶮塞錮京畿門戶至是皆煨燼因憤慨流涕未幾以疾自劾歸歸數年卒李公謀國誠宏遠有大略其所嘗識拔而躋之顯列者亦誠多才傑然而如公等比者乃人尤謂其能不負李公云悼持世之乏才懼國論之不審懲前失將不爲後圖國何以自立此有心者於公之喪不能不深曠愴怛而致私憂於無極者也公以光緒二十四年四月二十八日卒年五十八

詔贈內閣學士廕一子知縣事蹟付史館立傳子三人世珍世瓊世璘長女適候選道建德周學熙次適內閣中書太倉顧思義幼未字以是年冬十一月乙丑葬於青陽縣潼梓湖側公娶俞夫人早逝再娶郝夫人能承助公賢疏戚詠仰後公一年卒筵室黃氏李氏其葬也兩夫人皆耐旣葬學熙以狀授其昶請銘其墓道之碑維公義俠天稟篤於故舊修池州孔子廟又平九華山徑告歸三年不自逸其卒以料簡義田

絕於村舍然公之所勤於國者大矣大者壞於既成則雖立於身造於
有家必非賢者愉快事也嗚乎悲夫今不書以達公志遂爲銘銘曰
天險大鎗有驕窺堂巧勇鬪進儒則爲尪孰持世變黜闇開鑿彼懵不
知方厲其愕公佐功成公肩其艱雖艱厥成棄等一營厲生有階公曰
子恥憤不居位福此閭里人所矜有在公則餘我銘以質來者式諸

劉閣學別傳

朱孔彰

劉君盛藻字子務安徽合肥人弱年讀書有智慮家貧授徒劉壯肅公
銘傳其弟子也同治紀元偕銘傳至江蘇治軍嚴明有恩惠分帶銘字
左軍克南匯奉賢川沙金山衛等城擊破虹橋四江口賊眾二年四月
攻場舍破偽護王陳坤書十數萬援賊旋克江陰無錫兩縣四年克常
州積功擢道員加按察使銜後偕銘傳平東捻西捻無役不從

賞法克精阿巴圖魯名號題奏按察使臨事而懼好謀而成有儒將之
風七年直隸肅清銘傳乞假回籍君代統其眾駐山東張秋鎮訓練有
法軍民安堵明年直隸總督曾文正公奏派總統銘軍九月天津民夷
滋事調駐滄州拱衛畿輔師行以律畊市無驚旋解兵柄陳情歸養十
年銘傳督師乾州請疾

朝旨以曹克忠接統銘字武毅全軍曹克忠者爲將軍多隆阿舊部名將十一年武毅右營勇丁譚潰直隸總督李文忠公奏調君赴陝接統威惠廉明軍士翕服由是隱患潛消邊防鞏固丁父憂回籍營葬奪情復治軍光緒五年十月

簡放大順廣道修築長垣東明隄工甚固並立章程以垂久遠九年署直隸按察使辦秋審四百餘起平反頗多旋補授浙江按察使以疾卒官年五十有六浙江巡撫劉公秉璋與大學士李文忠公會奏君生平事蹟宣付史館立傳並從優議卹奉

旨追贈內閣學士銜十四年二月蒙

恩賜祭子二朝驥分部郎中朝班附貢生刑部湖廣司主事孫七人曾孫六人元孫二人君篤於族誼嘗與壯肅公捐萬金置田贍族在官每節省俸金以周族戚之貧寒者今夫人趙氏年七十四歲親見七葉咸謂君生平多陰德之報也

廣西布政使護理巡撫康公墓志銘

馮煦

公諱國器初名以泰字交修友之其號也宋末有曰建元者繇南雄遷南海遂爲南海人曾祖元猷祖輝父敏昌竝潛德不耀以公貴

贈如其官公少孤貧習吏以養母而識量閑遠洞於當世之務尤好兵
家言道光二十七年以勞授贛州桂源司巡檢咸豐三年粵賊走南昌
土賊黃刺離何盛發應之眾數萬陷萬安去桂源不一舍公募敢死士
三百禦賊賊相戒毋犯桂源贛南道周玉衡檄公攻烏兜賊夜襲我公
逃百人潛焚其巢而提二百人閒行要擊之乘勝攻良口怒馬斫陣所
向披靡斬獲三千餘尸山積會雨甚贛水溢戶蔽而下南昌賊震怖解
圍去遂克萬安公之能軍始此矣烏兜良口者介贛萬安賊所窟宅也
四年調樂安之招攜從贛州府耆齡軍防饒州造扒船三十艘習水戰
初我無水師曾文正創之於湖湘卒以破賊世亶高文正功而不知公
實與相應也五年軍童子渡都昌賊伏章田誘公公亦伏以待之賊不
得逞走響水灘敗我平江軍之援饒者饒遂陷公與都司畢金科還攻
饒金科主陸公主水水師先登復之拜藍翎之

賜且署南城知縣時石達開陷瑞撫臨吉四府江右震驚曾文正檄公
隸劉于潯軍從拔樟樹鎮我軍復張七年蹙瑞州剗臨江

賞換孔雀翎公子熊飛自粵來省公公委以兵熊飛沈毅有謀且善戰
常爲前鋒八年剗鉛山披安仁十年逐達開於樂安梁柱練四虎粵之

劇賊也踞英陽之藍山山阻絕數百里數爲抄暴廣東巡撫耆齡檄公
勦之公道翁乳萬山中緣崖絕磳出賊後四月次水口復次風流洞賊
樹石爲柵者九道險不得進公兄國禧夜登之師畢登又破之於竹木
白鷗二浪經白竹山縣繩上斂其礮臺賊氣沮熊飛單騎入四虎巢說
之酣飲縱臥者累日降其黨萬人六月梁柱走豬頭寨險且逾白竹舍
騎而徒閒不容趾公穴後山而陽攻其前石穿火發盡殲焉是役也賊
悍且眾負險幾十年公以二千人三月而平之擢知府並加道銜同治
元年公援浙二年正月克湯溪三年二月克餘杭加按察使銜七月遷
延建邵道始奏統一軍汪海洋竄新城公請於巡撫徐勤惠曰賊在撫
建毘錯閩疆宜輦光澤以固崇安邵武拊建甯以應泰甯歸化而後師
出邵崇諸關因勦爲防否則賊窮而東走閩其敝矣勤惠不能用海洋
果窺閩陷武平永平李世賢又陷漳龍巖與海洋合其旁郡縣皆沒於
賊左文襄三道來援公請於文襄曰龍巖控汀漳四戰之地也我先發
而中斷之進規南靖龍溪得建甯之勢則武永自下矣文襄乃以龍巖
屬公十一月公趨雁石熊飛壁鐵石洋三戰三克遂薄其城賊亦以二
萬人薄我前夷而後踵持至午賊少少疲熊飛出精騎突之始靡復拊

我鐵石洋背公又張疑兵走之四年二月古田賊萬人來援公設伏東
賣山而使賴長陽爲將攻者賊傾城出遇伏者奔夜焚其礮臺馘守者
五百人吳光亮入其東門熊飛繼之遂克龍巖三月賊走永定之苦竹
奎洋其地通大埔漳嘉應連營百里勢復熾劉光祿典攻奎洋而公攻
苦竹熊飛破賊於大坪於陳東坑吳光亮破賊於磔下於苦通劉光祿
亦破奎洋諸軍會苦竹夜大霧公使健卒百人火賊營吳光亮潛師繼
進賊大崩二十餘壘皆下熊飛遇海洋於東坑幾獲之賊棄苦竹走大
溪又敗之大埔之三角塘海洋復走永定環總兵王聞琳軍橋羅灘壘
平水坑遮援師公馳至燬其橋賊背山爲陣盪決數十賊奔逐之山半
賊反鬪以騎蹙之賊隱叢樹閒下石如雨山之左右皆伏公張兩翼應
之賊投崖谷死者無算海洋復陣於獅龍嶺衛者萬人衣五色衣張
旂蓋蔓閣坑筆架山公氣益厲曰賊之精銳萃於獅龍若先摧之其眾
必奔我堅壁示之弱俟怠而擊必獲濟焉白衣賊前搏我朱衣黃衣繼
之殊死鬪公使馮南斌燔閣坑吳光亮掩筆架山賴長扼河橋三道並
馳上卒騰踊呼聲動天地賊披壞盡收其軍實海洋跳永定始解嚴加
布政使銜時漳州亦下李世賢挾眾而西遇公於塔下公降其眾二萬

餘世賢僅以身免海洋之走也五月復陷鎮平世賢餘孽附焉將入粵
公議以粵師出新鋪閩師出高思六月公壁高思以一軍屯程官爲掎
角七月熊飛吳光亮衷賊於龍潭敗之又敗之藍坊高拱橋賊兩道來
援並卻之海洋將龔高思僞爲攻程官者公戒程官不與戰而伏精卒
於石灰岡烏泥坪兩山間海洋使他賊綴我程官軍而自率黃十四汪
大力二萬餘襲高思入兩山間伏軍起擡鎗發斃汪大力骸巨如五
斗瓠黃十四亦夷右股汪黃賊之梟也文襄謂爲入粵戰功第一十二
月東南平公三世並進二品封六年擢福建按察使八年遷廣西布政
使護理巡撫半歲十年有內召之
命公亦以疾歸矣歸十有三年法蘭西撓我安南文襄復起公籌南征
之饜邊事棘公憤不能食遂卒光緒十年八月二十三日也年七十有
四公治軍十餘年轉戰江浙閩粵諸行省習古陣法尤精擡鎗能以少
擊眾馭士不尙威嚴得
上賞賚與收之賊者悉畀士故士樂爲用受降逾十萬推誠與之健者
使隸帳下戴之如其周親石達開汪海洋賊中號驍桀推堅城覆大師
數矣公得其款繁戰無不克聞康拐子軍至輒走先是公禽鹽梟礮穿

足遂跋故曰康拐子云所識拔皆名將吳光亮馮南斌賴長其尤也公
子熊飛尤得公兵法而神明之積功至浙江候補道先公卒以兄子達
讓嗣某年月日達讓葬公於某原公內行竺至服官多循績爲士大夫

所恆有今不著著其終始軍事者藏於幽庶來者鏡焉銘曰

牛女之墟川蟠林潛竺生瑰奇六弢金版深識遠覽亦著赭寇之
東奮起一尉虎螭其師天戈所指何銳不靡何堅不摧鷹揚豫章暨閩
百越實奠南維島夷干盟窺交覲廣勞我鞭笞師出於東資糧屨屨公
實尸之晝規夜畫騰馬飽士其身則危卷卷憂國之死靡忒語不及私
浩氣太虛丹心千古三誦是詩忠誼激發無識不識巷踊衢洩上諱三
辰下風有位眎此銘辭

二品銜湖南按察使桂公墓志銘

馮煦

光緒十有三年冬十月徐州知府桂公還危疾且革矣徐之民填衢溢
閭走相告若急其私親爲文禱於神靳減算以益公會者凡千百人公
疾以瘳後八年遷湖南岳常澧兵備道徐之民留公不得迺建祠勒象
於城東快哉亭以祀之與宋蘇軾氏比又二年春三月公薨於湖南按
察使位赴至徐徐之民填衢溢閭走相弔若喪其私親爲位於前勒象

所拜且哭會者亦千百人彌月不絕於戲公之得此於徐豈無致而然邪其所治他郡縣不於徐迹之邪公諱中行字履真江西臨川人曾祖某祖某父某並潛德不耀以公貴

贈榮祿大夫曾祖妣氏某祖妣氏某妣氏某並

贈夫人先世賈於黔占籍鎮遠補博士弟子員旋食廩餼時翁文勤公同書督黔學目爲儁才咸豐六年黔苗鴟張公奔諸生以縣丞從文勤定遠軍多所規畫文勤倚之以勞擢知縣戴孔雀翎凡撮合肥蒙城阜陽三縣合肥新列於兵民與豺虎雜居護城王金榜尤驚公削平之公私亦立或日旰不食材官卒伍復嘯呼於門以斃公公疑然自若也蒙城揔所藪圩小大且數百曾文正公國藩檄公其善敗公一騎一伍規數百圩而董戒之小圩宮大圩圩樹之長正副各一人禾菽果蔬牛豬鴨鷄一內之圩揔來則守去則耕揔無所掠相戒毋犯蒙公與蒙更始民而揔者馘之揔而民者宅之謳歌訟獄唯公之歸得一言戴如衮鉞文正嘉之再遷至知府會馬端敏公新貽督兩江奏調公江蘇榷揚州正陽釐纖芥不自汙光緒紀元署徐州事至立斷廉明有威徐之戴公始此矣甫十日宅王母憂三年宣城建平民教閱堂之燬者十數沈

文肅公葆楨彊起公凡民教之獄率袒西而鉏中獨公執正以爭教士
百計恫喝不少動卒如公議論者謂南北洋之治民教者以是獄爲平
公亦進秩比道員又宅母憂今福州將軍裕祿撫安徽以皖南墾務畀
公初皖南數被寇田蕪不治荆豫之民隱占之賦不輸官官困田不歸
主民亦困主客相尋勢張甚公治賦始宣城有撓公者立寘於理萬目
睽睽誓公之勇田賦九等蔓如勢絲公目營手披條理秩秩如是者三
年將軍嘗謂公曰若年不五十髯盡雪宣城歲益數萬金然若心力單
矣九年再知徐州凡十二年始去徐其閒署淮安不一歲調蘇州未赴
也官岳常澧道亦數月遷廣西按察使北
觀歸調湖南所至有聲績於徐尤久且深爲治不務苛細而精敏持大
體凡所興革唯民是依不以己不以長官尤慎於折獄中有疑義人謀
鬼謀必得其情而後卽安農厲於畦士劬於塾商旅塞於廛三事大夫
以治平上者凡七或傳公政術相師法徐之民亦謂上下百年閒守徐
者以百數愛民之誠措事之宜未有若公者也號之曰青天青天云於
戲公之得此於徐信非無致而然其所治他郡縣亦於徐迹之矣公性
至孝與弟中純誼尤摯公在徐中純牧宿州輿蓋相望並著循績世尤

豔之廣穎方頤髯垂垂尺許神識閑定無崖岸斬絕之行而是非瑩然不欺其志與人寬和簡靖下吏走卒皆資以爲用一言之善虛己以聽之至有所執持雖勢要不毫髮阿然唯變所適亦不膠一以繩萬卽有剛愎譎張世號難近者久與公習莫不冰釋理解驩然交推而謹愿爲眾所擠排者益得憑公以自固於戲器識如公足以荷天下之重惜乎其止於是也幼嗜學老而益篤無劇易夷險未嘗一日廢書善八分得孔胄遺意尤能畫蘭時以比二鄭焉廉取而博施爲吏三十年自牧令而監司無一壠之植其沒也幾無以爲斂陳文寶箴撫湖南敦同列助之始克以其喪歸可謂難矣公生道光十三年十月距卒之歲六十有五再娶於金並

封夫人子三劼國子監生先公一月卒劼勸女六人吳某蔣某董某張某與兒子如京其婿也一未字某年月日劼奉公葬於某鄉某原禮也子四十以後之交莫親於公又申之以昏姻息壤之盟忽忽如昨而公遽沒矣敢次公行義以風有位復舉生平相知之雅系之銘以抒予悲銘曰

我初識公壽星之維公守彭城我亦客斯講肄清暇從公遊娶雲龍峩

我獨鶴無歸黃葉藉地猶壞色衣唯我與公別蘇捫碑有荷有蒲東澤
之陂有亭翼然長公之遺唯我與公飲酒賦詩上下論議亦寓亦后道
義莘莘切磨箴規况而下之文藝書碁曾不一語剗誠售欺我朝過公
日昃之離我莫過公夜如何其公之過我正復似之臧獲匿笑竇萌然
疑而我與公不知何誰我賦北征靡日不思我自濠公又南移參商
燕勞離次背飛投書在篋高尺有奇公數詔我偕隱淮垂遺弃參徽黃
農是師何圖一昔焱流電馳百年之好千里之期我獨何為拙宦攸羈
側身南望涕下綆縻於戲我公長與世辭民無父母國無著龜我之不
弔徒卹其私有尙友者鑒此銘詞

譚廷獻

清誥授資政大夫廣東布政使司布政使沈公行狀

曾祖某 皇贈資政大夫廣東布政使

祖某某 皇贈資政大夫廣東布政使

父某某 皇贈資政大夫廣東布政使原任仁和縣學教諭道光己

酉科舉人

浙江湖州府烏程縣貫沈鎔經年五十二狀

公字芸閣世爲吳興望族教諭府君生三子公其仲也生而銳敏同兄

弟讀書學舍少有文譽時已有志用世會兵事起浙西鼎沸公佐甯紹
台道張大夫幕府軍書殉午益練於事盡室避地甬上教諭府君卒於
寓廬公在軍中同治二年官兵克甯波府城敘功候選訓導六年丁卯
並補甲子科中式舉人次年成進士卽用知縣發江西公乃夙抱民物
之志願爲吏以自試慨焉登車時伯兄卽世奉母之官八年十月任長
甯地界叢蔚多盜踪出入旁縣難偵捕公約鄰境互按送不使逋誅姦
民斂迹十年補授貴溪令鷹潭鎮天主教莠民一投名則官不敢問公
造堂皇聽訟有稱奉教者先痛榜之以奪其氣調署鄱陽以貴溪民留
未赴越二年調補上饒奸人喫齋不軌穴九龍山公鉤致其渠置之法
亂乃不作政暇與諸生徒講藝不倦文風日振又於四鄉勸民積穀備
凶荒光緒三年調署新建公蹈厲之氣至是日損泐獄平恕大計以卓
異薦而公已捐升知府選授安徽太平府去江西矣先是宰長甯日名
捕劇盜盜匿山村隸不敢入公躬至村前坐交牀呼其族諭令縛獻不
卽應公堅坐不行日移晷而得盜上饒諸生健訟廉得數十人悉召置
官舍飲之讀書朝夕講藝秋試時罷歸人多改行比守太平江山勝處
吏事最簡公嘗謂所親曰居此鬱鬱久聞且致疾願所部有獄訟往往

走太守得理彭尚書視水師往來江上習聞公賢比公展謁立談尤傾
賞騰章奏達使相李公亦以人才薦公之枋用基於此矣蕪湖分巡道
兼治關權使者贖貨公與之忤投書干言傳誦至行省撫部劾罷分巡
而調公知安慶府公益用仁術煦然如春八年大水蛟發潛山太湖旁
邑宿松望江皆告災公行部盡傷先散餅餌權小舟以拊老羸旋請大
府振救停徵收廣蠲助全活至數十萬人時廷獻方權懷甯令朝莫見
公惻愴之仁設施之密欲助尺寸而智力不逮遠甚承教而已由是循
良日益著聞晉授安廬滁和道任事三月升廣東按察使公自知
朝廷將大用足展平生用世之志嶺南阻奧萬國襍處中外之襟要在
是時法蘭西方構釁海國大震驚宿將重兵絡繹禦侮公鄉試舉主南
皮張公總制兩粵彭公開軍府海上公以九年十月入都兵事方起海
防纂嚴

召對日欽承

諭旨航海赴任公母弟官江南府同知母太夫人就養江甯公配王夫
人太夫人之姪也前卒於安慶公獨身入粵纏縣君國馳驅知己大受
之期而致身之日矣廣南風氣鷲悍海盜多大獄莠民恃洋人爲護符

豪族又魚肉良懦公最長決獄夙夜治積案數百事持法既平又以廉
正風示僚屬和而不同素所蓄積然也明年春攝兩廣運司課賦大起
主客之師方集金錢如壑委公營務處調和羣帥廣偵諜裕度支尤嚴
治壁壘兵事允濟所司政令亦無不理雖智識兼人而心力已瘁歲暮
警報狎至巡行申儆與將卒共勞苦除夜駐守海壩士氣益奮當是時
彭督師張督部道義期許倚若右手公亦傾誠自矢無反顧嘗報廷獻
書其辭回曲重有憂者十一年二月升授雲南布政使粵防解嚴公繕
完豎宇善後之政百爲且紛督部奏緩其行公既習粵事亦未忍去也

四月奉

命調補廣東布政使時遣撤師徒移屯併戍散卒雲布水潦方災公資
送客眾振卹窮黎海疆甫定人心恃以不擾吏治惰窳非一日公方以
激揚自任望風旨者且濯磨而藩司出內填委事涉中外徑遂爲難委
蛇之迹非公本懷是年八月後洋款屆期輯納京師及濟鄰之饟運從
橫交迫張督部公所經營尤闕遠號令輒下藩司公日夜治事體素豐
畏暑粵又炎方夏秋間已病矣不可小休公弟疾歿於江甯神明畫傷
乃迎太夫人至寢膳之視且以暇豫慰親心雖金石有必斲之歎子姓

僮奴皆憂之十月既望祭南海神廟勘牛山礮臺工閱日還治已暮督
部手書訪治丙夜使至公臥中呼筆硯手告盈五六紙擲筆著枕痰逆
眩憊遂以不起遲明太府以下知之驚悼失聲弔者至布被蕭然如寒
素公同鄉舉錢唐吉士預游廣州下榻使司親見之以告獻也公秉
質過人少習勞苦自奉儉約無紈綺金玉之好聚書皆經史掌故寔用
之籍華藻無益之文辭不與焉官江西日印行當塗夏大令中西紀事
本末寄其憂時之慨年未五十名動
朝右顯擢大藩久爲當代名臣所器不才謂蓋羣吏而千人皆廢又
嘗推誠諮訪洞見癥結綜公生平殆無一日不竭神明之用廉儉爲其
餘事然於贍族睦婣所識窮乏不恤假貸以濟其困天性孝友爲同產
弟妹謀尤備纖悉身沒之日不特無餘財也逋負尙數千金賴彭張二
公以下賻贈始得舉喪歸葬公生爲良吏沒爲勞臣雖未竟其用可謂
不負所志者已喪歸湖州王太夫人尙健在十三年月壽終子秉模
官兩淮鹽運司運判孫念祖念曾公既卒官張督部彭尙書會奏請已
故藩司循良盡瘁從優議卹並生平政績宣付史館列循吏傳以爲勤
事者勸得

旨俞允遺孤以廷獻亦公同舉性行夙契又在皖趨在堂階非一日乞
纂聞見爲先公行狀獻方謝病解官雖不文誼不敢辭謹次第大凡撰
上史館備采擇仁和譚廷獻謹狀

二品銜浙江候補道署溫處兵備道宗公墓志銘

譚廷獻

通奉公姓宗氏諱源瀚字湘文宋代遠祖忠簡公澤後人自南陽遷四
川宜賓逮明有督學江南侍御史敦一之子姓著籍上元稍微矣崇殖
於通奉公時危康濟載績臨民以監司終於淞水一隅位不副德而表
見已焯然頌聲不啻口出而公特出英奇幼而鋒異少卽讀有用書文
實岸然不沾沾於章句師友推敬粵寇方起居恆叱咤默思自奮出爲
諸侯上賓通知時事才識甲千人持變守正處爲出基矣嘉善金按督
方清方籌大江軍精道義交契公佐佑巨細不以勞勩辭時時有所匡
勛比按督中蜚語被逮漕督使者鉤稽恐嚇羣僚匿影公獨詣來使抗
辨文簿出入要領具在使無以難按督事徐解乃撰海陵義友記以識
懷感聞風者歎慕公一笑置之同治以來物望所歸傾心將帥至有交
章徵引惟恐不赴公已積膺薦剡階知府乃謝羣公之官浙江於是親
民民親二十餘年威惠皆在人口權守衢州敦禮崇賢曾益孔廟田請

復趙清獻祠裔移湖州書院府志攷究文物浚碧浪湖水利聿興移嘉
興景仰先喆平陸清獻公祠田八年之訟公補官之嚴州瘠郡客作皆
温台窮氓蠶午攻剽公猶不忍遽懾以威廉主名喻利害散歸者六千
人再三移任先後莅嚴五載煦嘔山民若父子穿渠灌田引東西湖以
洩新安江之犇怒既劑旱潦疾疫亦不作方春時和簡從行田柳旂掩
暎下車與力穡父老相慰勉兒童怵笑於笄忘其爲長官治課第一徙
甯波劇要負山面海通商交涉豪猾戈鯤化影附英吉利領事主文積
姦利病民公杜干謁乃步流言齧螫當軸公屹不動牘上督撫南北洋
大臣艾愕哈不敢抗挈孛浮海去西人目之爲逐客初長興有防勇殺
人郡守閱實未竟徙官凶人何雲錦恃營將擾庇卸染游氓組織成獄
於是冤達刑部下疆臣撫部蓄疑檄原讞官自甯波至戒以刑求公治
獄有古風鉤距之智如見至是坐堂皇連數晝夜宛轉詰難凶人辭窮
始吐實曰殺人者我也堂下譴動雷老吏歸來聲暗數日亦勞矣顧
撫公尙嘆公得總藩任公調護之方事倚撫公毅然不撓故於戈鯤化
仍以去就爭也歷官五郡三舉卓異人有三異太守之目已陟道班署
杭嘉湖分巡光緒甲午日本事起海上震驚廖巡撫壽豐倚公守圍奉

溫處兵備道之檄公積勞髮白稍稍衰矣殫厥智略慎固應變持廉養正不可以私干教養就理如故疆隅小定體貌日瘁移疾輒不報其聞禽盜渠伏法者十餘人又以楓林教堂徐定鼇聳領事挾總理衙門抗有司檻之不服釋檻尤放言公夙志堅定視官如敝屣始終以誠動巡撫爭之總署徒教堂舍宇還徐氏宗人矣治溫處三年尙恙日篤得請受代未謝事竟卒於官光緒二十三年七月年六十四告終公用世矣而未竟其用少壯激清之志未試於軍旅中年以來與子若壻閒居坐論縱橫史事僂指安危時或大呼驚僮僕臨民歲月所至威惠並施紀實有不盡足以矜式方來文學閎深有本末究精地理上會典館浙江輿圖公經營之遺著有頤情館集金石書畫題跋名賢碑傳錄已刻者爲聞過集十二卷右文掌錄一卷元配湯夫人生子舜年光緒十四年舉人郎中銜內閣中書孫惟恭葬公於某山某原舜年以獻三十年來於公雅故之杭州以表墓之文請公壻無錫秦寶珉撰狀密栗要刪如右乃爲銘曰

貞幹在岳脩鱗在水喬松遊龍我思君子君子世出曰宗大夫性成學成曠古同符兵革之運韞奇勿閱民物之故纏繇胥次知或不知願爲

其難獲上徐徐獲下胥安

朝廷之官不疚不惕令則有禁無懈作息五馬駸尋分巡式僚昔者結友同此久要耿耿心精病於恆用鬱鬱佳城循吏碑頌

記名簡放江蘇儘先補用道嘉興錢君墓志銘

俞樾

光緒三十年甲辰三月甲戌江蘇補用道錢君卒余於其先德子方先生同歲生也故習於君知君最詳謹循舊史氏之職爲作家傳一篇未幾而其孤振聲又來告曰日月有時將葬矣請誌其墓余謂傳體宜載其詳誌體宜舉其大乃譜其世系敘其出處總其行誼攷其政績紀其生卒年月埒及妻妾子女而繫以銘其世系曰君諱志澄字伊甫亦字清士浙江嘉興人錢氏其先海鹽何氏也明初有諱裕者育於錢故氏錢後由海鹽徙嘉興故籍嘉興乾隆名臣有諱文端者其五世祖也曾祖復歷官福建直隸知縣終順天府大興縣祖友泗天文生本生祖泰吉廩膳生海甯州學訓導父炳森道光二十四年舉人景山官學教習三世皆以叔父諱應溥者官工部尙書而君又以道員例得加級請封故皆

贈一品曾祖妣陳沈本生祖妣胡蒯皆一品夫人其出處曰君屢應省

試不得意時方多故慨然有用世之志乃納貲以知縣分發江蘇歷充
洋務局上海糖捐局員歷宰荆溪鎮洋青浦各縣所至皆治光緒二十
一年過班爲道員仍發江蘇有

旨交軍機處記名遇缺請旨簡放旋代理蘇州關監督代統鹽捕營督
辦蘇屬沙洲事督辦松滬釐捐其行誼曰君少有至性教習君患寒疾
君旦夕叩禱時方九歲嘗讀書於叔父司空公京師邸第病痢日數
百次恐貽蒯夫人憂戒諸昆弟勿以函告蒯夫人疾歿江西兵火倉皇
棺衾菲薄後雖遷葬而此莫能補晚歲言及猶隕涕焉幼弟鼎甫遺腹
而生故鍾愛尤篤臨歿前一年捐巨屋一區贈之先代祠墓無不修理
前人箸述手自校定文端公年譜世祖太常公年譜皆校刻行世與人
交有終始有杭君者爲君司會計後雖別去歲致脩脯如初有一至戚
以貧告貸君時猶貧僅一羔裘解以予之無難色焉其政績曰荆溪多
客民土客常械鬪君爲土民定租額爲客民編戶籍客民畏而土民悅
遂以無事鎮洋每歲征收輒溢定額君悉照賦役全書頒示科則至今
循之青浦所屬唐家浜大火君聞報馳往按戶振恤不假手胥吏其地
卑下恆苦水灾君爲築圩隄疏溝洫自是水不爲灾又地近太湖太湖

之盜時時闖入君力請上游撥兵助捕請而未允以去就爭之自是境內無盜長於折獄嘗言吾曾祖大興公有錢一堂之稱謂其無留獄也吾雖不才竊慕之矣嘗獲積盜陳逢綬等八人盜自言曾行劫於某縣某縣移問諸縣皆曰盜已獲案已破君細覈之實陳等所爲也乃提各縣所獲之盜來訊之則皆承再三詰之惟目視諸捕塵諸捕去泣請驗其足蓋足指皆脫矣始知諸捕貪賞刑逼教供非眞盜也使非君平反不皆無罪而就死乎荆溪有客民陳殷二姓爭爲棚長殷自殺其族兄以誣陳察陳無懼色殷無戚容細鞠之殷詞窮發其橐而血刃見案遂定江都民奚姓丹徒民姚姓爭沙田聚而鬩君躬自履勘曰其田實屬丹徒然姚姓雖具稟承買而價未繳足且未升科完賦奚雖升科完賦而價亦未足且買在姚後又地非江都隔縣申買有違功令兩姓皆有罪姑從寬勿究以東西分界東歸姚而西歸奚六七年未決之案一言而決君之精敏類如此至論與外人交涉則有二言曰平日推誠臨時據理代理關督時有洋商欲於租界外購地者君據以新約爭執不可且上書兩院曰蘇州開埠自日本始尙須明定界限而援例之國乃欲有爭界外之權非特無以對日本且隄防一決枝節叢生流弊何所底

止書上總督劉忠誠公深韙其言任公道豁曾疏言君有血性而無偽
行光緒十二年大計中丞崧公以君勤直明爽果敢有爲列君上考皆
可謂深知君者矣其生卒年月曰君生於道光二十六年三月二十一
日卒於光緒三十年二月二十五日年五十有九妻蕭氏

封一品夫人籓室孫氏

賤封淑人君沒後六十日賦絕命詩四章仰藥以殉

旌如例子一人振聲也嘉興縣學廩貢生江蘇試用道孫七人倬附監
生候選州同儁价殤侑邑庠生健侗倣幼孫女三人其長者適長洲張
氏君嘗卜吉壤於海鹽祖塋之鄰地曰風聲港至是振聲奉而葬也遵
遺命也其銘曰

禾中望族賁惟錢氏英英錢君乃杞乃梓負翰苑才以貲郎仕宦游三

吳歷宰百里一片赤誠愛民如子羣公交薦循聲大起

天子曰才汝觀警使乃駕廉車重游吳市整軍軍整理財財理遠人來
游距我尺咫據理不阿推誠毋詭經界一正狡謀自弭以君之才以才
之美如日方升未見其止如何不弔一朝逝水壘我圭璋凋我蘭芷我
作銘詞千載斯視下奠幽宮上告良史

續碑傳集卷四十

守令一

張敦仁傳

江西通志

江陰繆荃孫纂錄

張敦仁字仲管一字古餘山西陽城人乾隆四十年進士任高安知縣公正廉明精於吏事治盜嚴宵小爲之斂迹在官四年無笙歌燕飲之事知廬陵升銅鼓營同知歷攝九江撫州南安饒州府事嘉慶五年改官江蘇數年後復補江西吉安知府再署南昌府事所屬武甯縣有婦與二人私而殺其夫前守以夫死途中非由婦姦報敦仁復鞠之詞無異死者之子年十三矣獨哭而不言敦仁疑之請留前守會鞠遂得婦與二人謀殺移尸他所狀案乃定龍泉縣天地會匪滋事巡撫檄往勘未至鎮道已集兵擒二百餘人民大懼敦仁察知匪眾與溫姓者有隙相仇殺與叛逆殊堅持輕比坐爲首者二人餘盡得釋十八年回吉安府任沿江多盜擇能捕吏巡緝諭強宗擒首毋匿捕逃河道以靖二十一年調補南昌知府蓮花廳民尹氏妾與僕通主母死疑妾與僕謀殺鹽商鄒姓與賈販爭利而鬩羣不逞因毀鄒氏室時議右鄒將坐羣賈以聚眾罪敦仁皆平反申理之二十五年護督糧道篆道光元年擢雲

南鹽法道以病致仕

樂城令朱君墓志銘

梅曾亮

道光元年十月二十三日樂城令朱君卒於官殯於龍岡書院父老婦
稚月朔望皆祭拜以暨其喪之歸者一年蓋君愛民出天性先是令以
檄取物於民例不供物而倍價以供君悉罷去終其任民以緡計者省
十萬聽事偶誤常徘徊胸中覆訊自引過乃已終日坐齋閣中士民有
故輒進見聞者無誰何所用僕從多啞舌癡步或問之曰樂城民皆吾
僮僕吏胥也嘗借車馬於民曰官以某日借某日還馬羸車敗者官償
之胥吏作權者民以告既集事皆如其言故有大徭役君嚴辦居最而
民不傷民有殺妻而以妻亡告者君密捕得妻尸廢井中人以爲神或
曰君於民如腹心視手足夫以手足詐腹心必無幸矣知言者以爲然
樂城縣固貧瘠令暫至輒改他邑使償先所負於官大吏以君之獨完
也安之至六年始以治行卓異薦於
朝未遷秩而卒君徽州歙縣人名承澧字藍湖曾祖德明祖馥皆
贈中憲大夫考諱芑會進士官汀漳龍道兄承寵禮部精膳司郎中弟
承厚以書名於時皆先君卒君父兄皆以科第顯自年十五爲諸生輕

財好施文彩動人既試不第家益貧年五十矣乃以貲得是官非其志也故彌策厲力求異俗吏所爲而竟死不卒其志可悲也已君配江甯侯氏子五人祖轍祖輅祖轂祖輪祖輶女一人歸洪氏女孫八人以道光二年某月某日葬歛之浯村祖墓側君於曾亮爲從母夫祖輪又妹之夫也故知君爲詳

山東齊河縣知縣蔣君墓志銘

黃安濤

君諱因培字伯生江蘇常熟人曾祖守祖并父瞻岵宰山東汶上多惠政見吳江郭君慶行狀君生而聰邁讀書過目成誦十歲通韻語十七以國子監生應順天鄉試爲烏爾吉祭酒法式善所激賞由是知名及汶上公卒母夫人春秋高棄舉業爲祿養計嘉慶二年援投效例得縣丞分發山東權費縣巡檢補陽穀縣丞累署汶上金鄉嶧滕高密鉅野諸縣事眞授泰安令丁母憂歸巡撫同公興以民情愛戴專摺奏留服闋補齊河縣所至循行鄉村周知民隱胥吏斂手攝氣不敢爲非彙猾之健訟武斷者皆望風屏跡居官無久暫去之日士民率扶老攜幼塞道遮馬首不能進君亦顧戀惘惘嘗曰民情可見風俗可轉移特恐司牧者心不盡而措施未得其宜耳初至汶上父老色喜相賀謂

良吏有後蔣公子來其我儕之福與會進漕御史某家人婪索供帳勢張甚所過咸趨承惟謹至汶上君方詣行館謁及門聞詬厲廉知橫行狀便止屏外揚聲慷慨而言曰公奉

天子命來因公過境凡適館具餐所應儲時有司爲東道主何敢怠忽今乃縱廝養無狀乃爾乎是藐功令也因培亦

朝廷命官藐功令者而顧覲顏奉之非夫也遽令撤所張鐙及供饌拂衣徑歸御史遂中夜蒼黃去後事發見法以賄賂牽連被斥者數輩東撫以君之事上聞奉

殊論此人可嘉之至由是君疆項之名藉甚播遐邇矣任泰安值都城有逆匪林清之變山東賊黨應之戕定陶曹兩縣令鄰縣俱閉關戒嚴僚案以爲言君曰賊未至而張皇是示怯以搖亂其民也不可因密爲備而靜以鎮之境賴以安其在齊河也視事未幾清釐積案一千餘件幾至無訟旋以直言忤上官奉

欽差查辦以曾刊改公牘故譴戍軍臺上官亦降斥有差齊河士民素德君有三百人者約赴都顛陳君力諭止之乃皆流涕而罷時道光元年也到戍未及期蒙

恩釋回入關後閒游豫楚閩粵歸遂杜門不復出放懷山水寓意詩酒
泊如也營生壙於虞山拂水巖側知好爲合錢種梅數千樹屬安瀕以
文記之君性純至應順天鄉試時聞汶上公病亟星夜南行墮驢背者
屢傷腰股血漉漉襦袴閒罔覺也三日夜達汶上已不逮含斂號痛躄
踊湯沐鹽酪俱廢者久之居母喪哀毀柴立失怙後兩弟種藐課之讀
口講指畫同研聯牀無閒也其孝友如此才氣卓犖熟嫻吏治任事果
決筆舌互用雖鐫譙四至而處之裕如同時名公以學術著稱者如協
揆百文敏公金尙書光悌制府方勤襄公劉學使鳳誥吳方伯俊孫觀
察星衍皆傾心下交或以案牘誣諉或以文字商榷一日數至從容裁
答不少淹晷咸服其當而歎其敏其待人以直視唯阿泐忍者鄙夷不
屑酒坐諧笑旁若無人涕唾發揮靡有瞻顧及遇同志則低首服膺交
久而益敬嗚呼如君之才之行並世曷嘗無知心者然而以之得名卽
以之獲咎惟直故也是可慨已生平所作詩數千首悉隨手散佚晚乃
掇拾殘剩爲烏目山房詩略八卷將梓行之道光十八年閏四月十七
日以微疾終於家享年七十有一配吳宜人山東萊州府同知諱華之
女子男二人長庸舉人湖南候補直隸州知州次愚湖南候補縣丞先

卒女一人適候選知州沈繹之孫五人勝吾興吾從吾懌吾新吾曾孫
一人籥君卒之明年九月其孤庸將撰辰安窆於虞山之壙踵門捧行
狀求銘安濤始未識君入都過汶上聞館人能言君指斥御史事心焉
志之及獲締交垂三十年承眷深而見知稔書辭紀行所不敢辭銘曰
穹壤生氣奕奕海虞繫君得之襲母味腴早歲岐嶷惟孝友于烹鮮歷
試游刃有餘義以爲質智過其軀官辦畢舉民信克孚不畏疆禦不納
垢汙老罷臥道貧狼避途匪好奇服所惜破觚直挺弦矢剛摧鏌鋌介
躡溷遂曷計毀譽何以諡之古狂古愚聞其風者志立懦夫峩峩劔門
洋洋尙湖有土一抔有梅千株清芬滃鬱鐵榦撐扶神仙弔鶴富媪驅
狐全歸得所何憾黃壚名與石貞敢告不誣

紀大奎傳

江西通志

紀大奎字向辰臨川人少時父示之易象曰易學心學也大奎於是研
精殫思以求天人之故盡通陰陽厯算及壬遁之術乾隆己亥順天鄉
舉分發山東知縣權知商河李文功等倡邪說將誘民爲亂訛言四起
大奎集縣民諭以禍福皆驚愕乞命他郡被惑者聞之亦相率解散歷
權邱縣昌樂棲霞福山博平民皆敬而親之聞兩親喪一夕骨立見者

悲詫解官歸有終焉之志嘉慶中大吏強之出任四川什邡知縣或謂
什邡強梗宜示以威答曰無德可懷徒以威示民何益未幾縣人士競
爲詩歌頌德大奎謂同官曰無德且懷況有德乎先是奸民吳忠友據
高山聚眾積粟講清涼教大奎偵知其事躬率健役夜半擣其巢獲忠
友餘眾驚散下令受邪書者三日內繳予自新民遂安居邑舊有禹母
祠在九聯坪洛水出焉大奎放禹生時有洛水之祥洛書八方皆合十
數以爲什邡命名之所緣起自著其說爲前人所未發擢知合州州爲
宋儒周子寓居大奎祀周子合宗書院作示學者一篇發揮希賢希聖
之學道光壬午引疾歸嘗言居官有十字訣朱子所謂虛靈不昧具眾
理應萬事是也又言此虛靈者朱子謂人之所得乎天古人爲學未有
不本於天者不離乎天則虛靈自現不昧之用生矣年八十卒祀鄉賢
祠合州名宦祠

朝議大夫臺灣府知府蓋君墓志銘

梅曾亮

嘉慶初賊起川楚以文吏著殺賊功者四川劉公清河南林君嵐陝西
則蓋君方泌也君字季源亦字碧軒山東蒲臺人曾祖越祖國杰皆縣
學生父諱熙早卒娶靳恭人無子以弟子爲後本生父諱東烈任安徽

司獄本生母王恭人自祖以下及本生皆
贈如君之官乾隆五十六年以己酉科拔貢就州判陝西署漢陰廳通
判石泉縣事署商州州同時嘉慶三年也治商州東百里曰龍駒寨寨
之東河南南出武關湖北路四通縮商賈輸寫之會又多林莽山徑易
憑匿賊自武關入陝寨數創君始至民吏埽地赤立而賊酋張漢潮擁
眾至乃置藥麪中誘賊劫食多死遂西走大軍乘之漢潮由是不振然
且揚言曰必報若君集眾謀曰賊雖去必復東若等逃亦死守不得耕
種亦坐臥死我文官也無兵若能爲吾兵當相爲全活爾命眾議三日
而後復曰生死惟命乃築堡聚糧據見戶三丁抽一得三千人無丁者
以財佐兵械糧糗且教之戰辰集午散曰無廢農事四年賊屯山陽鎮
安將東走河南迎擊敗之又擊賊於鐵峪鋪逐賊入林中矛折賊已近
奪矛以斃賊時賊據山上而伏其半於溝乃分兵翦伏奪據其東山上
數乘懈擊之殺傷過當賊宵遁卒不得東後賊由雒南東逸君馳至分
水嶺閒道走鐵洞溝出賊前而伏賊錯愕迎戰遂敗殺數百人鄉兵名
由是大振自武關至竹林關鄉兵皆請隸龍駒寨五年知州困於賊君
馳百九十里至北灣賊驚曰龍駒寨鄉兵至矣遂遁去是時賊屯商州

西及雒南山陽各萬餘人集眾勢欲東出君合武關竹林兵二萬人列
三大營以待賊不敢前而聞楊忠武公以兵自商州至卽前擊賊東西
夾攻賊大敗幾殲是役枕戈而寢者五十日游擊誣以事解職大吏直
其謾得留任賊遂相戒無過商州八年賊平始授蓋屋知縣公在商州
六年賊出入陝西久無所掠利銳欲窺河南甚狼奔鼠偷情狀捷出而
眇然以一文吏不憑一城籍一餉起千百農家子於逃亡餓羸之餘抗
堅悍滑習之賊於必爭之衝摧鋒守堅賊死突不能入平地便奔走牢
困山谷卒就擒滅夫古人有身受重寄一失守縱賊出隘奔騰潰漫不
可收拾者人必舉後此禍敗之罪歸重於首禍之人幸有大力者當之
奔騰潰漫之禍泯不復見又習而忘之未嘗以歸罪於敗者之重增重
於成者之功然則惟無赫赫之名而其功乃有益於人國此固君所不
得而辭者在蓋屋猶時時入山搜賊巡撫方勤襄公奏
賞藍翎又生得十三年甯陝倡亂者四十餘人奏授甯陝廳撫民同知
睿皇帝召見問商州事甚悉授四川順慶府知府改成都府十八年岐
郿有賊入川以鄉勇屯川陝通路賊知爲統龍駒寨鄉兵者也卽遁歸
陝就滅母憂服闋授福建延平府知府改臺灣府兩攝臺灣道事道光

三年以病歸里十八年六月卒年七十一君始在陝後在川皆以知兵
重然精吏事重民命其在盤匿賊甫定卽捐俸振飢旌死節婦及河灘
馬廠鹽法皆區畫久遠計始至順慶夫吏聞渠縣民叛屬以兵君曰此
作會人眾客主相驚疑訛言橫生非叛也請無用兵捕十二人而其變
息始至閩以三十金賞捕得周永和乃總督命鎮將欲以兵取者也在
臺灣所讞四獄皆千百聚羣稍激則變君一以理論民輸其誠蔽罪如
法彰義飢捕劫者七十人置之法天乃雨民呼爲太守雨其行事操舍
適機會又如此配萬恭人先卒里居時聞君日戰賊憂甚侍靳恭人前
言笑若無事者嘗誡子曰爾守有餘然居官當求濟於事有七子八女
長子鈺陝西佛坪廳同知萬恭人出次錯錕錕鑌孫男一女孫二
以道光十九年十月二十八日葬君於蓋村北原上曾亮在江南時嘗
記劉公清林君嵐及君遺事君長子後爲同年進士走京師以狀示曰
子於先君嘗有述也請遂成之乃系以銘曰
討賊方亟募民以攻始仗其力終怙其功養之病國汰之爲賊勿養勿
汰惟龍駒塞晝趣爾耕朝揚其麾飽德飫義奮如虎螭遂遏逋寇成誅
於師勝兵萬人計臣不知烏乎此則府兵之遺而後事者可以爲規

又書李林孫事

梅曾亮

郊縣陳伯瑜任俠士也嘗於巡撫某公座大言曰某某處教匪當起時乾隆六十年矣天下又安坐中皆搢紳先生大吏官屬也大譁以爲妖人嗾某公卽坐上執之伯瑜曰執我易易耳若何者而釋無何川楚賊果起官吏皆驚禮爲上客時賊眾已蔓延然未入河南界河南路四通輕徒烏舉不可制當事者尤是爲憂而浸淫聞賊自襄城來文武吏皆他出守禦獨布政使馬慧裕提空名守城實無兵用伯瑜計得襄城李林孫以五百人破賊襄城時賊已大至臨水欲渡聞伯瑜以二百五十人閱兵也戲觀之未及戰而後陳囂林孫以二百五十人出其背賊前後相紛拏殺傷過當乃遁去林孫已破賊襄城其鄉兵聲聞梁楚間林嵐乞其兵守盧氏賊帥張潮兒來攻眾號十萬可二三萬嵐卒不滿二千莫敢進嵐謝其眾曰公等皆林孫人徒死無益指大樹曰我官也死是閒耳眾怒曰誰無面目者乃致官爲此言今日戰有不勝賊而生者撞大石破腦死嵐拜眾亦拜遂戰賊幾殲賊走且詬曰我識若我識若林嵐者河南省試用知縣也後爲安徽省同知有蓋方泌者爲陝西商州州同亦善使鄉兵嘗敗言笑如平常眾怒曰見人父兄弟死反笑

爲固不可解也方泌曰賊小勝驕矣我報父兄弟仇戰必勝珍寶盡
有之我故樂而笑也眾氣振復戰乃大勝方泌至前戰地呼亡者而哭
曰好男子不見吾殺賊而死也因伏地哭不能已眾皆哭汪正盞曰吾
往來梁楚閒問所聞李林孫者見之襄城逆旅中年六十餘矣貌温厚
長者正盞與言形勢旺相用兵奇正之道皆不省曰大豪傑無他得人
心耳

汪青州家傳

盛大士

余同邑友人知青州府事汪君卒於道光四年八月某日前數日呼其
子元仁曰余病革速遣人至山陽邀汝師盛先生歸元仁曰先生在官
恐難速歸君不明日又促之元仁權辭慰君君盼望不至長歎而瞑
嗚呼痛哉十月余假旋送君葬元仁述君語相向而哭君汪氏諱彥博
字潞勳一字厚夫號文軒鎮洋人廷璵父學金皆以進士一甲第三
人人翰苑晉顯秩歷掌文柄君以乾隆四十九年召試
欽賜舉人授內閣中書乾隆五十二年成進士其在內則由內閣直軍
機登詞館改刑曹擢御史巡視東城其在外則兩使粵西一典鄉試一
任學政守青州三年君自十七歲通籍前後居官三十年勤慎廉明無

過失爲御史則直聲尤著嘉慶十有四年陳慎重封圻及抽查五閘漕糧乃極陳漕弊有云各省漕糧從前原不能無升合浮收以防折耗今則貪官墨吏慾壑難盈上次加二次又加三再復一年逐漸遞增直至加七加八之多尙無底止臣竊見漕弊叢生包攬之徒爭輸醜米而地方官內多私欲外以米色爲名反將糧戶好米有意挑斥鄉民凍守需時篩揚狼籍輾轉駁換較之額外浮收更形其苦臣請我皇上責成巡撫糧道實力查察以除民害

詔從其言於是江蘇漕政略有轉機君之力也十八年君在粵西聞都中逆匪滋事隱然抱憂國之思二十三年君以太恭人服闋補官上整飭武備疏其畧云國家以神武定天下近因承平日久武備漸弛十八年九月禁城之變賊眾不過七十餘人官兵已措手不及儻其時賊首李文成遂其逆謀與林清爲聲援糾結黨與直犯都門豈一二城門尉所能抵禦今雖畿甸肅清而禦患之具不可少廢故臣愚以爲欲保禁城之鞏固必先嚴內九門之警巡欲嚴內九門之警巡必先重外七門之防守查巡捕五營額兵一萬分撥二十三汛每汛四百餘名五營額設鳥槍一千桿請於提督步軍統領所轄之中營擇其精壯者撥出兵

一千名兩翼所轄之南北左右四營亦各撥出兵一千名合爲五千並
添置鳥槍四千桿專司操演至於八旗子弟素稱勁旅雖大閱鉅典未
能數舉然須每年抽閱一兩旗示以賞罰於簡稽軍實之中寓掄拔將
材之意其各省營兵則全以八旗註防爲表率而駐防遠不如前請
通飭督撫將軍提鎮隨時訓練名糧之缺者足之戎器之缺者補之墜
房之壞者葺之斷不可吝目前之小費貽後來之大患然而治法無
治人伏願我

皇上於知人善任之道時時加意焉

上覽奏云所論是非皆有難以盡從軍機大臣會同各該衙門妥議具
奏而議者格於成例竟駁之是年四月風霾晝晦

詔求直言君抗疏謂

朝廷捐官事例不可屢開漕糧浮收積弊不可不除權關盈餘雜稅不
可過嚴

皇上志切愛民而民間未沾實惠者咎在大小臣工營私圖利百弊日
滋方今民生和樂雖未至疾苦顛連然亦不可不防其漸也疏凡二千
餘言辭甚懇直

上以示軍機大臣且曰朕不惡聞逆耳之言也奏藁遠近傳播余寓君齋熟誦之今不盡記憶特撮其大旨如此君官青州治獄平允民間多以煤井爭訟者君至則剖析情偽積案盡結以廉介率僚屬四時饋送恆例皆卻不受重建雲門書院興起文教青州人士卽奉君粵西校士文爲程式博興城南有小清河旱潦皆爲民患君率屬疏濬使民有可耕之田其善政甚多余惟古史義例常事不書故略之居鄉屢創義舉會捐貲公建太屬會館於京師之宣武門道光三年州境大水君於病中倡議捐金振荒且欲特建義倉首捐米五百石折簡招邑中富者會議事將登其名於冊呈之州守富者不至招之再則曰此事須汪公一人主持某某自顧不暇弗敢與聞君浩歎而已自是鬱鬱不樂病亦漸劇空齋獨坐時聞感喟之聲詢之默無一語客至謝弗納君嫉惡如仇與俗士語則目他顧若未嘗見者寒暄泛語亦不肯少假借人以此多不悅里中相知若余與胡蛟門彭甘亭皆所至契者君與余數人議論亦不盡合余尤執拗各出所見相詰君不之服余爲人所譏君必力辯之嗚呼可謂知己矣君性穎異七八歲時曾與諸舅弟姊妹戲作春秋晉楚諸侯爭爲盟主長通經史善談名理尤工於詩嘗自評其詩由蘇

而韓由韓而杜近又最喜太白所著有養泉齋初集續集文集奏疏如
千卷其居家孝友訓子弟有禮法自奉儉素待人坦白皆合於古君子
之庸行亦以常事不書之例並略之卒年五十有七子元仁諸生元崇
元茹

山西蒲州府同知公舉名宦陳君墓表

唐仲冕

君諱世昌號蓺菘湖南武陵人曾祖諱其治祖諱瓊父諱天祚君未十
齡父母相繼逝偕弟世俊養於叔祖母胡幼而好學年十四補諸生旋
食餼應拔萃試以胡疾篤辭不與明年辛酉舉優行第一領鄉薦屢上
春官不第考補國子監學正充戊辰科鄉試內收掌官遷博士歷祿米
倉儲濟倉監督廉靖綜覈吏不能欺國博報滿引

見記名選蒲州府同知蓋其蹭蹬場屋者十餘年迴翔京秩又十餘年
始以司馬佐郡人或惜才屈於遇君則謂士特患不能其官耳何必顯
位於是敦勉教化竭悃忱而施之既下車知民苦獄訟久懸一歲之中
剖決七百餘牘創建條陽書院設學規膏火多士雲集修永樂鎮文廟
遵行丁祭生儒習禮其中助寒峻赴省試之艱於貲者皆蠲奉爲之導
人樂從而成其美玉溪澗久淤率民疏濬躬親其勞渠成而資其灌溉

者數十里禁民爲優翦其強猾任育兒等十數人奸宄斂蹟民有貧而
滯喪不葬者諭而飲之有捨骼埋胔之風山有狼爲禾稼害禱於神獵
其二磔之而害遂絕及權監掣嚴治私販修涑水河渠商賈胘胘賴凡有
關於民生利病必興除有成效乃已當盛夏旱暵君步行數十里至雙
泉觀及諸神祠虔禱大雨平地尺土民以惠我無私頌之而君瘁矣君
卒於道光三年十二月六日年四十八配氏戴丈夫子二慶基慧基女
子子二君卒後蒲郡衿士臚其政績舉名宦蓋三代直道之公也自余
官江南牧守君自京師寓書詢爲政之要承上接下之道何以與古人
合則其究心經世之學久矣著有親雅堂詩文若干卷乙酉夏其孤慶
基乞文於余因約蒲人所臚陳者而爲之表

書張丹村太守

張星鑑

張丹村太守名作楠浙江金華人嘉慶十六年進士由教授爲江蘇陽
湖縣知縣太倉州知州後官徐州府知府以病歸道光三年夏大水太
守以太倉州任辦災有善政民感其德通西人算術著翠微山房數學
當世疇人宗之歸田後鄉居不入城市太倉陸模太守舊部民也宰金
華訪之叩其居去郭外四十里竹籬茅舍宛然農家也通姓名知爲縣

令遂以疾辭既而陸有甥王姓者係太守在太倉所取士在幕中一日造其門欣然出見與之飯述家事呼三子出見問其所業長務農次衣工三則木工也王君曰何絕無業儒者笑曰世俗讀書科名是尙一入仕途中此心遂不可問古人以縣令爲畜生道誠有慨乎言之也止王君宿明日送之云老夫僻處荒江不與搢紳交久矣寄語陸侯勿以老夫爲念陸侯知其意卒不往

記武公

徐時棟

武公以道光初宰鄞去將五十年而民思之皆曰好官顧莫能詳事狀余問諸老吏得折獄二事或誘人婦賣之其夫掩獲訟諸官公問婦賣汝者誰也曰西壩村阿牛阿羊公疑之密令捕二人戒曰到卽見我毋得留署外片刻既至衣之青衣雜胥役立案前而以貌詰婦婦言之綦詳公曰試視我胥役有相若者乎婦徧燭無有公曰汝當日暫相見忘耳曾堂上下百餘人而無一人似者婦曰我與聚數日熟其貌今閉目猶在前也公怒指二人曰此卽是矣汝何敢妄語婦懼以實告則二人皆富而懦賣者使誣之立釋二人去而罪誘賣者甲生四子既爲伯聘乙女而伯死而祕之僞伸爲伯而別立兄弟子爲季也者以滅其跡於

是將為仲娶乙女乙驚曰是嫂叔也而夫婦之可乎甲不承乙訟之甲徧賄其宗族鄰里婚友皆曰甲不喪子公疑之歎曰甲也信則乙為賴婚其事小乙也信則甲為亂倫其事大吾不難以疑獄使別娶然而賴婚之風亦不可長也盡集四子者使不得相見各問其父母年歲生日與母黨姓名以至其旁親凡家常瑣屑子孫無不知而兄弟子不必與知者皆問之三子若一口獨季不符公出四供辭示宗族鄰里婚友曰何如皆叩頭服案定甲私謂所親曰吾網羅密矣閻羅王且奈何而不意讞我者仙人也老吏又曰吾侍公聽訟數年必委曲詳盡必得其情而未嘗以刑訊得者嗟乎非佞折獄惟良折獄世所稱才吏猶能之而公口碑至數十年不毀其必別有道以致此而惜乎此吏之不能言也公諱新安字靜溥山西某縣舉人

沈欽韓

山西霍州靈石縣旌介村人

祖嘉言不仕

考國佐 恩貢生 贈文林郎天長縣知縣

君諱汝慧字定甫又號南峯贈公生三子長郎君乾隆甲寅恩科舉人

辛酉大挑一等以知縣用分發安徽時揀發者多論班次推選君名在後巡撫荆公道乾器其清幹卽委署宣城縣事逾年移署望江縣至則縣以旱災當振饑君隱親貌閱痛絕吏胥以賄爲虛實手疏貧下戶於簿沿閭散給振事畢餘帑金四千餘兩或從與充私橐若分餽上司者君喟然曰是國帑也侵欺分豪上愧君親竟完歸藩庫一縣帖然若不知災謝事縣民揭香盆遮道送數十里不絕或繪象於房廟尸祝焉考贈公聞之喜曰如此方得爲清白吏署鳳臺又署霍山縣丁父憂歸服闋猶遲遲不欲行或促之裝上君泣然曰子之於親生不能供養死不親含斂不可爲人今老母在堂益衰汲汲焉求仕脫有不虞萬死莫贖於是請終養居家母病篤君脅不著席沒而水漿不入口營葬畢服闋赴安徽署定遠又署桐城太和革太和保營管田糧勒石爲厲禁二十四年署涇縣縣稱難治君下車批卻導款士民歡然各循其業未幾徐飛龍事起飛龍者涇之銅山人與張氏爲讐飛龍夜行斃於途徐疑張氏毆死訐之張亦以爲飛龍子殺其父藉報復互相控巡撫右張氏竟坐徐子大逆委州牧至縣索提飛龍屍棺赴省檢驗徐固大族知冤不可白卽詣部訴冤省官索屍柩急徐謾不肯應啟數棺皆非男欲至銅

山發棺君止之曰恐棺急不可得別生變端不從往乃爲徐婦女所困
辱君聞急往勸解牧乃跳歸飛檄上變制府發令箭飭臬司同參將會
兵勦捕至則圍守擇日進兵君跪白臬司曰徐氏以沈冤不白非反也
驟縱兵將多殺不辜請以身諭之臬司曰去必不返奈何君曰彼匿屍
樞而抗大憲又殺一命莫大之罪幸而可諭則事解公得遄反不亦善
乎臬使不覺屈膝前曰君能如是將如君何指其子樾曰脫不幸以遺
孤累大人臬憲灑泣曰諾君單騎詣銅山大呼曰我申某來拯汝一門
於死門啟徐氏老幼男婦歡呼迎躍曰向使君早來何至若此百口環
跪急問救死之計俱慟哭失聲急送飛龍棺於軍門兵遂解嚴臬使喜
且歎曰委員庸材幾誤大事君之膽識洵緩急可恃人也自督撫以下
皆歎賞君深謝後徐氏冤果得雪坐此落職者無數君以彈壓不先摘
去頂帶未幾復之嘉慶庚辰補天長縣長貧瘠而詞訟稀闊君因其
俗而治之獄中止一囚大校士子文藝遂得戴殿撰蘭芬大魁天下次
年委署知無爲州道光三年大水望江縣民洶洶不靖請於陶中丞曰
非申令不可六月至望江勘災至則饑民數百人臚集縣堂號哭已數
日一見君來歡呼曰是二十年前好官吾等得生矣君召父老前問墓

宅之存亡若何親戚之聚散若何一一撫慰潛然淚下眾皆哭徐語汪
府君在此必有以安輯爾等曷先歸聽命於是翕然罷去如神汪太尊
於屏後伺之久入卽握君手曰聞君言若時恫瘝於身使我亦悽然傷
心君誠循吏於是窮晝夜計口造籍救卹周至體量勞勅若未始有災
望江無饑者於是無爲州被災尤甚太守宋公請君權州事藩司徐公
欲令舊牧吳君同理振事君曰權不一必遺誤不敢應命巡撫於是撤
吳而委君至州境巢湖泛濫村莊盡沒屍骸冑樹哭聲徧野入城罷瘠
如鬼者盈路君慨然曰如此尙能朝夕緩耶令開倉煮粥勸紳士市麥
作餅人給二枚病者量予藥擇寺廟乾燥者處之甫閱月城市完然四
鄉甯謐徐藩司勘災至州驚歎曰何申令鳩集之捷也入境不見一饑
民獎慰者再三水勢稍落檢稽戶口籌畫錢米日夜不少休息振方畢
遂以積勞成疾是年冬臥病四年六月十四日終於官舍年五十有九
君少承父訓律己以廉撫民以誠處脂膏而不潤理糾紛而卽解其居
官卽眞不過一載以賢勞馳驅所受事無非艱棘難措手者三年冬大
計注君考曰有爲有守勝任艱鉅陶中丞尤重君且沒遣高手醫診視
饋珍藥值數百金且謂俟病瘳卽削章特舉而君不及待矣惜哉元配

繼配皆王氏子四長楷庠生元配出樾大學生棟枚皆業儒繼配出君之沒也樾撰次事實請予爲行狀按君以勤勞著官以清白遺子孫儻世之文宗作爲傳銘以闡幽他日得附於循吏之末君固藉以不朽而樾所厚望也謹狀

海甯州知州陽湖惲侯政績記

錢泰吉

道光七年夏五月泰吉始爲海甯州訓導時重建廟學諸所造作煥然成就僉曰州大夫陽湖惲侯謁廟之始仰瞻榱桷愀乎動容乃率僚佐董勸人士各出私錢驩欣會計不數月集金踰萬其明年侯以憂去州人士感念奮興力作罔懈越二年廟學成迺刊碑著勳用揚雅化泰吉到官之明年也又明年三月二十五日侯卒於家嗚呼侯莅海昌裁期月耳敏於當官州無逋事旣興廟學將從事於農田水利以興廢除弊惜其未成常用扼腕而侯之女夫歛縣金書恩所爲狀言侯卹嘉善縣水災事與泰吉夙所見聞皆合則其他所言必可信乃約舉大端曰侯諱敷字子寬自號遜堂負才識精力絕人勇於從政伯兄簡堂先生敬博學工古文爲學者所宗侯曰吾兄兼貫三才吾但欲旁通人事耳以乾隆五十九年舉人大挑一等嘉慶二十三年始至浙江權歸安事五

十日民歌誦之二十四年權臨安踰月將去時苦旱民請勘災得報而後行是年權定海縣定海孤懸海外控扼外洋額設兵二千餘名爲浙東巖邑惡少竄名軍籍中輒較轢人侯至莫敢犯乃設冊以清田畝勸分以救饑饉民大悅服及受代皆泣下曰仁侯去矣爲立生祠道光二年以次當補宣平未至任三年秋嘉湖兩郡水嘉善地尤卑下田廬漂盪老弱轉徙巡撫黃梅帥公曰非憚君孰能勞來安定之乃調補嘉善侯日棹小舟撫綏沾卹民歸之如慈父母及冬請緩征漕大府曰湖州烏程歸安被重災猶皆徵漕嘉善曷以緩侯曰湖州重蠶桑蠶旣登卽被水害民猶有餘蓄嘉善以陶埴爲業野水徧地無以爲生富者又以捐振竭其財是災雖輕於湖州民困實重於湖州也堅持其議莫能奪是冬嘉善迺不徵漕大府奏請治河相度地形博采輿論疏濬隄防皆有程則敘定海獲盜功五年擢海甯州知州嗚呼觀其所施設於他縣者使稍延歲月州人將獲數世之利不獨修起學宮一端也然揀災卹患諸仁政遇事乃見而自古循良之吏必以勸學修禮爲首務侯下車之始卽崇學校雖他未暇及亦可謂知爲政之本而無愧厥職矣且侯之爲此豈徒以廟貌巍峩爲士人觀美云爾哉惜其速去而養士勸課

之方不獲與吾曹講明而切究之此泰吉所以於學堂歡晏時每指謂諸君子願相與惕然知戒而思所以副侯意者如何也侯沒後嘉善人爭言侯來爲城隍神有不善者暴死曰侯擊之夫神之靈爽式馮於民其事杳冥不可知而民思侯於旣死猶赫赫若降神於茲土而禁暴止邪也則實政在民心宜祀名宦者非侯而誰謹次政績以俟上其狀者大清道光十有七年歲次丁酉仲春之月州學生員蔣光煦屬金陵馮秋田春谷兄弟勒石於奎星閣下閣爲侯創建州人以奉生祠今春秋祀侯之所也泰吉又記

慶陽府知府盛君墓志銘

李兆洛

君姓盛氏諱惇大字甫山先世金陵人明末始徙武進之南華墅今爲武進人也曾祖嘉烈祖衡舉經明行修補江浦縣儒學訓導父綱乾隆乙丑進士歷官山西絳州直隸州知州升湖南永州府知府未赴而卒母馮夫人絳州公三子長惇崇乾隆辛丑進士歷官甘肅布政使自曾祖以下

贈如其官妣皆夫人季惇復以謄錄議敘歷官河間府知府君其仲也應乾隆四十五年

南巡召試

賜舉人授內閣中書再丁內外艱五十八年始補官前後爆直

禁廷者垂三十年嘉慶十六年轉內閣侍讀二十年轉江西道監察御

史卽條奏養濟院常平倉社會積弊請查辦附奏常州府紳士舉行積

穀會請下該省巡撫嚴定章程以保久遠皆奉

旨嘉允二十三年

睿皇帝以風霾之異

詔廷臣直言時方幸奉天謁

祖陵君上封事言蹕路夫役之苦卽日奉

旨豁免順天府屬州縣錢糧并敕查直隸被災州縣分別蠲緩又以

萬壽恩詔赦積年民欠君言民欠或吏胥影射請酌免新賦十分之二

以普實惠未報會四川省奏合省無民欠奉

旨捐新賦十分之二他省無民欠者如之又條奏吏部吏胥舞弊宜釐

剔旋奉部駁然郎官之素精吏例者見之皆咋舌二十四年二月授甘

肅慶陽府知府府在萬山中號窮僻或欲留君省垣伺機會換善地君

不可既至以清省爲治官廚蕭然苞苴悉絕撫士民有恩而嚴於馭吏

部中便之在慶陽五年一署平慶涇兵備道道光四年以年滿七十請致仕既歸子思信方宦江西之樂平縣迎君就養其明年正月十六日卒於樂平官廨年七十有二四月初四日喪歸十二月初八日祔葬於皇里埠絳州公之阡外昭穴君好善如不及尤勇於見義聞人一能稱之不容口視兄弟之子如子延師課之以次取科第鄉人士之至京師者無識與不識以緩急告必响濡之或視其才之所能而成就之於仕宦無絲毫營競心然甚能敬其事心之所疑博稽於人久而不釋工書畫暇輒以之自娛人或求之初不拒亦矜慎不多作笑語煦煦溫克終日或規其過語至刻切難受君未嘗不婉謝且深自責也余齒少於君十餘歲嘉慶乙丑赴禮部試始識君一見輒相契旋延余於所居之南墅課其子朝夕甚歡余性既坦率以君相顧之厚益不自匿被酒放言往往及塾以外事而君不嫌戊辰余改官知縣君置酒餞之從容言吾不敢弟畜先生然私心相愛不能自釋竊願先生之兄我也余曰兆洛鄙世俗交故未嘗與人稱兄弟行如君則何不可自是以兄事焉比子出都停車南西門廉已曛黑君追送之坐邏舍階上執手問後會城鼓將下匆匆就車念之如昨日也而竟不得繼覓矣悲夫君娶母氏之黨

生子三思恭國子監生先君卒思騫原名思寬國子監生思信嘉慶丙子中式順天鄉試道光壬午

恩科進士即用知縣署江西樂平縣知縣河間公無子以思信嗣焉女二長適國子監生溧陽史迪次適嘉慶己巳科進士現任順天府府丞同邑龔鏜孫六人思騫思信皆從余遊者也來請銘銘曰

有識不祿有才不驚其處不瀆其天不琢謂之未施言庸政埤謂之已施孰窺其涯委委虵虵達於無疵於稽其貌懦者愚者載儀其心博也厚也歸復於土蓋如其真斯蘊斯培以澤後人

穎州知府劉君墓志銘

劉君墓志銘

劉君諱珊字介純先世南昌人遠祖汝材明僉都御史始遷漢川縣之周陂鄉桐疇曾祖岳

贈中憲大夫奉天府治中加二級祖世棟任山東鹽運使司濱樂運同父修程任江南金壇縣丞母萬君嘉慶十二年舉人十六年進士分發安徽以知縣用權桐城補天長調合肥二十四年矢計卓異未及引

見

特旨升泗州知州旋署穎州府事道光二年又奉

特旨升廬州知府大府奏調潁州以四年正月二十三日卒於官春秋四十有六君擅文譽最早甫弱冠卽名動公卿閒海內文學之士願交者甚眾君益意氣激發以古人自期及來安徽又與無錫薛君玉堂武進李君兆洛海甯查君揆以經訓吏治相切礪名藉甚余與君定交在三君之後而君彌留之際氣絕復蘇諄諄以墓石相託君子幼不能詳知君志行僅就余所及見者三事爲文以報君其一事君旣調合肥相度地勢高於他縣不能蓄水雨澤稍不應期耕者卽束手無計以故年屢不登君與紳士耆老議每田十畝捐二十之一以爲塘民初難君君親歷鄉村諭以周官溝洫之制蓄洩之利民乃悟役旣興又爲之獎勸勤惰塘卒以成自塘之成逮今五年歲常大稔其一事泗州多水患歲洚饑居民苦之尤甚於合肥之苦早前牧請挑濬濉河水有所容凡歷三敘設帑至七萬三千有奇每年灘入地丁銀征納號爲河帑泗民未享濬河之利反受帶征之累君甫上事卽啟請奏免以舒民力使相孫公玉庭大然君言通諭三江有類泗州者州縣以聞於督部督部以聞於朝竟邀

恩旨得免其一事君之署潁州也有河南姦民邢名章者習邪教將爲亂署軍師元帥等爲官先復讐於阜陽之岳家莊奪其室居之會大雨期雨止入潁州城君聞警急召營官部勒步騎百餘人冒雨出城城中士民叩馬而阻者以干計不可則願隨往爲聲援君命人持草一束旣至岳家莊四面深溝雨甚水漲不得渡賊望見大譁笑於是持草者悟君指爭前投草溝中水漸壅君鞭馬先馳州將及兵各大呼繼之賊出不意倉猝散亂遂縛名章及其孥以歸事聞

賜花翎擢廬州嗚呼君以外吏再邀

特達之知使稍假之年所建樹甯止於此卒之仕不盡其才權不副其志學不竟其業此在造物者往往有然而君又值之爲可悲也君遺詩十二卷續五卷文二卷詞一卷劉氏藏書記十二卷配恭人方妾張氏並守矢志男子二人祿幼殤德滋女子五人壻曰汪爲柱王敦臨金大鏞餘未行道光五年月日葬某鄉某原銘曰

蘭芽茁霜與期雲上天風汨之吁嗟劉君止於斯

瀏陽縣知縣趙君墓志銘

宗稷辰

雲南太和縣趙氏翰元欽元與稷辰同歲鄉舉其叔父令君宰零陵時

稷辰居永州深知其當官之賢及卒於官將歸葬幕客會稽胡世勳爲狀屬稷辰銘其墓誼無諉也君諱瑜字崑來號蘭坡先世楚之華容人遷於滇數世而至君父郡庠生贈君奇遇績學礪行有陰德蚤逝君弱歲有文譽事母以孝稱嘉慶庚申歲舉於鄉戊辰歲大批得縣令出宰湖南初權桂東三年補通道尋權零陵又三年調補瀏陽皆有惠政任零陵日值

今上敕大吏察舉守令總督李鴻賓首以廉能薦君道光丙戌大計巡撫康紹鏞又以卓異薦丁亥秋八月吏部趣詣

闕將北行十月初九日至長沙一夕洗足中風遽卒年僅五十母楊氏封太孺人妻李氏

贈兵部主事某之女生女子二妾某氏生男子三朝元翊元士元俱在髫髻明年七月從子翰元來奔喪扶其柩歸葬於滇君微時久歷困苦入仕備知民生之艱潔己愛民出於天性平時溫溫如春愷惻坦易當其燭姦除疢不疾而速動若雷霆然雖盛怒嚴威未嘗刑過其嘗遇有關大體名節之事每收銳斂照以全之故所至數邑民無大小賢愚皆呼爲趙青天云當在桂東通道僻簡易治其廉名已大彰零陵附郭一

郡訟獄皆委決於君民以不冤零陵多淫祠有爭粟王廟社田相殺成
獄者有稱毛王前設誓能斂人者君悉沈其神於江俚俗頓變於瀏陽
特建明季死節周愍公祠以示民嚮方瀏土沃饒俗尙華侈君至悉裁
抑之鋤豪剔蠹境內肅然巨猾十三人皆畏法逃死湖南通病姦民蠹
役藉道殣餓殍庭屍爲奇貨牽告居鄰地主株蔓誣害墨吏或樂受之
以爲利野有死人比閭驚惶破家供索視若常事君一切痛懲無餘力
良民始得安枕而臥其治也進乎君子之道矣君去一邑民之走送涕
泣者恆千百人四邑聞君喪號慟如失所依知其貧不能歸喪醵金往
賻者遠近相望嗚呼誰謂民不可感楚不易治乎觀君之卹其民與民
之感君三代之風於今復見矣斯人而亡非方州之大戚與銘曰
繫眾母猗惟民之親忘私而劬以肆隕厥身沒世不諛猗嚮風歸仁慘
諸孤猗天扶其顛俾延厥澤猗千萬年

萬廉山司馬傳

陳文述

君名承紀字廉山姓萬氏江西南昌人父廷蘭以進士官直隸通州知
州君幼有大志才略英偉究心兵刑河漕之事嘉慶初以副貢生佐湖
南巡撫姜公晟幕會苗疆不靖夙將如明亮額勒登保德楞泰先後統

師至姜公與諸大帥連營一以兵事屬君君磨盾草檄洞合機宜一夕苗匪數千來撲營君以中丞令令戰士持滿伏短垣俟賊槍及我乃發馳告諸帥遣兵至請令君以中丞令令援師繞營後殺賊而整師開營門出其前夾擊之殺賊幾盡中丞知君能堅臥以鎮定之鼾聲達戶外自是苗不敢逞某廉訪駐衡州聞衡永數府民爲匪誘惑將起事名簿鉤連以萬計民懼變且作亟請中丞發兵中丞令君處分因單騎馳一晝夜達衡言於廉訪曰愚民非樂從亂皆勢窮脅從耳宜誅其渠魁餘悉道之使自新廉訪從君言戮首逆焚簿於庭示以恩信皆羅拜去境以安當是時楚南處處皆伏莽盱眙環伺微君言殆矣先是苗匪蠢動川楚間遊竄野掠散輒復合四郊多壘君援據古今案切時勢著堅壁清野議卒以平苗畢公沅聞君知兵乞以自佐會奉

嚴旨盡驅漢民之在苗疆者數甚眾懼速變從君言詳陳利害據實入告荷

嘉允焉苗疆平以軍功議敘州同援例加捐知縣歲己未揀發江蘇歷任江浦丹徒寶應元和所至緝盜賊與水利治行卓卓有聲以承審壽州案失出案疑獄也與同官逮至皖星使某侍郎重君欲免君導君以

未與審自解君曰臨難而避非義也誣人以免非仁也非仁與義何以爲人甯不爲官耳卒自引同罪既落職僑寓吳門益與諸文士講論訓詁推步旁及篆隸丹青音律詞賦靡不通究隱然爲後學楷模己巳因子啟昫成進士官中書乃復遊京師與法梧門諸君續春明詩酒之會百文敏公督兩江知君才招入幕時河患亟海口積淤河下壅上潰陳家浦馬港口倪家灘先後漫溢至是復溢王營減壩有主仍開馬港使黃河由海州灌河入海者君謂馬港未塞黃河無患而運河潰壞三十餘處特移河患於運耳不可行宜接築長隄東水攻沙以復潘尙書靳文襄之舊且於湖口復文襄磨盤埽以蓄清刷黃文敏屬君具稿入奏悉如議行減壩工竣文敏特疏保之謂君諳習河務詳慎明敏勵行居心不徇流俗實爲不可多得之才

特旨准其捐復蓋文敏在江左頗網羅人才於君尤有國士之目補山陽又以承審劉第五案失實被議落職案亦疑獄也文敏復招君入幕會有散布逆帖之案增損星垣變亂庚申詞語悖逆書法印文皆詭異嚴旨切責名捕君謂虛聲恫喝必非伏莽且散播皆在近地其藏匿必不遠察其詞意當是舊匪徒黨漏網者之所爲乃訪獲金宗有之徒方

榮升於和州悉獲之不十日而獄定奉

旨以知州升用改河工同知黎襄勤之以郡守擢河道旋擢河督也文敏為舉主君亦頻左右之君既改官河工為所屬自立厓岸置閒散者數年從不自言人問之君曰黎公以才略膺

特達之知百公且不敢以推轂自居況隸在宇下乎妄有所請是挾故也請而不應是忘舊也人已交失吾無取焉以余族兄曼生乞病乃始補海防丞以讞獄平反節相孫公奏請加知府銜攝淮安府淮海道篆甲申冬高堰潰洪湖決調外河丞當事主引黃濟運之議過船二千八百艘黃流淤運河舟膠不行者三之二乃改駁運君皆始終任之今督琦公涖兩江招君問前督魏公僨事狀君力白其誣琦公心重君以才銳氣鷲故過之奏請褫職然河工有大事輒詢君倚重君者二年君知無不言不以得失幾微介於胷次如河口設閘屛水通船實足以救漕船之窮及鎖過溜之法知君才實可用心亦無他將保君而君已病且逝矣乙酉春余以運道梗塞至淮詣節相孫公制府魏公問起居言引黃借運不可恃請行海運並與君言君韙之丙戌春余將北行道出河上張芥航潘芸閣兩河帥留余佐箋奏君亦以余留意宣防者二十年

多事需人之際不當引避諄諄與師君禹門勸留以所著治河私議示
余大意言黃河中泓淤塞故黃水不大而河面增高此如人病在胷膈
也擬上開毛城鋪下開減壩而以鉗口壩束之可以減黃水之盛漲而
不致潰決語甚切至余曰此治河良方也余亦以丙戌南河議十篇示
之君爲擊節晨夕縱談往往流涕君才氣橫逸於當世人物罕所心折
余交君二十年蹤跡疏闊僅以文字相知及來浦上乃益相愛重自以
勞勩數十年不得休息思河事得稍順軌子得外任可以家食將圖息
肩思卜居西湖又思卜居吳門恆與余曰東南可居之地猶是蘇杭生
平交遊落落如晨星吾欲從君卜居若張南周北矣雲閒馮氏白鷗池
園亭極水華木林之勝君思購作別業屬改七香寫爲圖乞余爲文以
紀之又擬買屋石湖楞伽山下皆未果君才藝過人篆法似李陽冰畫
入北宋人之空渲染青綠深得古法海內無二癖好金石及靈壁英德
諸石喜爲縱橫之文餘事爲詩皆不存稿善縱談驚聳四筵聽者忘勸
余嘗過君見料量茨楫少暇坐蘿月軒爲亡姬周若珊寫梅花畫謂余
曰姬甚賢淑嗜翰墨惜早逝余爲畫扇十一幀今爲作此爲裝冊也諸
女各有山水巨冊以充匱具將爲余作碧城仙館圖惜未竟也以畫法

授太倉王子若以篆法授吳門孫子和善音律精審不失分判久居吳於曲家皆能品其優劣有周公瑾當筵顧誤之意與家曼生在河上稱雙絕余謂君亦自有三絕清談畫法及篆書君亦以余所著秣陵集海內一絕也君待人以誠胷不設城府往往以言語之失爲人所咎君或不自知人或比君爲象言其龐然行不避人觸跌人不及知或爲人竊其皮亦不知也君之病也余方在浦以病亟不得屢見君之卒也距余還吳門而月矣爲撰挽聯云斯冰篆法荆關畫派李杜詩壇四十年豪氣壓并州領袖騷壇三絕爭推老名士鄒枚檄草龔黃治譜賈韋河議二千石虛銜滯袁浦浮沈宦海九能同惜此耆英觀於此者足以知其概矣

論曰余涉世四十年所識海內文章英俊之士眾矣若才略英特忠義慷慨以當世之事自任者恆不多覩卽閒有之亦必使之抑塞折挫不得遂其志以死如司馬者其一也豈盛名爲造物所忌歟抑遭際以成功必有藉於福命也知白守黑知雄守雌益知老莊之言爲有味矣

呂璜

浙江慶元縣知縣秦州劉君墓表
道光戊子之冬君方除慶元縣知縣自都中來至杭州病甚以余知醫

且嘗令慶元庶可問途者遣其子爾棟迎余余往視之君雖憊矣猶侃侃論天下事英氣見於眉鬚然竟不起明年爾棟將昇君柩歸而乞余表其墓按狀君姓劉氏諱思敬字儼若號渭川其先數世皆有聲於巽序居甘肅秦州之北鄉君年十七爲弟子員文名甚著後選爲拔貢生君讀書務爲有用嘉慶初川楚教匪爲亂有逸入甘肅境者所過村落爲墟君集鄰莊健者築堡而籌守禦之策凡二十條以爲備賊不敢近旣而河南賊亦有入甘肅者將及秦州君所居數十里人畜輜重糗糧藉堡以無害後總督那公見君守禦條約歎曰此名將之智略也先是張公綬視學廣西病不能親檢校君在幕中爲主一切去取等列惟允邱公庭澂爲廣東按察使君亦佐之以鉤考大小獄惟平蓋君之志汲汲欲有爲於時才又足以濟之故未仕時見於經畫已如此及官高臺教諭每有利病輒以告其邑周令君令君亦虛懷采納之邑故有書院又設義學二君察義學有實效視鄉所宜設咸增之凡有十八厚書院諸生及義學生之精大比之歲諸生以道遠故憚省試君籌所以欣之人十金邑布少以不習女紅君授之紡具市棉分與導之紡且令善織者教之織布成則厚償以直邑鬪訟者率以爭水灌田君謂令君宜酌

田多寡定溉之時刻毋許爭眾安之爭鬪乃息又謂令君倉所儲穀久且腐民乏食時盍糶之視價賤則糶以還於是民以不艱食初高臺人以地迫西陲輕文事而好講武自君至振起揉涵之凡六年俗一變士習蒸蒸郡守聞之上其事於巡撫巡撫盧公曰是劉君也耶其幹略那公嘗告我然不謂乃能是下其事於屬邑使咸取傲焉而薦君於

朝以爲知縣由部銓選得慶元未至遽卒於杭州年六十有九矣君喜拯人患苦先世有所積皆斥爲義舉貴居京師以醫擅於名公卿閒昔班史稱雋不疑學以從政臨事不惑然薛宣固云吏道能否自有資材不可學也君未嘗一日爲牧令按其名迹以視古循吏何多讓耶不僅爲慶元人惜之已配黃孺人先卒子爾棟諸生爾楷孫來高升高邁高泰州知州葉君行狀 李兆洛

曾祖考長華

祖考培元

考舜凡 贈儒林郎

本生考臣佐 封儒林郎

君諱維庚字貢三號兩垞葉氏本籍甯波府慈溪縣君之七世祖始遷

秀水遂爲邑人君幼負異稟貧而力學弱冠補弟子員嘉慶戊辰

恩科中式本省鄉試甲戌成進士改翰林院庶吉士充

武英殿協修丁丑散館引

見以知縣用得直隸完縣以親老告近選江西新喻縣君績學敦行通曉時事疊然欲見諸施行故其得縣令也人或以去清華就卑溥爲君惜而君夷然矢於神以不負所學爲誓其在新喻也一意栽培人材剔除奸蠹邑儒學前有沙溪久淤塞邑中士無登科者三十年君爲相視形勢濬治而疏通之自是文武獲雋者接踵而起己卯鄉試充同考官所識拔皆名下士十月丁本生母江安人憂去新喻士民遮道餞送無不泣下癸未服闋謁選得江蘇寶應縣以甲申二月抵任其夏境有蜚蝗君盡力募捕并默禱於神願減己算爲民請命未逾旬而蝗盡滅十一月高家堰隄工爲風所破黃水挾淮而下寶應當其衝君計請帑之不及也立捐備饘餅蘆席自乘舟按視隨宜給發全活無算又勸邑中富民量捐錢米酌地之遠近或振米或振錢或振粥民無失所乙酉春運河淺阻君循隄護視漕艘設法推挽風雨無所避大府亦積知君之勤勞丙戌六月以秉質淳良辦事穩實保奏題授江陰縣知縣得

俞旨因留辦振務未行六月洪澤湖水復大漲漂沒鄉井數邑咸被其患君曉夜履勘先撫後振野次露宿者數月暨丁亥之春災民回籍各給資而遣之殆無一夫不被其澤者四月始履江陰縣任而大府復以寶應任內辦災允愜輿情於資送流民尤能核實奏請獎勵奉上諭以同知直隸州升用江陰地濱江海僻遠之民多驚悍鬪很其秀黠者每因忿爭輒構訟訐訴至不可解君每遇投牒者必委曲開導釋其爭心民俗漸革尤嚴緝盜竊使宵小無所容有長洲元和之積匪穴於邑界立捕得之檻送省會究治遺棄略盡邑之田賦最於旁縣故官此者每視爲膏腴而運丁之婪索過使之供頓彌補之提解耗之者十三四又黠胥因緣爲奸險狡之士凋劫之民互相窟穴課之逋者歲或至鉅萬數以故二十餘年來官於此者無不蹙額袖手比其去也傾其橐不足以償負君任事日淺計欲發株掘根而不能又性慈愛催科雖急不肯以敲撲從事官符如火持尺一行下者旁午於道君雖寬和自持而仰屋竊歎略可知矣君以寶應積勞得喘疾其後時止時發戊子九月大府以君才識明練辦事樸誠民情愛戴奏請升補泰州知州十月月中

俞旨下而君病喘已劇以二十六日卒於署寢君和平樂易不設城府少時處約歷仕宦不改其素衣無華鮮食無重膳尤慈厚奴隸雖有過加呵譴無厲聲嗜學如不及寒暑不廢未第時客授以給饘粥教弟子孜孜不倦其才可造就者必達其材使疊疊日上以故從遊之士取科第者不可屈指數沈酣載籍博而能精阮宮保芸臺潘尙書芝軒劉侍郎金門諸先達無不激賞錢心壺給諫黃霽青太守方鐵珊參軍諸名流則皆以詩詞狎主壇坫者也詩以超勁爲宗而清邁絕俗在庶常時益肆力史學雖治劇縣案牘如蝟稍暇猶手一編不輟有所疑逢人輒問如爲諸生時故所至必振起學校激賞寒雋在新喻則整理緱山書院爲延山長課之在寶應則修葺畫川書院新其堂曰振秀旬月必親課試鄰邑之士聞風而至願受業焉在江陰則加意暨陽書院院中有能文之士因罣誤被褫者力爲復之忠信篤至肫然流露治一事斷一獄勤勤懇懇將之以誠事涉

國計民瘼關白大府必以實雖尋常公牘未嘗敢忽邑嘗有行移吏請稍移易月日則事易集君持不可曰是欺也吏白而從之是導欺也事親至孝謹雖出嗣伯父而怙恃早喪本生封公又無他子故所至迎養

官署公事外凡家庭瑣細必稟命而後行尤敦厚故舊同邑馬良山明經幼所從受業也君以貧故將徒業而賈良山奇公之才固尼之居門下者十年及公得外任迎良山而館焉事之益虔有大事常取決君既以清勤樸誠所至受知於大府薦剡之牘屢上

皇上亦漸知君姓氏故隨請輒報可駸駸嚮用庶幾可以抒其所學潤澤一時矣乃刺史之命甫下而君遂齋志入地瑩瑩旅櫬囊無餘財封翁已衰豕嗣甫逾弱冠天平人乎何乃丁辰如是所著紀元通攷十二卷方刊行鍾秀山房詩文集若干卷三國地理攷若干卷并雜著十數種藏於家君生乾隆三十八年三月二十五日卒時年五十六配江氏

敕贈安人繼配鍾氏

敕封安人例晉恭人子三湛恩江出鴻恩海恩鍾出孫二人如柏如楨君之蒞江陰兆洛為暨陽書院山長君每以課士至書院談文藝揮書史甚相得也聞將擢泰州方悵去此之速孰意其并不能待邪君蒞江之政兆洛既親聞而親見之復從封公遊得備聞歷官之大概故撰次為狀他日史官傳循吏者或有取於此焉

寶慶府知府譚子受墓志銘

陳用光

子受姓譚氏名光祐南豐古愚少宰之幼子而吾叔父繹堂府君之壻也少時卽以才見稱公卿閒旣不得志於場屋乃入賞爲通判而擢至郡守其宦於蜀楚績甚著楚蜀之大吏有絕愛重君者而亦有不悅君者年六十而卒於寶慶其遇不可謂困而要不可謂得行其意也余與君遊從久且密嘗交勗以無墮先人志緒而期於恢大之者聞君卒而痛君蓋不獨親知之感傷而已也君之往蜀也初嘗佐經略軍於達州繼又佐總督軍於瞻對經略總督皆倚如左右手其署重慶府通判能戢亂民餘孽以安商民其兼攝重慶江北廳同知訟煩而能使案無留牘旣補夔州府通判旋檄調總理美諾屯田事美諾居萬山中無城郭都市能不鄙夷其民而柔戢土司使畏威而懷德旋署潼川郡守以屯田保舉推升歸州知州而方佐瞻對軍總督奏留於蜀中敘功題補馬邊廳同知能戢胥吏斥去請開礦以侵猺夷地界者而捐養廉補解舊礦不足之稅額居馬邊八年擢寶慶府知府能戢胥役以伸士氣而懲其黠胥役以漁鄉民之利者嘗閱訟牘多無理可笑歎曰吾察其民風甚樸拙奈何以健訟名甲楚南居寶慶六年知君者謂君之望當得首郡君旣嘗屢辭而寶慶人則惟恐其去然君亦終不得首郡君少時偕

其兄退齋光祥師錢魯斯伯垌及居京師與學士大夫詩酒相過從退齋既得庶常人期君亦旦晚入翰林也及入貲得外吏人既交以吏事重君又兼知君嫻於文事四川總督修通志延君爲總纂而君之振興庠序汲汲如不及蜀馬邊廳楚寶慶士子遂多有秀出才異於昔時者君眸子炯然貌威重而心愷悌議論瀾翻不竭性戇直遇事可否無阿隨人忌其才而畏其口故吏事文筆延譽滿縉紳而仕宦終於郡守君病亟時語吾從妹吾官階年壽止於此命也余幼時嘗謁見少宰於吾家及入翰林與退齋相過從至熟君亦以其時居京師時與文酒之會退齋自出守施南旋調武昌遂不得相見而君之自蜀楚來京師輒主余家君既兼工騎射篆隸又善度曲嘗取醉翁亭記赤壁賦及唐人詩可被管絃者傅以五音悉中律君八子我之自出者三亦皆似君多藝能君於京師爲詩酒會意興邁往而酒闌夜分與余言身世事輒悄然有深思及君守寶慶而余督閩學書牘往還復累紙如相晤語雜談嘲不厭嗚呼余將北還而遽得君訃音矣悲夫君卒後余甥以墓志相屬余諾之兩年而未及爲今乃按狀而銘之吾從妹少君■歲以君官寶慶得中憲之

誥爲恭人子三祖同壬午科舉人兩娶皆陳氏吾從弟雲冕女也錫洪
乙酉選拔貢生候選兵馬司副指揮君以後其兄退齋君卒後二年卒
娶南豐邱氏祖勳四川候補府經歷娶南豐趙氏妾子五人錫燾貴州
安平縣典史錫鈞祖慶祖蔭照墀女八人墀仁和縣典史王如瓌新城
縣學生陳常宿州知州朱獲候選布政司理問吳昌期餘待字孫五人
柯煥步瀛映奎桂潭爲塋銘曰

君來就婚見余里門吹篴吹塤兩姓弟昆君之納粟余居京師吏才之
喜出於文史起家治邊作守才騫與我數面中年少年君兄有女相攸
得所自蜀省楚君實語語貸米負米止止行行親貴家貧子能養親緬
厥軼事徵於文字追昔悼今漼如涕泗諾君墓銘遲遲報君終得吉卜
燾汝後人

又寶慶知府譚府君墓表

宗稷辰

昔從湖南入都見盧文肅公問湘中司牧孰賢對以湘中人多賢譚寶
慶公慨然曰素知南豐譚少宰之賢門多才子第七其季也少跌宕自
喜今能善其官無曩時意氣是亦賢矣吾於是益思少宰也後數年君
始知稷辰且敘先人與君從子同年之誼又十餘年稷辰獲交君仲子

祖同時君沒已久無何君配陳恭人喪祖同以先後行狀來屬稷辰表其瑩弗容辭也君諱光祐字子受號櫟山少能文通六書韻學自少宰沒棄科舉以府倅從軍蜀中參經略勒保公戎幄厯判夔州總理金川屯田事攝潼川守遷知湖北歸留辦贍對軍務論升敘州府馬邊同知積邊俸推升知寶慶府在寶慶六年郡大治以勤官致疾道光十一年五月卒於任年僅六十君負奇氣早從子舍見廟堂碩畫及官蜀久深明邛笮閒蠻風犵俗徧陟古詩人遊處之跡治邊少暇彎弓盤馬擊長劔吹鐵簫嘯唵古今浸淫騷雅蓋未嘗沾沾於利達迨守邵州折節求治道初至禽巨猾害民者五六人遂與民休息務行豈弟不尙武健民以悅服而每不得於上官弗顧也病中治事不輟旣革瞿然起坐諭諸子曰吾生未嘗爲惡無愧對父兄於地下喪歸民號慟送之生平篤於內行母夫人持牛肉戒君病脾泄亟醫者謂惟食牛可療泣涕謝之曰食此固得生負吾母矣遇手足之變指臂輒先痛兄喪以疾幾殆奉嫂如母朝夕起居甚嚴敬教子以文史經術深誠幸進詭遇其素節可見矣元配新城陳氏恭人幼以痘成瞽善聽讀書明大義歸君事尊章治家事如未盲君敬之如良友終日危坐無惰慢字子女亦嚴正人並賢

之君沒十五年恭人爲仲子祖同迎養至淮安山盱丞署以道光二十九年八月卒年七十七其遺訓習稱者惟知足不辱知止不殆二言嗚呼君洵爲賢大夫恭人不愧爲令妻賢母矣夫士具不羈之才往往放佚墮廢君惟能恢廓其外而斂抑其中乃克成厥後以良二千石終至婦人不幸有廢疾往往無所見乃恭人自全其天爲君子所重德行教育子孫是不皆卓然可傳也哉君以某年某月某日葬於縣山原恭人卜以某年某月某日合葬生男子八庶長曰錫燾安平典史嫡出者三祖同舉人知府銜山盱同知錫洪拔貢生出嗣其世父祖勳四川府經歷庶出少者曰錫鈞錫坊祖蔭祖慶女子八適仕族孫一人孫女七人咸豐紀元前歲十月年家後進會稽宗稷辰表

循吏張君傳

方宗誠

君姓張氏名聰賢字愛濤桐城人太傅文端公之五世孫也中乾隆壬子舉人嘉慶辛酉成進士丁外艱歸乙丑補行

殿試

授翰林院庶吉士戊辰散館以知縣用是年選陝西甘泉縣調補長安數年以卓異升同知直隸州君遂告歸終養丁內艱服闋道光壬午復

權知長安數年始補潼關廳同知嘗兼權同州府事以辦軍需加知府銜君性樸素裘馬不飾居官十餘年未演劇飲宴惟以振起士習民風興利除害爲己務在長安最久善政尤多閔民不識詩書勸義學二十餘所以訓蒙士時親考課行賞罰縣多弊俗君設立規條撰通俗詩句擇素行公正者爲鄉約長多方化導犯者約長先以理斥不變然後白君懲之弊俗遂革實行保甲匪人不得匿境內回民舊有禮拜寺月朔咸集君因其俗時往爲講說孝弟忠信廉恥禮義之事而剖析是非寓反經以正邪慝之意回民德之縣志不修百餘年君懼節孝義行久益湮沒捐俸設局采訪四載告成凡入志者俱給匾額以示風勵婦女由是皆知貞節之爲重有王氏夫死家人強使改適投井死鄧氏女未嫁夫死亦誓死不渝君聞以鼓樂導歸夫家率邑士往拜之志成之後又訪得如例者二百餘人具載縣冊俟後之修志者得有所攷亦先表其門閭尤以課士者民之表也前後十餘年未嘗稍懈縣舊有蒼龍河年久淤塞每秋澇山水衝突計傷長安三四十社民田萬五千畝鄠縣八社民田五千畝咸陽五社民田三千畝上流居民築隄爲防而下流民以受害與訟君親循視河道勸民居各村分段開濬河身以興築沿河

高岸移書咸鄆二縣村民亦然其離民遠者不便撥夫則捐俸以濬一
年而工竣河患遂息君又慮日久事廢記章程丈尺勒石以昭久遠諭
居民立會期每歲三月各清河底淤泥以覆堰上加培築樹株蘆葦礙
水道者盡搜掘之俾無阻滯以爲永利居民至今設位瞻拜名其河曰
張公河君卒於潼關廳任道光十一年六月也次年長安士民以狀申
大府奏請入祀名宦祠子四人延齡舉人怡齡太學生後官夔州通判
佳齡舉人華齡

論曰余嘗從馬元伯工部朱魯岑先生問鄉前輩遺事皆稱君質直有
古人風避亂時與怡齡佳齡游重氣誼尙節概益知君之以清白貽謀
者遠也最後得長安士民所記君政績上大府狀讀之雖古循吏無加
焉因次其事以示後世云